





圖書在版編目(CIP)數據

儒藏. 精華編. 一〇九/北京大學《儒藏》編纂中心編. 一北京:北京大學出版社, 2007.11

ISBN 978-7-301-11827-6

I. 儒··· Ⅱ. 北··· Ⅲ. 儒家 Ⅳ. B222

中國版本圖書館 CIP 數據核字(2007)第 174301 號

書 名: 儒藏(精華編一〇九)

著作責任者:北京大學《儒藏》編纂中心

責任編輯:王 應

標準書號: ISBN 978-7-301-11827-6/B • 0513

出版發行:北京大學出版社

地 址:北京市海淀區成府路 205 號 100871

網 址: http://www.pup.cn

電子郵箱: dianjiwenhua@163.com

電 話:郵購部 62752015 發行部 62750672 編輯部 62765691 出版部 62754962

印 刷 者:北京中科印刷有限公司

經 銷 者:新華書店

787 毫米×1092 毫米 16 開本 43.5 印張 422 千字 2007 年 11 月第 1 版 2007 年 11 月第 1 次印刷

定 價:500.00元

未經許可,不得以任何方式複製或抄襲本書之部分或全部内容。

版權所有,侵權必究 舉報電話: 010-62752024

電子郵箱: fd@pup. pku. edu. cn

「十一五」國家重點圖書出版規劃項目·重大工程出版規劃國家、社會、科學、基金、重大、項目教育部哲學、社會科學研究重大課題,攻關項目

《儒藏》精華編第一〇九册

首席總編纂 季羨林

本

册主

編

孫欽善

魔 樸 孫欽

總

編

湯一介

孫欽善 安平秋

半秋 (按年齡排序)

嚴佐之

(儒藏) 精華編凡例

則的典籍的叢編。 爲儒家經典和反映儒家思想、體現儒家經世做人原 、中國傳統文化以儒家思想爲中心。《儒藏 收書時限自先秦至清代結束。

藏 》中的精要書籍 二、《儒藏》精華編爲《儒藏》的一部分,選收《儒

外,其他一律省略

互見。 《中國古籍善本書目》,於個别處略作調整。凡單書 漢文寫作的儒學著作,編爲海外文獻部類。 寫者一律收其釋文文本。 已收入人選的個人叢書或全集者,僅存目録,並注明 分類法分類,大類、小類基本參照《中國叢書綜録》和 土文獻。傳世文獻按《四庫全書總目》經史子集四部 三、《儒藏》精華編所收書籍,包括傳世文獻和出 出土文獻單列爲一個部類,原件以古文字書 韓國、日本、越南儒學者用

> 編,不改編,保持原書的完整性和獨立性 四、所收書籍的篇目卷次,一仍底本原貌,不選

爲主,酌校異同。 勘價值的版本爲校本。 確定内容完足、精確率高的版本爲底本,精選 五、對人選書籍進行簡要校勘。 校記力求規範、精煉。 出校堅持少而精 以對校爲主, ,以校正 有校 誤

例,進行規範化標點。 六、根據現行標點符號用法,結合古籍標點通 專名號除書名號用角號(《》)

落。 正文原已分段者,不作改動。千字以内的短文 七、對較長的篇章,根據文字内容,適當劃

分段

一般不分段。

出現順序前詳後略 及其他有關情況。 及整理時所確定的底本、校本(舉全稱後括注簡稱 介紹作者生平、該書成書背景、主要内容及影響,以 八、各書卷端由整理者撰寫《校點說明》,簡要 重複出現的作者,其生平事蹟按

九、本書用繁體漢字豎排,小注一律排爲單行。

鳴

謝

本 焕法師

壹佰萬元

《儒藏》精華編惠蒙善助,共襄斯文,謹列如左,用伸謝忱。

本册責任編委 李本册 審稿 人 張

李峻岫石

《儒藏》精華編第一〇九册

經部 四書類

論孟精義(南宋)朱四書總義之屬

論孟精義

黄 坤 校點

| 論語精義卷第五上 子罕第九 | 論語精義卷第四下 泰伯第八 | 論語精義卷第四上 述而第七 | 論語精義卷第三下 雍也第六 | 論語精義卷第三上 公冶長第五 | 論語精義卷第二下 里仁第四 | 論語精義卷第二上 八佾第三 | 論語精義卷第一下 爲政第二 | 論語精義卷第一上 學而第一 | 論語精義綱領 | | 論孟精義綱領 | 論孟精義序 | 諸老先生名次 | 校點說明 | | | 多 | ₹ | |
|---------------|---------------|---------------|---------------------------------------|----------------|---------------|---------------|---------------|---------------|-----------|-----------|----------------------------|-----------|-----------|------------|-----------|-----------|-----------|-----------|----------|
| 二四四 | : | :一八八 | : <u> </u> | : | … 九八 | … 七〇 | 四一 | 九 | 四四 | | 0 0 0 0 0 0 | • | 0 0 0 0 | • | | | | | |
| 孟子精義卷第七 | 孟子精義卷第六 | 孟子精義卷第五 | 孟子精義卷第四 | 孟子精義卷第三 | 孟子精義卷第二 | 孟子精義卷第一 | 孟子精義綱領 | | 論語精義卷第十下 | 論語精義卷第十上 | 論語精義卷第九下 | 論語精義卷第九上 | 論語精義卷第八下 | 論語精義卷第八上 | 論語精義卷第七下 | 論語精義卷第七上 | 論語精義卷第六下 | 論語精義卷第六上 | 論語精義卷第五下 |
| 離婁章句上 五六六 | 滕文公章句下 五六二 | • | * * * * * * * * * * * * * * * * * * * | 公孫丑章句上 五二七 | 梁惠王章句下 五二〇 | 梁惠王章句上 五一四 | 五〇九 | | 堯曰第二十 五〇一 | 子張第十九 四八二 | 微子第十八 四七〇 | 陽貨第十七 四四四 | 季氏第十六 四三二 | 衛靈公第十五 四〇七 | 憲問第十四 三七一 | 子路第十三 三四八 | 顔淵第十二 三二二 | 先進第十一 二九五 | 鄉黨第十 二七四 |

| 孟子精義卷第十四 書 | 十三 | + = | 孟子精義卷第十一 生 | 第十 | 第九 | 第八 |
|-----------------------|-------|-------|-----------------------|----------------------------|-----------------------|-------|
| 盡心章句下 | 盡心章句上 | 告子章句下 | 告子章句上 | 萬章章句下 | 萬章章句上 | 離婁章句下 |
| • • • • • | | | 0 0 0 0 0 | 8 0 0 0 0 0 | 0 0 0 0 0 | • |
| 六五三 | 六二五 | 六二 | 六〇六 | 五九九 | 五九二 | 五七七 |

校點說明

的總體成績。
《論孟精義》是朱熹從宋代十餘位理學家的文集、語録、講章、注疏中纂輯出的有關《論語》、《孟》之學集、語録、講章、注疏中纂輯出的有關《論語》、《孟

爲《精義》一書的前身。

說》; 下,已小有心得。 書」之中,又對《論語》、《孟子》二書用力尤深。 从十三四歲 朱熹窮畢生精力,從事「四 十七八歲開始研讀《孟子》; 時, 便跟 宋孝宗隆興元年(一一六三),朱 随其父學習二 書」研究,而在 至二十歲上 程 的《論 四四 語 他

例,與後來的《論語精義》大抵相同。此书可以視序》(見《晦庵集》卷七十五),可知其編纂宗旨與體傳,然而考諸朱熹隆與元年所撰的《論語要義目録爲《論語要義》一書,以備學者觀覽。此書久已不熹輯取二程及其門人朋友數家之說《論語》者,以

(一一八○)朱熹對《精義》進行了修訂增補,再刻 《語》、《孟》,不可便道《精義》都不是,都廢了。須 《孟子集注》。 更名爲《論孟集義》。 於豫章郡學,並更定書名爲《論孟要義》。其後,又 借它做階梯去尋求,將來自見道理。 方是自己所得處。」(《朱子語類》卷十九)淳熙七年 行,却也未因《集注 後,他又擷取《精義》之菁華,撰成《論語 義》一書,並於乾道八年(一一七二)鏤板行世。 尹焞諸家詮解《論語》、《孟子》之說,輯爲《論孟 馬、吕希哲、吕大臨、謝良佐、游酢、楊時、侯仲良 乾道年間,朱熹蒐輯條疏二程、張載以 《集注》産生之後、《精義》雖 》廢棄。 朱熹曾說 知得它是非 集注》與 及范 不再風 一今讀 此

借 本 的 見 去,近日方始都無疑了。」(《朱子語類》卷十九)可 只恐《集義》中有未曉得義理,費盡心力,看來 之意如何。 却不編出者,這處却好商量,却好子細看所以去取 注》,教熟了,可更看《集義》。《集義》多有好處,某 注》、又恐太易了。 「《集注》乃《集義》之精髓。」又言: 看《集義》,恐未易分别得,又費工夫。不如看《集 論》、《孟》諸說之所出以及各家之學術傳承,則 重《集義》不可。 優點在於簡明,故歷來成爲初學者的首選 兩書各有所長、《集注》精而《集義》博 鄸 學者若欲登堂入室,深 集義》的特色則在於詳贍,是進一步深 於《集 須是看得《集義》,方始無疑。某舊日 義》與《集 這事難說,不奈何,且須看《集 注》之關 刻了解宋儒关于 係, 「諸朋友若先 朱熹當 《集注 造 言 非 的 讀 看

郡 晦 庵集》卷八十一)可知,在朱熹生前、《 據朱熹淳熙七 兩 兩 度 刻的差别在於,豫章郡學版曾更定書名, 刻 板 刊 行 年所 作《書 初 刻 於建陽,再 語 孟 要 義 序 刻 論孟 於 後》(見 豫 童 精

> 跋, 子《跋》,淳熙庚子」。 卷、舊抄本。 心源之《皕宋樓藏書志》,著録有「《論語 語精義》各本,當皆出自建陽之初刻版。 頣 僅有一條凡七十字(見《論語精義》卷八),不僅 「集義」者。 考今傳《論孟精義》衆本,均未見淳熙七年之序 氏說四篇有半」。 並 本,然不知其所終。 四篇有半」之數相去甚遠,且內容乃係周氏向 發問,而非其說解《論語》者。 經朱熹增 且諸本書名皆題「精 補。 宋朱子撰。 至於《精義》全書中涉及周孚先之處 增補的 所謂 「毗 此舊抄本或出於豫章郡 重 朱子《序》,乾道壬辰。 要内容之一乃「毗 陵周氏」即周孚先。 義」,而無作「要義」或 故此,今傳之《論 集義》二十 又按清 陵 朱 程 學. 陸 與 然 周

以下僅就傳世知見版本作一簡單介紹。

印。 精義十四卷》,今藏 跋》文,首頁鈴 明抄本與傳世刻本及《四庫全書》本相比,有 (甲)明抄本《論 全名《國朝諸老先生論 有「錢 南京圖 孟精義》(以下簡 曾藏 書」、「八千卷樓」朱文 書館。 語 精義二十卷 扉頁帖 稱 有丁 孟 明 抄 丙 子

《季氏篇》中有十六行之闕版,惟明抄本不闕。於注文之外並録經文。二是刻本及「四庫本」於部分,無《孟子》本文,明抄本之《孟子精義》,則兩大區别。一是刻本及「四庫本」的《孟子精義》

缺《論語精義綱領》與《孟子精義綱領》各一篇。簡稱「四庫本」)。與明抄本及刻本相比,「四庫本」(乙)《文淵閣四庫全書》本《論孟精義》(以下

寶諾堂重刻白鹿洞原本」。 (丙)清康熙中禦兒吕氏寶諾堂重刻白鹿洞原本」。 全名《國朝諸老先刻》本(以下簡稱「寶諾堂本」)。 全名《國朝諸老先生論孟精義》,其中《論語精義》十卷,每卷析爲上生論孟精義》,其中《論語精義》十卷,每卷析爲上

存金陵」,收入洪汝奎《唐石經館叢書》。 記題爲「同治十三年冬公善堂仿石門吕氏刊本板本(以下簡稱「公善堂本」)。體制仿寶誥堂本,牌本(以下簡稱「公善堂本」)。

麟《朱子遺書重刻合編》本(以下簡稱「傳經堂(戊)清光緒十二年(一八八六)傳經堂刻賀瑞

雕訖」,收賀氏《西京清麓叢書》。本」)。亦仿寶誥堂本,牌記爲「光緒丙戌十月六

H

丑冬仲仿白鹿洞本刊於廣州」。本(以下稱「紫陽叢書本」)。扉頁牌記題「光緒辛へ(己)清光緒二十七年(一九○一)《紫陽叢書》

版社影印出版)。 籍畫刊·思想三編》(一九七七年日本東京中文出籍畫刊·思想三編》(一九七七年日本東京中文出保文句之校勘,其中不乏真知灼見者。收《近世漢誤字,悉近寶誥堂本。天)。其形制、文句乃至(庚)日本享保十四年(一七二九,當清雍正七

京師範大學文獻學系楊新勳先生曾代爲抄録、核文篇目增補。整理過程中還參考了上海古籍出版文篇目增補。整理過程中還參考了上海古籍出版文篇目增補。整理過程中還參考了上海古籍出版本、論孟精義》的點校成果。北京大學中國古文獻本《論孟精義》的點校成果。北京大學中國古文獻本《論孟精義》的點校成果。北京大學中國古文獻和第二、此次整理、以清康熙吕氏寶誥堂《朱子遺書二

多中肯意見,在此一並致謝。 等中心的李暢然、谷建、沙志利、李峻岫等幾位同案中心的李暢然、谷建、沙志利、李峻岫等幾位同安平秋教授對於整理工作給予指導,《儒藏》編

校點者 林嵩 黄叶

四

諸老先生名次の

横渠先生張氏名載,字子厚。 成都范氏祖禹,淳夫。 伊川先生程氏名頭,字正叔。 明道先生程氏名顥,字伯淳。

解見《孟子》。

榮陽吕氏希哲,原明。

延平楊氏時,中立。

建安游氏酢、定夫。

上蔡謝氏良佐,顯道。 藍田吕氏大臨,與叔。

河南尹氏煌,彦明。

河東侯氏仲良,師聖。

0

原題作「論孟精義目録」,今重擬。

論孟精義序

意 此 非 者 而 並 要,古今爲之說 同符也。 之傳有繼,其於孔子、孟氏之心,蓋異 年,河、洛之間有二程先生者出,然後 秦、漢以來,儒者類皆 其 者 非 徒 索之無 徒 言而失之,學者益 可 而 謂 其溺 其鶩於高遠者,則又支離踳駁,或乃 以 미 得 至矣。 》、《孟》之書, 得其 故其所以發明二書之說,言雖 之。 以 窮,指雖 於卑近者,既 得 意 其 其 間 者,蓋 所 嘗 言,而 而 遠 蒐 以 又可 而操之有要,使夫讀 不 已 學 輯 興 以 又可以 得 足 者 百 以 條 起 病 其 以 所 並 有 疏 斯 焉。 言 與 其所 餘 以 以 文 得 附 而 聞 家 求 宋 開 其 斯 道 以 不 意 章 悟 進 世 斯 興 得 道 然自 之 之 於 其 之 近 而 道 百

> 然而 所 其 指 謝 可 先生之學之至,其孰能知之? 嗚呼 充擴之功。 以示人者,莫非操存涵養之要, 而 以附益之,名曰《論孟精義》,以備觀省。 於先生者,若横渠 抑嘗論之,《論語》之言無所 所 至 傳 無 同 時及門之士,考其言行, 之緒 爲孔 ,竊意其猶伯 體用 以奮乎百世絶學之後,而獨得夫千 所不究,而其所以示人者,類多體驗 、游氏、楊氏、侯氏、尹氏 志之士有欲從事於此者,亦不隱 少異於先生,而悉合乎聖賢之意 取夫學之有 氏之顔、曾也。 也 源 與? 若張公之於先生,論 夫聖賢之分, 也,顯微無 夷、伊尹之於孔子; 張 同於 公,若范 先 間 其不 今録其言,非 則又未知其 生 不 也,是則非夫 凡九家之說 氏、二吕氏 者 同 包,而其所 與 七篇之 固 其 如此, 1 有得 焉。 載 孰 其 弦 而

此題原無。據四庫本補。

哉 ? 者 已乎? 學者之心。 似之言以文異端之說者,則誠不可以 不 先 顧 而 學者有得於此 者,其考證推說 近世二三名家 苟不先 通訓詁、考制 然則凡說之行於世而不列於此者,皆無 遠 IE 亦 末分,● 誠 其 流 生之 學 在彼爾。 曰 用 語 俗 者 大 特所以求夫聖賢之意者 言氣 力於此書 頗 涉其流,則 門 所 者 E : 已 人 醇 官 既 若夫外自託於程氏, 象之間 然以其荒幻浮夸足以 者,又或 杰 醨 同 鄉之矣,其 度、辨名物,其功博矣。學者 而 不 與夫所謂學於先生之門人 心耳。 異 然也。 亦或時有補於文義之間。 則 而 後觀焉,則 (味而 亦何以 則 其 有得焉 出其書焉, 淺 演有 至於近歲 不敢載矣。 深 漢魏諸儒 爲害豈淺 用力於此? 疎 亦何適 不 則 於其 難 毫 則 以 則 辯 而 数世 釐 正音讀 淺哉? 言 在 來學於 者 竊 而 或日 意 之 其 入於 其 此 雖 無 間 也 取 源 學 近 得 欲 丽 而

> 之亦 焉 說 爾之消 之長、折 乾道壬辰月正元日新安朱熹謹 且 有 所 不敢 流 不 俗之謬,則 暇 辭 至 然 於明聖傳之統、成 則 竊 是 亦 書之 妄意其庶 其

幾

衆率

讀

_

「末」,四庫本作「未」。

國朝諸老先生論孟精義綱領

雄。 日 快 所不包; 子,春生也 只要分别聖賢之分。 顏子,便入聖人氣象。」 迹,孟子其迹著。」 又曰: 尼,天地也; 露其才,蓋亦時焉而已矣。」 有自然之和氣,不言 人,顏子儘豈弟,孟 ,則儘做得,只是難 山巖巖之氣象也。 只見才雄,便是不及孔子處。 「孟子有功於道,爲萬世之師,其才 道 先 顔子示不違如愚之學於後世 生日 孟子,并秋殺盡見。 顔子,和風慶雲也 : 。如孟子若爲 而 仲尼 得 仲尼,元氣 子 化 似聖人。 又曰: 者 儘 無迹,顏子微有 也 「孔子儘 雄辯。」 又曰: 也; 人須學 孔子 仲尼. 孟 孟子, 一仲 子則 是 明 無 顔 又

> 間。 生日: 或問: 之: 子。」 Ц, 駕其 語 道,而人不尊; 則門人不親 後能明其道。 臣,皆能發明大道。 則門人不尊。」 及顔子。 句句是自然,孟子言語 花,花 說 顔、孟雖 有許多水,然後爲海: 聖賢固有間矣。」 又曰: 孔子爲宰則爲 於天 「使孟子與孔子同 則 能 下 斯 讀其言便可 無大優劣,觀其立言,孟子終 無 譬如有許大形象,然後 郭? 並 和」,此是不可 不 孟子教 孔子教人常俯就,不 又曰: 駕? 孔子益 似 孟子必得賓師之位 處 將學於孔子耶?」 宰,爲陪 雖顔 人常高致,不 只 以知其人, 又曰: 自 句句是 「孟子嘗自 是 1、時,將與孔 卑, 子亦 無 及 他 而 臣 事實。」 處 「孔子言 此未及 造化 未達 人益 則 爲 尊 其 尊 致 又 並

「讀」,四庫本作「觀」。

冰與 日 有圭 聖之次也。」或曰: 「氣象 同,顏子去聖人只毫髮間 子却寬舒,只是中間有英氣,纔有英氣,便 知 其 謹 有 角。 象,無許多光耀也。」 水精,非不光,比之玉,自是有温 嚴,便 迫 「但以孔子之言比之,便可見。 切 英氣甚害事。 不 有 否?」先生 迫切 知 言 也 氣 象, 曰 如顏子便渾厚不 無 3 或 : 寬舒之氣。 問 見於甚 孟子大賢,亞 子 厚 横 處?」 謹 潤 且 如 之

右論孔孟氣象

至聖 句 作 孟 句 經 미 子》 而 人 之 不 伊 意 而 治 爲 jii 求之,畫誦 吾之所 本。 先 ,與聖人 而 明 生 矣。 《論 以 所以 語 讀 而 未 》、《孟 味之,中 書者 至 學 工者、所 用 者當 心, 當 一子》既 與 夜 U 觀 以 聖 而 聖人 未 ^ 治, 論 思 得 者; 之, 所 所 則 語 以 以 六

見意者 質? 念孟 得。 異」? 所以與弟子許多議論而無 孟復 義,然後可 聖人答處便 曰 : 如此,今看《語》、《孟》之書,亦與 如當時人。借使 者,必先看《語》、《 度事物,自然見 得?」曰: 平 讀《論》、《孟 其 **>** 生,不 將《論語》中 心 中深求玩 也。 但 或 又 或問 將 問 以 日 其 過 以 學者一 作今日耳聞,自然有得。 ×, 聖人語言玩 氣 求其意 以 如尺寸權衡相似,以 義理 凡 味,將 得長 諸弟子問處便作自己問, 如當時人,聖人所答 此 闕 聖 (孟》。 「學者如 部《論》、《 教人。 其 人之 去推 看 短輕重。 疑 來涵 文字,須 今人雖善問 未有 索 味, 久則 經 則 所得, 何可 若 可也。 旨 聖 養 孟 文 能 成甚 以有得?」 某常 》,見 先 義 見孔 是不 如 於《 之 自有 曉 學者 不 此 何 意 未 語 易 聖 曉 其 生 雖孔 不 語 去 口 而 文 所 何 學 渦 必 見

間 爲?. 夷、柳下惠皆古聖人也,若不言清 馬 昭 也。 子方言「苟有過,人必知之」。孔子答,巫 著,意便不足。 讀玩 也。 整理過。」 思之,又似剩只有些先儒錯會處, 便自意足。學者須是玩味,若以語 場話說。 夷、惠爲 期亦知之,陳 必更有語言,具巫馬期欲反命之意,孔 公知禮,巫馬期告時,孔子正可不答,其 其心,必有害,雖孔孟亦有是患。 味,須將聖人語言切己,不可 讀 曰」,只當言『堯曰』,傳者乘 又曰: 》、《孟》而 又曰 人只看得此二書切己,終身 聖人,豈 雖 又曰: 多, 「《論語》、《孟子》只剩 某始作此二書文字,既 司 「凡看《論》、《孟 不知道,所謂 亦 不有害? 敗亦知之。又如言伯 奚 「傳録言語,得其言 以 爲 ? 又如 雖 名 和, 放勳 孟子 却 只 亦 又 且 言 儘 如 待 讀 作 須 翠 B 便 未 與 解 名 孰 而 著 以

殺舜 也。」 意。 有所 治之而已。今之官府,治人之私者 舜雖不告,堯固告之矣。堯之告之也,以君 而象欲以殺舜爲事,堯奚爲不治? 頑,過時不爲娶,堯去治之,堯命瞽使舜娶. 可以利誘之意。「舜不告而娶」,須識 觀其文,只似孟子不肯爲國人矜式,須知 使予欲富,辭十萬而受萬,是爲欲富乎?」若 處? 但時子以利誘孟子,孟子故曰 子以萬鍾」,此事欲國人矜式,孟子何 句,豈不有害? 若不因公西赤有問,及仲由 堯號,乃 只見句 若使舜便不告而娶,固 無可 見。」先生日: 尹焞當言: 稱 句皆是實 見之迹,發人隱 放 勳 又如《孟子》,齊王「欲 日 語。」先生首肯之,日 「近日看《論》、《孟 「所見 又如言聞斯 慝 如 爲 不可。以 而治之,非堯 何?」焞 比,便信 亦多,然 蓋象之 . 行 其父 得舜 不可 養弟 此 如如 似

-

國朝諸老先生論語精義綱領

曾讀。」 是這 抵讀 牆 是讀 《詩》時,授之政,不達, 面 方,不能專對: 足之蹈之者。」 如『誦《詩》三百,授之以政,不達, 了後知好之者,有讀了後直有不知手之舞之 牆 面而立。 事者,有讀了後其中得一 箇 書,只此便是法。 既讀《詩》後,便達於政,能專對四方,始 伊 5川先生1 人,及讀了後,又只是這 到讀 又曰: 『人而不爲《周南》、《召南》,猶 了後,便 須是未讀《周南》、《召南》,一似 日 8 雖多,亦奚以爲」。 又曰: $\stackrel{\sim}{\sim}$ 論語》問 「讀《論語》,有讀了全然 不面牆,方始有驗。 如讀《論語》,舊未讀 使於四方,不能 「今人不會讀書。 两句喜者,有 同 箇人,便是不 而答異者至 是 使於 未 大 Ī 四 專 讀

問 顔淵 問 民無信不立。」不是孔子弟子,不能如是問; 聖人不能答,便云: 黨》形容聖人,不知此者,豈能及此?」 書,傳道立言,深得聖 位及所居之位而言。」 『老者安之,朋 不是聖人,不能 去,於斯三者何先?」才說: 食,足兵,民信之矣。』便問: 論語》,非是只要理會語言,要識得聖人氣 鄉人皆好之,何如?」曰: ,或因人才性,或觀 車馬,衣輕裘,與朋友共,敝之而 如孔子曰: 日 『不得已而去,於斯二者何先?』自非 「鄉人皆惡之,何如?」又如說 「孔門弟子善問,直窮 「願 友信之,少者懷之。」觀此數 無 如是答。」 伐 『盍各言爾志?』子 善,無 人 『去食。 人之學者矣。 所問意思,或 又曰: 施 勞。二孔 又曰: 到底。 未 自古皆有死 『必不得已 『去兵。』便又 可 路 也。 子 如問 無 所 「凡看 如《鄉 一足 日 日 到 而 便 又 地

長。 句。 當 賢氣象。」 時 賢氣象,它處 便見 已 曉 得 文義, 聖 又曰 賢 也 氣 難 象 讀之愈久,但覺 見。 「某自十七八讀《論 大 段 學者須 不 同 要 若 理 讀 意 會 此 味 得 語 不 深 聖 見

之, 遠 不 讀 章 於 日 訓 心於淺近 道,亦萬 亦 誣 其 析 萬 足以 也。 堯 識 詁 固 旬 舜 無 書 謝 其 無 不 是 耳 然 氏 知聖人 面 同 窮 無是理。 有 得 謂足以識 理; 自 無用之地,聰 曰 者要當 知 盡 今日 其 秦 一,指 門 心, 魏 漢 論 言行不類,謂爲天下國家有 識 而 天 無 以 語 而 君子 會之以 謂言能 聖人心, 其 書 下 窮 降 來 心, 也。 同 明 於 談 開 弟子記當 知 神。 H 此 在 者 門 中倫、 有 蓋 尊 萬 就 盍 授 我 盡 益 其 孔 無是 彫 譬諸 闕 則 嵇 徒 辭 行 喪,雖 乎? 氏 改 可 者 年 近 能 理 觀 容 索 言 既 不 同 中 之 其 欲 過 更 不 行 蓋 知 慮, 於 指 分 讀 溺 既 知 不 腎

是 與 深, 惰 雲; 躓 未 食 味 ; 深胷 其 學 縵 矣, 也 言令色寧病 淺 書遠 是 0 之 妨 者讀之,豈 師 智窺之,豈不大有 道 雜服,不能安 可 書聲 吾樂; 高 惟 書紳爲 中矛戟者讀之,謂 患者讀之,孰信 方其 能 誨爾諄 則 勝數哉 深博厚,不 於 同 安 猶 聲 人 氣 一个种 弦 故 乎 至 然 同 諄聽我藐藐者 知 注 ? 也 誠 ? 乎 後 諂 禮 心 飯 相 服膺? 不 不 是皆越 笑以言餂之者讀之, 可 於利末 蔬 未 坐 應, 同 學博 遠 逕 涯 食 能 是 乎? 惟 不 涘 庭 於 同 飲 素 終 故 依 近似者易 義 乎? 書 過 氣 人 也 得 身 貧 水 難 乎? 此 之 如 不 然 視 讀之,孰 宜 已不 賤 可 讀 曲 富 此, 其 後 能 而 秦 行 而 方其 往,益 肱 卒 安 相 貴 人 已 恥 之 人也。 煮 爣 蓋 求, 無 而 之 謂 真 而 惡 恕 物 不 以 亦 枕 見 肥 如 有 衣 謂 誠 童 學 勿 是 高 我 田 也 思 1 瘠 益 不 浮 顛 惡 彼 太 心 操 巧 何 不

爾

能

返

是

心

者

可

以讀

是

書矣

孰

能

脫

之功。 小 與 理 者 乎? 也,習益察,行益 油 者乎 求人 大人 矣、明矣、 志 去 天 ţ 信 與 能 非 ,其亦自知 然内 凡 地同 秩敘 平 書 我 ? 知, 之器 近 莫爲 當不惟念之於心,必能 至此,蓋 相 得,難以 取 是 ൬ 以 忘 流 ş 不雜矣,其 容 捨之相 有 宜 人 求 終 游 也 形 體 色,無 而 乎 仁義 也 ·天 身 莫 高 則 與 己。 語 無 督 人 知 之計 爲 明 著。 向 形 神 人,謂聖人之言真 禮樂, 遼 與 者 非 未 明 豈特思慮之効,乃力 所 也。 書 、於讀 識 誰 知視 身之謀 必 妙 不 莫 而 謂 爲 互相 其 其 中道 用。 求 爲 豈 辭 有 大,不 間 是書也,能 0 聽 人 同 後 愳 近 者 發也。 之? (能强 世之 體之於身矣。 父子君臣 言動,蓋皆 俗 兒 若動 ጢ 儻 m 之 指遠 督 有 其 以 而 若植 名 態 至 慮 及其 者 此 心 天 不我 求 者 此 ? 當當 下之 識 無 同 而 其 可 何 岢 至 久 行 欺 得 廣 不 1 理 有

> 淵。」 哉 哉? 謂吾 有隱 聞 君子 無聲無臭,此天下之至賾,聖人 得 生焉 天 미 何 也 信 而 哉? 言 此天下之至顯,聖人惡得 聞 ,夫子之文章 無隱 宜其 知 無行不與二三子者」也。 則 哉 哉? 有 以 亦 之不二 隱 二三子以爲 謂 何 《詩 無隱之不二者 有 夫子之言 遠 隱 之 者, 乎 口 有 爾 得 ? 捨 有 性 「鳶 而 則 以 此 隱 聞 與 1,豈非 謂 飛戾 四 書 乎我 天 也。 時 無 而 其 道 亦 上天之載 行焉 隱哉? 天,魚躍 隱 豈 何 閎 者 悪得 不 平 以 真 可 博 也 爾 見 得 明 而 不 百 允 題 所 物 知 可 面 則

之書 齊 未 去聖人,或相倍蓰,或 IE 未 有 鵠 ,孔子所以告其門人,羣弟子所以 不志於聖 乎 楊氏 有 ? 不 日 止 雖 於 巧 人而 IE 力 學 鵠 所 可 之 相 而 及, 以 視 可 言 什 聖 有遠 伯,所 以 學 言射 也。 近 其 造固 中 夫《 猶 也 否 射 不同, 論 之不 之於 士之

孔子 乎? 己。 之,如在荒墟之中,曾無 容筋 之方焉。夫道之不可以言傳也審矣。 英才異稟,不 年,士不知所 能宅天下之廣居乎? 嗚呼! 則馬之絶塵 以形容筋骨 窮高極微,而卒不可與 書,物色牝牡 窺聖學淵 爲童子之習而莫之究,人德之途背而去 其所視,而遺其所不視,則於余言其 而 者, 其言近,其指遠。 骨 善夫伯樂之論馬也,以爲天下馬不 答曰 而 士之 范 源,而 求天下馬,其可得 四轍者無遺矣。 相 止,而 ,有不能 有 過 美 '視其所視'而遺其所不視, 要在 區區於章句 志 一驚爲 問 乎聖人 繆悠荒唐之辭盈天下, 知仁。 知者蓋多矣。 辭章,以夸多鬭 世儒以其近也易之, 「讀《 人堯舜之道。 遽 者 廬 之末,是猶 余於是得 論 , 孔 乎? 以托宿焉,況 所 道廢千有餘 子 語 宜 說 盡 以 學 余於是 心也 間 何 士欲 爲學 靡 處 庶 者 以 矣 能 形 口 有 而

當者 孔子 【民無信不立】之說。 乎於仁爲近矣。」 觀之,聰明才智未必不害道,而剛毅木 者,曾子而已矣,豈非以魯得之乎? 者也,考其淵 於它人。 蓋嘗謂曾子在孔門,當時以爲魯,學道 木訥 所至有不 宜 使之足食與兵,何疑之有? 之以「去兵」。 後世所謂不必疑者也。 者,故其學莫能 有疑。今之士讀書爲學,蓋 有所疑,乃能進德。 ·足食,足兵,民信之矣。』子貢 玩 味。」 是 近仁」,自此而求之,仁之道 何 然子思之《中庸》,聖學所 同,故其答之亦異。只如言『剛毅 又 語 ? 問 源,乃自曾子,則傳孔 於食與信猶 相尚。 E] 與鄭季常言: 孔 然亦須是著力深, 「皆的 子說仁 如孔子門人所疑, 子貢問政,子曰: 有疑 若今之人問 血自以 當。 處 疑 樊遲問仁,子 為焉,故 甚 所 亦自可 但其門 為無 「學者 河去, 多 賴 子 , 方能 訥 由 之 宜 尤 미 以 知 答 疑 的 道 難 此 傳

明白 知古之學者善學。 者,今人不知 夏 枉,能使枉 「某平生爲學,亦嘗自謂無疑,今觀所言,方 初問之答,便不復疑。蓋嘗謂古人以 子夏問『巧笑倩兮,美目盼兮』,直推至於 舉臯陶、湯舉伊尹爲證,故仁、知兼盡其說。 知之道,不 日 禮後乎」然後已。 ,猶申問「舉直錯諸枉」之義,於是 而遲 愛人。」問 者直」教之。 猶曰未達,故孔子以「舉直 其幾矣乎? 疑也,學 知, 如使今之學者,方得 子 何 日 由是而 以進?」季常 . 樊遲退 知知 行之,於仁、 人 ° L 而 又得 見子 爲 日 錯 是 疑 其 舜 諸 其 :

苟能 心 以 文義者數十百家,俾臣復措說其下,亦 筵,被旨解《論語》以進。 受,而 寡陋 卽 尹氏《進解序》曰: 辭。 其問答,如己親炙于聖人之門,默 躬 行之,則 竊 惟是書乃集記 可 謂 善學矣。 「臣自布衣、入侍 臣 備 孔 職 子嘉言善行, 勸 後之 講 不,不 不過 解 識 其 敢 松平

> 測奥 臣 亦將何有? 爲無取。 誦 上。 非臣 縱,如舜好問 稱 重講解,慎言辭也。 謹其辭說,苟不踐形,等爲虚 差謬,豈惟無益,害有甚焉。 語文字,去本益 行,不貴空言,若欲意義新奇,文辭華贍, 事業矣,復有何待於臣之說? 己以安百姓,固已合符乎夫子之道,施之 無 贊 而傳,或以 父妙 任慙羞恐懼之至。」 所知也。 之 又奏曰: ,發明指歸。 ጢ 施之於己,未見其功, 已。 其於聖賢言行,何足以 如湯 解說而陋,況其所 姑 恭 摭所 惟 「孔子以 況如臣者 日新、舉賢 是故先王遺書,雖 陛 彊顔爲之,第塞詔旨。 下 聞 聖學 以 來,道學屢絶, 語 脱使窮其根源 稱 ,材質甚愚,修 高 ,此先賢所以 論 而 明 然而學貴 遠 挾以 明 所 詔。 窺? 趨,不無 不仁,修 出 事 臣 以 乎 力 於 講 謹 則 天

論語精義綱領

國朝諸老先生論語精義卷第一上

學而第一

愠,不亦君子乎?」
 明自遠方來,不亦樂乎? 人不知而不子曰。「學而時習之,不亦說乎? 有

悶,乃所謂君子。」 繹, 聞 者 乃學習之義。 我,故說 者,將以行之也。 衆,故 浹洽於中,則說 說,在心, 「說,先於樂者, 川《 可 習,如禽之習飛。」 解》曰: 樂。 子路有聞,未之能行, 雖樂於及人,不見 樂,主 也。 又《語録》曰 「習,重習也。 時習之,則所學 一發散 以善及人, 由說 在 又曰 外。 m 是 而 唯 時 後 者 所以 而 信 復 有 在 從 無 又 思

然非樂不足以語君子。」

能立。 《兌》之《象》: 矣。 所以求道,故可說之。 曰 : 險而流焉,君子於難事也亦然,故其《象》 坎」,水之於險也,必洊至而不已,然後 學而習之, 之者,次也,所以求爲聖人,及其成功, 亦說者,比於說矣,猶未正夫說也。 則與性一矣。 成。」學者之習,所以反其性也,●習之而串, 人君習堯舜,是 「性相近也、習相遠也。」伊尹 無習則 習之言試也。《易》重 「常德行,習教事。」夫必有常也,而後 范 孔子習周公者也,顏淵習孔子者也 E ,知所以修身,知所以治 亦無說矣。 「學先王之道,將 《易》曰: 『以朋友講習。』朋友講習, 亦堯舜而已矣。 《孟子》曰: 善莫善於講習。 「兌,說也。」 日 險之卦 以 行 『習與性 子曰 人,則說 之也 日 則無 而 能 知 習 不 īfii 乘 鄉

● 「所」,四庫本作「將」。

九

人莫 乎 惟 人,而 外,未有 小人唯恐人之不知也。 子自遠而至是也。 樂之者。 之善 而無悶」,「君子依乎中庸,不見知 能如此者,其 之善士。」才小者所友近,才大者所友遠。 君子之學,有同道者自遠而來,則亦可以樂 斯友一國之善士, 聖 君子矣。 者 世 未 ,得而知之,是以道不行,時不遇,獨立 者 夫說自外至,樂由中出 土 爲 以爲君子。 有得於内。 一,斯 能 一當 不 習在己,而 之」。此皆藏 有悶 · 知者 而 友 必 惟好學者乎? 一鄉 ,斃而 也。 蘄乎人知,有諸 故人不知 君子之道,求爲 之善士 君子不病人之不己知, 天下之善士,斯友天下 不知 有得於外, 後已,亦 潛龍之德,「不見是 其 而 德 而 ,故好之者 温,則 在孔子,則弟 不 而 無 修 温,斯 内, 國之善士 悔 身者也。 而不悔, 可充也, 不知於 必 焉。 朋友在 形 可 不 諸 下 如

> 捨 於終而不悔,故人不知 吕曰 信於中而有孚,故 信於始而 而 朋 不 不 疑,故 愠 來乎遠方, 時 習 而 不

士。 猶有不相知者,況它人乎? 道同則相 其與己之不異: 士,斯得一鄉之善士, 古人,先得我心之所 德聚矣,能 「顛沛必於是」,則 同堂合席,專門同師 時習也, 坐如尸」,則坐時習也 時 則 國之善士; 習之,所以自處也, 謝曰: 知我者希,則我貴矣, 其自待者厚: 知,不 『造次必於是」,則造次時習也 無說乎? 「學而時習者,無時而 天下之善士,斯得天下之善 同 則 皆朋 顛 不 同 然後謂之朋也。 沛時習也: 斯 有朋自遠方來,非 相 也,能無樂乎? 然, 3 不亦 知, 一立如 有 國之善士,斯 是以一鄉之善 朋自遠方來 君 求之今人,信 師弟子之間, 人不知而 子 齊」,則立 乎? 如此, 不習。 不 得 必 則

愠

而

此三 其 愠 同 示 中 .焉 乎 己者 矣。 者。 愠之謂 幾於樂矣。 飯 也 顔 也。」 子 疏 食飲水,曲 一簞食, 人不 ^ 知, 論 語》 異 肱 瓢 乎己者 而 經經 飲 枕之,樂亦 一大抵 不改其樂 也 不 而 在 出 不

爲物 之說 學而 得 莊 以 也 於樂,則中心 時習於禮 不 而 矣, 說 成 不 章不達。 也,不盈 敬 我 也。 時習之,則心之所同然者得矣,此其 學問之道無他,求其 游 時 而 E 口。」今試以吾平居之學 有得 則 本心之和得 無 故曰: ,則外貌 斯 慢易之心無 「理 矣,其爲樂 須 科不行; 無 故積於中 不和 斯 也 無 『理義之說我 須 一,義 矣。 斯 不樂,則鄙詐 不 自 須 和 也 可勝計哉 者厚,然後發於外 君子之志於道也, 不莊 J. 時習之, 而 不 人,而 所 人 樂。 不 同 心 , 驗之: 心,猶 敬; 然者 之 , 則 之 無 本 所 斯 流 時 心 心 M 有得 同 水之 之敬 時習 無 須 己。 所 然 自 若

乎? 至,其 耶? 既 者 子 者 聞 朋 君子成德,孰能至於是哉? 天,不尤人,「遯 我,而世之所可願者 聞 至 而 而 致之也; 豈借美於外哉。 已周 也。」蓋不 暢於四支,有 譽 廣 是 自 廣 不 温,不 譽施 遠 哉 施 機於 若夫尊德樂義之士,囂囂 反諸身而已矣。 蓋君子非樂 矣。 ? 諸 方來,則發於外者既 得於己者全,然後信於人者 於身, 身,則美在 非樂 此 亦 小 知 非夫積 其 君 人也 命 世無悶,不見 所 其 以 所 子乎」,語 惟不借美於外 於朋 則 聞 以 致 以 孰禦焉,尚 厚於中,得全於己者,曷 行 屏焉,其爲樂 譽 聞 其 不願 樂 險以 來也,樂其 示 也,樂其美在 中, 也。 譽 也 人之文繡也。」夫 成 知 而暢 徼 已廣,信於 孟 是 命, 故 德 倖 然 何 子曰 而 自得, 也。 於四支, ,則志願 日『人不知 水馬 以 無 無 將 聞 也 爲 以 鳥 悶 無 譽 周 其中, 君 可 爲 有 人者 不 미 怨 君 樂 以 E 在 夫 有

禮,則 馳 樂,所以爲君子,則在於學者之心得。 以爲君子也。 至於樂,則在我者無憾矣,宜其令聞 之地矣,故說。 則中心無斯 阨 德之士安於義命者不能爾也,謂之君子。」 君子所謂三樂者,内外兩得矣,故樂。 饗焉,終不足以知味。」 飲食之美也 也,君子也,言其義則然, 「不念舊惡,怨是用希」,與夫『遺 也,而 窮而 外貌 不憫」者,何以稱夷、惠? 人有不知焉,是有命 無斯 ,借使易牙日譽於前,而己不預 須不和不樂,且將日進於理義 今也人不知而 内足以成己,外足以成物, 須 不莊不敬; 又曰: 若夫 不愠,則非 也,不知 侠 時習於樂, 所 說 「時習於 而 廣 也,樂 以 不 學 譬之 命 譽 說, 怨 成 四 前 無

挺而目不瞬,貫蝨而懸不絶,由是而求盡其譬之學射而志於彀,則知所學矣。若夫承『請事斯語』,則習矣。學而不習,徒學也。楊曰:「顔淵『請問其目』,學也,

孔子以 其 妙 朋來,人知之也,以人知而樂,不知而 之,則說不足道也。 亦非君子矣。」 ~, 非 類至也。 習不能 學不講爲憂,則講學之樂可知矣。 合志同 也。 習 方, 有朋自遠方 丽 相與 察,故說。 講學,故樂。 來,學者以 而 或 性 成

之有,故曰君子。」而信之也,故樂。學在己,不知在人,何愠能有所自得,故說。有朋自遠方來,其道同能有所自得,故說。有朋自遠方來,其道同

弟也者,其爲仁之本與!」之有也。君子務本,本立而道生。孝者,鮮矣, 不好犯上,而好作亂者,未有子曰: 「其爲人也孝弟,而好犯上

之本。 矣。 也 孟 明道 孰不爲守? 子 孝弟有不中理,或至於犯上,然 日 Ė 「孰不爲事? 孝弟本其所以 守身,守之本也。」不失其 事 生,乃爲 親 事 之本 亦

身而 一之本。」 能 事 其 親 乃 誠 孝 也。 推 此 可 以 知 爲

弟來? 之本則不 本, 物 何 性 否?」曰: 則其道充大。孝弟行於家,而後仁愛及於 上 者是仁之一事,謂之行仁之本則 便是孝弟。 敬親者不敢慢於人,愛親者不敢惡於 中只有箇仁義禮智四者而已,曷嘗有 ,豈復有逆 ,所謂親親 弟 論 伊 性 『孝弟也者,其爲仁之本與。』又曰: 爲 ĬII 然仁主於愛,愛莫大於愛親,故 則 仁之本, 可。 解 以仁爲孝弟之本。」 非 示 盡 又 **>** 理亂常之事? 而仁民也。故爲仁 $\check{\exists}$ 得仁斯盡得孝弟,盡 問 盖仁是性 愛其 也。 : 此是由孝弟 「孝弟,」 「爲 親 謂行仁自孝弟 而 仁 愛他人者, 也,孝弟是用 先 順 德有本, 德 從 也,故 可,謂是仁 미 愛 以 始, 多弟 以 物 得孝弟 或 至 之悖 推 孝弟 問 本 不 也。 如 孝 爲 立 犯

> 不能 君子 親 親 親親 、墨子也。 仁民,能仁民豈不能愛物? 不 敬 而 其 仁民,仁民 親 而 敬 他 人 而 愛物。 謂 之悖 能 民 親 禮 親 而 豈 推 故

其心; 於孝; 孝弟。 子爲仁 根,水之有源也,無本則無自而生焉 順,則犯上宜 則未之有决矣。 者,有至焉、有不 不順於長,不愛於人者也。」 范曰: 未有事父孝,事兄弟,而 有道,在修其身; 正心有道,在誠其意 教民禮順,莫善於弟。」民 「孝弟則宜 鮮矣。 子曰: 至 焉 道之有本, 者 無犯 也 『教民 修身 上,然 至 有道, 於 親 不忠於君 如木 誠意莫 知 愛,莫善 好 親 而 作 之 在 故 愛 鮮 如 禮 有

愈博 能 論求仁之方也。夫仁之爲道 勝 ,其去仁愈遠。 謝曰: 而 行之莫能 「上章論爲學之大 至,而 古人語 語之 此者多矣, 亦 體 惟 舉 此 之 其 莫 節 語

遠者。 也? 而 事親,命也,不 非仁也。 仁,蓋亦如此 特慎言而已,何以見其爲仁? 仁」,若不知仁,則止知克己復禮而已。 不僞者,莫如事親從兄。 已,何以見其爲仁? 仁,則止知恭寬信敏 出 亂 不察,終身由之而不知者,尚能不好犯 如見大賓,使民 爲 必告,反必面,冬温夏凊,昏定晨省,亦 ,況於真 至於從兄,則自有生以來良心之所 夫事 孝 也 可以論仁者莫如人心, 事 矣,閭 親從兄之心,行之而不 親從兄而充之,則何往 爾。 積 可解於心。」此 恭 力久,擴 巷之人亦 爲孝弟者近仁,然而 如承大祭」,此特飭 寬 惠 「仁者,其言也 信 而 敏 而充之者乎? 己。 莊子曰: 「子之 惠 能 爲 之, 「克己復 可見其良 Ξ, 有子之論 著,習矣]初」,此 而 人心之 若 。 出 幼 孝弟 非 身 禮 不 上 未 心 而 爲 知

序

行後長,亦

미

以

爲

弟矣,閭巷之人

道

此心如之何, 實欲知仁,則在力行自省,察吾 道,古人猶難言之,其可言者止此 以爲仁 爲終不 之。 可可 然 可以 而 以入道,在念不念之間。 以 知此心則知仁矣。」 入道,亦不可也。 閶 巷 之人爲 有 道 事 但 親 而 不 從兄時 孝弟 己。 盖 町 仁 也 口

也。 於上,水漸 固足以禦亂矣,曾何作亂之有? 如其親,憂國必如其家,愛民必 悖逆之氣不萌於中矣。若是者,其事 好犯上。至於不好犯上,則忠順足於己, 不好 ,亦務本而已矣。 其不足於忠順者,寡矣,故孝弟之人鮮 ,故順可移於長: 游曰: 犯上,而好作亂者,未之有也。」木漸 於下,有本者 「事親孝,故忠可移於君, 孝弟也者,置之而 孝弟者,忠順之資 如是。 故君子之 如其 故 子 君必 日 而

能

本,則『本立而道生』之說見矣。」者爲樂: 兹非仁之本與? 知孝弟爲仁之此者爲禮,宜此者爲義,信此者爲信,順此天地,溥之而横乎四海,● 入此者爲仁,履

尊之與夫子等,故首述二子之言繼夫子之 死。又,惟二子獨稱子,餘無 事之。羣弟子惟曾子爲最少,而是書記 孔子没,子夏以有若似聖人,欲以所事孔子 語》之書,竊意有子、曾子之門人共成之也。 耳。若師氏至德以爲道本之類,皆是。《論 者,謂之好則鮮矣。孝弟非仁之本,蓋 事君,有犯而 隱而無犯,則孝弟之人宜無犯上者, 之本也。欲爲仁當務孝弟,此務本之一事 上,舉斯心加諸彼而已,無二道也。事 ,爲是故也。」 楊曰:「人以事其父兄,出以事其 無隱,則犯上盖有不得已 稱子者, 爲仁 移之 則 而 親 其 其 然 有 長

敗亂天下,其無以鮮而易之也。」

尹曰:「孝弟,順德也。順則宜無犯

公本产养的。一个,性也。爲仁之道由孝弟而生,故爲仁者上, 不好犯上矣,其好作亂者,未之有也。

子曰:「巧言令色,鮮矣仁!」必本乎孝弟。」

爲利而已,其心未必不仁也。人君邇之,必鮮者,則有時而仁也。夫巧言令色之人,亦比驩兜、有苗,則宜曰不仁而已, 然而曰比驩兜、有苗,則宜曰不仁而已, 然而曰非仁也。知巧言令色之非仁,則知仁矣。」非仁也。知巧言令色之非仁,則知仁矣。」伊川《解》曰:「巧言令色,鮮矣仁,謂

謝曰:「仁雖難言,知其所以爲仁者,者,末足以兼之。」 。 蓋修於外者,本有所不立, 修於内容。 蓋修於外者,本有所不立, 修於内

一年刻本,下同)並作「横」。●「横」,四庫本作「擴」。 按《游廌山先生集》(清乾隆-

亦可以知仁矣,若孝弟爲仁之本是

也;

乎? 《禮》曰 其遠 言, 鮮矣 倍,則知之矣。此宜學深思而力索,不 雖 至於小人,蓋嘗訐以爲直矣,言何嘗 以好其言語,善其顏色,直以爲鮮仁也哉? 欲巧」,亦鮮 甫之德曰: 言語道也。」 内在 何者爲令色? 於仁 仁1是也。然巧言令色,知之亦 「逞顔色,怡怡如也」,色亦令矣: 至於聖人所謂「孫以出之」,辭亦 而 色厲,色何嘗令? 者 小亦 情欲信,辭欲 仁乎? 「令儀令色。」然《禮》所謂「辭 可 以 若能知 知 仲山甫之德,亦鮮 仁矣,若「巧言令色、 巧。」《詩》稱 出辭 然則何 氣 미 者 可以 遠 巧; 爲 仲 漏 豈 巧 巧 Ш

與木訥 在 於令色? 巧言人於僞,令色歸於諂 有於巧言 於巧言令色而 游 日 反 矣,宜其 仁者,敬 「仁者, 己, 鮮 誠 於仁也。 則 而 而 已矣,無諂 孔子所謂「朽 已矣, 使斯人之志 無僞 世 其 也 木糞 何 資 有 何

> 與仲 美仲 也。 也。 反 其人 牆 Ξ, 之志在於善,而 尼之意異。 山甫何也? 然則仲尼之惡令色也如此, 孟 此聖人所以 子 所 謂 鄉 善觀《詩》者,以意逆志可 盖詩人之所謂「令色」者 不 原 絶其 失其 終 不 爲 所習,則 可 仁,而 以 人 丽 止 德 猶 詩 一言其鮮 可 人以 以 自 使

之容; 皎 其德者多矣,故鮮矣仁。」 仁 Ш 未爲過也。 以文之,而 也。 甫, 厲,其去道遠矣,焉得仁?」 楊 而以「令儀令色」稱之,則巧令非 然是之人務爲容辭之文而 日 有其容,則文之以君子 實之以君子之德; 故《記》曰「辭欲巧」、《詩》美仲 「君子服 其 服 則 又曰: 文之以 之辭。 雖 不 或 實之以 「便儇 巧令, 君 盡 子

曾子曰"「吾日三省吾身"爲人謀为言令色之非仁,則知仁矣。」尹曰"「巧言令色而仁者,鮮矣。知

六

而不忠乎? 與朋友交而不信乎? 傳

不習乎?」

謂 ,言不習而傳與人。」 信, 明道 表裹之謂 目 也。」 發己自 盡 又 調忠, 日 循 傳 物 不 無 習 違

之謂信。忠信,内外也。」 以《語録》曰:「盡已之謂忠,以實已。」 又《語録》曰:「盡已之謂忠,以實 伊川《解》曰:「曾子之三省,忠信而

曾子懼夫傳不習也。」
不明也。夫治己者未至,則教人者不足,故而不信者,誠意不至也, 傳不習者,講學而不信者,誠意不至也, 傳不習者,講學人謀而不忠者,有我與人故也; 與朋友交人謀而不忠者,有我與人故也; 與朋友交

無 m 弊。 一人遠 愈失 中 謝 其親 矣。 其 日 庸 影可 真。 「九流 炙 獨曾子之學用心於内,故 見也,考《中庸》,則知曾子矣。 而 如 得之者,有子思。 子 皆出於聖人,其後 夏之後 流 爲 莊 周, 子思之 傳之 則 愈 去 傳

> 文以 以 聞 也。 踐言 交而 曾子之事,不載於《論語》者甚多 伐 道自道,我自我,終不能相合而一矣。 之於人; 爲一,其能如此 者有矣。今其幸存者,可不盡 乎其嘉言善行不盡 事而謀; 三者,未可以淺近論也。 有不盡 柯, 睨而視之, 猶以爲遠者, 見子思矣。蓋其所 而 相接, 信,傳而習,非真知道無二致、人與己 傳 而後信也; 得之者,有 而不習,他人之道,我何與焉? ,則非忠矣。 習者,得之於我。 至於平居 一有不盡,則非 孟 乎? 子。 驩然有恩以 傳於世,如《孟 靜慮,思所以 學至真至 爲人謀 考《孟 與朋友交而信,非 爲人謀 信矣。 子》之書,亦 而 傳而不習, 相 心乎? 以其二物 忠,非 一則其冺 E 愛,粲然有 而忠,與 子》所 如 處人者, 傳者,得 如 特 此 滅 則 柯

[《]程集》作「義」。

以 之至也。」 一矣。 異 於執 凡此三者,幾於無我則能之,是學 柯 伐 柯 也? 惟習 而 熟 則 道 與 我

事親 身者 此其 惟於應物之際,恐或失念而違仁,故日所省 謂「夜以計過,無憾 則曾子之誠身庶乎可以跂及矣。古之人所 室,而忿有所未懲歟? 信 行者,庶乎可以跂及矣。然此特曾子之省 或愧於心,而言或浮於行歟? 慾有所未 操心宜無不忠,其立行宜無不信, 、憾矣。 而 曾子於正心誠意之道,宜無須臾忘也, 事而 有不足於孝,事長有不足於敬歟? 游曰: 固,則有不善未嘗不知, 不自悟也,故日三省其身焉。省之如 而已,若夫學者之所省,又不止 己。日 慮其所以接人者,或入於不忠不 「考曾子之學,主於誠身,則 加 後即安」者,亦曾子之 推是類 知之未嘗復 而日省之, 而處己者 此 行 其

> 之在 是? 習,口耳之學也。君子之修身,其患孰大於 之大倫也。 朋友之交,與君臣、父子同謂之達道,蓋人 人,猶在己也, 謀之不忠,違仁遠矣。 楊 故曾子之日省者如此。」 日 交而不信,違道遠矣。傳 「仁之於人, 無 彼 己之異。 而 不

身。 皆誠所未至也。曾子守約,故動必求諸謀而不忠,與人交而不信,不習而傳於人, 尹曰:「曾子之三省,誠而已。爲人

而愛人,使民以時。」子曰:「道千乘之國,敬事而信,節用

人之言,雖 時治千乘之國,果能此道,則亦可治矣。 心,然而使民 以保其國矣。」 又《語録》曰: ,堯舜之治亦不過此, 伊川《解》曰: 「今之諸侯能如 至近,上下皆通,此三句若推 亦有 不 時 處。 若常人之言,近 此則至淺,言當 「有愛民之 是,足 其

以 時 政。 便 下 事 只是淺 其 近 所存,未及治具,故不及 去。」 又 日 : 「敬 事 而 信

政, 是,則法行, 刑政,亦制數而已 而言『節用 横渠曰 不 Mi 「道千乘之國, 能 愛人,使 如 耳。」 是, 則法 民以 時 不及禮 不 」, 徒行。 樂 能 刑 禮 如

五者 使民 也。 然則魯變至道,亦未至夫教也。」 民 而已,教之則未也。《禮記》曰『國家未 可 治國之常法也 變,至於道。」道千乘之國,變而 范曰: 使; 敬事 以 時, 所以 節 則 穀 用 子 修 則 己 不 日 不乏; 可 敬則事 : ,故曰道。 勝 「齊 食,材 無不 愛人 變, 不 此 立。 則 足 可 至 以 勝 本 於 富之 至道 道, 用 固 信 則

後爲 日 學?」此言是也。 謝 有 日 民 「學之爲王者事久 人焉,有 社 然夫子不與之者,特 稷 為馬, 何必讀 矣。 書,然 子 路

> 敬事 乘乎? 家 非 也。 動 節 下,亦何獨不然。 中國,不得志行乎家人,其爲道一也,況 家之道, 天下、朝諸侯,則千乘之國 者 用 之斯和。」夫子未嘗得邦家 所 則能 ,所謂立之斯立,道之斯 而 以待子羔也。 信,節用而愛人,使 古人得百里之地 則 愛人; 可以爲天下國家矣。 子 使 敬 事 民 貢 以 謂 而 而 時, 信, 民 亦 君之,皆可 行,綏之斯來, 也 以 可 「夫子之得邦 民 敬 知其 以用心矣。 時,雖爲天 得志 事 前 不 信 미 行 爲 以一 也; 緩 邦

以 所 以 德教以道之,則尊君親上之心篤, 節用而愛人,使民以時,政事以道之也。 者,近之矣。 道之, 謂「引養引恬」而已。 加 游曰: 此 ? 則 勸 盖 功 敬事 敬 道之爲言、未及治也、猶《書》 樂 朝 覲 事之意 而信,德教以道之也 之事 馬融謂「爲之政教 純。 則 君臣 有國之道 有政 何 有

所 知使 裕國 細 而 是道 人之道足矣。 信,則慢令而 信之,夏后氏未施敬於 久於斯道而 以 言之,使道之以道,則於法度乎何有?」 m 已,未及乎 民 養 少恩,非 而誠於心,則有虞氏未施信於民,而 民 以 知節 時 E 用 節 致 知是五者,而 則 所 當孔子 將 以 雖然 圃 用,則侈費而傷財,非所 期, 非所以孚民 /厚下, 輕用其力、 已,未及乎愛人,則將 時,斯道 知敬事 民 法 知 而民敬之者, 愛 輕奪 度 也 而已,未及 人 加)將亡矣,故 ,其務, 而 焉 已,不 知信 吝 非 以 平 亦 民

> 自盡 於節 然而 心,雖有政不行焉,與孟子論王道之始同。」 然此特道之而已,未及 侈用則傷財,傷財必至於害民,故愛人必先 而疑,則事不立矣。敬而 (易))日 民 析 事 尹曰: ,雖有愛人之心,而人不被其澤矣。 用。 事不敬則下慢,敬而不信則 夏因,既蜡 不 可 然使之不以其時,則力本者不 「節以制度,不傷財,不害民。」盖 緩 「敬其事、信於民、節用、愛人、 也。」盖 m 不 有 興功之類,所謂時也。 土 爲政也, 有 信,以身先之也。 民 下 無 疑,下 非 苟無 獲 慢

春

0 集》並作 和刻本並 紫陽叢書 主」,傳經堂本、和刻本並作「上慢而多欺」,公善堂本、 "孚民」,二字原爲墨釘 慢令而 1堂本、紫陽叢 作 本及《游馬 民」。 「治民」 五 書本及《游集》補 字原馬 今據公善堂本、紫陽叢 公善堂本、紫陽叢書本及《游馬山 Ш 集 四四 墨釘,四庫本)並作「慢令而致期」。 庫本作「服民」 作「游 本及《游 經 移 堂 而

滕文公問爲

國,

孟

子

日

0

行矣。 不奪其 者,其亦不知本矣。 而 言近易行而忽諸?」 E 後世不能先此,徒欲以 時,以是 然推 其 極、雖堯 五者道 有志於南 其 舜之道 國, 可 面 刑 亦 謂 [者,其 政 不 言 而 過 近 可 爲 如 而 以 治 是

世。有所本而後學文,然則有本則文自至也。有所本而後學文,然則有本則文自至明道曰:「行有餘力者,當先立其本

書,非謂以前不可讀書。」生便知有父子兄弟,須先盡得孝弟,然後讀也。」 又《語録》曰:「學文便是讀書。人則學文。不修其職而先文,非爲己之學則學文。不修其職而先文,非爲己之學

弟,立身之本也。「庸行之謹,庸言之信」,范曰:「此修身之大略也。入孝出

先,文學爲後,學文者,行之餘事也。」親之,以善爲主也。夫子之教人以德行爲以其所愛及其所不愛,衆則泛愛之,仁者則

吕曰:「行謹而言信。」

有餘力則以學文者,其游於藝之謂乎?」而就一則以學文者,其游於藝之謂乎?」心,而親仁以成己,則在我者立矣。至於行能「庸言之信,庸行之謹」,充其無欲害人之盡弟爲難。能盡孝弟,則能明人之大倫,又盡弟爲難。能盡孝弟,則能明人之大倫,又盡,爲與,其為為,,其為,其為,其為,其為,其為,其為,其為,其之。

後枝葉爲之芘覆, 苟其無本,則枝葉安所其文足以增美質矣。猶木之有本根也,然也。有所未能,則勉爲之, 有所未至,則、無而泛愛,則友而親仁,●君子之務,此其本衆而泛愛,則友而親仁,●君子之務,此其本。

作「交友」。 「則友」,賀云:「則友」誤。按:《游廌山集》「則友

_

之。 子,稍涉文義,則 而是 以溺 賢 此 附 以學文; 於 在於是。 也。 不稱其智,則其文適足以滅質 鄉 此 事 也。 哉 也。 而 託真以 心,以爲 黨,交遊不稱其信,醜夷不 而 ? 己。 是以聖人 已 詩》者, 夫 或訾其無行,則驁然不顧, 然則 文者,《 不然, 酬僞,飾姦言以 使其孝不 《禮》者,體 禽犢者有之,以資發塚 無 言此情 活治 必 本而學文,蓋不若無 固 詩 待行有餘力,然後 有 稱於宗族,其弟不稱 自喜,謂天下之美 所 ^ 而 此 書 未 己 而 \leq 濟利心者,往 暇也。 已, ^ 禮 ^ 稱其和,仁 ,其博適 書》者,述 《樂》者, 後之 《樂》之 者 許 文 或 詆 盡 君 之 之 往 有 足

矣,烏知聖人之本末哉?」

其不足,則忿疾如深讐,亦可謂失羞惡之心

本也; 此 後,可以入德矣。 長,謹於行 德行也。 尹 日 文藝,末也。 行之有餘力,則 信於言,泛愛乎衆而親仁人: 爲弟 爲子 故 之職 窮其 以 〉學文。 本末,知所先 孝 於親 。德行 弟 於

也。」 明道曰:「致身,猶言致力,乃委質

如是 誠 易 顔 也 而 色,愈加 伊 已。 事君、 川《 解 恭敬,好善有誠 事親、與 **>** 又《語録》曰: 日 : 朋 見 友,皆盡 賢 改 也 色, 「言見賢 0 其 有 誠, 敬 賢 即 學 之 求

也。 以 然而好賢者、未必 范 好賢 日 而 惡惡臭 易 其 好色之心,則 而 誠好之也。 好好色者,人 賢賢者, 無 之 加

力之 誠 謂之學也 m 終之以 心 所 以 至 爲 信,此可學之資也。 賢, ,本立而 此 不 好 質美故 之篤 敢 有 者 其 也 身, 也。 故危 雖 事 日 父 未學,必 難 母 不 竭 避, 其

色,好善有誠矣; 患 未學者文耳 而 也 不欺,交際有誠矣: 吕 事君不有其身, 忠有誠 所謂 日 質者,誠 質具矣,而文有不足,非 事親不愛其力, 而 已矣。 四者,先立乎誠,所 矣, 賢賢 孝有 待朋 至 於改 所 謂 友 誠

其長 父子 爲子 亦可 色,天下之誠意無易於此。 以 有親 ,職而 幼必能 謂好德之至也。 謝 與朋友交,言而 日 舜 已, 君臣 其 有序,夫婦必能 「賢賢易色,如 法 有義,朋友有信 事君能致其 口 傳 於天 有信,在我者不欺矣。 事父母能 下者,其能 (身,不敢有己 此好 悪悪 有别矣。 に,能如 竭 德 臭, 其 如好色, 如好 (力,共 (此,則 則 外 舜 好

> 乎 謂 之不學也 ? 聖人人倫之至 ,其亦幾於生而 也 此 知 而 之者乎?」 日 未 學, 不 得

學,吾必謂之學矣。 學,故孟子曰: 事君能致其身,與朋友交言 子 名,而其言如此,則 人倫厚矣。學之爲道,何以 人倫也。」今能賢賢易色,事父母能竭其力, 之時,在上者舍是無以 也,夫婦 不在末,故《學而》篇大抵皆在於務本。 游曰: 也 「天下之達道 ,昆弟也,朋 『學則三代共之,皆所以明 仲尼之門,子夏以文學 知古之所 教,在下者舍是無 友之交也。 五 加 加 謂 有信 此 學者,在 君 臣 ? ,則其於 雖 也,父 先王 本 以

學本 斯謂 者。 九 而 經,而尊賢 之學 於致知,親賢所以 學者,明此 楊 日 可 也。 在親親之先,亦此意也。」 「事 而已。 然先之以賢賢易色者,蓋 君 親,交朋 致知也,故爲天下有 苟能 是,雖曰未學, 友,人倫之大

尹曰:「賢其賢,則敬賢之誠見於色,

盡 故 也 其 故 易 誠 色。 雖 未 無 所 學,必謂之學矣。 於 不用 其 事 其 君、 極也。 事親 學者,學此者 與 朋 友交, 皆

改。」 主忠信。無友不如已者。過,則勿憚主忠信。無友不如已者。過,則勿憚子曰: 「君子不重則不威,學則不固。

也。」 信。 鄉 在 者, 忠信,不 能安固。 遷善不可 伊川《解》 明道 人心也。 又《語 曰 誠 則 録》曰: 所主 不 日 無物。 若無忠信,豈復有物乎?」 速。 聖人言忠信多矣。 在 「不厚重則 君子自修之道 於忠信,所 且 「君子不重 出 人無時,莫知 無 親者必 威儀, 所 人道 則 當當 不 如 威 忠 其 是 唯

尚 厚 友 重 而 |知學,德乃進而 横渠 急賢。 日 欲勝己者親, 將修己,必先厚重 不固 矣。 無 忠信 如 改 進 以自 過之不 德,惟 持

0

嚴,而

學則

亦不能堅

固

也

則日 餘。 守也 改 以 之守,誠爲大, 内,故學則不固 已,故不重則 者 重 己者,所以進德也。 忠信爲主。 心必以忠信爲主,言必以忠信爲主 爲 過 則 盛 不吝, 不足; 損 自 有 范 德之至。 以 忠者,誠 威, 日 爲 過 則又賢於勿憚改者矣。此三者, 好 忠信,所以立本也。 而 不足,則 不 與不如己 重 言 惲改者,不能 威。 也; 其與· 君 則 重 爲 子 有 則 夫與賢於己者處, 人而 日 輕乎外者必 所 觀。● 有 人也,不 信者,不 益 者處,則自以 法, 貴 不 乎 重,未 行 動 强 道者 自 重 容 爲善也。 欺 欺 以 無 則 不 周 也。 爲 有 爲有餘 有 能 友 大。 IE 旋 行 不 爲 中 則 不 己 必 君 易 堅 有 如 以 子 其 平 貌 而

好」,原空一 何 行 重 謂 則 四 字,明抄本 有 重 日 貌 重言、 重則 作「好」。 有 重 行、 按揚 好 重德、 (重則 雄 重 有觀。」今據 法 好。 言·修身 言 重

也。」 也,自天子至於士,皆不可不務

進; 所託 固 失人, 也 主 吕 所 ; 日 以自治不勇, 讀 如了於 友, 所 則勢窮 學 衛 輔 則 3 主 知 也 則惡日長。」 顔 類 所 ş 警由」之『主』。 輔 通 改過,所以自治。 達,故 不如己, 不 至 則 於蔽 主,

過 所 不 行者也。 行之,勉强而行之,亦善矣。此非論生知 之,亦善矣。孰有安而行之者乎? 孰有生而知之者乎? 忠信,友如己,改過。 以 其修身乎? 固 而 改, 謝曰: 修 其 足, 身也。」齊 困之事 中 自重、忠信、友如己者,學之事 庸》 所以 「此一段當分爲四事 日 蓋爲 也。 防 明 其躁 盛 冠所以莊其首,爲 「齊明盛 君子不重則不威,學則 學者闕一不可 服,特 能學而知之,困 也 古之君子 威 服 儀 非禮 耳。 也。 能利 自重, 必 履 加 何 也。 所 以 安 佩 面 知

> 仁者。 間 賢 哉 有 行 並 其 非上智下 温 儻 謂 而 所 之爲貴。 玉 爲仁矣。 畏之,亦餘事 以 事 m ,孔子猶戒 薰蒸陶冶,能無待於朋習乎? ,吸風飲露而 不 默而成之, 進 尚 使非 知 知此而欲 學如之何 能 則 蹈之則爲君子,捨之則爲 君子過於情性 四 蓋事衰世之大夫,友薄俗之士, 移 揖 僻之 師師 十九之非, 愚,皆可 自非 養 退 以事其大夫之賢者,友其 也過」,過也 如 心 不言 則 進德 耳 而 欲飽」, 聖人, 此, 無 揚 不 以 自 而信, , 固 忠信,進德之本 而 爲善, 亦過 周 耳。 ٦ 何異『絺兮綌兮而 況視 也 也 無 旋 能 ? 是理 也 中 存乎德行」者也。 可以爲不善, 無 聽言 蘧 規 則其 夫 過 伯 矣。 小人。 但 容 折 ? 以子 動能 玉 儼 貌 旋 夫人 何 惟 也。 然人 衣 中 士 服之 過 責 自 年 其 難 自 之 欲 重 與 五 貝

●「情性」,四庫本互乙。

也; 旦 不 百世師也,而 君 義 子。 亦何常之有 小人 君子所 所以憚改 日不 ? 以 勿憚改者 者 循之則 ,蓋安於故 爲 季路 蓋 小 知 亦 常 其 百 捨之 也 世 無 漏 師 常 則 顔

食焉 之師乎? 人,蓋亦有過矣,豈以嘗有過而害其 也,人告之以 無損 於明 知此,則知君子之過, 有過 也。 則 今人以嘗有 喜 荀 卿 嘗 過 如 日 謂 而 爲 月之 之 自 百

世

可 日無侯 者,亦愚矣」。 `與不勝己者處,鈍滯了人。」 之過,一日不見, 以爲終 無可。 不 或問 可以爲善,遂至於文 又 則不得聞吾過矣。」人 日 其 故, 「中顔 日 自謂 一無 미 不 且 能 可 攻 飾

學,其思之必精,其 德性 .聽之必專,人乎耳,著乎心,此德全而 m 尊矣,故君子日就,小人日遠。 畏之,此君子之重而威也。 游 日 「正其衣冠,尊其瞻 行之必篤,其問 重 視,儼然人 之必 而 由是而 三威,則 切, 學

下,

以天下之善

 \pm

一爲未

足,

mj

求之古人。

之一國;

以一國之善士爲未足,而求之天

無

友

不如己者,尚友之道也。

求得賢者

能 文 往 以往 義 爲 信,所以進德也,如甘之受和,白之受采,故 心 招 子之論尚 故爲仁不主於忠信,則仁必出於姑息, 而 必忠信矣,故其言爲德言, 善學者其 固 立矣。 . 矣。 數仞之牆,而浮埃聚沫以爲基,亦没世 m ,無時而不在是焉,則安往而非 必忠信也,故其行爲德行。 以 辜,何威之有? 不主於忠信,則義 ,則禮必出於足恭 爲有鴻鵠將至者有之, 非敗德哉,而 反是, 友也,以 故主忠信者,學者之要言也。 心以忠信爲主。 則言 招憂, 何進 一鄉之善士爲未足,而 道聽 必 德之有 出 ,智必出於行險,安 行 而 於矯抗。 招 不言則已,言 途說 何固 辱, 不行 焉? 止 者 之 而 貌 進 1有之, "則已, 思, 有? 招 操是 譬之欲 德 淫 哉 動 示 10 而 而 忠 好

棄

二六

子曰 勝計 者輔之。 學成之。學之道必以忠信爲主,而以 言之過,則一言善矣, 能改一行之過, 而 必樂告以善道,故以過則勿憚改爲終焉 起矣。 行善矣。 友之,則聞 哉? 過 此 雖然,使其或吝於改過 然則君子之道以 仲尼所以 m 若過而每不憚改者,其爲善 其 能 所 改,善莫大焉。」蓋能 不聞,見其所 期子夏之日進也 人威重 一,則賢 不 一爲質,而 見, (者未 勝己 改 mi 以 可 則 孔 德

憚改, 也。 拒 者處也。 後 道 「無友不如己者,商也 m 友 也 已,不必勝己也。」 可 也?」1日 楊曰: 無友不 以 雖有輔仁之友,無益 與權,故不固。 儼然人望而畏之,則有威矣。 然我之不賢,人將拒我,如之 如己者,資 「正其衣冠,尊其 「所謂 日進,以其 以輔仁也。 主忠信,所以 如己者,合志 矣。」 ,瞻視,自重之 好 與 或問 然 學然 勝己 何 過 進 同 其 德 而

> 信,其忠信不 志 速,故過則勿憚改。 不篤 曾子曰: 尹 日 : ,志不篤則所學不 「不厚 如己者,則 「慎終追遠,民德歸厚矣。」 重 君子自修當如是也。」 則 無 勿友 能堅固。 威 儀 也。 無 遷善 威 主於忠 儀 則

於遠,足以化民歸於厚德也。」 慎終追遠之大者也。凡事能慎 伊川《解》曰: 「居喪盡禮,祭祀致誠, 於終,不忘 又《語録

之行,一於孝; 勿忘也。先王重喪祭所以厚民德也。 始,使民勿倍也, 范曰: 「慎終追遠,不止爲喪祭。 「慎者、誠也。於終者誠 慎終追遠者,孝之終。 於遠者追之如近,使民 之如

吕曰: 「喪祭者,慎終追遠之一 端

耳。」

友」, 四庫本作「人」。

二七

日:

也。 降,非爲人而然也。 强 以 爲之棺槨衣衾,爲之春秋祭祀,聖人 當大事 民哉? 以此教民,則民德歸厚矣。」 曰 0 彼有感於狐狸之食,霜 養 蓋 生 J 以此處己,則己德歸 不 情之至 足以 當 極 大 而 事 不 可 惟 露之 以 送 貴 厚 僞 死

以

口

不忘 遠者,人所易忘也,而追之: 有妻子則慕妻子,知好色則慕少艾,仕則慕 楊曰: 游曰: 因物有遷也。 則民德歸厚矣。歸者,反其生之謂 「終者,人所易忽也,而慎之, 「人少則慕父母,其生厚矣, 至於終遠,猶且慎之而 厚之道也。」

終,不忘於遠,非 遠 之主事 尹 也。 日 . 推 居喪盡禮、祭祀盡誠,慎 而 至 惟己之德厚,化 於天下之事, 民 皆 亦 能 歸 終 慎 於 其 追

也。」

子禽問 於子貢 日 夫 子 至於 是 邦

> 與? 夫子之求之也,其諸異乎人之求之 子貢曰: ,必聞 其 「夫子温良恭 政,求 之 與 儉 抑 讓以得之。 與 之 與 ?

也; 光輝 也。 則不好勝。至於是邦,必聞其政。」 以接物,良乃善心,恭則不侮,儉則無欲, 語録》曰: 德容如 接於人 伊川《解 恭,莊敬也, 者 「子貢善形容孔子德美: 是,是以諸 **>** 日 也。 温, 儉,節制 温 侯敬而信之。」 和 良 厚 恭儉讓,盛 也 也 3 良, 讓,謙 德 之 遜

豈弟 也。 不回。」 豈弟非以干禄,不回非以求 敬人者人恒敬之,是以所居之國必聞其政 夫子之求之也,其亦此之類也與? 仁者愛人,有禮者敬人。愛人者人恒愛之, 《詩》 制干 范曰: Ĕ 禄之道也,不回則求福之道也。 「温良,仁也, 「干禄豈 一弟。」又曰: 恭儉讓,禮也。 福 子貢之

以 者,亦不過乎此。 徒,各以 得政,則 其 識 由 知之淺 \overline{h} 者。 若子 深 雖 而 貢 堯 觀 則可謂 舜之聖,見 夫子之德 善觀 於外 夫 其 子 所

道 而 [惡盈] 人與之也 日日 而 好 謙 ,況聖人之謙乎? 温 良 【恭儉 讓,皆 謙 德 此 所 也 以 求

以 也。 充, 不 之容,如「天子穆穆,諸 之容,非誾誾,非侃侃,非提提,非 髮上衝冠; 也,故以聖人儀形明之。 ·爲物侮 名之乎? 有求者,必以 和 必有光輝著見乎外者,蓋誠之不 謝曰: 之發也; 然則德至於聖人之地者,其必 剛 「此一節論 蓋 不爲物懼,其 剛 喜隨 清 暴狠 和 口 可 人 爲 爲 愎, 侯皇皇是 也 也 蓋 學之既成,德 則 惟 如 而 而 粗 其容悻悻 温 此 難 難 厲感慨 良 者 於良, 於 人恭儉 也 總 不 温 有 總 口 可 然; 温 讓 聖 勝 則 性 良 聖 者 足 人 計 揜 内 必

> 觀,豈 易直 敬乎 春 此, 本無 乎 觀 炙之者乎? 者想見其形容,●猶能使人興起,而況 其惟聖人能之乎? 今去聖人久矣,以 儉,有物我之心者必不讓。 忿懥之心者必不温,有忮剋之心者必不良, 貌如此、諸弟子豈不能學以致之乎? 遠暴慢不足道也,遠鄙倍不足道也 不 有欲上之心者必不恭,有驕人之意者必不 恭 如 則泰然矣, 儼然矣。 競 之 此 不 雖 其儼然也,豈不如 人也, 發也。 强之心,行如之何 本無侈泰之心 欲有爲於一國者,其能 威儀可象,豈不和樂,豈不 不 爲 借令魯衛之君, 獨能不驚且疑乎,獨能 當時 本 無 所用 侮 人之 ,用如之何 秋 其 猶爲 ? 泰 m 心 則温 -, 貌 然也, 豈 不讓 雖甚庸 片 當 不 良恭儉讓 不 時 就 而 如 ? 容 所 之 而 不 莊 不 且 於親 ·親且 此 蓋 夫容 止 敬 謀 敬 不 至 儉 何 五 有 如 ? 於 可 而

● 「見」,四庫本無。

行矣。 聖人 雖 子貢者,亦可謂善觀聖人矣,亦可謂善言德 木 威儀之間,亦 吾 於此,豈獨知聖人哉,又將以 以 吾 其 與 知 聞 所 之 以進 也 學 德 者儻 矣。 知 然則 有 子貢 心 爲 於

乎 慢侈泰, 在 ? 我 耳 楊 E. , 所以異乎人之求之者也。 則 人所忌嫉,雖欲求之,其可 「夫子以是五者得之, 若夫暴 則 求 之 得

必 則 於人者也。 聞 不侮 容 其政 如是,是以諸侯欽而信之,至於是 尹曰 也 也 : ; 温 儉則 温良恭儉讓, 和 厚也 無欲也; 良,易直也; 聖德之光輝 讓,謙順 邦, 也。 恭 接

在之道,不必主事而言也。」 伊川《 子 日 《解》曰 三年無改於父之道,可謂孝矣。」 父在,觀 「孝子居喪,志存守父 其 志 父没, 觀 其

> 當争,父死則當改,不可以待三年也。」 事,顯揚其 事生,事亡如事存也。 ,諭之以道; 范 日 美; 父在, 父没,觀其行 三年無改於父之道,事 觀 其 若其有過,父在 志, ,則能繼 則 能 先 志 意 則 死 述

如

志

及; 之? 父之道可改也不可改也,亦遑恤 皇皇然如有求 間,賢者處之,則如白駒之過隙。 之道,豈以爲父之道不忍改與? 蓋三年之 世,孝之終也,觀其行可也。 謝曰: 觀其 坐則見親於牆,食則見親 志可也。 「有父兄在,如之何其聞 而弗得,望望然如 立身行道, 揚名於 三年無改於父 乎? 於羹 有從 當是時, 而弗 斯

若武 宗不踰年而改之,天下後世不以爲非者 待三年? 文武之道,雖行萬世不可改也,何止三年? 一帝権 游曰: 利之政,德宗宫市之事,昭 今言無改於父之道,則在所當改 「三年無改於父之道。若堯舜 何 順

也。 改之道乎? 孔子所謂古之人皆然者,豈爲其父皆有可 者,有身自執 喪之制, 而 可以未改也。 如以爲聽於冢宰,爲嫌於改父之道,則 有不言 蓋哀恤之道當然。」● 事 而 加 人君士大夫皆當 事 後 公行者: 行者,有言 此尊卑之等 而 如 後 此。 事 行 居

可謂孝矣。」
也。君子不忍死其親,故三年猶不改是焉,故父没然後可以觀其行。出必告,反必面,故父没然後可以觀其行。出必告,反必面,

故也。」 然則三年無改於父之道,孝子之心所不忍終身無改可也, 如其非道,何待三年?終,三年無改於父之道。說者謂如其道,雖行,三年無改於父之道。說者謂如其道,雖尹曰:「父在觀其所志,父没觀其所

道,斯爲美,小大由之,有所不行,知有子曰。「禮之用,和爲貴,先王之

又曰: 斯爲美,小大由之」, 和,不以禮節之,故亦不可行也。」 也」。禮以和爲貴,故先王之道以此爲美, 不行,知 而小大由之, 然却有所不行者,以知和而 加 禮之用,和爲貴。有不可行者,偏也。」 禮勝則離,故「禮之用,和爲貴,先王之道 安 伊川《 别而和,爲可貴也。」 「知和而和,執辭不完。」 而 和而 和,不以禮 解》曰: 和,不以禮節之,亦不可行 「禮之用,和爲貴。 節之,亦不可行也。」 樂勝則流,故「有所 又《語録》曰: 又曰: 恭

也。敬者,禮之所以立也, 和者,樂之所欲天下皆可行,人情莫不安,此所以爲美用,則以和爲貴。先王爲禮,非以强世,蓋用,則以和爲貴。先王爲禮,非以强世,蓋

0

今據四庫本、傳經堂本、紫陽叢書本及和刻本補。本並作「良」,公善堂本作「衡」、《游廌山集》作「體」。「哀」,原爲墨釘,四庫本、傳經堂本、紫陽叢書本、和刻

之爲 以 口 動 由 不 謂 丽 生 美, 有 미 達 也 樂 禮 節 行 勝 ௱ 樂 則 也。 有 不以禮節之, 之本。」 敬 禮 樂勝 也 故君子禮樂不 而 ,行而 無 則 和 流 禮 則 有和 則至於 禮 勝 勝 則 則 可 樂也。 離 斯 流 矣。 有 須 此 和 (去身, 其 有子 知 M 所 和 無

子知以 之。 序 民 强 文武 以 飲 酒 勉以 清 共 食之性 相 而 自 也 由 而 成 謝 出 性 唐 害安逸之性哉? 不 和 日 離 於 益 莫不如 敢 陰陽 至周,數千載間,無苦心刻 哉 爲 : 所 勉 先王 厚, 貴 飲 ? 不安之患,父子 强 蓋蓋 也 禮樂之道 風俗 献 肉乾 之 是, 五有見於 剛柔 澤既 不 益 IIII 何獨禮樂不 圃 一敦,得 出 不 也 百 , 衰, 於 天下宜之,後世 敢食, 一,動靜 異用 此 拜 循 禮文 也。 非 ,几設不 益 理 丽 以 豈强勉以 而 也 親 然 同體 知 不 和 乎? 仁義 此 出 君 意 止 爲 倚 於 於 貴 臣 不 則 相 쓹 益 與 害 飾 誠 安 反 而 知 有

所 子 禮 夫者 其 不入 要之 以 能 無 也 家使 力之 貌 由 疏 有 ,豈不以 隆 無 强 制 以 嘻嘻乎? 節之,蓋 察 之,不以禮節之,故均 辨 我 語 世 其 作 至此 人 異於人之和者, ,必有異於上大夫矣。 殺焉,又況小大乎? 容,肅欽之心,跛 從 也 室 者 之 如 事 末 源 時; 者 流 有 此之難從, 於 也 ,則和 數乎? 恶 聖人於一拜一揖、升降之間, 斯 敷 矣,或以爲忠信之薄 0 而 知 其 ? 也 不 或以爲 之禮 此 曲 一瀆也。 ·及先王也,豈非 士又牽於世俗之習,而 往 小大由之,有所 則 家人之失節,豈 喪矣。 往 殆不若夷俟 知 倚 知 僞者有 如 於 其 以 所 事 季 不 有 節 臨祭者多矣。 君 則其用和於下 知和 真 氏 口 反 矣。 之 矣,或 之祭, 儒 行 加 辱,朋 m 既 也 己。 過 者 聖人 倨肆之愈 不 不得位 和,不 不 我 有 以 雖 行 門 矣 之 以 友 爲 有 大 莫 和 之 以 難 婦 猶 恐 而 强

楊曰:「禮以敬爲本,進爲文,進而不

子與 大由之也。 美 至 已 也 則 侃 如 E 至則 離 故 也 大 然 小 不 夫言,誾誾如也, 則流矣,亦不可行 以用 大 此 侃 可 以有 侃,和也。 之謂「知和 皆由之, 和爲貴。 加 矣, 則有 上下異施,則非小 而 故先王之道斯 《易》曰『履 和一然 所不行焉。 也。 與下大夫言。 和 和 丽 孔 爲 而

以

禮節之,

爲美,小大由之, 至於流 而和,不以禮節之,則失於流故也。」 宗也。」 尹 近於禮,遠恥辱也。 有子曰: 日: 禮之用以和爲貴,先王之道以 禮之弊則至於離,和之弊則 「信近於義,言可復也。 然復有所不行者,蓋 因不失其親,亦可 斯 恭 知

因 義,以言可復也。 恭信而不失其 明道 曰: 信近 於 信 所以親 恭 恭近 本不及義,恭 近於禮 ,近於禮義,故亦可 於 以遠 禮 也。 恥辱也。 本不 信 近 於於 及

> 宗也。 斯可矣。 如言禮義雖 不 可得見,得見恭信者

辱爾。 言可復爾; 其親,亦可宗也 親亦訓近。」 近於禮義也。 又《語録》曰: 伊川《解》曰 信恭因不失近 恭非禮,近於禮者,以其遠恥 又曰: 因不失於相 一, 況於盡禮義者乎?」 「信非義,近於義者,以其 「信能守約,恭能遠 於禮義,亦可宗敬也。 「因其 近,亦可尚 近禮義而 也。 不失 恥,

也; 之恭 文相 必近於義,故能成其信,故言不必信,皆 前文、義有未盡者、皆挈之。 於非義之信; 三者,知和 范曰: 屬 3 横渠曰: 恭而 而不蒙者。 寧孤 而 無禮則勞,故不能遠恥辱也。 能以 立無助,不失親 「信而 寧身被困辱,不徇人以失禮 「君子寧言之不顧,不規規 禮節之也。 凡《論語 無義則 賊,故復言非 它皆放此。」 》、《孟子》發明 於可賤之人 上有子之言, 可

29

於諂 此,而後能 愛必自親始,親親必及人,故曰[因 復 於聖人,故可宗也。」 也 聖人本末 恭必 恥辱可遠 至 近禮 焉。 先後 也。 則能 德 有本,道有源,其學出 有序, 君子 成其 君子所因者本, 恭,故其 必 自 示 恭 失 而 不 其 如 立

足遠其 堂,非禮之恭也, 必復其言; 有不足正其宗。 吕曰: 恥 尾生復言,非義之信也, 親親 恭主遠恥,然非禮之恭,有不 信主復言,然非義之信,有 義理之差,必至於此 主於有宗,然親 墨子兼愛,不可宗之義 失其等, 夷 不可 王下

行 古 言 者 至 ,則可以世爲天下道矣,使後世多識者, 是也 善 於使人可復,亦可謂善言矣。 謝 也 日 0 一義則 ,而況於近義乎? 「「復」當如「復白圭」之「復」, 言之中倫者是也,信且近 信則言之必 言而信 可

> 以 有? 人者 若是者, 不可以謂之親。 也 也, 致恭 敢侮 乎? 雖四海之内皆兄弟也 姻、婚姻之姻皆從因。 推吾一視同仁之心, 禮也,子道也,何恥辱之有? 勞則争先,行 亦 不中節? 則必後,禮也,弟道 曲拳,過位 食 可 而致恭,施於在我之上者,猶妾婦 有矣,未必中節也。 人者有矣,未必中節, 以畜德矣,言至於如此 施於在 其招恥辱必矣。 見父之執猶事父,年長以倍猶事父, 不侮之謂恭,中節之謂 内 親也, 生當有燕食之歡,死當有功衰之 非所當致恭而致恭也。非 必 趨 我之下者,是啟寵納侮之道 ,禮也,臣道矣,●何恥辱之 何謂 甥 也,何恥辱之有? 親? ,此特可以謂之泛愛、 因,親 姻 何謂 媾之聯 繫之以姓,綴之 也。 自愛 禮 其 中節 有 故姻 而 畏 不 外 ? 可 親也。 之 所 何 敢 擎 復 而 侮

● 「矣」,四庫本作「也」。

於諂 成 難,欲 地,適 治 戚 之,亦可謂美行矣, 其言,恭以飭其身,親以與人同,自衆人觀 惟 捨此三者之外,亦有 而 親 我 我 達 也 所謂 賤 之,亦有可 也 不失其 足以 免 也。 斯 親 招恥 其 者其 者,豈 所親,然後爲可宗也。 既諂賤 惟 親 師 辱取不敬也。 惟學乎? 者乎? 它人 雖 乎,教我 矣,豈謂所尊身之道。 非天屬,亦 可親者乎? 然一人於非 可 以 有之, 也, 擬 蓋惟 倫 信乎 可 其惟 其 也 學 禮 吾恐不免 惟 ? 信不食 미 求 親 友乎, 君乎, 道 義之 矣。 此 非 明

學也已。」

恥 惟 恥辱之道焉,以其近禮,故能遠恥辱。 而 義 之道 辱不足道也。 已 所在 ,以其近義,故可復; 至矣。 ,則言有不必復也。 信信 又因不失其親焉,是 信不失義,恭不悖禮,則 不 近 義, 而 恭不近禮 復其言,是 恭而安,則遠 亦 一,則 若 可 小 交 夫 有

也。」

足以 於義 然則恭信 子曰: 盡禮義之本,亦不失其所宗尚 3 於事 尹 日 恭 而慎於言,就有道 於禮義 非 「君子食無求飽、居無求安、敏 禮也,以其遠恥 信非 爲 義 近 也 者 以以 也。 其 而 辱, 因 正 言 其 焉,可謂好 則 可 也。 近 近 復 於禮 ,則近 未

爲 故 孔 此其自言也。其於門人,獨稱顔子好學,而 道者,則就 不及也; 之邑,必有忠信如丘者焉,不如丘之好學。」 語》記夫子之言好學如此。 文子不恥下問,亦謂之好學,則知學者鮮 好學矣。 食不求飽,居不求安。 范曰: 伊川《解》曰 慎於言者,恥躬之不逮也。 而正焉,故 學者,所以學爲聖人也。 「君子志於道,而 . 「敏於事,勇於行 無常 敏於事,行之如恐 師。若此, 又曰 不願乎其外, . 十室 也 미 荷 ^ 論 以 有

逸,獨 悅 悅 求 曲 學者之師也,其 者 性 事 居 有 聖人易之以 可可 者也,使其從大夫之後,斯爲之矣。 者 推之。 飽 陶 肱 無 人 於道,學所以正: 於徒言,必見於行 E (神而 一欲其 也,有財 H 加 復陶穴者矣,及 求 謝 吕 謂 與 安 枕 日 日 飽 不 人 一乎? 之」與「瓢飲 安 化之,使民宜之者也。 蓋上世 無求 求 異 烹餁 也。 飽 則 乎 不志 此 安,口之於味, 爲之矣。 且 事有可考者,如「疏食飲水, ? 是不然。 則 一當有茹毛食腥 此豈人之私 安乎? 節 是不然。 於 事,學所 至聖人易之以宫室, 食 學至於此 館 私 不可 E 食在 養, 欲 前以三鼎,死 此 此不 以事求,當 其 學 無 以 陋 孔、孟、曾、顔、 智爲哉? 餉 可謂 所 實 得不 四 財 巷」,可 者矣,及至 者 以 肢之於安 不 何 也; 專; 好矣。」 口] 미 獨 所 謂 然則 以 好 以 且 以 趨 易 學 爲 情 蓋 則 嘗 不 不

乎?

有能從方

事於兹數者,蓋亦考其

(用心,

而

勿

所爲。 既 邪? 乎? 能 焉,非篤意於美身,爲 出 夫言 欲 聖 未 言者豈少哉 求慎言之理 言及之而言 鲍 則有不忘其初之患,於斯兩者之間,其 得 速者 之心 得 如 於口,何慎之有? 賢 無欲速則有遲鈍 之,欲罷 此 而誾 所 慎非 豊 也。 也 則 夫欲速與進 以 拳 可 誾, 過 默 簡 不 拳 ? 矣,然 人 蓋 一言而 在 可 邪? 敏 默之謂,言及之 不 服 倚聖人之門牆 者 此未 非 朝廷 也 能 噟 安 進 而 且 取,聖人既不爲,及 慎 在 可 不 取 敏 難 厲 丽 捨是數者之外,可 非 及聞 謂 切問 ? 之謂 及事之累,不 非 言 便 失,其 囁 미 就 欲 便,正 謂 也。 嚅 之, 近思之學者, 謂 進取 有 速之謂 聖 之謂 ,說異言從法 面 道 慎 惟 就 語 賢 言 欲 平 而 顔 有 有 而 乃 與與 其 ? 正焉者。 豈 氏 不 道 À 狂 聖人 求 (厲也 既 於 惟 至衆 者 安 而 可 以 大 īF. 狂

考其 得 以 捨 後 顔 理之速,明 無 氏 行 之子,不 事 復髣 果 髴 何 理 求 於 可 mi 哉? 以 行, 此 矣。 語 不期而 此 非 矣。 好 又曰 學 速,非 當 而 知 何 是 自 當 手忙 敏 孟 之? 是 子

脚

亂

求飽 也。 則 心 君 也,雖賢者蓋 必 子何 於 進 學 也 於是,顛 者學 狂簡 矣; 與 夫 楊 食 學 安,則違是遠矣。 容心哉? 問之道 不知所裁,亦未足爲好學也 此者也。 而 然不 沛 求飽,居 有不 「君子無終食之間違仁,造次 必於是」, 知就 無他, 敢 隨 又能 有 所 不 m 道 水其 遇 飽者,如亥 則是心不可須 求 敏 孟子曰: 而 而 安,亦常人 事 IE 放 已。 而 焉 慎 而 則敏 而 一个,人 言 唐是也。 已矣。」 志在 八之情 曳離 則 慎 内 於 或

無

如

居 欲 侯 安 學者也。 日 (也,求 安 食 學 則 欲 志 如 飽 於安。 不及, 也,求 猶恐失之」,事 飽則志於飽 志於飽, 志於

> 理,就 苟 知 不 辭,與「不」字不同 其仁, 可不 如 是,非 有 敏 道 焉 也。 用 而 好 學 正 佞」,言不可 「禦 焉 而 人以 ,求所以詣 何? 口 不 給 無」字非 慎也。 屢 理 僧 而 於人, 禁止 自 學欲 信也 之

行 楊 者矣。然不取正於有道者,未免 君,謂之好學可乎?」 尹曰: 墨者,學仁義 「君子之學如此, 而 差者也,其流至於無父 미 篤 有差。 志 力

子貢 往 切 日 如?」子曰: 而好禮者也。」子貢曰: : 如 而 磋, 日 知 來 賜 如琢如磨」,其斯之謂與?」子 者。」 也,始 「貧 而 可與言《詩》已矣,告諸 可也,未若貧 無 諂 「《詩》云「如 富 而 無 而樂。富 驈 何

之謂 貧 富 也 所治當 明道 若貧 日 如 「貧 此。 而 言好 子貢引切 而 禮 能 樂, 則至於卑, 富 磋 琢 面 能 磨 好 蓋治之 禮 富 隨 m

三八

富 樂, , 餡尤甚於怨, 蓋守不固而有所爲也。」 而好禮, 則 至 非樂 於 驕 不能。」 然貧 而樂 又曰: 非 好 貧 禮 不 不 怨則 能

能 而 琢 磨 知自修之道,知來者也。」 處其分也。 ,自修各以其 川《解 **∀** ∃ 樂與好禮 道 「貧 也。 而 ,能自修也。 告之以樂與 無諂 富而 、好禮, 無 切磋

所 謂 内 好 自 一善矣。 不 禮 修 謂 者, 也。 聞 足,故以貧無 范 日 非自修者不能 夫子進之,而其 以知二,其自知 貧 「切磋 而 樂,非志學者不能也; 諂 者,道學 富 也。子貢外有 無驕爲問、蓋 亦明矣。」 知又足以 也, 琢 知來者, 磨者, 餘 心 富 所 而

斯,使之成器,必切磋琢磨之,工不 生之際可以 未嘗變也。 吕曰: 惟士爲 無變,況貧富之間哉? 能。」夫士苟能守其恒 孟 士之處於貧富,亦猶 子曰: 「無常産 而 同,而 ۱Ľ, 有玉 有常心 是 雖 也 於 死

> 觀 貧 有 而 禮者也。 者 也。 以 夫 而樂,貧而自樂也; 無 其狷介之志,何時 所 與之,乞人之不屑, 豆羹,得之則 謂「未若貧而樂,富 於善,雖貧富之異,而 則 無驕於人也: 謝曰: 弗 以道自 貧而無諂者 諂 無 食 人亦 驕 (樂, 則 「此一節論 若斯人也, 何與於 富 其 生,弗得 則 無諂於人也; 心亦有 此物我相對之稱 加 以 而 9 我 富 能樂邪? 禮 好禮」之爲美也。」 質美者當學以成之 吾 哉? 則 而 自好 及其 何 動矣。 心未嘗動 死し。 好禮,富 當 嗟 諂 蓋 皆欲 來,雖 此貧 此孔子所 於 至於蹴 富 人哉? 也。 一簞食, 而自好 也 而 吾 身之 而 無 貧

⁰ 「之」,四庫本無。 「恒」諱作「常」。」按: 上韓、 常」字,四庫本、公善堂本並作 阮元《孟子注疏 原本作「常」 校勘 記 者 》謂: 蓋避 宋真宗趙 「《石經 行 本《孟

也,舉 若 以 禮 與富 敢 所 諂 嗚 加 如 い騙於 以 損 直 磋 斯人 呼,其亦異高叟之爲《詩》矣。」 琢 怨 如如 長 異 如磨,成德也。 而 而 八者,亦 於 人 好禮直不同 知問學成德之事,善 守 之 隅而 琢 ? 術 貧 如磨之義。 也 亦 而 然其 能以三隅 何 樂 時 何敢 也。 自愛之心,未免乎吝 能 而 也。 中 知所以守富之術 語以「貧而樂,富 驕於人? 富 反者 禮 如 子貢聞 者怨之府,儻 切 邪 乎子貢之達也。 如 也,故知 ? 磋,問 此 滿 以知 富 而 學 有 丽 亦 不溢 加 如切 也 知 也 無 好 驕 何 所

有 富 磋 見於斯歟?」 琢磨言之,其知來矣。 而 好 楊 禮,非 目 「貧而 知自修不能 樂,非 所謂 有道 也 聞一知二者, 學 故子貢 不 能 以切 也 3

能 已 也 尹 至於貧 日 切磋 琢 「貧能 而 磨,自修之謂 樂、富 無諂,富 而 好 禮 也。 能 無驕, 非 告 自 以 修 安 者 分 樂 與 不 M

> 也,能 好禮 也 以 而 意 能 逆 知 志 自修之道,告往 而 得之,故 日 「可與言《詩 知來者 也 賜

故人 爲師,善者不得以爲友,何 患 有不知者也。 人不己知 有能 范曰 : 而 己不知,君子之所患也 0 然道 若己 學以爲 積於中, 不知 己,非 人, 則德見乎外,未 求人知也 以 則賢 進 者 其 德 不得以

知,則、 也。 之」,所以立命也。」 吕曰: 君子 亦有命 之學, 示不 而 已矣。 自 患人之不己知。 充其 孟 知 子曰「修 爾 若人之不 知, 身以俟 知

高視 者? 七十 子則易。人之所以 下則易,如七十子知夫子則 謝曰 大人之視小人,如見肺 「天下之理, 自 相 下視 知 肝 難, 何 高 則 有 夫子 小 難, 不 然 知 M

於人知乎? 乎,人知者爲大乎? 窺君子,莫見畛域。 此學者之患也。」 以是觀之,知人者爲大 盍亦急於知人乎,急

甚? 知, 邪淫遁之辭,足以妨道而亂德,其爲患也孰 無以加損焉,何患之有? 不知人,則詖 楊曰: 「君子求爲可知而已,人知不

己既明哲而知人矣,豈有人不知哉?」 明達爾; 者不能。 尹曰: 侯曰: 「知人明哲之事,非學造精微 故君子所患者,患學不造理,識不 人之不己知,非所患也。 「君子求在我者也,故 不 雖然, 患人

能辨,故以爲患也。」 之不己知。 其不知人者,則是非邪正 一或不

國 朝 諸老先生論 語 精義卷第一上終

五上同此,不再出校。 終」,原無,爲統一全書各卷 義例補 下至卷

四〇

國朝諸老先生論語精義卷第一下

爲政第二

子曰:「爲政以德,譬如北辰,居其所

而衆星共之。」

横渠曰:「爲政不以德,人不附且伊川曰:●「爲政以德,然後無爲。」

勞。」

也。 至靜 信,無爲而 務德 是故所守者至簡, 而 而 范曰: 己。 能 制 爲政以德,則不動而 成,如北辰之居其 「人君欲天下之歸己, 動 所務者至寡,而 而能: 御煩 所 化,不 而 則 衆 能 所 星拱 莫若 服 處 衆 者 而

吕曰:「爲政以德,自治之道備,則不

己。」 求於民,而民歸之。 故大人之政,正

己

而

也。」 外之殊,及其時措之宜則一也。 以德者如之。學以成己,政以成物,雖有内 故謂之北辰。 物爲事,而後能使民從己者,則是居 者,特推吾所有,與民由之而已。 故謂之北極; 天下也。不出家而成教於國,此 禹、稷之事也。親其親,長其長,未必 仁義之君子,一旦中天下而立,未 不勞,在人則易從。苟爲不爾,將弊弊然 謝曰 : 「北辰,天之機 於此見無爲而爲矣,故爲政 以其 (所建 周於十二辰之舍 也。 以其居 故在 以德 語未必 必 陋 能 爲 巷 我 Ψ. 爲 積 則 政 以

星也。居中故謂之極,中而不遷故謂之守至正,而天下從之,故譬如北辰。辰,極特至。「政者,正也。王中心無爲,以

● 「伊川」下,四庫本有「解」字。

29

辰。」

不以德,則人不附且勞矣。」 而治,人之歸之,如衆星之共北 尹曰: 一爲政 以德,則 不 動 辰。 而 化, 爲 政苟 無爲

子曰: 「《詩》三百,一言以蔽之, 日

「蔽,當也。 伊川曰: 思無邪」。」 《詩》三百篇, 思 無 然邪,誠 惟「思無邪」一言 也。

又曰

以當之。

至正。」 禮三百,曲 要,知要則能守約,守約則足以 毋不敬。」 言可以蔽之,思無邪是也。 范曰:禮 又曰: 三千,亦可 「《詩》之義主於正己而 「王中心無爲也, 以一言蔽之,曰: 學者必務 盡博矣。 已 以 守 知 經 故

先 其流出於楚漢,猶有屈宋蘇李; Ŧ 一之澤。 謝曰: 先 「《詩》者,民之情性之正,出於 王之澤既 熄,而 詩》遂亡。 魏晉 齊梁

有取 心讀之乎?」 憂思慮之作,孰能優游不迫也? 聖德之形容,固不待言 伊阻。」役行無期度,思其危難以風 行。」至軍旅數起,大夫久役,止曰: 之詩也,其言不過曰: 『土國城漕,我獨 日 其言,亦將以考其情性, 之間 曰「苟無饑渴」而已。 言率皆樂而不淫,憂而不困,怨而不怒,哀 於此猶能並與其深微之意而傳之。 性,又將以考先王之澤。蓋法度禮樂雖亡, 謂一言以蔽之矣。君子之於《詩》,非徒 而不愁。如《緑衣》,傷己之詩也,其言不過 義,非易其 亡邪? 焉。 猶 「我思古人,俾無訧兮。」《擊鼓》,怨上 蓋求其止 有鮑 作《詩》者如此,讀《詩》者可 心 而 謝曹劉,孰 後語 乎禮義 者不 若夫言天下之事, 而可 謂 ,非特以 能,則 則 當 知也。 無 春 也。 秋之 思 孔子所 為,不 無邪」 故其爲 考其 其 止乎禮 時 「自 以 與 而 過 邪 秋 胎 美 南 誦 可 遽

乎? 得 謂 子 惟 議 能 神,其孰能與於此?」,夫自至神而下,蓋未 然 於 日 思 E 瞻 也。 無思土木可乎? 無思也,惟無思爲足以 不 貌言視聽必有思焉,而 無邪者,惟有思而 『思無邪』 然而皆止於禮義也 動,感 日 楊 《繋解》曰: 「君子有九思。」 思可以作聖,而 「《書》曰: 《詩》三百出 「有思皆邪 而遂通天下之故,非天下之至 言足以蔽之。」 〈 詩 》 「易,無思也, 「思日 發於 於國 此 無所 也,無 非 人情 皮,固 睿,睿作聖。」孔子 窮 感通天下之故,而 思乎?」如 神知化,未足 謂有思皆 思 止乎禮 無 未 或問: 則土木也 無爲 邪 能 而 不 也,寂 何? 義 己。 邪 君子 思 可 而 與 固

邪 不 地 ,感鬼神, 同 而 其旨 日: [則可 莫近於《詩》,非正 夫子既删之,止乎禮 「《詩》三百篇 一言以蔽之,曰:),其 所 思 雖 奚可 美 悪 哉? 義 怨刺之 動天 思 無

> 格。」 子 恥 日 道之以德,齊之以 道之以政,齊之以 禮,有 刑, 民 恥 免 且 而

恥,不待上之命而然。」 日 . 伊川 「有恥且格,此謂 日 : 「格,至 庶民。 也,至於善。」 士則行己有 又

之事也。」 足恃也如此。若夫先之以博愛,陳之以德 則無所不至,犯上作亂者有之矣,刑政之不 率人,而齊之以刑,則苟免而 義,道之以禮樂,示之以好惡,皆道德 范曰: 「政者,法度之 事 無 也 恥 0 以 無 法 齊 度

子,則政足以不煩, 切任治外之法,則民將失其本 日日 治内者, 先格人之非 德禮者,所以治内; 知 本 末 刑足以 、先後, 心,使之可 不用 刑政者, 然後 心,不 也, 可 以 以 所 爲 以 乃若 君 治

思」,原作 和 刻 本改

無從 以 畏 德 治外之法 則人皆可以爲君子,雖有政刑,非先務也, 治内 罪 禮 發 而 之美,冒 也。 已。 行, 而 故政刑之用,能使懦者畏,不能 犯不 刑 則不 又曰: 政所以 義, 知 爲善之美,雖有本心, 無 治外。 所不作,雖有格者 德禮者,先王之所 治内之教行,

使

强

者革

,此之謂失其本心。」

政。 於犯刑。 至於並 無德與 善其心,●故有德禮; 於小人乎 ,則君子至於犯義, 道之以德,齊之以禮 政與德 謝 禮 日 與 一刑政 君子犯義,是以無 加 爲先後, 刑 「道,所 而亡,故哀刑政之苛。 政 7.猶 存焉,故傷 刑與禮爲 以勸之; 欲以正其身,故有刑 刑 ,雖刑措 恥 政苛,則 而 表裏。 人 齊,所 苟免者多, 倫 可 之 小人至 也。)廢; 以 人倫 以 欲 率

遠 罪 而 楊 己, 日 故免而無 道之以 恥, 政 ,齊之以 道之以德, 刑 則 齊之 民 知

> 以德 禮 夫禮 以 所以不悖歟?」 王 用 非 禮 樂刑 刑 爲 不 則 也。 政 用 民 也 刑 政 日 有德禮 政 四 遷 也、《書》曰 伯夷降 達 善 而 而 則 不 不 刑 悖 典 自 政 行,折 「德爲善政」,●則 知,故 則王道成矣。 在 民爲 其 有 中 刑 恥且 矣,兹其 則以

化矣,王者之政也。故有恥且格。」齊之以禮,則教之也。教之,則民日遷善而之,霸者之事,非有以教之也。道之以德,矣可。侯曰。「道,治也。以政治之,以刑齊

以禮,則教化存焉,所以有恥且格。」化矣,民雖苟免而無恥, 道之以德,齊之化矣,民雖苟免而無恥, 道之以德,齊之

立,四 子曰: 而 耳順,七十而從心所欲,不踰矩。」 十而不惑, 「吾十有 五 五 + 而 而 志於學,三十 知 天 六十 而

爲」,和校云:

[「]以欲」,傳經堂本、公善堂本作「欲以」。

直 百 能 立 「孔子生而知之者也 知天命, 圃 而知之者,所以 ,能自 又曰: 成 有 喻 事則滯於 ,耳順心通 不惑,五十 人言己 知 誠 章 立 許 而 ,無所不通。 伊 天 ĴΠ 命 之 文 乃 多節次者; 下 則 立 達。」 亦 「孔子之學,自十五至七十,進 不 解 四十 理 於 思 節者,言不惑, 法, 一事 勉 由 知天 也 斯 **>** 盡 而 日 學 教 而 而 性 道 盈 不不 知之也。 又曰: 凡人聞 不惑, 命 人 丽 中矣。」 七十縱心,然後至於命。」 也。 也 科 能 至, 聖人未必然,亦直且 而 也。三十有所立 而 吾 未 自十 貫 明 後 耳 不惑 + 所 通。 至命,六十聞 一言則滯於一 順 進,不可差次, 六十 則自誠矣。 善之徹矣。 以 + 有 五 又《 五 所 觔 Ti. 以 則 耳順者,聞言 而 而 語 進 往 聞 無 而 耳 志 皆 後 録 志 事 所 於學, 人 於 順 通 疑 五 四 皆 日 知知 言, 也。 爲 德 + : 須

> 欲,不 也。 者,在人之最 而 得也 踰 然猶 矩, 則聖 滯 末 於 者 (迹焉。 人之道終矣。 也,至 耳 至於七 而 順 此 則 縱 是 之 1 不 序 所 思

知。 公。 化。 與 天同 理盡 也。 性,然後 裁,其進德之盛者歟?」 察, 異於它人, 故自 常人之學,日益 天地 六十盡 性,至天之命,然不可自謂之 縱 四十 横渠 德,不思不勉,從容中道。」 心 參,無 又 至於命。 -精義 而 日 日 不 : 人物之性,聲入心通。 . 意 踰 致用,時措而 「三十器於禮 我 矩 而莫自知也。 縱 盡 一老而 固 心 人物之性,然 十五 必,然後 莫 如 安死,然後不夢周 又曰: 至七 夢。 不疑。 範 仲尼 非 十,化 圍 强 至, 見周公, 後 天地 行 五 立 窮 又 耳 理 而 著 曰 故 + 之 之 盡 知 漝 與 窮 謂 E

0

[「]縱」,四庫本作「從」,下同,不具校。

[「]察」,原作「祭」,今據四庫本、傳經堂本及和刻本改。

志 順之至 也 也。 不 夢 老而安死,故曰吾衰 欲 不 踰 矩 也 不 也久 願 乎 矣。」 外 也

也 衰。 所 思 欲,所以 塞於天地者也 矩也,是以能縱之。 窮 者,孟子所謂 至七十 老則縱 三十之事也。 加 俾予縱欲以 聽 理盡性,故知天命。 立者,既壯 而 無非 「老者 舜耄期倦於勤者,其血 范曰: 得,此所異於人也。 ·而縱 心所 養血 予欲宣力四方,汝爲。」此舜之所欲 道也。七十而縱心所欲,惟 安之,朋友信之,少者懷之」,孔 欲,皆 心所欲,此與人同者也。 「聖人生而知之,不勉而 治。」又曰: 氣 不動心者也。 矣,非禮無 四十而天下之理得矣。 無無 也。 ※時而 I 所以 夫血 君子困以致命遂志, 六十 衰 自十五始志 氣 以立。立於禮者 其德 「予欲左右有民 有衰 而 氣衰也, 五十而學《易》, 七十 耳順者,耳之 也。 前 而 舜曰: 縦 志 於學, 中,不 三十 不惑 不踰 心 志 氣 所 m 氣 無

> 則何 也。 子 禮》、《樂》,修《春秋 之 以爲法乎? 蓋自七十以下,未與於此,若其踰矩, 所 欲 也 及 夫 時 》, 此 不 用 縦 心所欲之大者 道 不 行 則 定

之虚 酢 能 「,通貫乎全體。 至七十,然後化。」 萬 淫, 吕 日 貧 用無不利, 賤 「信有諸 不能 移,威 己,故志 故不惑。 武不能屈,故立。 。六十,心 於學。 富 知

酬

不

烹飪 居也。 於是也, 理 雖 飽 聖人生而知之也。 熟與不熟有差別耳。● 始 飫 終 厭 焉 謝 曰: 足,已 不 譬如飲食焉,始則 於其 已而設匕箸焉,已 同,何嘗 不踰 「此一節論道之精粗無二,特 、間有所謂立,則物莫能揺奪 愐 矩,不踰於是也 知 有二物哉? 嗜好與滋味 生而知之,特聖人之 雖始於學,亦可 知其 加 可 可 一,亦豈 兩 於 志於學,志 嗜,已而 口 相 忘 有一 已而 以 不 見 加

[「]特」, 原作「時」 據和刻 本改

之所 乎 以 舉 知 能 理 故有 心 不 欲 内外 而 爲二,决無 可 童 ·學爲 豈 以 知 廢之矣。 立, 時 雖 加 固 能 미 道 ,已知有此理,有志焉者,知其學,而 所 得 意 自出,與 矣, ,益見其狂且妄也。 安且樂也。 未嘗思,然亦未嘗無思也。 兩忘矣。 有知 决 未知以學爲事, 有所 欲 馬,不 難 而 無 (徳爲尤難,蓋非 也 損 謂 有所謂 耳 天 不 或乃以謂聖人縱心之妙,不 知 命 未嘗放,故不踰矩。 之無間 順之理。 惑之理; 可得而 至於此,則酬 今天下之士,視聖人志學之 心雖未嘗放,而非出於收, 天 者 若見道不明,决無志 命 不惑,則 乎; 矣 益 則 决無可立之理, 然則不 知 心 知 今去聖人既遠,所 不知天命,則 規 且 理 雖 有 高明之難,而 酢 盡 不盡 欲 所謂 之 事 志於學者,● 物理 所 不 未嘗無思, 物之變,雖 聖人於成 性性 自 加 耳 而 意 順 來 學之 與道 且 無 學 不 後 疑 則 性

> 事 怵,始可以當志學之名,始可 日 子 反,决知 者儻能離經辨志,親師擇友,决知中道而 當學而安之。● 有所未知,亦當學而知之, 而知之; 何 ,時也。 `特以爲淺近,又豈知何害其爲生知 志乎學,吾必謂之未也。」 害其爲安行乎? 不爲外物摇 是可不謂難矣乎? 聖人之於安行,豈物物而安之? 下學而上達,正如是爾。 聖人之於生知,豈物 奪,决 知不 以知聖人 有所未安,亦 未能 爲 如 異端 此 八爲童 乎? 誘 學 物 不

乎操 矣。 聖 自十 人乎?」非知聖人者也。 也 縦心 五 楊 曰 志 學, 楊子曰: 而所欲 「學始乎 積至於七十,則終 不踰 『能常操 矩, 爲 士,終乎 則 夫以孔子之聖, 從容 而 存者,其惟 中道 八乎爲 爲 聖人 無

[「]志」,四庫本作「至」。

[「]之」。四庫本作「知」。

[「]楊」,傳經堂本作「揚」。

論 孟 精 義

也; 將聖 可勉 其學不 今之後學皆能知,孔子必 皆知之矣。孔子曰:『五十而知天命。』豈 天也,莫之致而至者命也。」又曰: 以 不得爲有命。」●世之後生晚學,讀《孟子》者 水火之著明也。 孟子曰: 曰然,而未有信而不求者,以其知之不若蹈 告人曰『水火不可蹈』,人必信之,以其知之 竊謂其知之未至也。 至乎縱 以其身爲天下法,故言之序如此。 世之學者,皆言窮達有命,特信之未篤,某 分身教 也。 而 蓋孔子之所知,殆不止此也。」 告人曰「富貴在天,不可求人」,亦必 漸 也 待十年 心,故未達一間者也。」 進 其學宜不俟十年乃一進,蓋 也。 以聖哲自居、庶乎學者 前 進, 又曰: 知之,斯信之矣。今 而其言若此者 「莫之爲而爲者 至五 「孔子固天 + 又曰: 加 「得之 顔淵未 知 「所謂 後 聖 縱 此 知

> 盈 聞 則 此,其亦勉進學者不躐等之闕。 而 肾通 無 知之者,而言十五至於七十,成德之序如 科而後進,不成章不達。」亦此意也。」 日: 所 御,子告之曰: 祭之以禮。」 日【無違」。」樊遲曰: 懿子問孝。 也 疑 也。 「生,事之以禮, 縦 知命, 心,則 子曰: 窮理盡性也。 不勉 「孟孫問孝於我,我對 面 「何謂也?」子 中 「無 死,葬之以禮 也 違。」 孟 耳 子日 孔子生 順 |樊遲 所

已,故告之如此。」 臣,其事君不以禮多矣,其孝宜盡此三者而 告也,故因 復問,則將以不違君父之命爲孝,此不可 後語之。]孔子告以「無違」, 范曰:「《學記》曰: [樊遲 御以告之。 孟氏,魯之世 而孟 『力不能問,然 懿子不 能 不

吕曰: 「孝者仁之出也。 不以仁之道

0 「爲」,四庫本及《孟子》作「曰」。

尹 曰:

「立,能自立於斯道也。

不惑,

四 八

哉? 厚其親 家 以「無違」。夫能無違於禮,豈特孝 卿之禮不足以奉喪祭,而僭君之禮。 卿之禄不足養,而竊君之禄, 事親,謂之孝可乎? 而 與逐昭公,其不仁甚矣。 所謂「我欲仁,斯仁至矣」。」 ,而非孝也。 故孔子因其問 孟懿子於魯,列於三 親之生也,以 其没也,以 孝 雖 而 m 料 E

親 知矣,故戒之以禮。 之於魯,事君不以禮者多矣,則其於事 懿子不能復問,故因樊遲 ,足以爲孝矣。」 尹曰: 「孟懿子問孝,答以「無 苟能盡此三者以事其 御而告之。 小親 違」。 孟 可 氏

而

憂。」 孟武伯問孝。 子曰: 「父母唯其疾之

此。 以 不孝則災及其親,子能不爲父母之憂,則可 得 父母 范曰: 免其 唯 身 其 而 「孟武伯弱公室而强私家,所 疾之憂,不憂其爲不義也。 保 其 族者 ,幸也,故告之如

0

謂 孝矣。」

所

非

不免,其遺父母憂者,不得已也。 義而遺其父母之憂,●則不孝之大者也。」 尹曰: 能養。 何以别乎?」 子游問孝。子曰: 至於犬馬,皆能有養, 「父母唯 其 疾之憂者, 「今之孝者,是謂 疾病人 如 此 疑

養親,荷不能敬,無以異乎犬馬。」 以異於犬馬,故養親以敬爲大。《孝經》 「居則致其敬」,則孝以敬爲先也。」 切。 尹曰: 范曰: 子服其勞, 子夏問孝。 犬馬 「此教弟子以孝也,故其言明 皆能有養, 「犬馬能養而不能 子曰: 有酒食,先生饌,曾是以 於人,若不敬,無 「色難。 敬, 有事,弟 人之 B

四 九

此 生》引尹氏此語作「如以非義而遺其父母之憂」「此 以。 句原本存疑。 按《晦庵集》卷五十二《答都昌縣學諸

爲孝乎?」

之也。」 潤之色: 勞而言; 對 之子,尚不能,●況餘人乎?」 極時,養志如 養志,使父母說,却與 孟 而或失於敬 武伯者,以武伯多可憂之事 伊 川 又曰: 日 服勞更淺。 各因其人材高 曾子、大舜 ; 對 「色難,形下面 子夏能直義,而 孟 此辭不相合。然推 若謂 懿子,告衆 可 下與 也。 諭 父母 其 曾元是曾子 3 有 所 人 於道 事 失 或 者 子 服 而 少 游 也 其 能 其 温 能 教

孝。」 酒 能 (食則先長者,此所謂養口體也,不足以爲 養 其 范 志 日 ,則能 色難者,養親之志爲 承 其色矣。 勞事則代 難 長者, 也

日 服 其 勞,有酒 吕 「色難,先意承志之謂。」 日 : 食先 色難,養 生 饌,養口 志者也。 體 者 也。」 有 事弟子 又

謝曰:「四人問孝不同,聖人語之各

其 賢語之詳矣,今不復道。 也; 哉? 天也, 非 非 棺 也。 言。 則愛敬非生事之以 憂,有事弟子 之以禮,舍愛敬則不能 者,然其言有及於孝,亦 遲、游、夏雖不在寢髮,三桓子孫非志於聖 之道 異,要之非 親 謂 槨衣衾之美也,必誠信可矣。 ,必不 既 備 聖人對之,舍性與天道,又烏 事其親 禮 不如犬馬皆能 何謂性與天道? 一言不足以 九 謂之天理 乎? 州之美味也,知不以仁者之粟祀 享也。 不 者,不足以爲孝子。 同 服 何 也。 謂 其 則以仁者之粟祀其親,豈 一矣,何淺 該徧天理,不足 禮乎? 生事之以禮,聖 一勞,有酒 有養而不敬,敬也。 蓋 親,天 也。 則愛敬是 死葬之以禮,非 順 不可不謂 深之有哉? 理之謂 父母唯其疾之 也 食先生饌 祭之以禮 也。 聖人 不 之切 得 以 以 爲 之言 而 生事 事 問

▶「不」,四庫本作「未」。

悅其顔 諫之; 子 好好 愛而 親之猶 順 苟不念此,則親之不忘我者有矣,我之所 笑取辱,是所憂也; 以憂之也。 憂,父母之愛其子,無所不至,惟其愛之,是 意承志 於犬馬皆能有 事之以禮哉? 不忘親者未之有也。 理? 服 則 其勞, 不 愛其親 色 無 敬也。 ,喻父母 色而已。 事天也。 同, 遊矣。 不順 諫 特欲質 必欲 而 以荷訾取危,是所憂也 亦愛之之至也,故特以 而 不 理,豈非違 不敬,猶不足以爲孝,信乎事 禽荒者愛犬,乘肥者愛馬,與 養,不敬,何 「今之孝者,是謂 聽,則 樊遲非茫然不知此,有 於道,皆恐傷其色。 躬致其勞也; 其 至於有 色難,此非苟於從父之令, 目 加 號 而況於好勇鬭 豈非不孝? 己。 泣以 過,則 也? 以别乎?」此 父母 随之。 違 下氣恰色以 有酒 能 唯 則 養 犬馬 豈 豈 其 食先生 有事 至於先 狠 非 問 知 以 疾 平 弟 荷 語 言 牛 ? 之 不 至 以 於

> 饌,欲將徹必 請 所與 也。」

以

者。 告之,欲其知本之爲貴也。 蓋多文之士也。 也,故以父母唯 之至也,雖澗溪沼沚之毛,足以 雖斂手足形,爲不薄矣, 水,足以盡歡矣; 人子之於其親,生事葬祭,蓋有不得盡其 財者,故告之如 有愉色者,必有婉 愛者,必有和 以貽親憂也。 爲 也 是,皆違 悦。 然以其所以養,養之至 所謂 得之爲有財,孟懿子蓋 : 也。 色難者,如是。」 「不得 氣 此。 其疾之憂告之,使無陵 仲孫 ; 子游、子夏皆在文學之科, 至敬無文,●故以敬養色難 以其所以葬,葬之至也, 有 不可以 夫無 和氣 謚武,非有 嚴 威 財不可 者,必 爲 以其所以祭,祭 嚴恪 故孝子 也,雖啜 悅 盡 以 柔 有 得 無 非 誠敬矣。 爲悅, 之而 愉 之有深 嘉之德 所 財 菽 色; 犯 不 禮 取 飲 順 可

反

禍

0 敬」。四庫本作「親」。 親

曾元 子養· 口 也。」 未得爲孝 志是 養 口 日 也。 體 是也。 也,故孟子曰: 色難 先生,父兄 曾是以爲 謂 承 也 順 顔 「事親若曾子 孝乎,言養 色爲 服 勞 難、若 具 食,若 曾

日: 問,又却終日如 也。 故 曰『唯」。 亦足以開發也。● 足以發,如 矣,故曰不愚。」 如愚。 子曰: 如「參乎,吾道一以貫之」,便理會得, 伊川 退而 「孔子門人少有 若其他門人,便須辯問也。」 日 退而 省其私,亦足以發,回也不愚。」 何?」曰: 「吾與回言終日,不違,如愚。 「回於孔子之道,無所不悅 省其私,所自得亦足以開發 愚。 或問: 蓋顏子見聖人之道無疑 「孔子退 會問者,只有顏子能 「退而省其私,亦 省其中心 又

聖學之外,無一毫私

意留於視聽言動之間

拳拳焉,孜孜焉,其好篤,其心虚,想起觀聖

聞

相通,雖以耳聽,而實以神受也。顏子於

之言無所不悅,默識 范日: 「顔子之性幾於聖人、於夫 而心通。不疑,故不 子

> 問; 能如 己。 此顏子所以獨爲好學。 乎?」蓋言人心通,最爲親且切也。然苟不 答問。 至於不違之地,則與亡則書無以異也 於其私則不愚,此顏子所以爲不可及也。」 足以發,此所以知其不愚。 回之於夫子也。 及其退 謝 不問, 日 孟子嘗曰: 而與門人言,則門人之於回,不 故 「聖人之教雖多術,然莫善於 無 辨 一而 故有問 所謂 終 況於親炙之 日不違,如 於夫子則如 而回之所應亦 愚 |疑,□ m

0

不 違

者,蓋

聲

[「]孔子」至「發也」,賀 發明」「孔子退」作「顏子退」。 云:「開發」,按《或問 . > 疑 當作

抑揚太過。」則「亡則書」或當作「羣弟子」。 謂「苟不至於不達之地,則與羣弟子無以異 卷五十二《答吴伯豐》。 也」,四庫本無。又,原本於此句存疑。 「子曰「吾與回 言終日」,謝氏 按《晦

知 則 爲此言者 眉 實之言也。」 其 之形 回 睫之間 也 不 不 違 容,猶將 ,特以是證聖人察顔子之詳,非真 愚,聖人之意蓋不如此。 也必矣。 察顔子之形容,已知其不愚矣。 有得,況於聞聖人之言乎? 所謂 退 而 省其 私, 聖人於 然後

所 子有不得 謂 施 也 載顏淵之言無幾,則孔子所與回言,羣 [吾與回言終日],則非止一二也 蓋 楊曰: 如 此。 而 聞 默 一者矣,非聖人之教人凌節 而 識 之,故 如 愚。 然 是 孔 弟 子 書 而

察

化耳。 已知 悅 也 退 ,所以終日不違如愚,頹然其順也。 而 其 省其私,亦足以發,回也不愚,聖 侯曰 故聞聖人之言,默識 不愚矣。 : 「顔子具體 云爾者,有以發門人 而微、去聖 而 心 通, 人 無 之 特未 人 夫子 所 進 固 不

尹 日 口 之 2學默 識 心 通, 何 事 於 問

> 辨。 以 如 愚。 爲 不愚也。」 其於孔子之言無所不悅 退而省其私,亦足以發明其道,所 故 日子

心之所存。 也 人,如聖人也。」 子曰: 明道曰: 安,人焉廋哉? 所安,所 在己者能 「視其所以, 處 所 以,所爲也, 也 人焉廋哉?」 知言窮 察其 觀其所由,察其所 理, 所 處 則 所由, 能 則 以 見 此 所

從

又曰: 安,心之所安也。」 從之道也; 伊川曰: 「視其所以,觀人之大概, 所安,志意之所安所存 「以,用也,所爲也; 察其所 也。 由,所

視之謂 者 察其所 正 也; 取 人,無所 范曰: 安者,究其 觀其 夫在己者未至,則在人者 匿 所由者,考其所 「視其所以 其 所矣。 所 處之是 者,知 夫達視之謂觀,詳 非 行之歸 也 其 用 心 以 趣 之邪 亦 也; 此三

忠,則 常道 知 易將至矣,豈 ŝ 也 雖 帝 子 若夫大 堯亦以知之爲 知己, 可不以堯難之爲法乎?」 佞 然 之似 後 知 人。 大賢,大姦之似 難。 三者, 荷以 (爲難) 知 人 之 則 大

所經由, 所安,卒所歸宿。」 吕曰:「所以,今所自始,● 所由,昔

其 視 其 其 則 子 其 性 由 而 然者? 其 所 户 也。 可 M 識 所 ? 由, 由 所 謝日 以 日 不 不 仁者有矣,然 則 以 君子小人雖行 也 知 君子小人動作 何 觀其 在於善,然而 其 一也,於此則可以見人之德。 莫由斯 必有以也,視其 所 視 動 察 視其 安矣,於此 作也; 其 其 變事也; 道 所安,要之以久也。 所以,視其 也,故 而所安者仁; 事 雖 所安者利。 不 察其 不 可 道 同 同 所 以 然 然贵 有君 所安, 以, 觀 行 察 其 事 誰 則 所 子小人, 人之誠。 要其久, 也 小人何 察其 有 能 可 由 出 以 無 觀 所 君 不 觀 大 情 觀

> 於 肝 能 其嚴 勉 至 以 至其所安 此。 也。 於所 在 强 以 此 也 乎?」言必見於外也。然非 小人 然豈 後世爲 道 由 一, 則 觀人,故 曾子曰: 獲 則 如聖人爲簡且易也?」 顔色之間必有發見 可 動 九證十二流之別,其 以 作 催 思 態 君子視 「十目所視, 慮 度之 爲, 間 亦 小人 難 可 平 以 如如 十手所指 者,尤所難 有德者,不 勉 勉 源 見其 强 强 也 至

所 其 IE 所 則 所 日 所 知 匿 由,有邪正, 安,則知其至: 以。」荷 安者。 哉? 尹曰: 其 楊 觀其 才, 日 無 究 所 重言之者,深明其不可 濟 「視其 其 「《春秋傳》曰: 由 觀 用之才,則 所處之是非 其所由, 者,考其 所至,有遠 夫如是,尚能廋乎哉?」 所 以 者,知 則 所由之嚮背; 不能 知 近。 「師能左 其 其用心之邪 以 則人之情 視其所以, 行 匿也。」 也。 右之 察其 何

● 「始」,原空一字,今據四庫本補

子 日 温 故 而 知新 可 以 爲 師矣。」

新 忘 미 處,學者極要 日 可 其所能也 益 人師,則窄 ,斯言可 伊 以爲 ĬII 師。 解 理 師 日 狹却氣象也。」 會 也 只此一 又《 0 語録 所謂 若只指 温 事 故 $\stackrel{>}{\exists}$ 日 미 則 知 師 認 其 不 矣。 温 廢,知 所亡,月 故 温 知 如 故 此 新 新 而 便 築 無 知 則

至之,緣舊所聞見而察來,皆其義 以蓄其德,繹舊業而 横渠 日 温 故知新,多識 知新 益,思昔未 也 前 言 至 而 往 今 行

師

知

爲

知 微

能 自益 不已也。 其 動 范曰: 而能益 也 知新者, ,日造其 師者,人之所取以爲 人者也。 温 日 所 故而 知其 無,而 所 知 温故者 亡也。 新者,進德 好其所新。」若此 月 益 也,未有 無 雄 修 忘其 ⊟ : • 業 所 不 而

爲 矣。」 日日 「師 尚 多聞 故 温 故知 新 可以 則可

以

爲

師

矣。」

然自一 新 則 猶 温 新 矣,與記問之學豈 , 豈徇物 故 謝 則 故 言 德 曰 則 知 與 極 者 新 温 新 高 「觀之, 踐迹者之所 非 非二 故 明 新 進取之謂; 非 而 故 ボ 致 莫 之相 道 可 忘其 也。 知其 中 同 因 庸 為乎? H 在 初之謂 異 ,特事變之不 而 致廣 温 也 在 語 故 知 哉 故 大 温 新 不 ? 故 能 害 而 可 不 以 害 其 盡 温 而 其 爲 知

新

也。」 以爲可 新 則日知其所亡。 日 以爲師矣。 「温故, 此《書》所謂『惟敦學半』 子夏以 則 月 無忘其 爲 好 學,而夫子 所

言 口 尹曰: 師 也。 温 故則不 廢 知 新 則 日 益 一,斯

子 日 君子不器。」

0 傳 經 傳經堂本、四庫本皆作「揚雄」,以下不另出 本、 四庫本 並 作 揚」。 按 本凡

五五五

若一才一藝,則器也。」 伊川曰:「君子不器,無所不施也。

以下皆器也。夫子之教人,志其大者遠者, 則器。工者,所以制器也。夫子之門人, 者,各適其用,而不能通其變者也。 而 顔淵、冉伯牛、仲弓不可以器名之,自子貢 可以行陸,車不可以行水。 忘其小者近者,故曰君子不器。」 ,器也。君子以道爲本,故不入於形。 范 日 「形而上者,道也, 大德則工,小德 故舟 形 加 不 唯 器 下

器,則能圓能方,能柔能剛,非執方者所與謂之器。君子,體夫道者也,故不器。不謂之器。 了形而上者謂之道,形而下者

싨平直之所自出,非一器可名也。」 楊曰:「君子其猶規矩準繩乎? 方

不器。」

侯曰:「君子不可小知而可大受,故

從之。」
從之。」
「先行其言而後

之,謂觀人者。彼能先行其言,吾然後信之,謂觀人者。彼能先行其言,吾然後信多言而發之。」 又曰:「先行其言而後從其言而後從之,而後可以爲君子。因子貢其言而後從之,而後可以爲君子。因子貢與一樣解》曰:「踐言則可信。」 又

艱,而行之艱,故夫子以此告之。」恐有聞,此君子之事也。子貢之患,非言之行,而皆有實矣。子路有聞,未之能行,惟言,故必先行之而後從之以言,則言不浮言,故必先行之而後從之以言,則言不浮言,故必

其言則去之,兹其爲君子與? 子貢在言語楊曰:「言將行其言也則從之,不行

「周者以至公交物,比者以

私

之科,故告之以此。」

也。 尹 曰: 「先行其言而 後從之,言 顧 行

者

子曰: 周。」 君子周 而不比,小人比 而 不

道 謂 能周。」 弘,周及於物 不相私 伊川《解》曰: 又《語録》曰: 比 也。」 而不偏比。 「周爲徧及之義。 「周謂周旋,不比 小人偏比,故不 君子

善亦周 徧也 從,故比而不周。然君子於義亦比,子曰: 天下,故周 忠信是與,周焉者,皆忠信也,不患 君子與小人,晝夜陰陽,相反而已。」 無適也,無莫也,義之與比也。」小人於不 范曰: 、《傳》曰: 阿黨爲比,言相比 而 「忠信爲周,言其道之可以 不比。小人唯己之私,唯利之 「頑囂不友,是與比周。」 附 而 르 。 無 君 黨於 子 唯 周

> 以 意 交物。 忠信也。」 故周訓爲徧,又爲忠信,至公之交

可也。 言 達 可。 器之理矣。以其不言而 下惠,然而不學三子也。知此者,可以識 也。孟子於清和, ●未必過於伯夷、伊尹 體,未必優於子夏、子游、子張,然 不 想其爲人,將何以 日 主名,特君子不可以一端論 四,夫子所不居,則謂之聖人亦可。」 言而可喻,其所行固無係吝之私,以其 IIII 而後從之。 以 謝曰: 器名,故曰不器。顔、閔於聖人之 非小知者也。其所存養者如此,試 要其所存所養,蓋喻於義而不懷惠,上 「君子而 此等豈可以器名之乎? 「天下之善,如仁智聖賢,皆有 先行其言,行其所言也, 不仁者有矣,則謂之賢 目之乎? 其必謂之君子 可喻,故曰 也。 其 君子 而具 所 先行其 人亦 之道 有 雖 不

可

」下,四庫本、公善堂本有「任」字。

五七

不比。 後從 不言 也。」 其 子爲之乎? 者,乃兒女之事,壯士且 之光, 豈擇地 則 何 比 何 爲 害其爲君子? 也。 所親; 天乎? 之, 而 而人皆知其爲 君子無私好也,無私 人皆知 言其 彼係情 以其 無 所行 知此者,可以知君子不比 而 其爲 後 私 於濡沫之間 照 無 好 也 如不言 孝 门則 乎? 係 廉。 3 吝之 能 無 不可 則 而 能 至 故爲 所 惡 私 行 於 四 讓 不 爲 也。 也 時 德 至 千 謂 周 親 也 諧 故 行,亦何害 乘 而 惟 而 無私 言不 之 頑 加 予 後 如日 E 熨 闖 與 而 謂 周 可 恶, 至, 周 君 汝 以 月 而

比 尹曰: 楊曰 比則 : 暱於私 一忠 君子道大, 信 矣,故 則 無 不 周及 周 往 加 於物 不 周 而 故 不 偏 不

子曰: 而 不 思 則 罔 思 而 不 學 則

殆。」

比,

(偏比,故不能周

日 之,篤 力索 進,故殆。 學而 而 伊 行之, 「學原於思。」 不思則 ĬII 不 問學 博學之,審問之,慎思之, 五者廢 無 日 得 則 勞 故罔, 殆。」 其一,非學也。」 而 不 思 又《語 思 而 不學 則 録 無 明 則 日 得 又 無 3

也 也 殆 以 則 博 而 加 不 求 學 篤 而 無 不 思 學, 學 不安。 ,則無得於内,故罔。 志 微 以致其精, 而 范曰: 切切 妙, 多 則 則 識 有 問 非不 無得於外, 或過乎中, 非 治, 「學以 圃 近 故罔而無得 思則 不美 善 思。 也 治之, 也 故 有 然 學 無 得, 殆。 不能 而 以 然不能思以索之, 思 罔之言亡也。 思 致其道,故博 忧 則 以 學 殆之言危也。 無 精之。 則有 以聚之, 罔 殫思研 殆 得 之過 於 内 學 則 精 而

而 不學 吕 日 則不 得其所安。 而 不 思 罔, 罔 如罔之 羅 無綱

則居之不安,故殆。」

楊曰:

「不思則

無

以

自

得

故罔

不

危也,不安也。」

病。 矣,而不能思以精之,則有習矣而不察之 也,欲其崇; 廣 夫子語季路以六言六蔽,正謂 不能學以聚之,則有窮大而失其所居之蔽。 合者觀之,不可 民不可使知之,正謂是也。 崇德而 廣業,雖 學,習之事也,欲其卑。 知 (崇則: 以不兩 非 德 二體,然自其 進 益 也。 崇, 此矣。」 下 思, 知及之,而 學 知 内 則 之事 能習 業 外

學則知義以 所學者不能以爲己,故罔。 求者,思也。 而 今者,學也; 無實 游曰: 也。 殆者,應於事 方外,而外 思而不學, 思則 「多識前言往行,而考古以驗 耳目不交於物,而悉 知敬以直 有 則所思者不足以 而 Ë 不 内,而中 罔者,反求諸已 安也。」 學而不思,則 有 主 以 涉 自

力索而不學,則勞而無所安。」 尹曰: 「學而不思,則罔然無所得

伊川《解》曰: 「攻乎異端,則害子曰: 「攻乎異端,斯害也已。」

於

E

豈 楊朱、墨翟是已。 聖,則由之。」異端則 之工皆曰攻。 孔之道,皆異端也。」 不害哉? 人君之學,苟不由堯舜文武周 范曰: 楊雄 「攻者, 其率 曲 日 專治之也,故木石 天下至於 而 : 不通諸聖者也,若 事 雖 無 曲 父無君, 而 金 通 諸 玉

自敝而已。」無邪慝。今惡乎異端,而以力攻之,適足以無邪慝。今惡乎異端,而以力攻之,適足以善吕曰:「君子反經而已矣。經正,斯

異 亦未遠,姑存之,則未甚害也。 端端 無徵則弗信,弗信則民 謝曰: 然當定哀之 「隱 於小成,暗於大理 時,去先王 弗從,其爲 猶 欲 近 改之則 故故 皆 所謂 其 失 無 也

五九

也 其於異端豈待吾言 故夫子於怪力亂 大 墨,不得不辨,則異乎此。」 焉 彼 有 一識吾之門牆,能以 其 不免推 神, 而判 特不 波 助 哉? 語 瀾 而 縱 已, 善意從我, 若孟 風 無 止燎 子之於 事於攻 也。 则

追 放 豚 楊 日 則害矣。 異端之學,歸斯受之可 也,如 楊

文王爲 則害於政。」 尹 他道。 日 適堯舜文王爲正 君子正而 不它, 道, 荷攻乎異 非 堯 舜

子曰: 之,不知 爲不知,是知也。」 「由, 誨女知之乎? 知之爲 知

當 求問 知 是終 矣,故云是知也。」 伊 川《解》曰: 不 知也 3 「人苟恥其不 以 爲 不 知 而 ·知,而 求之,則 不

所 由 不 其誠 ,知以 范曰 爲 ,則是知也。 知 「仲由好勇, 小其所知以 若禹之行水,行 勇 於學 爲 不 知 則 故 將 其所 (莫若 强其

> 信者鮮矣, 無 事 加 己。 豈獨由也哉?」 凡人莫不有 此 患,有 諸 己 面 必

儻能 不知爲 者也; 能 闕歟? 千歲之遠,六合之外,則衆人有以 何害於道 可 如死生之說,鬼神之情狀,在衆人則以爲不 之以此。 速,則於道豈無强探力取之蔽乎? 夫子之門,其爲 死生之際,蓋有大過人者。 知者矣; 充是非之心矣,故曰 别 謝 識 日 愧者矣; 不知爲不知,不可知,不必知者也。 於此,亦 ? 知之爲知之,可以知,不可以 如 然 「子路勇於學者也 此 而 功不過數年之間 可 者。蓋 在學者,苟不知此,豈 在學者,儻 謂 1是知 知所 非 可以 也 存 然舍故 不 心 知此,則 矣,亦可謂 一言盡也, 彼 故特 若 態 其 是 閑 不 而 亦 非 知 其 於 游

此。 路以 正名爲迂,是以不知爲知也,故語之如 楊 Ħ 「以不知爲知,豈知 也哉?

以 爲 知者,故孔子誨之以 尹 日 . 一仲 由 好 勇,蓋 此 有 强 其 所 不 知

中矣。」 子張學干禄。 言其餘, 餘,則寡悔。 則寡尤 言寡尤,行寡悔,禄在其 子 日 多見闕 多 殆 聞 闕 慎行 疑, 其 慎

然矣。 至,禄 寡 其 然學不必得禄 此,使定其心而不 也; 也。 寡 탷 所以告干禄者 中矣。 悔 則 悔,禄在其中矣,此 之道 伊川《解 悔, 在 君子謀道不謀食,學也 此 又《語 其 君子知其如此,故憂道不憂貧 問,孔子告之亦不然。 理自 也。 个中矣。 **>** 也。」 ,猶耕之不必得 録》曰: 内 日 君子行 出 爲 子張學干禄,故 者也。 利禄 又曰: 所以告子張也。 多 己 見而 「尤,罪 動。 能 修天 慎, 闕 食,亦有餒 禄在其中矣。 若顔 「言寡尤,行 其不安者 得 爵 自 或疑 外 禄 淵 告之以 削 若顔 之道 至 如 則 ,此 在 韻 者 此 不

> 亦 唯 理 有 可 不 得 爲者,爲之而已矣。」 禄者 孔 子 蓋 日 耕 也 餒 在 . 其 中 矣,

不疑 寡尤 人之德也。 行有不慊於心, 其善,而未果於行,愈於不知者耳。」 ,則傳言之; (者,不以言得罪於人也, 横 渠 日 聞斯行,好學之徒也。 . 則 歸罪爲尤,罪 餒矣。」 見而不 殆,則學行之, 又曰: 己 行寡悔 爲 見而 悔。 聞 中 言 而

修天爵 干 仕 人,故曰禄在其 不仕於大夫,漆雕 爲急,故學干禄。 禄也。」 范曰: 而 人爵從之矣。 「夫子之門人,顔淵、閔子 八中矣。 開亦不欲仕 而夫子告以慎其言行, 苟能修身,亦 夫子 循 也。 循 然 子 不 善 . 廢 張 騫皆 其 誘 U

子, 往 訓 而 日日 謝 夫子語之以干禄之道 或得之於益友,皆所謂 日 . 疑者所未達,殆者所未安。」 此子張以干禄之學問 也。 聞 也, 或 彼 得之於 於夫 豈

孟 精 駦

者可 乎 又曰 乃 者 勿言 我 無 下 無 曰 不 見之不疑,然後行 我罪, 一,不行 ? 天 不 П 自 哉 理 以得之乎? 用 過,行滿天下 尤 口 此 「慎言其餘,多見闕 信則已; 善 也 也 所以 我 可 慎行其 1則已; 獨 也 未 見 有必得 多 於心 能 非 有 聞 聞 安 餘,此皆有 之不 天理,則 無怨惡 能至於此,非特言滿 目見之見,乃 闕 於 無 疑 用 禄 吾 疑, 慊 而言,見 善 之道 疑; 乎? 心 也。 殆 可 則 神之聽 也 皆 深 可可 以 人其 於見有所未 殆 若汝如此, 尤 所 意 無 以 識 加 謂 其 非人尤之, 慎 舍汝 之其 無 見 行 疑 慎。」 惟 之見 人雖 舍汝 天下 乎 近 疑 ? 天 思 安 則 又

也 也,故於應物者言寡尤。 悔 游 於行 尤在 在 E. i 事也。 己者 也 行於己 言寡悔; 應 《易》之言無悔 於 物 而爲行,故 而 言 有 咸、同人、復、 無尤 言 者,本諸 慎 故 者,涉 慎 行 言 則 於 10 則 寡

> 壯 以 有 無 悔已。 悔 賁 鼎 蹇、 旅、 大畜 無 尤 非 謂 言

可

不

能闕 也。 之多 其疑 知其求焉 以言行寡 於聖人之門而 能 殆, 其 然子張,孔子以爲狂 ,則身之不能 楊曰 無 疑 疑 而慎 殆 耳。 殆 尤悔告之,所以 蓋有之矣,故其告之如此。」 以其餘? 聞 《詩》曰『干禄豈弟』,蓋是 問干禄,宜 疑 而 見之多,則知 保, 則 言之,殆 不 何 無尤悔矣。 長 非 禄之干乎? 士,則多聞見而 (善而 所學也,故孔 而 之未 行之,不 救其失, 必 積 盡 尤 知 也 義 學 闙 不 悔 使

故 故 闕 多 其不 聞 也 夫子告以 而 尹 安者 日 能 闕 慎言行,則禄 其 8 寡 所 慎乎言行,修天爵 疑者,寡 臣 悔之道 聞 歸 在其中矣。」 也。 尤 罪 之 爲 子 道 尤,罪 張 也 而 以 人爵 己爲悔。 仕爲急, 多見而 從之

哀 日 公 問 舉直 日 錯 諸 何 枉 爲 則 則 民 民 服? 服 孔 子

諸直,則民不服。」

伊川《解》曰:「舉錯得義,則民心

服。」

好, 至情。 古 則異。然自古治日少而亂日多,彼其心豈 特在於舉錯之間而已。 下之情二,好惡而已。好直而惡枉,天下之 「欲舉枉錯直,以拂天下之心哉? 蓋 照之,則自以爲直、自以爲枉者亦多矣。」 人之所以去也。然則爲天下國家之道, 謝曰: 「天下之道二,枉直 順其所好,人之所以服 故舉錯則同,治亂 也, 而已"天 ,逆其所 無道

楊曰:「舉錯當,人心則服矣。」

尹曰:「舉錯得義,則民心服也必

季康子問。「使民敬忠以勸?

敬; 不能 之問,未嘗不以正對者,急於民也。」 一,而欲民勸,不可得也。夫子於君 范曰: 何?」子日 不能 則 孝慈,而欲民忠; 「季康子不能 舉善而教不 臨 之 以 能 Œ 不舉善 身, 則 則 勸。 而 欲 大 而 夫

無體 善,蓋有不待詔 慈可以居之, 勸非强 耳。三者皆情性所 可 下國家也? 彼其所問,蓋故家遺俗之所傳 加此? 如季氏者,亦豈知此道真 盡 使民忠也。」 以僞爲,善學者雖以此自養可也。 乎外。交盡,●忠之本也,故可使民忠。」 謝曰: 也,惟莊可以聚之, 吕曰: 「敬忠以勸、雖三代之民,何 「既孝且慈,上下交盡,此 又曰:「孝以盡乎内,慈以 而從之輕矣: 有,豈可以强爲乎? 勉也,使知善之爲 忠固有也,惟 此三者皆 可以 爲 所 以 天 以 敬

❶ 「交盡」上,四庫本有「内外」二字。

如

之

所謂成己成物,有二致不可矣。 後世徒以不可使知之,其能使不出於此道乎? 然則

度

繩

墨糾持人心者,亦多見其術之疏

則人樂於爲善矣,故勸。」則人知親上矣, 善者舉之,不能者教之,之以莊則敬; 孝以身先之,慈以子畜之,之以莊則敬; 孝以身先之,慈以子畜之,故臨

不勸哉? 雖堯舜之政,不出於斯而已。」 忠哉? 善者舉而用之,不能者矜而教之,孰哉? 孝慈非忠也,孝於親而慈於下,孰不爲哉? 以莊,孰不敬

使民忠,當先孝慈, 不能。 尹曰: 弟,施 日 或 謂 未有不自己出而能化人者也。」 孔子曰: 於有政。」是亦爲政、異其爲 「欲使民敬,當臨之以莊, 欲使民勸,當舉善 「子異不爲 「孝乎,惟孝友于兄 政?」子 而 欲

政?」

孝友于兄弟,则能施于有政。」 伊川《解》曰:「《書》之言孝,則曰惟

父、子子、兄兄、弟弟,此一家之政也,一致,是亦爲政矣,豈必在位乃爲政哉?」 故孝于父母,友于兄弟,施之於家而有也。故孝于父母,友于兄弟,施之於家而有也。故孝于父母,友于兄弟,施之於家而有心。故孝于父母,正也,正身而已。未有

果有物我之限哉? 其分而少。天下皆亂,而己獨治,在獨善者 在任重者處之,猶以 處之,不害爲大平; 未足爲政,●豈知道者之言乎?」 用之,不見其聚而多, 下之政也。 國能如此, 父、子子、兄兄、弟弟,此一家之政也, 一國之政也, **豈有二道哉?** 謂『孝乎,惟友于兄弟』 爲不足。然則論 天下皆治,而己未治, 天下皆用之,不見 天下能如此, 同是道也,一人 政者,

^{● 「}惟」下,傳經堂本有「孝」字。

至 爲 於爲政,則 政之本也。 楊 日 有 爲政 夫子之於是邦也 不 者,自家推之國 得 而 與 八焉,以 必聞: 行示 而 其政。 已,此 之而

已,是亦爲政也,故其言如此。」

焉?」 爲天 後爲 施 於有政,則天下可以平,何必民人社稷 下 政 侯曰: 哉 則 ? 行 聖人言而世爲天下法,動 「爲仁自孝弟始,推孝弟之順 而 世爲天下道,其爲政孰 ௱ 禦 ## 而

施於家,是亦爲政,奚必在位乃爲政哉?」施於天下國家者,其爲道一也。故孝友之声曰。「政者,正也,正身而已。所以

遠乎 信 也 1,猶不 子曰: 范 車無輗 日 信, 知其可,而 故 兵 則 食 小車 「人而無信,不知其 不可行 車 可去,信不 無 無軏,其何以行之哉?」 況於爲天下國家, 於州間 軏 則 미 鄉黨,而 跬 去。 步 可也。 不 兀 夫不 能 況 進 其 大

其可行乎?」

是性? 也 懷穿窬之心,則幾於無羞惡。 當其操欲害人之心,則幾於無惻隱, 無耳 曰: 可謂 言之,亦可謂有是性, 聖人人倫之至,雖不可以信 謂 觀之,亦莫知所謂 則無諸己矣, 是性,亦 有之,以至於此,求其 希,尚可 無者無何物也。 同。 有是形。 謝 大車無輗 視之不見,與無目同, 斯 日 亦何嘗離是形? 何不可之有? 人 則雖謂之無是形,何不可之有? 者 '以謂 孔孟 有諸 미 聖人固如 小車無軏,取譬實不遠矣。」 之人 以當之,以言其 有者有何物 論 今且以形 己之謂信。 信如此。 有 乎? 天與 以 此,然衆亦豈能 自其 與於遊 何以謂之無也 世 言,然自其因 之, 踐形言之, 性之近論之, 聽之不聞, 也,亦莫知 蓋 則 然 非 有 雖 自 而 魂 而 謂 不 有 爲 無 學者 魎之 之 變者 當其 非 不 舍 性 ? 能 無 與 無

實, 也 雖 而 而 之爲仁, 以信成之。 m 已 ? 有信 可 備 潔,終不 也 游 而 曰: 無 而 爲 則 則 可 輗 無 大德 智 蹩 忠 軏 人堯舜之道,故其喻如 軏 信 躄 則 信 m L 則 大車 誣 小 而 則 無 所 m 德 己, 有車 雖 信 以 無 所資 小車 居之似忠信, 爲 進 信 則中 禮 以之爲 德 之名而 下所恃 以 以 則 進 無 而 朝 僞 以 所主 巾 義 斬 義 無 行 也 爲 此 矣。 運 行 者 故 無 則 禮 喻 行之 輪 之 踶 巾 所 似 以 趣 施 跂 何

無以

田者

遠, 則不行於州里 也,在興則 人之於信,猶是也。 楊曰: 見 其倚於衡 車 ,況天下乎? 無 輗 軏, 也,夫然 故立則見其參 則 無 以 後行, 引 重 於前 舍是 丽 致

猶 智則不 爲仁,信於 大 侯曰: 車之無輗,小車 義則爲義,信於禮 不信, 「信者,有諸己也。 則 無此 之無軏,可行之哉? 四者,罔 則 爲 信於 禮 (而已, 一,信於 則

輗軏,車待以行者也。

駕 ,轅端横 軏,言不可行也如是。」 車、兵車、乘車。 馬者也。 尹 日 木, 轉 人而 大 東,謂 軛 無信,如 軏 以駕 者 平 謂 4 地 大 轅端 者 任 車 也 載 無 上 之 輗, 曲 小車,謂 車 鈎 車

雖 於殷禮,所損益 子 殷因於夏禮 張 百世可知也。」 問 「十世可知 ,所損益 甲 知也。 可 知也 也?」子 其或繼 周者 日 周 因

有 有 T 時 不 損 也。 必 時不可 益 損 益。 同 伊川日 可 來者没事 若不 知 自畫桂 也。 夏商 默 · 是 隨 觀 「殷因於夏禮 所 爲得者。 垂衣裳, 時 因, 又曰 又非聖 則 損 : 須知 益 至周 聖人 人知慮 可 禮 三王之禮 知 時 出 文方備,只 周 所 一百事 爲 因 則 不 大, 「於殷 能 須 皆 與 禮 物 做 周 當 爲 只

) 「木」,原作「水」,今據四庫本、傳經堂本、公善堂本改

五胡亂 歸者。 使 子 號 平之,故隋唐 浮虚 學,然宗經師 者,亦必有 子弟皆不可使,玄宗纔使肅宗便 第能驅除爾。 故東漢之士多名節。 多守節之士。 之士,故儒 從則從之。」 書》而亡。 永王 · 君 臣 治 ,遂至於苦節,故當時苦節之士有視死如 權臣 平,然亦 而 一夫婦 璘便反。 華。 無禮 苦節既極,故魏晉之士變爲曠蕩 跋扈、陵夷有五代之亂。 所損益,如云行夏之時之類, 者多。 漢興鑒 法。 夷狄之亂已甚,必有英雄出 混 古識 其原始於太宗也。 有夷狄之風,三綱 世祖繼 唐有天下,如正觀、開元,●雖 又曰 君不君,臣不臣,故藩 禮法既亡,與夷狄無異,故 天下。 義理者衆,故王莽之亂 儒者多、雖未知聖人之 其弊,必尚寬德,崇經術 知名節而不知節之以 起,不得不褒尚名節 「秦以暴虐,焚《詩 隋 不可謂一天下 篡, 不正,無 故其 漢之治過 肅 後 鎮 宗 尚 不 繷 世 父 而 可

> 於唐 萬日 漢大綱 亦未甚舉。」因問十世 正,唐萬目舉,本朝大綱 司 知 ,遂推此數 甚 E

然

宜也。 矣。」 不出 以加矣,故孔子曰「吾從周」。 三代之禮,至周而 太平,如欲太平,舍之而 而 乎三代而已。楊雄曰: 商周繼之,必有所損 范曰 其或繼周者,亦必 . 「夏商之禮,皆聖人之所作 備、後世雖 用他 有 益 所 焉 道,亦無 雖 有作者,亦 損 ,所以適時之 「繼周者 有 益 損 可 知也 益 未欲 由 亦亦 也 無 至

必然,故可以推知百世 日日: 「按殷周已見之迹, 知 理 勢 之

聖人 意 乎近,亦可謂窮理之言也。 而 謝曰: 不以爲然,亦不以 聖人之意如 「子張之意,以 何? 爲不 然意 然,直暢之以 謂 以 謂 遠 則 在 必 有盡 我之前 有 以 故 故 己 驗

正」,四庫本及公善堂本作「貞」。 避宋仁宗趙 按 原本作「正

之所 或有 此聖 人 損 所 有 庶民,●可以驗諸鬼神者 理,出於窮則變而 又當百世以俟聖人而不惑也。 益 以暴 以 作,其必同乎? 無可因革,紹堯之後 既 乎? 人 損 以 在 以 於 益 易 聖 何 考諸 乎? 暴者 繼 不可得而 因 如 聖者 「革損 耳。 三王 乎? 不可 乎? 於此 益 與民宜之,不謂纂紂之餘 此其可知也 圃 之 得 知 不可得 不 理 可見三王之用心矣, 一無可 也。 不 m 謬 ,雖百世之遠,有 可 知 可 3 知 其唯 得 也 而 也。 損 在我之後 知 而 因革損益之 益,視其 可 不知 也。 知 繼周 以 也 證 所 其 者 聖 諸 以 知 或 理

淵 無 也 以易 爲 ,因時損益,救其 邦之問 楊曰: 此,故 ,其損益之理可知 「三代之禮 雖百 世可 偏 弊 知 一,相因 而 也。 己。 也。」 而已, 觀孔 後之繼 子對顔 非 周者 盡 革

奚止十世哉? 三代之損益,不越斯而已。」侯曰:「損過益不及,雖百世可知也。

之則商 若能 垂 衣裳 知 尹 損 .因於夏,周因於商,從可知矣。 ,至周方備,皆因 日 益 之道,雖百世亦由是也。 臣 聞 =王之 時 損益 禮 不 而然 同 也 自 後 畫 世 推 桂

不爲,無勇也。」子曰:「非其鬼而祭之,諂也,見

義

鬼神 知義之不可, 范曰: 也。 伊川《解》曰: 時 多非禮 而不能止,蓋無勇耳 非其鬼 之祀, 「不當 而祭之,則是 祭而祭之, 諂 情 狃 於習俗 非 所 乎

勇也。」 均。 也。 而 事 故祭非 之也 夫可爲 3 其鬼者爲諂,見義 而不爲,與不可爲而 見義不爲者,所當 M 爲,其 爲 不 爲 而 失則 不 爲

是二端,以明過與不及之害。」 吕曰:「諂生於過,無勇生於不及也。

推

謝曰:「此一段立義雖異,而意則相

●「證」,四庫本作「徵」。

生之。 乎 諂 下,原於非所祭而祭之,此其所以 也 無 此 則 不 夫 鬼 制 者 循 勇 位 神 致 祀典。 且 經 時 非 不 不 爲 不 ,祀典猶 而 神 Œ ,其憂深 欲 所祭 者 知 死 不 祭之,則 智 陰 乎? 之; 武 矣,故繼之以「見義 陽 行 知 不仁者,不足以與此,亦豈 致生之,故其鬼神, 驟 事此者爲仁,惟仁智之合者, 祀典之意,可者使人格之,不 諂 者蓋 而祭之者,宜其紛如 則 不 而 鬼神之情狀豈 而 爲 不可者使人遠之,不使人 喪也。 而又當政教失、禮義廢之時, 有如公子家者,則 思遠之所爲,以 語之則無證 鬼神之禮未爲不 |有矣。然此之所謂見,亦豈 有 可 神, 恥,而又能 蓋鬼神之 形 氣 離 , 不 不爲,無勇也」。 欲秩之以 而 勇於不 昭昭乎? 致死之,故其 謂 理 也 有 明於 爣 知及之而 鬼。 不 祈於 明 能 知鬼有 聖人於 -爲,庶 禮則 天 於 知 可 知 下 所 致 使 不 天 以 此

> 信 不 如 真 威,此可見矣,又況於自反而縮者乎?」 也 能 父 所 如 母 謂 恂恂仁者有如吴祐 鷹 之 見 愛 鸇 之 赤 ? 逐鳥 子; 使其 雀 如 使其 ? 見 謂 如 所 而能抗跋扈之 不 見 好 能 所 則 爲,吾 讐 豈 則 不 不 豈 能

也,見義不爲,其氣餒矣,焉得勇?」 徼福於非其鬼,非諂 於習俗。 祭之,諂於鬼神也。 尹曰: 楊曰: 知義之不可,而不能止,蓋 「非享親報本、皆祭非其鬼也 「臣聞師程頤曰: 時多非禮之祀,人情 而何? 夫氣集義 不 當 無 所生 祭 狃 而

國朝諸老先生論語精義卷第一下終

耳。」

六九

國朝諸老先生論語精義卷第二上

八佾第三

孰不可忍也?」孔子謂季氏,「八佾舞於庭,是可忍也,

伊川《解》曰: 「忍爲是,則何所不能

先正禮樂,則季氏之罪不容於誅矣。」也,陪臣而僭天子,亂莫大焉。孔子爲政,之間不可毫髮僭差,君臣上下非禮不定故四,士二。自上以下,降殺以兩而已。然兩四,士二。自上以下,降殺以兩而已。然兩四,十二。有上以下,降殺以兩而已。然兩四,十二。有上以下,路與以兩而已。然兩四,十二

此著之。」

遂使季氏僭八佾,三家僭《雍》徹,故仲尼於

游曰:「人臣僭國君之禮,是無君

履倒 八佾 不可忍也?」 也 舞,其 施 陪臣僭天子之禮,是無 ,滅天理 心遂無王矣,是將 而壞人倫矣。 E 拔本 此 也 面 塞源,冠 可忍,孰 季氏 以

子爲政 亂莫甚焉, 侯用六,大夫用四,士二。陪 尹曰: 禮 樂在 忍爲是,則何所 舞 所先,季氏之罪,不容於誅 於禮有數: 不 能 臣 天子用八,諸 爲 而 也? 僭天子, 孔

王之賜,伯禽之受,皆非也。其因襲之弊,子之分所當爲,魯安得獨用天子禮樂? 成好川曰:「周公之功固大矣,然皆臣公,天子穆穆」,奚取於三家之堂?」三家者以《雍》微。子曰:「「相維辟

以祀周公於大廟,非使魯君亦得而用之也。范曰:「成王賜魯以天子禮樂,惟用

七0

周 其君,故至於用天子之禮,其所由來 衰 夫子力未能誅也,則正言之而已。 竊 取 前 用 之,習以 爲 常 蓋 \equiv 有 家 漸 僭

亦有 稱事 其義也。 也。 察? 之所爲, 公乎? 豈非不仁者之所爲? 樂之歌非取其聲,取 所不當爲,不敢須臾 仁不知, 僭禮樂,特論小人無忌憚也。 君,何所憚而不爲? 故曰「孰不可忍也」。 徹,義也,容有不知; す,則 謝曰: 穆穆之容乎? 而季氏則忍矣,推此心以往,則弒 於汝安乎? 亦何以 辟如猿狙 有此,則可 何所不至? 義與事稱,則名辨而實 以《雍》徹,不知者之所爲。《雍 「此一節,聖人所傷,意不在於 歌爲哉? 衣以 以《雍》徹 亦可謂忍矣。 其亦 處,如負芒刺,不忍 八佾舞於庭,不仁者 周公之服,人不 八佾,數 有相予祀事之辟 三家者盍 矣。 無忌憚,則不 处也, 豈 喻 君子於其 無 是 自 省其 父與 有 謂之 事 義不 故 不

> 也。 周 所爲邪?」 此理,則奚肯以《雍》徹乎? 公, 故曰: 鳴 鳩 『奚取於三家之堂。』三家 傅以冲天之翼,人 豈非不知者之 不 謂 之 儻 焦 知 明

可。 也。 如禮樂何者,斯之謂歟?」 可忍者。 則甚夫納 庭,「相維 之禮也。 楊曰: 納冠於足,其可乎? 而季氏三家忍爲之,則肆爲逆亂,無不 冠 辟公,天子穆穆」,歌於三家之堂 其 而禮之於上下,猶冠 爲不仁甚矣。 於足也,雖庸人孺子亦知其不 「舞用八佾,祭以《雍》徹,天子 舞八佾於季氏 所謂人而 履之不可易 不仁, 之

仁,如樂何?」子曰:「人而不仁,如禮何,人而不

īE 理 伊 ,則無序而 川 解 > 日 不和 . 仁 者 天 下 之 正 理 3

心矣。 佾,三家之《雍》徹,謂之有序有 事 不可僭,而 僭之,而禮樂明甚,人末如之何。 八佾,天子之舞也, 則無禮樂,故曰如禮樂何? 若季氏之八 :仁者外有其序,内有其和,則無不慊乎吾 得其序,謂之有禮 范 不仁之人,不愛其身,而由於不正 日 人自僭也。」 者 愛 《雍》,天子之詩也,雖 人,必 得其 和,謂之有樂。 能 自 然則禮 和 愛其 可 乎? 身。 樂

手足乎?」 一,则不仁之人,何所措也,则不仁之人,何所措出,一日曰:「禮樂之情,皆出於仁。不用

何!; 次顛沛 謝 樂者,樂此 日 未能 由 不 禮者,履 憂,以 於是,以 者 也,知此 何爲此,故曰 [如 此者也, 何爲此 則 知樂 故 知此 日 矣。 則 二如 知 禮 未 禮 樂

> 何 求委,則禮樂决非不仁而能也。」 亦足以敦樂 亦足以備禮 造次 顛 矣。 矣 沛 由 捨表不可求影 「於是, 不憂,非仁 非 仁 不 不 能 能 也, 也 源 則仁 不 則 可 仁

必僞, 樂何 心?」 其爲樂必淫,而鄙詐之心人之矣,豈足以治 彼且不順,其如族黨之樂何? 事父,必不孝,其如父子之禮何, 上下同聽之而 必不忠,其如君臣之禮何, 3 游曰: 而慢易之心人之矣, 豈足以治 在族黨之中,長幼同聽之而 「人而不仁,則人心亡矣。 和敬,彼且不敬,其如宗廟之 在宗廟之中, 是其爲禮 以事君, 和 躬 順, 也

如禮樂何?」大人舉禮樂,天地將爲昭焉。不仁之人,其大人舉禮樂,天地將爲昭焉。不仁之人,其楊曰:「先王以禮樂合天地之化,故

也。仁者天下之正理,夫人而不仁,其如禮尹曰:「樂由天作,禮以地制,皆正理

樂何? 失正理,則無序而不和矣。」

寧戚。」 禮,與其奢也,寧儉, 喪,與其易也,林放問禮之本。子曰: 「大哉問。

所出。 儉 也 文對實已爲兩物。奢又文之過,則去本遠 則爲奢,不足則爲儉。 理,則甚有事也。 過則奢,實過則儉; 者,華也,末也。理是一物,文是一物。 禮者,理也,文也。 ,不若禮不足而敬有餘 也,寧儉。」言儉近本也。」此與形影類矣,推此 范曰: 儉乃文不足,此所以爲禮之本。」 伊川《解》 「華多者少實,故禮與其奢也,寧儉。」 喪主於哀,故寧戚。」 故林放問禮之本,子曰: 「夫祭,與其敬不足而禮 又曰: 日 理者,實也,本也; 飾 奢自文所生,儉自實 文者,稱實而爲飾, 「奢自文生,文之過 過則 又《語録》曰 失實,故 喪,與其 「禮,與其 有餘 哀 又 文 文 :

隆禮,故大其問。」
 一次,不若戚而不文之愈也。 儉者物表,故曰禮奢而備,不若儉而不足之愈也。 儉者物表,故曰禮奢而備,不若儉而不足之愈也, 禮失之奢,喪失之易,皆不能反本而隨其不足而禮有餘也,不若禮不足而哀有餘也。

不如此。聖人之於禮,不求之人,而求之天本,豈不曰先王之意至於如是而已乎? 蓋本,豈不曰先王之意至於如是而已乎? 蓋本,豈不曰先王之意至於如是而察也,問禮之林放獨能於頹波之中習矣而察也,問禮之本,豈不曰先王之意至於如是而,故不誠之弊。 當定哀時,文武之道未墜於 謝曰:「當定哀時,文武之道未墜於

孰多; 子於禮 暮歌所 棄而 其致一也。」 洪荒之世,所以猶愈於文滅質之時 儉與戚去性爲未遠,奢與易流於情矣。 至理,則過猶不及, 與其奢也,寧 莊之徒,徒識 絶滅之。 稽之度數,而 得孰多? ,當過儉矣,與 曾子之執喪,嘗過戚矣,與朝祥 儉; 其末 故嘉其問 知此,則三千三百之儀, 節,遂以 喪,與其易也,寧戚。」論 稽之性情。● 、難於爲上之大夫所 論品節,則質爲近道。 而 語 爲忠信之薄, 其故: 又不 也。 如 此 而 得 老 厭

故 麻哭踴之數,所以節之也,則 其本儉而 飲,●爲簠簋籩豆罍爵之飾,所以文之也,則 衰 夫子大而告之以此。」 ,世方以 楊曰: 己。 文滅質,而 喪不可徑情 禮 始諸飲食,故 林 放 而 能 其 直 〈本戚 問 污 行,爲之衰 禮之本, 樽 而已。 而 抔

尹曰:

「文勝則奢,質勝則儉。

當是

「抔」,原作「坏」,今據傳經堂本、公善堂本改。

寧 然近於本也。 時 以大之,故曰「與其 也,禮 戚」,亦近本之意。」 有文勝之弊,林 喪以哀爲實,故「與 奢 也 寧 放問其本,孔 儉」。 其易也, 儉非中, 子所

也。| 子曰: 「夷狄之有君,不如諸夏之亡

曰 : 諸夏 又曰: 之之僭 伊川《 「歎夷狄且有君,不如諸夏之亡也。」 通無 「此孔子言當世大亂,無君之甚, 解 **>** 日 上下之分也。」 「夷 狄且有君長,不 又《語録 如

0 而求之天 字,連下讀,則全句當爲: 引與《語録》不相合。 者。」可知謝氏治禮、主不稽刑名度數也。 喫木札相似,更没滋味,遂生厭倦。故其學無傳之 人下稍頭溺於刑名度數之間,行得來困無所見處,如 蔡語録》卷 「稽之度數,而稽之性情」句於文理稍欠通。 一云: 不稽之度數,而稽之性情。 「横渠教人」以禮爲先……然其門 故頗疑上句之「下」字當作「不」 「聖人之於禮,不求之人、 今《精義》所 又按《上

若 百 夷狄猶有君,不如諸夏之亡也。」

君臣 禮 有君,而 無以爲國,有國 而 無禮 者,有上下而禮義有所措也。 范 日 無禮無義,故不如諸夏之亡。 ,則又夷狄之不如也。」 一天 地定位而有君臣。 而無禮,則亡爲愈。 所 夷 若諸 狄 貴 夫非 雖 平

以 植 遺 維之,此夷狄所以不可如也。」● 腹 吕曰: ,朝委裘,而天下不亂者,蓋有 「所貴於諸夏者、禮義存焉耳。 禮義

乎? 之有君,令之必聽,歐之必從,其有 誰其尸之,安在其爲君臣之義也? 哀之時,陪臣執國命,政在大夫,禮樂 所加,七賦之所養,●此特其俗耳。 狄與中國一也。至於論禮樂法度,五政之 謝 以是度之,不如夷狄之有君也。」 日 「天下豈有無君之國 [哉? 中國 若夷狄 如 法 定 是 度 夷

故 言夷狄不如,傷之也。」 楊曰: 「陪臣用天子禮樂,無君甚矣,

> 猶 不能盡其道爾。」 有君,不如諸夏之亡也。」亡非實亡,有 尹曰: 「孔子傷時之亂,曰: 夷 狄 而

安知冉有之不能救,季氏之不可諫也? 不可告也。 范曰: 正,則美林放以明泰山之不可誣,是亦 能 季氏旅於泰山。 嗚呼,曾謂泰山不如林放乎?」 救與?」對曰: 然而聖人不絶於人,盡己之心, 「冉有從季氏,夫子豈不知其 子謂冉有曰: 「不能。」子 「女弗 日

0

0

弗能

教誨之道也。」

堂本、紫陽叢書本作「如」。 原空 字,四庫本作「棄」, 今據傳經堂本、紫陽叢書 和刻本作「入」,傳經

所加,七賦之所養,中天地者爲中國。」今據明抄本補 言。問道篇》: 「五」、「七」、「養」,三字原本空字,四庫本依次作「刑」、 財」、「出」、明抄本作「五」、「七」、「養」。 「或曰: 孰爲中國? 日: 按揚雄《法 Ŧ 一政之

乎? 故爲 夫祭 祭,福猶不自外至,況以陪臣旅於泰山 況祭則受福,非神福也,乃自福也。 不 本 泰山雖欲福之,亦安得 旅於泰山 不得祭天地,大夫不得祭山川,亦猶士庶人 敢以 意 等 五 也。 殺 他人之祖禰而祭於己之宗廟 祀, 日 一,不過 以 故 士庶 、别尊卑,蓋有至理 日 天 求 人祭祖 子祭天 福 一曾 而 而福之? 己。 考,此 謂 地,諸侯祭 泰 曾不 Щ 其禮 存焉。 不 知 此祭祀之 之 如 Ш 祭 季氏之 也。 文, Ш 林 乎? 所 放 當 侯 而 大

況其 泰 欲救之。 、屯難之時,膏澤不敷,權移於下,政 君臣所 Ш 國 《易》曰: 楊曰: 魯所祭 君 能 乎 蓋當是時,政之在 ? 正 也 「諸侯祭名 也,故欲 旅泰 屯其膏,小 季氏忍僭天子之禮樂矣, Ш 正 亦 山之在境内者, 其 無 季氏 小者 貞 足 道 吉,大貞 一,爲之 久矣,非魯 者 ,而孔子 兆 区 。 而 則

> 也。 其後昭公卒至敗亡,失此故也。 出 然不以罪冉有,蓋孔子以爲具臣矣,故不以 本, 況泰山 所當祭,則鬼神弗享矣。 是望之也。」 凶 之道也。 ,人君之屯也 孔子欲救 乎? 故 旅 大貞 ,權移於下, 言此又以大林放之問 泰 凶 山者,姑 一, 小 林放猶能 貞 而 吉,漸 小貞之而已。 欲 驟 然祭其 正之, 問 而 禮之 正之 也。 非 取

林 爲 放猶 甚 侯曰: ,故歎曰 能問 禮之本,泰山豈 泰山 「曾謂 非 季 泰 氏 山 所 不如林放 當 受非 祭 也, 禮之祭 乎? 僭 侈

乎?

於季氏 問 季氏,陪臣, 禮之本,泰山豈復受非禮之祭也 尹曰: 子 日 而不能救,故孔 而升,下而飲。 旅於 君子 天子祭天 泰 無所 山,可謂 子歎之,謂林放 其爭也君子。」 地,諸 爭。 僭 必也射 矣。 侯 ? 祭山 冉 猶 有 اال 在

乎? 爭也 乎? 甚 《語録》曰 君 離 己者,反求諸己,豈 也君子。」 ,無此。」 去射位 子。」言不 伊 故曰: 其 爭 川 圃 解 又曰: 「仁者如射,射 也君子,言君子 爭 飲 又曰: 也, 日 也, 「揖讓 有爭者也 「下而飲,非 射 而升,下 若曰 「君子無所 若下堂 其 其 而 Œ 爭也,是 而 而 ? 不 爭 己 飲,其 飲,則 下堂 中, 爭 平 故 m 日 不怨勝 一而飲 也 君 爭 辱 其 非 子 之 也 射 爭 又 有

飲 知 也。 也 又曰 横渠曰 其爭也,爭爲謙讓 彼屈則吾不伸 下 . 而飲者,不勝者自 「君子無 而 所 而已。 》爭,彼 伸矣,又何 伸則 下 堂 爭?! 我 而 屈 受

其 下而 (於射, ()故欲 飲 范 正 正 曰 則 辭 己以 讓。 勇於正己,故必求中, 「君子 率 揖 不正 遜 謙 而 以自牧,於人 也。 升者, E 先人 己以 後己也。 禮,正人 無 强 所 於正 爭

以義,此君子所爭也。

堂,止謂自貶下而 故 之爭,爭於辭 皆自貶下之義。 揖 讓 吕曰 而升,相爲讓而已。 爵 「古之射禮,勝飲 自飲。 不勝者之爭,爭於自下。 執 下 弛弓,說决拾 而飲,非謂下 不 勝。 勝者

事 爭 至 之時,揖遜而升,揖遜 己 無 每 此 於 也 相忘於至足之地,何所事 有 所 君子。 爭乎? 善 爭然後可 謝 ,則所謂 日 思與 . 君子,其必我得之矣。 惟不爭,故天下莫能 人 以 惟君 見君 同 子爲能通天下之志, 子 而下 」,惟 有 ·, 揖 於爭 射 善 遜 可 若出 乎? 以 而 與之爭。 似 飲 故曰其 一諸己。 君 方射 果何

爭 爭 蓋 射 也 ,則無所爭可 君 者 楊曰: 人 子 /所爭 乎 ? 故 君 知矣。」 蓋言其 也 無 揖 所 不 爭,必於 讓 ·爭也。 而 升 下 射 於射 加 而 飲,其 後 而不

七七

揖遜而升,下而飲,君子其有爭乎?」尹曰:「射者正己而已,非爭也。觀

其

施 又《語録》曰 素待繪以 素 地, 伊川《解》曰: 而後加采,如有美質而更文之以 成絢。 . 「素喻質,繪 子夏能 「美質待禮 喻,故曰 喻禮 以 起予。」 成 凡繪先 德 猶

誠 之後 禮。」故質爲之先,禮爲之後,凡學禮者 其容,内有其質也。 素爲之質,譬則 絢爲之采,譬則容也。 信而後 也。 范日: 《記》曰: 可也。 「『巧笑倩兮,美目盼兮」,外 夫子之美卜商,以其 「忠信之人,可以學 繪事後素者,采爲 德 知 必 也 所 先 素 3 有

華,則可謂備矣。」
先後,可與人德矣。君子有本有文,有實有

如之。 問,謂聖人之知所未及,足以起予,則非也。 而知學,故皆可與言《詩》矣。」 子夏之爲《詩》,與子貢之告往知來之意則 感於理而深發於性情者。若以子夏禮後之 兮」,則碩人之容其必有本矣,故繪畫之事 目見耳聞,無非妙道,而況論學之際,必有 不信之人,而欲以禹行舜趨爲禮,亦悮矣。 絢,飾也。 一,然賜也因論學而知《詩》,商也因論《詩》 起予者商也,始可與言《詩》已矣。」聖人於 謝 。 君子之於禮,亦何以異此? 曰 可以 「倩盼, 爲飾,必曰「素 容 也, 以 質 有不忠 爲 世 絢

「繪事後素。」而子夏曰:「禮後乎?」可謂之說也。夫善教者使人繼其志。孔子曰:以學禮。苟無其質,禮不虚行,此繪事後素以學禮。「甘受和,白受采,忠信之人可楊曰:「甘受和,白受采,忠信之人可

乎? 矣。 能 玩心於章句之末, 繼 亦教學相長之義也。」 然繪事後素,自子夏發之,故有起 其 商 志 、賜皆可 也, 非 得之於意言之表者 則其 與言《詩》者以 爲《詩》也亦固 此 能 予之 若 而 己 夫

以成絢。子夏能喻,故曰起予。」尹曰:「美質待禮以成德,猶素待繪

成之。」

以此,

成禮吾能言之,宋不足徵也:

也,

成之。」

以禮吾能言之,宋不足徵也:

也,

以禮吾能言之,宋不足徵也:

徵,則從之。故無徵不信,君子不言。」之道也。杞宋不足證吾言,則不言, 周足横渠曰:「無證而言,取不信啟詐妄

杞宋,聖人之後,而文獻不足以成焉。《易》 范曰:「夏商之禮,孔子嘗學之矣。

遠故 以從周 禮也近,舉而措之天下無難矣,非若夏商之 不欲用之哉? 聖人無與成之。 也。 『神而明之,存乎其人。』苟 也。 然則周有其人乎? 求之杞宋,不可得矣,此 夫以禹湯之典 法,孔子豈 無 其 周之 所

所考據。」
 吕曰:「徵,考據也。二代之禮,以孔野者可訪,然後得之。由二者之不足,故無跡以考據,必在杞宋二國,有史書可考,有好之學,亦止能言其制作之意爾。若求實

足徵矣。周衰,杞宋之君不能踐修厥猶,則先王,修其禮物,庶乎後世有考焉,則文獻二王之後,非徒興滅繼絶而已,蓋使之承統故周之文監乎二代而已。古之王者,必立故周之文監乎二代而已。古之王者,必立

[「]意言」,和刻本校云:「意言」當作「言意」。

^{)「}稽」,四庫本作「藉」。「矣」,四庫本作「也」。

興乎?」 之矣。無徵不信,不信,民不從,則禮其可文獻皆不足也, 孔子雖能言之,而不能徵

之矣。」
之文籍法度不足考證,故夫子不能正也。」
之文籍法度不足考證,故夫子不能正也。」

事耳,故有不必觀也。」 其誠意交於神明者至矣, 既灌而後,特人合。禮既灌,●然後迎牲迎尸,則未灌之前,之未發齊也,祭祀之未納尸也』,正與此意呂曰:「荀卿言『喪之未小斂也,大昏

徴也 欲觀之」,此孔子論三代之禮。 「我欲觀夏道,是故之杞,而不足徵也,吾得 杞,商之禮在宋,周之禮在魯。 父時焉; ,吾得坤乾焉。]又曰: 謝曰: 我 欲 「自「夏禮吾能言之」至『吾 觀殷道、是故之宋,而 「我觀周道 聖人當日 蓋夏之禮在 不足 幽 : 不

> 乎? 矣。」 知矣。 之禮 陽也。周人尚臭,故灌以圭璋,用玉 聲,臭味未成,樂三闋,然後出迎牲,此求諸 後迎牲,此求諸陰也。 禘非禮也,周公其衰矣,其意 當今又如此。 厲 之禮或先求諸陽,或先求諸 不信則民 不謬,於其禮何所 傷之,吾舍魯何 ,則既灌 既灌 魯之郊禘如此,則周之禮 弗從也。 而 往不欲觀,則一祭之間,舉 而 前世之禮,則文獻不足, 往,吾不欲觀之也。 適矣?」聖人考諸 疑? 考之杞宋 然則灌者,其祭之始 然 而 陰。 與此同。 已如彼,考之 無徵則不信 若商 又可 魯之郊 三王 器, 蓋 口 尚 而

於灌,以精意尤在於是故也。灌而有不至,貴氣臭而已。故祭有三重,●而獻之屬莫重楊曰:「祭以精意爲主。灌用鬱鬯,

「禮」,和刻本校云:「禮」當作「禘」

四庫本作「事」。

八〇

祭。』又曰: 以 則 也。』《易》曰 往,其威儀度數足觀 致其文,於此 祭,祭莫重於灌。 稀自既灌 誠如此。」 繁文從事, 其餘不足觀也 而往者,吾不欲觀之矣。 而 何 能 「東鄰殺牛, 足 己。 簋 致 蓋 미 觀 矣。 求 誠 以用享。」其不貴物 乎? 以 鬼神於幽 又曰: 若不既其實, 格 鬼 故孔子嘗 不如 神 則 陰之時 四 禮莫重 鄰之禴 蓋 自 歎 灌 日 而 未 带 徒 於 而 而

指其掌。 其說者之於天下也,其如示諸斯乎?」 或問禘之說。子曰:「不知也,知

如 皆失也。 謂 以 往皆 止 示 以 禘也,因禘失禮之甚 諸 魯逆 伊川《 掌 不欲 祀而 也。 天下之事,苟能使之中禮 解》 觀 其曰 云,是固失禮之大者,其節 日 ,蓋非一事之失也。 : 不知者,不欲顯 灌者祭之始 而言 爾。 也, 言之也 ,則致治 先儒 又《語 自 文 皆 灌

> 日: 皆非 録 禘之說。子曰『不知也』者,不欲斥言也。 其 指其掌。1此聖人言知此理者,其於治天下, 祭,故聖人自始灌以往,不欲觀之矣。 之大祭也。 之義以發之。」 掌乎?』蓋有疑孔子之語,《中庸》又指 如示諸掌乎?』●指其掌。《中庸 下如指掌之易。」 知者、蓋爲魯諱。 自始至終皆無足觀,言魯祭之非禮 .知其說者之於天下也,其如 '明乎郊社之禮',禘嘗之義,治國其 × E 萬 也。 事各正其名 「灌以降神,禘之始也。既灌而往 : 知孔子不欲觀之說,則 禘自既 灌者,祭之始也。以其僭 又曰: ,則其治如示諸掌。」 灌 如自此事而正之,其於天 又曰: 而 往 「褅者,魯僭 不 「孔子曰 足 觀,從首 示諸斯乎? 於天 V 如 也。 便 . 上之 下 或問 天 至 郊 示 日 其 諸 褅 知 末

^{■「}掌」,傳經堂本作「斯」,和刻本校云: 「諸掌」之「掌」

如指 其 掌 甚 易 明 也 0 蓋 名 分 Œ 則 天 下 定

惡也。 故 人先正其本,後治其末也。」 父子君臣 祭器且正之,而況於昭穆乎? 不 ,如指掌而 ·欲觀之。 范 苟知其說而正之,則由此 則 人 不以告人,而 魯逆祭宗廟, 己。 倫 明 孔子於魯先簿正祭器 m 王道 亂禮之大者也 日不知者 從此始矣。 正昭穆以正 以正天下 諱 聖 或

知也」。不知者,不可盡知也。」本,皆從此出,雖聖人亦未易言之,故曰「不以尊祖之意莫重乎此。人本乎祖,天下之以尊祖之意莫重乎此。人本乎祖,天下之日曰:「禘者,禘其祖之所自出,其所

蓋 孔子知之,或人亦知之也。 義 加 求 大 人矣,其 已? 所 謝曰: 謂 交鬼神之道。 郊社之義,從可知 昭 「此皆因 穆之序, 遵豆 一論禘 交鬼神之道,豈止 而立文。禘嘗之 其問 簠簋之列, 也。 於夫子者, 鬼神之情 非 唯

> 所 如是,則於爲天下國家 於郊社之禮,禘嘗之義,始可以言明矣。 孝之至,●通乎神明,而 乎? 也。 狀 日 爲能饗親,爲其盡子道 能饗帝,爲其盡人道而與帝同 其說,非體 「之於天下也,其如示諸斯乎? 指其掌。」」 狀,則能以神道設教,而天下服矣。 知其說,則知鬼神之情狀矣; 難言也。『知其說者之於天下,其如示諸 不 聖人以 得聞 游曰: 0 謂之不知 指其掌。」此告之以交鬼神之道也 不 也。 道 知也。」其 爲 「祭祀之義, 不足以致其 其 知 故 不 以或問 猶孟子養浩然之氣, 可 日 也, 也何有? 神祇祖考安樂之,則 禘之說,孔子 「知其說者之於天 侕 非精 與親 義。 以 爲 德 蓋惟聖人 義不足 不 同心也。 知鬼神之情 宜乎衆 知 故曰 惟孝子 亦 答 以究 丽 不 爲

「之」,四庫本無。

言之,其說亦當如此。 庸》意異。」 若言禘大禮,其義衆,恐非其質也,恐與《中 王純德之容,而曾孫篤之,所以致太平也。 夜毖祀!,蓋 之,故止及禘之說耳。成王自謂『予冲子夙 不可不知 ,萬事畢」也、《論 如 示諸 也。 『雝雝在宫,肅肅在 斯乎? 是禮 也、《中庸》兼郊社 語》特因或人之問 指 其 古人之所謂「 掌」, 則 廟」者。 又 以 而 通 褅 明 文 平 發 其

有 有 不 爲臣不全。」非或人可得 臣 也 至賾 一,不可不知也。 知而已。其爲義大,豈度數云乎哉? 也。不明其義,君道不全, 楊曰: 存焉。 「一稀嘗之義大矣,治國之本 知其說者,其於天下乎何 明其義者君也,能其事者 而問也,故告之以 不能其事 蓋

伯禽之受,皆非也。則魯之郊禘,非禮也可尹曰:「魯用天子禮樂,蓋成王之賜,

則治天下其如示諸掌也。」知。是以自始及末,皆不欲觀之。知其於

與祭,如不祭。」祭如在,祭神如神在。子曰:「吾不

否?」曰: 恭敬。」 神 人因其性,裁成禮法以教人耳。] 皆有祭,皆是天性,豈人而 在,祭在外神也。 伊川曰: 又問: 「非 也。 「祭如在,祖宗也。 「祭起於聖人制作以 祭先主於孝,祭神 祭祀本天性 不 如 一, 如 物乎? 祭 豺 神 獺 教 主 於 鷹 如

至也。 無 己以致之也。 君子七日戒,三日齋,必見其所祭者,誠之 鬼,嫌於不同,故曰如在 ,誠爲實,禮爲 其 范曰: 神,可不慎乎? 是故郊則天神降,廟 「祭如在者,祭先也, 有其 虚 也。 誠 『吾不與祭,如不祭. 則有 其 則 皆不可欺也 神, 人 鬼享、皆由 無其 神非 誠則 其

謝曰:「祭如在,謂無一作爲尸者言。

八四

吾不 況於祭乎? 於賻贈之禮,猶曰 使者未至。 如 與祭, 神 在 冉有 如不祭。」昔伯高之喪,孔 謂 故 見 攝束帛乘馬 曰: 『徒使我不誠于伯高』, 其 所 「吾不與祭,如 祭者 而 而將之,聖人 子 子之 \Box 不 而

故皆曰 則祭之,所謂 見怪物,皆曰 法》曰: 『吾不與祭,如不祭』,以是故也。」 楊曰: 如在,非 一山 林川 神。」天子祭百神,諸侯在其 祭神也。 祭如在,事死如事生也。《祭 盡其誠敬 谷丘 夫齋必見其所祭者, 陵,能出 不能 也。 雲,爲 故孔子 風 雨 地

竈

可

以致其福乎?」

不 與祭,如不祭,誠有所不至也。」 尹 王 電,何謂 一孫賈 日 問 也?」子 「事死 日 如事 日 與其媚於奧, 生,事神亦 「不然。 寧媚 然。 獲罪於 於 吾

> 又曰: 其心 也。 也。 天,求 所切,喻當權。」 於天,無所 范曰: ,則獲罪於天,雖禱於神無益也,何 媚於竈者,小以至大也。 庶士庶人,或立户,或立 夫子 媚何 「奥,尊者所居,喻富貴, 知 禱 益 其 也? 「奥者,室神之主,祭之尊 何爲 意 媚 故 奥? 抑 又《語録》 之云 何爲 竈,祭之小 夫人一不 日 媚竈?」 若 竈, 獲 罪 獲 正 者 者 罪 家 於

也。」 爲有命自天,若無義 也。 執政用事。 人君, 竈況執事。當孔子之時, 天下之國 云『夫子主我,●衛卿 吕曰: 竈主飲食,家之所有事也。 王孫賈所以勸孔子 「室西 南隅謂 無 可 命,是所謂獲 得」之意也。 之奥, 者, 尊者 故 猶 孔 以 奥 所 子以 彌 況 居

伊

川

解

>

日

奥

喻

貴臣,

竈

喻

用

事

天,無所

此 孫賈 孔 奥,直求福 日 獲 意 子 罪 知此 ,則非 <u>,</u> 媚 於 謝 「不然。 己 人 日 意, 耳。 無 以 於天也」。 所 取禍 則不爲無 獲罪於天,無所禱 在聖人之意,則 知 媚 矣。 獲 罪 其言則 於 \pm 補 孫 天 爲 賈 使王孫賈 遜 之 無 日 所 意 『我寧媚 丽 也。」使王 禱 不 逼 過 不 則 ~; 止 知 於 使 知

也,而 子之所 天 罪 ,尚安所 於天矣。 楊曰: 以斯言問之,故子告之如 爲有 禱乎? 義有命也。」 天者, 「媚竈非 理之所 \pm 理也, 孫 賈 自 欲 逆天 出 孔 此 也 而 子 使使 動 之 得 媚 罪 知 則 己 於 君 得

益 知 其 意 尹 故 日 抑之曰: 三王 孫 賈 欲 若 獲 夫子 罪 媚 於 天,求 于 己, 夫子 媚 何

子 日 周 盤 於二 代, 郁 郁 乎 文 哉

吾從周

周

范 Ħ 唐 虞 官 百 夏 商官倍,周 三百

之禮 焉 先 大。』夫子從周 時 事之多 謝曰 則 亦不 其 文 : 能違 少 大 不同 禮 禮之文出 備 者,以 時,故《記》 ···, 時 夏商 使 . 時 之然 於 '措之宜 如是而 與 曰: 也 時 宜之。 也 足矣, 聖人 禮 時 不 而 能 爲

周

徴也 俎, 黍捭 從 無 故周監於二代,其文爲備也。 琴瑟管磬鐘鼓」,文質雖 粢醍在堂,澄酒在下」,『**蕢**桴土鼓』與『列其 三代之禮 矣乎?』使孔子有其位 今用之,吾從 也 也 其 豈 「汗樽 豚 位 必 ,特學之而已,於時 故《中庸》曰: 與「 吾學殷禮 從 如 而 抔飲」與『玄酒在室, 以 周 損 以燔以 周。 作 也 益 :俑者 焉 ,有宋存焉; 王天下 蓋 炙, 爲 非天子不制 「吾說 如 而 不仁, 不同,然有 陳 乘 制作 有三重 其 殷 王之禮 犧 之輅,豈 夏 聖人 爲芻 禮樂,蓋將 性,備 禮 馬 醴 吾學周禮, 八有其件 ,不敢 其 ,杞不足 醆 自來矣。 靈 在户 察過 者 必 從 爲

八六

禮,不考文也。」

知聖人復起,●無以易此也。」 王,修其禮物,因 監二代也。 備矣,故曰「郁郁 楊曰: 夫周 一周 立夏商之後,使之統 監 時 乎文哉,吾從周」者, 於二代而損益之, 制 宜 ,有可考者。 承先 從 然後 其 其

道也。其損益固嘗告顔淵矣。」
乎文哉,言其盛也, 吾從周,不敢反古之呼文哉,言其盛也, 吾從周,不敢反古之

义而從之。」 「三代禮文,●至周大備,美其尹曰。 「三代禮文,●至周大備,美其

聞之,曰:「是禮也。」人之子知禮乎? 入太廟,每事問。或曰:「孰謂鄹子入太廟,每事問。或曰:「孰謂鄹

也。 其 、敬焉。 鬼 范曰 伊川 神視之而 : 日 故 : 人太廟,每事問,慎重之至, 國以宗 不見,聽之而 雖知亦問,欽慎之至也。」 廟爲本,所以教民孝 不聞,聖人尤

則是禮也。_

也。」 後 問 可 者 1,慮有 吕曰: 以 議禮之得失。 所 變,不可 禮 雖 有 經,不能 不知。 禮所當問,非 問 無 而 變。 知之,然 所 以

以問 乎? 之也。 其 謀焉,其將誰 禮 人豈知我者 從大夫之後,於禮之闕失有 得失,於蜡 亦自任矣, 豈其人太廟 猶曰慎之至也。」 謝曰: 而辯之,或以告而改之,冀有補也 使其無所 每事問,祝史有知其失者,其能 則喟然 ,子寧與之辯哉? 可? 「孔子考三代之禮,議時 知 ,其能無疑乎? 而歎 於入太廟,姑與祝 () 禘則 而 不得而正 疑之也? 不欲觀 日 [是禮 由 其於 此 王之 史 蓋 將 動 語

● 「知」,原空一字,四庫本作「能」,公善堂本作「知」,今

「代」下,四庫本有「之」字。

0

焉者。不知爲不知,是乃所以爲知也。」禮。蓋籩豆之事,則有司存,君子有不與知楊曰:「每事問,敬其事也,夫是之謂

之得失,聖人亦欲知之,故每事問。」侯曰:「子人太廟,每事問,慎也。禮

者,豈足以知孔子哉?」慎之至也,其爲敬莫大於是。謂之不知禮慎之至也,其爲敬莫大於是。謂之不知禮,尹曰:「禮者,敬而已矣。雖知亦問,

之道也。」
專以中爲善也,與爲力而射者不同科,此古專以中爲善也,與爲力而射者不同科,此古明道曰:「射求正諸己,主于容體,不

曰 : 同 主 故曰 皮 科 《爲功也。 也。 伊川《解》曰:「射有五善,不必專 「爲力猶言爲功,射有五善,爲功不 不同 古者取善之周也。」 科。 功力非一端,苟 所謂 五善者, 有可取,不必 觀德行,别 又《語 以

邪正,辨威儀云云。

一也。」 墜於地者,中鵠爲可知矣,此爲力不同科之以貫革爲勝。侯以布,鵠以革,其不貫革而以貫革爲勝。侯以布,鵠以革,其不貫革而横渠曰:「君子之射,以中爲勝,不必

專取 也; 以主皮爲善,與爲力 破。」若王良之御,爲之範者,不主皮之謂 子不貴也。《詩》云: 於中, 范曰: 爲之詭遇者,爲力之類也。」 而無其德 「射求正諸己,故以觀 行,則是尚力而已, 而射者不同 『不失其馳,舍矢如 科也。 德,不 必 君

不主皮,以其力之不同也。」 然無害於中,則比於禮樂,亦可見矣。主皮 於樂,中少者不得與於祭。射而貫革,主皮 也, 射而不貫革,不主皮也。雖不主皮, 於樂,中少者不得與於祭。射而貫革,主皮 , 謝曰:「容體比於禮,其節比於樂,中

楊曰:「容節可以習而能,力不可以

八七

八八

也,言古之道以正今之失。」 强而至,故射不主皮,爲力不同科。古之道

也。古者取善之周也。」
功也。功力非一端,苟有可取,不必同科功也。功力非一端,苟有可取,不必同科尹曰:「射有五善,不必專以主皮爲

也,爾愛其羊,我愛其禮。」子貢欲去告朔之餼羊。子曰:「賜

子貢欲 得 火 也。 (以爲羊存則政舉,將有所考,譬猶以 丽 謝曰:「當是時,告朔之禮已亡,是以 用之; 去 是以 餼 羊。 夏之政雖衰 商之政雖衰,湯之禮未亡, 禮之存亡,何與於一羊? ,禹之禮未亡,故

> 也。」 惜乎其終 故 興斯道爲己任者,終不可得,以其文不足故 作,將舉而 文武 得 廢也。三代之後,雖有志之士以 而 措之天下乎? 用 之。 夫子又安知不有 是以愛之。 然 王 者 而

又《語録》曰:「事君盡禮,在它人言之,伊川《解》曰:「當時事上之禮簡也。」子曰:「事君盡禮,人以爲諂也。」尹曰:「禮廢矣,羊存猶得以識之。」

必曰 「小人以 子曰「人以爲諂」而已。聖人之道大德宏, 非孔子而言,必曰: 故其言如此。」 「當時事君者,於禮不爲盡也,故以譏聖人。 禮與諂異 爲諂」,聖人道 矣,諂何疑於盡 或 問 『小人以爲諂也。』孔 孔 一洪,故 子 盡 禮 ? 日: 止 日

必犯,是以不爲諂也。」犯,是以常爲諂也, 事君盡禮者,君有過犯, 是可言 「事君不盡禮者,君有過必不

以 所 語, 云 自其不知天命不 無 以 德則事我者也,亦何可當斯禮? 可以見夫子之盡 義,不可也。 聖人且 必 其言非 盡禮者,以其 : 「觀《鄉黨》之所記,與拜 以我 非怒,直以待知者知此道 爲有義,不 畏大人者觀之,宜以爲諂 日『事君 禮於君 畏天命畏大人故也。 盡禮,人以爲諂 可也 也 魯衞之君, 然聖人 且 下之 以

> 别。 誾 禮,又不與你計較 與夫子所謂『事君盡禮,人以爲諂」,其立言 也 自然到此,不待勉强做出 瞽者,見之便作,過之便趨。 相,怎生當得聖人恁地禮數? 日: 則異,聖賢之分固 於王前 王 自參較彼我,未有合一底氣象。」 如也, 矣,其言曰 不期於自 孟子說大人則藐之,勿視其巍巍然,猶 「事君盡禮,人以爲諂。」當時諸國 ,故齊人莫如我敬王也。」道則直矣, 與下大夫言,便侃侃如也。 明 也。 我 長 [如此。] 非堯舜之道,不敢 短。 孟子人嘗以 來,氣象與孟子渾 與上大夫言, 又曰: 蓋其德全盛 是他 爲不 只 「孔子 敬 便誾 管 者

以爲諂乎?」 楊曰:「如拜下之類,則拜上者寧不

尹日 定 」孔子對日 問 歎當時 君 使 事 臣 上之禮 「君使臣 臣 事 簡 以禮 也 如 之

君 以 忠。」

以 私意鑿 ,小者與之小,此賢人所以不及也。」 范 日 也。 聖人之言出於天 若天地之於萬 物、大 理 者 面 與之 未嘗

事

吕曰:

「使臣不患不忠,患禮之不至

君不患無禮、患忠之不足。

禮使其 曷 之以 如 之如土芥,畜之如犬馬,然後知三代之君以 賤 忘之?」此以忠事君。」 則 其 國人,疾之如寇讐,然後知三代之臣以忠 飲食之?」此 賤 君矣。 可,非爲君之道; 臣 事 日 也。 貴則可,非爲臣之義。 \sim (詩》不云乎: 「不能使臣以禮,謂之以貴 《詩》不云乎: 以 禮使臣 不能 也。 『中心藏之,何 事 觀後世視之 「中心好之 觀後世 君以忠, 視 謂 治

飵 君使臣不以禮,則臣雖欲盡忠不可得也。」 以將 楊曰 其 厚 意,然後 ~ 鹿鳴》既飲食之,又實幣帛筐 忠臣 嘉賓得盡其心焉。

H

事 天,其近如地1者,此也。」 過如此。 近,顧知之者如 以忠,君臣之道盡矣。 矣。定公問君使臣、臣事君,孔子對 臣 止 君以忠, 於敬。 侯 日 伊川先生日 盡臣道也。 知禮知忠,則誠 君使臣 何 爾。 以禮 聖人之言, 爲人君止於仁, 「聖人之言, 以禮 盏 盡忠、雖堯 敬之道立 君 道 無 也 其 精 日 遠 舜 以 粗 加 禮 如 不 遠 仁

以 禮 尹曰: 則臣事君以忠。」 「君臣以義合者也, 故 君 使

子曰: 傷。」 「《關雎》樂而不淫, 哀 而 不

其 不得,輾轉反側,是哀而不傷。」 色,是樂 明道曰: 面 不淫。 樂 得淑女以配君子,不 哀 窈 窕 思思 賢 才,

也。 傷善也。」 哀思之切,無傷善之心也。 伊川《解》 又《語録》曰: Ĕ: 樂得淑女,非 「大凡樂必失之 切於色,乃 淫 其 色

《關雎》則不然,故不至於傷,則其思也,亦則思之甚切,以常人言之,直入於邪始得。雎》則止乎禮義,故如哀窈窕,思賢才,言哀淫,哀必失之傷,淫傷則入於邪矣。唯《關

乎常人之思矣。」

也。 之過,傷者哀之深也。 不和則無以爲《關雎》矣。」 《詩》, 樂者淫之事,●哀者傷之事; 范 則琴瑟鐘鼓,樂也; 日 「此言其聲之和 發而不中節則不和, 寤 寐 也。 2 輾 淫者樂 冰轉,哀 求之

傳》所謂『無服之喪,内恕孔悲』也。」 吕曰:「哀謂惻怛,至誠而已,如《禮

於哀 樂而 示天 之義也。孔子於此、非特 窕,思賢才, 也 不 下以性情之正 謝 淫 《關雎》之義,發乎情,止 ,無惡於樂也; 而 「樂得淑女,不淫其色, 無傷 一,而淫 善之心焉: 諭 傷非性 哀而 《關雎》之義,因 不傷 情之正也。 是《關 乎禮義 『無惡 哀窈 雎》

> 是以 善 傷,非特相近而 養其 聖人 性 情者,不過 有取焉。 不 同也。 能 如 知禮樂正反之節 此 惟深於道者,可 與樂而 淫哀 以 而 而

默而識之矣。」

而已,故太姒所以宜爲文王之配。」 與在於得淑女,則異乎人之樂也,故不淫其樂必淫于己,其哀必傷于人。《關雎》之其。此,故不淫其。 其哀在於思賢才,則異乎人之哀也,故不淫其

窈窕,思賢才而已,故不傷。」楊曰:「樂得淑女而已,故不淫; 哀

配君子、憂在進賢、不淫其色、是樂而不淫尹曰:「以《詩》考之、謂樂得淑女以

⁰ 淫」, 此 處 補 原 以 小 字 闕」 傳 經 堂 本、 和 刻 本並作

[[]傷],今據補。

③ 「傷」,此處原以小字註「闕」,傳經堂本、和刻本並作

哀而 也 轉,哀也。 、聲之和,發而皆中節者也。 3 不 哀窈窕 傷 也。 然則樂不失於淫,哀不失於傷, ,思賢才,而無傷 鐘鼓琴 瑟 樂 也 善之心焉,是 寤 寐

遂事不諫,既往不咎。」 「使民戰栗。」子聞之曰:「成事不說,氏以松,殷人以柏,周人以栗。」曰: 反 以 松, 殷人以柏, 周人以栗。」曰:

也。」 又曰:「社本主字,文誤也。」也。如今人嗟惜一事,未嘗不再三言之往不咎」者,大概相似,重言者,所以深責之得,所以曰:「「成事不說,遂事不諫,既

取 或 哀公爲政,將以刑威民,故緣周人以栗之說 我,戒以言之出 于木,●而又曰使民戰栗? 其如指諸掌。 范 日 日 「明乎郊社之禮,禘嘗之義,治 「使民 「不可不慎,其以此故歟?」 君 有問焉,則宜對以義,何 戰 栗者,哀 孔子深非 公之言也。 室

> 以 m 可 三言責之。 便 宜 爲 木,而 同成事、遂事之比。」 解 以 傅 非 蓋哀公初有此意,尚在可救,不 會其 所 取義,不爲之辨,故孔子以 意。 宰我知松柏栗皆 所

以 已矣: 之曰: 己 秋傳》曰「大夫無遂事」,遂言專也,遂事 尚可諫也; 失之矣。 不同對之。 從古以然,故宰我因哀公之問,以三代所宜 言哀公此語 所宜木對,哀公曰使民戰栗,則失其旨 所當與,故不諫, 楊曰: 謝 日 皆君子不爲也。 『成事不說,遂事不諫,既往不咎。』 宰我阿其意而 哀公不知其意,而曰使民戰栗, 非成事,尚可說也, 非既 「已成不及改,故不說, 「各以其土之所宜木以爲主, 往,何不可咎也?」 既往而咎, 不能辨之也。 哀公問 社 則 非遂 責 而 子聞 宰 無 予

校云"「水當作木。」今據四庫本、傳經堂本改。
●「木」、原作「水」、四庫本、傳經堂本並作「木」、和刻本

川

解》

曰:

謂

管仲器

小,非止

謂

莫之救,孔子是以言之,以正宰予之失。」之言,非此三者之謂,宰予所宜救正也,而矣。 由是而使民,必有非其道者。 然哀公

說、不諫、不咎也。」 一侯曰:「社,三代各以其土之所宜未爲成事、遂事與夫既往,孔子所以責其不以松柏栗爲對。 哀公有意於刑威,故曰:以松柏栗爲對。 哀公有意於刑威,故曰:以松柏栗爲對。 哀公問社於宰我,而宰我

我於木。宰我不知而妄對,故夫子責之。」 尹曰: 「古者各以所宜木名其社,非取

子曰: 坫。 邦君 日 攝,焉得儉?」「然則管仲 仲儉乎?]曰: 爲兩 管氏 「管仲之器小哉。」或曰:「管 邦 君之好,有反站,管氏亦有反 而 君 知 樹 禮 塞 ,孰不知 「管氏有三歸、官事不 門, 管氏 禮 亦 知 禮乎?」 塞 門。

器大則自知禮矣。」 不知禮也。或問其知禮乎? 故答以不

坫。 禮 則王者之事也。夫惟器小,是以有三歸、反 繩 乎? ,豈理也哉?」 禮者, 范曰: 先自治而後治人之謂大器 理也。 「楊雄曰: 臣 無 「大器其 君之事,而僭君之 猶 。」大器 規 矩 進

哉? 焉? 規 之間 歸、官事 奢亦奢,則其得君 下,民受其 可大受也。管仲相 器。」此說非是。孔子之意,直以管仲爲 仲尼曰器 矩 謝曰: 淮 不過 甚 謂之小器,不亦宜乎? 繩 可鄙賤 不 小, 歟 濟耳 (賜,其 攝 ? 「楊子云: 請問大器? 曰: 先自治而 樹 目之欲 ,猶兒女子得意於衣 功大矣。然君 而專國政, 豈以天下爲 塞 桓公,霸諸 門 而 與 一齊 己。 反 後治人之謂 站,於汝 得 曾不 夫子於管 夷吾 淫亦淫, 侯,一匡天 大器 知 服 圃 其 有 何 稠 君 加 不 大

何 「,然後可 . 誅 焉 以語道矣。」 蓋 欲 指 示 學者, 使 知 先 立 乎 大

途。 器 蓋 歸具官告之,則又疑其知禮 而 稱 非王佐之才,雖能合諸侯匡天下,其器不 小者 不 也已。 知 楊曰: 故聞管仲之器小, 爲之範,則不悟其 有不在 正學不明,●而王霸之略混爲 「夫子大管仲之功 是也。 蓋世方 則疑 小宜矣。」 ,而不知其所謂 以爲儉; 以 詭 加 遇 小其 爲 以三 功

楊子曰: 也 子 尹 舞 日 作,翕如 魯太師樂, 「先自治而後治人之謂大器。」」 如也,以成。」 而 犯 日 從 禮 人之,純 其器之小可 樂其可知也 如 也 知。 如

語之如 至 一於繹 范 伊 川《 如 此 日 (解))日 非 然 因 通 瞽 朦 于樂者,孰能知之?」 磬 「樂始翕如 司 以 聽 求 以其義 加 所 列則 知者音也,故 純純 樂亦 如 皦 可 如 知

0

矣。 終,故其本末皆不廢 聖 人守其 義 圃 闡 也。」 其文, 究其 始 而 要

其

所謂 合而 五味之相濟, 成」。 相 如 謝曰: 反 無 和矣,欲其 ,言其合也。 相 而相連,如貫珠可也,故曰 樂之聲音,盡於此而 奪倫者,豈宫自宫而 然後 「五音六律不具,不足以 無 相 五音合矣,清 和,故曰『從之純 奪倫,故曰 己。」 商 濁 二辉 自商乎? 高 如也。 下, 如也, 爲 也」。 如

翕

也; 魯太 奪 之者、蓋周衰、禮壞樂亡、樂之不得其所 倫,從之純 楊曰: 師, 終始之緒不可 魯之司樂者, 「衆樂並 如 也; 亂,故繹 作,故 宜知樂矣, 可 觀 翕如 其 如 深, 也 也 而 以 故 孔 成 子 如 相

以

不

景昭舉楊氏曰『道學不明,而王、伯之略混爲一塗」。」 E, 趙 則 明抄本作 「正」疑當作「道 書纂疏 《朱子 引楊 ,語類 氏此語並作「道 五

樂至此則盡美矣。」和,則皦如明白,無相奪倫,故繹如而成也。如,合也,從之純如,合而和也,合而健,合而矣。,

下可知,亦可謂善論賢人矣。」封人者不傳也,獨記封人之言,而其才之高言如此,亦可謂善觀聖人矣。夫子所以語言如此,亦可謂善觀聖人矣,見而知之,其

夫子也。」

謝曰"「天下有道,聖人達而行有枝

葉; 況之,不亦宜乎? 封人之意,以爲 子所以鳴道於衰周之時也。 天下也,何必進而撫世哉 夫子矣,故弟子特記之。」 夫子則後世其如折衷何? 天下無道 聖 人窮 而 ? 辭 顧以道未 如封 以 有 木 枝 人可謂 鐸 葉。 斯 振 喪於 文微 文 此 教 知

乎? 天將以夫子爲木鐸。』言興斯文者在知其道在是矣,故曰:『二三子何患於喪明不行也,天下疑其喪矣。 封人見孔子,則明不行也,天下疑其喪矣。 封人見孔子,則也。何患於喪乎? 木鐸振文事故也。」 本鐸版文事故也。」 大下雖為曰:「斯文之興喪,天也。天下雖

也可知已矣。」
尚能識之,而人君莫有用之者,則時之不幸子,復何患於道喪乎? 當是時也,儀封人尹曰:「木鐸,施政教所振也,以況夫

]。]謂 善,亦武王之德異也

道? 如此。 心哉? 美 豈以我 征 與 誅之義,順乎天 謝 盡 日 征誅之義,固不 所 善,聖人之意,豈 如冬日則 遇之時不 揖遜之事,天與之,人與之。 而應乎人也,聖人豈有一 飲 如 湯 舜 如 儀鳳之容,然聖 而 夏日則飲水,事 不 日 私 自己哉? 舜 與武 王 人 同 故

未 德,則武之用心可知矣。 功者,舜以紹堯 人之樂皆無餘 盡美,以其功言之也。 武》,豈可 盡善者其事也。 游曰: 同 「王者功成作樂、《韶》、《武》之 日而 美。 丽 爲《韶》,武 乃若所遇之事,所 語哉? 猶之周公東征 如觀 故 盡 其成功,則二 觀 美者其功也 以滅 成 湯 四四 之 商 2有慚 或 而 以 是 爲 致

□ 「德異」,傳經堂本、和刻本並作「德異」,今據傳經堂□ 「德異」,原爲墨釘,四庫本作「所知」,紫陽叢書本作

加

損

亦

不加益

焉

湯

有

慚

德,其

自

知

明

也

海

雖

欲

爲《韶》,

亦

不

可

得矣,其

未

亦

異

也

樂所

以

象其

德,德之所至,聖人

不

范

E

「《韶》與《武》,其德

不同

其

磬

《武》:「盡美矣,未盡善也。」
子謂《韶》:「盡美矣,又盡善也。」謂

伊

川《解》曰:

「一有傳之失者,

故

未

其所 孔子自衛 不及 也。」若非 亦有未盡善者。 之樂則未盡善爾。」 盡 慚德,武王亦然,故 盡 善,言當時傳舜之樂則盡善盡美,傳 又曰: 善。」 也。 揖 ,是知未正之前,不能無錯 讓 反 征伐非 有 又《語 **E** 「《武》未盡 魯,然後 司 失其傳,則武王之志荒矣。 録》曰: 《樂記》曰: 其 迹故不及, 所 未 樂正、雅 又曰: 善,非是武 欲 盡 ",所 善。 「成湯放 然其聲音節 遇之時 堯舜 「有司失 亂 》、《頌》各得 説者 者。」 、王之樂 桀 湯 然耳 以 武 其 武 惟 征 傳 其 奏 誅 未 有 Ŧ

九六

至於致辟管叔於商,豈其所欲乎?《武》之皇,是時周室幾再造矣,其功顧不大哉?

未盡善,其事類如此矣。」

如此。」 賢,天與子則與子。」唐虞禪,夏商周繼,皆天 盡美 帝王之號,亦因時而已,非有心迹之異也。」 其所欲哉? 不得已焉耳,故曰未盡 欲,故未盡善也。 也,聖人何容心哉? 奉天而已。 顔淵問爲邦,則告以樂則《韶》舞,●則《韶》之 「舜之孝,武王之武,聖人之不幸也。」征伐豈 楊曰: 盡善可知矣。 又曰: 「在齊聞《韶》,三月不知肉味。 樂以象成,故形於聲容者 「孟子曰: 武之《武》,非聖人之所 「天與賢則與 横渠曰 善也。

何

足觀之哉?」

有其聲,蓋不可以僞爲故也。」 尹曰:「樂所以象德,故有其德者,則

哀,吾何以觀之哉?」子曰: 「居上不寬,爲禮不敬,臨喪不

伊川《解》曰:「居上以愛人爲本,主

本也,●何以觀乎?」 於寬厚,禮主於敬,喪主於哀, 不然,是無

[162°。]♪ 臨喪則哀者,理當然也。聖人之言,惟理而故不可不寬,寬者爲上之本也。爲禮則敬,故不可不寬,寬者爲上之本也。爲禮則敬,

慢而不敬,臨喪易而不戚,皆失其本矣,尚楊曰:「居上不寬,則無以容衆,爲禮已矣。」●

喪主於哀。不然,則無本矣,何所觀乎?」 尹曰:「居上主於寬,爲禮主於敬,臨

國朝諸老先生論語精義卷第二上終

- 「則」,四庫本無。
- 「是」,四庫本作「則」。
- 哉?」」凡四十九字。 夷,則本不立矣,其如末何? 故曰:『吾何以觀之哀,則本不立矣,其如末何? 故曰:『吾何以觀之思本,臨喪以哀爲本。居上不寬,爲禮不敬,臨喪不以宜爲本。爲禮以敬

或 . 朝諸老先生論語精義卷第二下

里仁第四

子日 里仁爲美。 擇不處仁,焉

?

美。」 明道曰 又曰: : 「里仁之所止。」 「里,居也。 擇仁而處之爲

伊川《解》曰: 居以親仁爲美。 處不

擇仁,●焉得爲知?」

仁,而 也。」 則是知矣。故仁則知在其中矣,身不 也。」亦若里而已矣。 范曰: 謂之知,可乎? 「孟子曰: 知仁之美,擇而處之, 故不仁未有能知者 「仁,人之安宅 處于

吕曰: 「所居之里有仁人焉,猶以爲

> 者不如 擇術以 也。 自處,而不居於仁,則居仁之里

也。莫之禦 故繼之曰: 謝 日 而不仁,是不知也。」今當以此 「夫仁,天之尊爵也,人之安宅 孟 子因擇術之論嘗引此矣,

論 楊 E : 「不能知仁而弗去,焉得知?」

爲

證。」

尹曰: 「里居之間 有仁者,猶以爲美。

處 而不擇乎仁焉,焉得爲知乎?」 子曰: 以長處樂。 「不仁者不可以久處約,不 仁者安仁,知者利仁。」

爲利也。」 行之,是利仁也。 而行之。 伊川曰: 至若欲有名而爲之之類,皆是以 又曰: 「知者利仁,知者以仁爲 心有其仁,故曰利。」 「知者知仁爲美, 擇 利 而

移,惟仁者能之; 范曰: 「久處樂而不淫,久處 不仁之人,樂則思驕,約 **総約而** 不

可

[「]處不擇仁」,四庫本作「擇不處仁」。

樂天者也, 者未有 畏 則 也,故安仁; 面 體之日安, 高 思 濫 明 能獨 是以是以 居逸 行者也。」 不可久 利仁者,畏天者也。」 知其善而爲之曰利。 知者,知 而 自 處 久 也 也,故利仁。 又曰: 處 0 憂患 夫不 虐 而 惸 不 有諸己 困 猫

我既 有 欣 미 我 窮約 所 心 也 事 厭 無 厭,故不可以 喪 存乎事 乎 而 謝 久處約 (矣,則 内外 盡 哉 日 然則不仁者, 性者,於此豈有二心哉? ? ,憂樂發乎情 遠近精粗之間, 以物爲 미 有 約對 也 所欣,故不 長處樂。」 利達,樂對憂愁。 我, 蓋 樂何與我 未 , 所性 知我之爲我 以 口 非 物爲我, 以 又曰: 不存焉 有 事,長處 久處 所 存 約何 能 約 利 加 無 與 彼 達

> 之有 不知 道 不亡,非有所 持 不惑則可 不 安仁 此 所 而足 亂 得 味 者, 未 也。 行 則 能 也 未 然未免於利之也。」 理 非顔、閔以 無 諸 口。 而 意 知 子 自不 者謂 也。 ·雖有 有 所 亂, 之有 安仁 存 E 卓越之才,謂之見 一去聖 班不 如 所 則 目 見則 Ė, 人爲不遠, 視 而 利 有 可 耳 0 所 則 理

長也。」 得。 也未 仁,利之也。」 未能敦 必盡濫 楊曰 又曰: : 乎仁、蓋 ,其處樂也未 「安土敦乎仁,則 「由仁而行,安之也, 有 刻意厲行者,其 必 盡淫、然而 無 人 而 處 不 何 約 自 可

又曰: 道 不能安貧,則諂怨無 僭,驕僭則 也。 侯曰: 貧而樂,富 安仁,生而知之者也 犯 禮 「不仁者久處約 뻾 而 亦 好 所 無所不至: 禮者 不 至 唯仁 則 長 不 能之。」 處樂則驕 能 利仁,學 皆亂之 安貧

● 「謂之」,四庫本無。

九九

而知之者也。

事也。若仁者,則安於仁而已矣。」利其仁也。心有其仁,是利之者,乃知者之能之。」 又曰:「知仁之爲美,擇而行之,,尹曰:「泰而不驕,窮而不濫,惟仁者

开川《解》曰:「导志公臣也。」 子曰:「唯仁者能好人,能恶人。」

伊川《解》曰: 「得其公正也。」

頑讒說」,仁者所惡也。」《書》曰「敬修其可願」,仁者所好也,「庶惡者,必不仁也。唯仁者能公天下之好惡。惡者,必不仁也。唯仁者能公天下之好惡。

爲能好惡人。」
之逆已而惡之,惡人之逆理也。故唯仁者人之順已而好之,好人之順理也, 不因人人之順已而好之,好人之順理也, 不因人

也。惟仁者宅心于大中至正之地而無私然好惡每失其實者,心有所繫,而不能克己游曰: 「好善而惡惡,天下之同情也。

唯仁者爲能。」
之,仁或未足以守之,則不足以與此,故言焉,故好惡非我,遵王之道路而已。 知及

之好惡,而不爲私焉。」 楊曰:「會物於一己,而後能公天下

尹曰:「仁之道,公而已,所以好惡皆

子曰:「苟志於仁矣,無惡也。」當於理。」

也。」 伊川《解》曰:「苟志於仁、則無不

有?」以爲子則孝,無所往而不爲善,何惡之爲君則愛人,以爲臣則盡忠,以爲父則慈,爲曰則。 「志於仁者,心以仁爲主。以

矣。世人見君子亦有惡,於此論不能無疑之志,則於人何所惡也? 容衆而矜不能可不可不謂之知仁也。惟知仁,故能通天下不可不謂之知仁也。惟知仁,故能通天下謝曰:「苟志於仁矣,雖未能安仁,然

惡己之惡,則謂之無惡亦可也。」人之惡不同,斯知之矣。使其惡人之惡如也,蓋亦未之思耳。盍亦察惡己之惡與惡

而爲惡則無矣。」 楊曰:「苟志於仁,未必無過舉也,然

子曰: 「志於仁者,何不善之有?」 要也,不以其道得之,不去也。君子去 恶也,不以其道得之,不去也。君子去 思也,不以其道得之,不去也。君子去 一,惡乎成名。 貧與賤,是人之所 是人之所 是人之所 是人之所

則道日益明矣。」 得之。」 又曰:「須是無終食之間違仁, 明道曰:「不以其道得去貧賤,如患

次必於是,顛沛必於是,言守道也。」 又也。道不可須曳離,可離非道,言道也。造矣。」 又曰:「終食間不違仁,得善勿失矣。」 又曰:「終食間不違仁,得善勿失

之,而 顛沛必於是。」 月至焉。」 又曰: 於是,三月不違仁之氣象也。又其次,則 日 純亦不已,天德也。 「無道 不處焉,惟特 而 得富 貴,其 立者能之。」 「自下而達上,惟造次 造次必於是,顛 爲 可 恥, 又 皆知 日 沛 H 必

也。 乎名也,然而有其實則其名從之。存乎仁, 賤亦不去也。」 皆不以其道也。君子正其在己,而 賤,小人之所當得也。爲小人之所爲,而富 離非道也。」仁不可造次顛沛違,可違非仁 又曰: 「《中庸》曰: 『道不可須與離,可 有諸内必形諸外,故去仁則無所成名。」 則成仁之名; 天者,故非道而得富貴則不處,爲仁而得 且貴焉, 爲君子之所爲,而貧且賤 范曰:「富貴,君子之所當得也, 夫如是,則可以謂之學矣。」 存乎不仁,則成不仁之名。 又曰:「君子爲善,不蘄 聽 其 貧 在 貧

苟且 涉 急遽 難 而 可知矣。」 已,非常居; 涉難之時 : 造 次 也。 者 顛沛者, 顛覆陷溺, 迫 造次,謂 荷 且 之 時 所 之所舍, 顛 沛

是。 道。 無放 之,如形之與影,聲之於響也。 實亡矣,故曰 所惡不去,不以富貴貧賤異其心,惟仁者能 至於不 至於造 於仁,非有意於不違,特身之所在,仁斯從 名之至。故非體仁不足以盡人道,去仁 子者,仁之成名也; 而 悲貧 樂富 飯 蓋 謝 《賤,欲 又曰: 日 無 處 欲離於是,亦不可得也。」 次 貴 流歐,則不違可知矣。 不去,則小人與君子異。 非 「有得富貴之道,有得 而 常常 也,所 惡乎成名。」 「惟盡仁然後有仁之名。 悲貧 處 河,顛 性不存焉。 賤 沛 聖人特體仁之盡 者,君子與 非 又曰: 所安,猶且 觀終 所欲 豈特如此, 小 貧賤 樂富 日之間 人 不 一必於 君子 ൬ 同 則 得 君 貴 之

> 驗其學不在 日 有命 不 祭,則僧家出生,皆可以爲不違仁矣,此 於仁,雖終食之頃不違也。 則君非君,子非子矣,安所成其名?」 得卿,孔子不爲也。」 又曰:「君子去仁, 貧賤,是不以其道得之也,然 處 也。 ,以有義 游 「無終食之間違仁、言造次顛 此皆爲君子言之,故主彌子瑕而 己。 也。 富 與 君子宜富貴者也,今至於 貴 非 其 道 如以 圃 得 不去者, 之, 飲食 沛 則 必 必 君 依 有 口 又 以

焉。 將 子之去貧賤,亦去其得之之道而 賤,君子不去焉; 則趙孟之所貴,趙孟能賤之,故君 賤,此以其道而得之者也。 去之矣。 然富貴貧賤,皆天也,不以其道 楊曰: 去,而猶不免焉,天也,君子何 然則其去也可 「君子而得富貴,小人而 則 以 其 必乎? 得之不以其道 道 而 得之者, 曰: 子不處 M 得 得 得 貧 貧 古

乎? 是焉。 哉?」 是,則所謂無終食之間違仁者,可勉而至 民 禮 其爲說陋甚矣。 間違仁,此雖間巷之人皆能之,何俟君子 也 而已矣。 何以 如承大祭。』知此,則可與言仁矣。 爲仁。」告仲弓曰: ,故無終食之間違仁,雖造次顛 所謂造次 然所謂是者,果安在乎?」●曰: 成名?」 又曰: 世儒 謂 類沛 孔子告顔淵曰: 飲 「道二,仁與不仁而已,去 又曰: 食必有祭,爲無終 『出門如見大賓,使 必於是,又 「道不 (何事 可 沛 『克己復 須 亦 夫如 食之 央 也? 必於 か離

知 不改其樂矣。」 君子與小人異。處之不以其道,雖 小人同; ·,弗顧 不知爾。 侯曰 也; . 其得之不以其道,則不處不去, 若曰 「富貴貧賤,其欲其惡,君子與 去之不以其道,則簞食瓢飲 又曰: 知也,何必終食之間哉? 「仁不可 離也,在 禄以天

係

嘗見爾,豈敢謂天下無仁者也?」

無間可違也。」

也。」 所惡有甚於貧賤者,不仁是也。 不以貧賤 而樂不仁,故曰: 『不以其道得之,不處也。』貧賤,人之所惡, 富貴者,仁是也。不以富貴而害仁,故曰: 又曰: 尹 **日**: 又曰: 「君子之於仁,純亦不已。」 「富貴、人之所欲 「去仁,則不得名君子矣。」 『不以其道得之,不去 , 所欲 有 甚於

(乎力也。用力於仁者,固當有之,●己未乎力也。用力於仁矣乎? 我未見力不足日用其力於仁矣乎? 我未見力不足日用其力於仁矣乎? 我未見力不足子,不使不仁者加乎其身。有能一好仁者,無以尚之, 恶不仁者。

也。」

- 「乎」,四庫本作「哉」。
- ❷ 「當」,四庫本作「嘗」。

徒 者不如是,不足以成其身,故孔子未見其 故徒善未 不仁而不使加乎其身,惡不仁爲甚矣。學 好仁 如好色,好仁爲甚矣。見過而内自訟,惡 不仁,然後 ,必歎曰已矣夫,思之甚也。」 横 渠 而 必 不惡 日 盡 盡仁義之道。」 義,徒是未必 不仁,則習不察行不著。 「惡不 仁,故不善未嘗不 盡仁。好仁而 又曰: 「好 知

者,中道 惡不仁者不若好仁者之爲美也。 必自外入而後見焉,好則仁在其心 其身,是亦爲仁矣。 夫有好必有惡,然所 是志於仁者也, 有能一日用其力者也。 性然哉? 不能審其好惡故也。是以仁者常少,豈其 無人,故聖人以爲有之而未見也。」 范曰:「人莫不有仁,其爲不仁者,由 一而廢,不爲仁者,自畫而已,●故 蓋不爲也,非不能 惡不仁者,不以不仁加乎 以天下之大,不可 也。 力不足 而已,故 好仁者, 鮮 惡

是功效,人莫之敢抗,豈患力不足哉?」趁其身而已。用力於仁,雖有差等,皆有如能天下無敵,故其效止可使不仁之不敢加曰「無以尚之」。惡不仁者劣於好仁者,不曰「無以尚之」。惡不仁者劣於好仁者,不自曰:「「尚」讀如「君子不欲多上人」

欲,而 乎? 乎; 其於仁猶待於擇,固與好仁者有間矣,●故 恥,不仁惟恐其浼我也。 惡不仁者,愛身之人也。 待惡而 惡矣。使其出於天資,可不謂生而 惡臭,惡不仁者也。 謝曰: 故未見其人也。好仁者,不出於 無 使其出於學問,可不謂行著習察之至 不加諸其身矣,故曰「無以尚之」。 所 待於惡不仁也,則其於不仁,不 「如好好色,好仁者也, 好惡如此,始可謂真好 愛身之人,出於愧 恐不仁之浼我,則 知之 如惡 所

[「]畫」,四庫本作「盡」。

^{□ 「}仁」,四庫本作「也」。

矣]; 聖人不敢以難待天下之人也,故曰『蓋有之 焉,故曰『我未見力不足者』。 此道甚易行, 次焉,使其操此心以 止 於 不使不 然天下莫能 仁者加 行,聖人不敢以易待天 乎其 往 則將天下之仁皆歸 身 也 志至 焉, 氣

下之人也,故曰「我未之見也」。」

以見,故曰『蓋有之矣,我未之見也』。」有足有不足。世無用力者,則有力不足無力不足之有? 然人嘗用力于此矣,然後力乎其身。爲仁由己,我欲仁,斯仁至矣,何乎其身。爲仁由己,我欲仁,斯仁至矣,何必之? 惡不仁,則不仁者遠矣,故不使加楊曰:「好仁,則天下歸仁焉,其孰能

者豈力所不足乎? 蓋不爲耳。孔子不欲禮,天下歸仁焉。我欲仁,斯仁至矣。不仁足者」,言未見用力于仁者也。一日克己復足者」,言未見用力於仁矣乎? 我未見力不能惡不仁,不使不仁加其身,是亦爲仁矣。却曰:「人能好仁,則何以尚之? 苟尹曰:「人能好仁,則何以尚之? 苟

謂無其人,故曰「未之見也」。」

斯知仁矣。」 子曰:「人之過也,各於其黨。

觀過,

伊川《解》曰:

子過於愛,小人過於忍。」類: 君子常失於厚,小人常失於薄, 君類: 「人之過也,各於其

過,小人有小人之過,各於其黨以觀其過, 則 則物必 通天下之志。如不分其黨,持一法以平物, 仁,故因 物物得其所,而仁 吕曰:「仁道之大,貴於類族 有窮,仁術 觀過然後 知仁之所以然。 狹 術弘矣。 矣, 君 子 惟弘所以 有 辨物,以 君子之 爲

- C 六

視功不若視過也。」 之所勉,過者非人之所欲爲,故求其誠心,

之至。 在。 以 性善,論之至也。 然於此特可以見仁矣。」 又曰: 過中,皆可謂之過。 處 水之性; 一亦自在 也。 知仁之方。 如觀過 謝 如水之就下,搏擊之非不可上,但 日 君子注心於義,小人注心於利 人雖 斯 「仁之道 黨,偏蔽也,君子小人之注 知仁,既是過,那得仁? 可以爲不善,然善者依 性非不可爲不善, 既日過,安可謂之仁? 不易 知 ,聖人於此, 孟 但 自 非 子 舊 非 然 性 論 其 語

功而 之,或利之,或强之: 功一也,此之謂同功。 同 利仁,畏罪者强仁。」所謂仁有三, 楊曰: 過,然後其仁可知 異 八情。 《記》曰: 同 功,其仁未 也。 此之謂 與 【仁有三, (仁同功,則 夫仁者安仁, 異 可 情 知 也 與仁 功 及 其 安 知 與 同

> 可 其黨觀之,則情異者見焉,則所謂三仁者從 而 知矣。」 已,故其 仁 未 可 知 也 與 仁 同 過, 各 於

117 日 guo. 君子過于愛,小人過於忍。各於其類觀之,君子過于愛,小人過於忍。各於其類觀之,尹曰:「君子失於厚,小人失於薄;

仁不仁可知矣。」

大矣, 難。 子曰: 子曰: 明道 非知道者,豈以夕死爲可乎?」• 日 : 「朝聞道,夕死 朝 「皆實理 聞 道 ,夕死可矣。」死生亦 也。 可矣。」 人知 而 信者 爲

得聞 也。」 也。」 道,知所以爲 道 伊川《解》曰: 又曰 又曰 雖 死 人也, 可 也。」 苟 朝聞道,夕 「人不可以不知道 有『朝聞道,夕死 夕死可矣,是不虚 又《語 死可 録》曰 矣,死得是 可矣」 一,苟 生 聞

● 此句下明抄本尚有「又曰: 動容周旋中禮,盛德之

也。 得 曾 及其 若耳聞口道者,心實不見, 不 則 虎,則雖三尺 湯之心,則自然别。 說禮義。 肯安於此。人之一身,儘有所不肯爲,及至 人皆避之,是實見得。須是有見不善如探 此者,只是說得,不實見得。 不肯爲,其它未必然。 他事又不然。若士者,雖殺之,使爲穿窬必 須 經 是,實見得非。 曳不能 能若此 則 傷者 劬 臨 則 得之於心,是謂有得,不待勉强,學者 烏 强。 利害,則不知就義理,却就富貴, 不 能 又如王公大人,皆能言軒冕外物 者,只爲 ,如曾子易實,須 神色懾懼, 肯 如 古人有 童子,皆知虎之可畏,終不 此 日 ? 不見實理。 凡實理,得之於心 安於 捐軀 昔曾傷於虎者,它人 須 至誠畏之,是 至若執卷者,莫不知 是 所 殞 實 不 要 命 見 安, 如此乃安。 及蹈水火,則 者 若見得,必不 實理者,實見 得 1,若不 何 生不 止 實 自别。 見 重 實 日, 於 見 得 如 語 如

> 可愛。 義,生 成 不 力須倦,又慮學之不能及,年數之不多。 日 就 足,不猶愈於終不聞乎?」 『朝聞道,夕死可乎』? 學不多,年數之 不安於死 箇是而已。」 人少壯則自當勉 也。 故有 又 日 强 殺 身成仁者,只 「老喜學者尤 至於老矣,志

之謂 朝聞道, 而 范曰: 道。」君子之欲聞之也,必自慎 日道,未之或知 則 夕死可矣。 「君子之學,惟患乎不 也。」 命中 ·庸》曰 獨始,舍 聞 「率性 道 也

吕曰: 聞道 而死,死而不亡。

是

死生爲 然不聞 而 死 ? 謝 道, 日 在 道。 則 以死生爲 死生,命也 與其不聞道 在我, ,何可不可之有 而生,孰若聞 聞 道 一,則 以 道

得 人,至是無餘 Œ 楊曰 而 斃 : 焉, 事 「曾子 斯已矣。」言已矣,則人之爲 也。 Ė 故荷聞 : 吾 道 何 而 得正 求 哉? 吾

亦在其中矣,何恥之有?」

子曰: 尹曰: 「君子之於天下也,無適也,無 「役於外者,未足與議道也。」

莫也,義之與比。」

往也,無莫往也,惟義是親。」 又曰: 之與比,親於其身爲不善者,直是不人。」 伊川《解》曰:「君子之於天下,無必

類也。」 之從,故不患無當於天下。凡爲善者皆其 無適,故無所就, 范曰: 「君子之於天下,無心而已。 無莫,故無所去, 惟是

者,惟義而已。」 子之於天下,無所主,亦無所不主,所與親 吕曰: 「適,主也, 莫,無所主。

乎? 應變,卒得罪於聖人者,此也。 可無不可,苟無道以主之,不幾于猖 謝曰:「適,可 此佛老之學,所以自謂心無 也, 莫,不可 聖人之學不 所 也。 住 狂 加 自 恣

夕死可矣 日 ,斯言於曾子見之。」 「死生亦大矣,非誠有所得,寧

子曰: 「士志於道,而恥惡衣惡食者 以

夕死爲可乎?」

伊川《解》曰: 未足與議也。」 「志於道,而心役乎外,

何足與議也?」

也。 惡衣惡食者,未能忘外也。 於内矣,夫豈足與議哉? 夫子於門人,獨 稱子路能之,若子貢猶不免於外重而内 范曰:「志於道者,重内而忘外, 徇其外,則無得 車型 恥

不可以入道,蓋其心與道直不相似耳。」 之心取也。 謝 曰 恥惡衣惡食,未可以言大過,獨 「道至大至變,不可以有窮量

耳,烏足與議道? 苟志於道而養其大者, 則 雖簞食瓢飲,衣敝緼袍,捉衿而肘見,樂 楊曰: 「恥惡衣惡食,此務養小體者

之心果有所倚乎?」然,於無可無不可之間,有義存焉,則君子

懷刑,小人懷惠。」子曰: 「君子懷德,小人懷土, 君子

之所在。」
一定,在上者志存於德,則是一定,在上者志存於嚴刑,則民思仁民安其土,在上者志存於嚴刑,則民思仁民安其土,在上者志存於嚴刑,則民思仁民安其土,在上者志存於嚴刑,則民思仁民安其土,在上者志存於嚴刑,則

重遷,無爲而輕遷,皆懷居也。」横渠曰:「安土,不懷居也。有爲而

謝曰:「德與土,刑與惠,皆上所以得

人,所向於此分矣,學者不可不察也。」刑,懷安故懷土,務苟得故懷惠。君子小上之心不同也。樂善故懷德,惡不善故懷民心之道也。懷德懷土,懷刑懷惠,此親其

居矣。君子以刑爲體,小人則惟利之從楊曰:「君子安安而能遷,小人則懷

尹曰:「樂善惡不善,所以爲君子,

矣。」

也。蓋欲利於己,必損於人。」
伊川《解》曰:「心存乎利,取怨之道子曰:「放於利而行,多怨。」
苟安務得,所以爲小人。」

人亦利之, 利己不利人者,人亦不利之。利於人,小人惟欲利於己。利人不利己者,『放於利而行』,此利之小者也。君子唯欲下』,又曰『利物足以和義』,此利之大也,范曰: 《易》『乾始能以美利利天

❶ 「何」,四庫本無。

乃所以 下 故 君 謂之益 子 自利也 常 一, 損 多 助,小人常多怨。 下益上謂之損, 君子惟利 是 以 損 天下 上 益

小人則 以遠 仁,又何怨? 以 者 談笑而道之,則可無所怨也。 絶 無 蓋 躬自厚而薄責於人」,則遠 之, 教人 起怨之端出於放於利而行也。 怨 ,果何小哉? 怨之道 也 謝 則 以 有 曰:「此一節非 미 之, 其所以待小人者,或惡怒之,或 遠 無所怨也; 也。 怨之道 「不念舊 至於君子,捨君親之外, 聖人於此特矜之,故教之 也 悪, 或待之以妄人,或 教人以遠利之道 怨之道 忽矣: 怨是 然則有怨 惟 求仁 用希」; 女子 皆教之 一而得 與 則 1 誅

利 放 於利而行, 尹 楊 一必害於人。」 日 曰: 「心存於利, 正 能不求乎 己而 哉 不求於人, 取 怨之道 故多怨。」 則 也 無 蓋

於己

不能 子 日 以 2 禮 讓 能 爲 以 國 禮 讓 如 禮 爲 何 或 ? 乎 ? 何 有

禮 何 讓 ? 伊 無禮 復 ĬII 何 讓 解 加 焉? 則 曰 不 可 不能 以 禮 爲 者 國 以 爲國之本, 也。 禮 讓, 將 如 能 禮 以

何 ? 讓 之有? ,則民莫 范曰: 爲國 不能以禮 敢 而無禮,未有能立者也。」 不 讓 敬 者 讓, 3 不 ·爭之道也。 則 民 無 莫 以 敢 先民, 不 敬 爲國 故 何 如 難 以 禮 禮

知 矣。 必能 共由 矣,故曰如禮 也 者,以 謝曰: 言能以禮讓治身,推此以 成 物 不能 其成己成物無二道也。 何。」 以禮讓 「在畎畝之中,事之可以 不能 成物,其 爲國 门則 不 往, 能 身之禮 成 則 能成己, 己 爲 可 口 或 與 知 知 民 可

乎何 以 敬 有? 楊 讓 日 而 「虞芮質厥成」,讓之道行故也。 民 不爭, 禮讓, 民 謂 至於不爭, 以 禮 面 讓 則 也 於 爲 先 國 之

從 不 而 以 子哂之,爲是故也。」 禮 廢 焉 而 讓 尚 則 如 諂 禮 瀆而 何 哉? 民不 子路率 敬, 民 不 爾 敬 而 列禮

子曰:「不患無位,患所以立, 不患復何加焉? 不能以禮,將如禮何?」尹曰:「禮者,爲國之本。能以禮讓,

莫己知,求爲可知也。」子曰: 「不患無位,患所以立, 不患

之行,不患人之不已知也。」患身無所立,不患無位以行之, 求爲可知患身無所立,不患無位以行之, 求爲可知例川《解》曰:「君子求其在己者,故

位 内不足也, 行之。知之在外,爲可知在 所患,惟不能有立, 一,行修 有形必有影,有聲必有響,未有身立而 范曰: 而不知者也。」 「位者,所處 修其在内者,求可知之道也 有立,則不患無位 而 内。 行道也。人之 君子所患, 以 無

實; 謝 有位 日 而 「有才而 才不 稱,適足 位 不稱,不 以 招羞 害其 又 八爲 況於 有

不患人之不己知也。」

也。」 乎無位, 矣, 夫復何求? 知,宜其莫我知也。 世愈難用,宜其 求可知之道在,至論 逃名之理,喜名者無得名之理,故 不患 雖得之必失之者乎? 故君 可知,不患莫己知也。 名不易得 無位 也,無實者必喜。 也。 不惟求可知,實不患乎莫己 名不難 無位也; 至於此,不惟求位 難用 則不然矣。 得也,有實者 雖然,此論 而莫我知 道 然而 子患所以立 愈高 畏 而 才愈 猶 君 一實不 名 斯 世 有 子 必 大 者 畏 我 愈 求 求 知 患 貴 難 位 爲 無 丽 而

所立,不患無位以行之, 焉? 則人 足患哉? 尹曰: (知之亦囂囂,人不知亦囂囂,又何患 楊曰: 求爲 可知而已。」 患所以立 「有所立、則位之儻來寄也,何 「君子求其在 而 Ę 己者,故患身無 荷 求爲可知之行 有 미 知之實,

矣。」也?」曾子曰:「夫子之道,忠恕而已也?」曾子曰:「夫子之道,忠恕而已曰:「唯。」子出,門人問曰:「何謂子曰:「象乎,吾道一以貫之。」曾子子曰:「象乎,吾道一以貫之。」曾子

乎? 其 公之道,恕所以行之也。 遠,非一以貫之忠恕也。」一作:「忠恕一貫,忠者天下大 忠,天道也, 所以行乎忠也。 忠者體,恕者用,大本達道 及物,恕也。違道不遠是也。忠恕一以 人道也。」 也,此與違道不遠異者,動以天耳。」一本作: 「以己及物謂之仁,推己及物謂之恕。忠者,無妄之謂也。 忠乎? 忠者天道,恕者人道。忠者無妄,恕者 明道 又曰: 日 恕,人事也。忠爲體,恕爲用。 「天地變化、草木蕃」、不其 "「以己及物,仁也, 「「維天之命,於穆不已」,不 「忠恕兩字,要除一箇除 忠言其體,天道也; 忠恕違道不 恕言其用 如 貫

明恕。忠,體也, 恕,用也。孟子曰:伊川《解》曰:「盡己之謂忠,推己之

是後。 所以 曾子之告門人,猶夫子之告曾子也。 才。 朕,而萬象森然已具。未應不是先,已應 孝弟而已矣」同。 違道不遠,斯下學上達之義,與『堯舜之道, 也?」曾子曰: 安排引入來教入塗轍,既是塗轍,却只是 貫,不可道上面一段事無形無兆 化、各正性命」、恕也。」 知天矣。 箇塗轍。」 「「維天之命,於穆不已」,忠也,● 盡 其 告之也。 故孔子曰: 「參乎,吾道一以貫之。」 心者, 如百尋之木,自本根至枝葉,皆是 知天一貫則道矣。」 『唯。』蓋惟曾子爲能 知其 又曰:「聖人之教人、 「夫子之道,忠恕而已矣。」 子出,門人問 性也。」」一本此下云: 世儒以爲夫子之道高遠, 又曰: 又《語 日 達 一,却待 冲 「乾 録 此,孔子 各因其 何謂 知 漠 道 曰 性 旋 則

^{●「}也」,四庫本作「者」。

《中庸》又言『忠恕違道不遠」,蓋恐人不喻, 又 以 間 可 是體用,須要理 m 可以貫道,子思恐人難曉,故復於《中庸》降 子之道,忠恕 乃指而 或未盡忠恕之道; m 曾子言『夫子之道忠恕而已矣』,忠恕果 曾子 問 曾子之言雖 等言之, 曰: 乃 不 便爲道,故曰 一貫之乎? 若使它人言之,便未足信, 止)所以 願 於孝弟也,夫豈知其旨哉?」 則 「忠恕可以貫道否?」曰: ,亦勿 示之近,欲以 是堯舜之道,孟子知之亦 未 恕字學者 爲一 足 施 而已」,盡己爲忠, 是如此,又恐 也。言仁 『忠恕違道不遠。』忠恕只 見 於人。」此 會得。」 之, 可用 『忠恕違道不遠,施 喻人。」 曾子言之,必是盡 所 功否?」曰: 見 義亦可 又曰 又掠下教人。」 者 人尚疑 又曰 ıĿ : 如心爲恕, 有 也。 於 「忠恕固 又曰 《中 所不 忠 忠恕未 「一一夫 恕 諸 也 恕 或 mi

> 忠上。 焉。」 字甚 平。 處。 字,須是仔細體認, 中庸,不可偏舉。」 行之者,其恕乎?」 忠 之謂恕、盡物之謂信。」 己之謂忠固 上。」曰: 「多在恕上。」曰 吾道一以貫之,而 何 「人謂盡 造德則自忠恕,其致則公平。」 恕甚難,故 大, 孔子曰 以 便是仁否?」曰:「固 纔忠便是一, 能 恕? 是,盡物之謂 0 不 己之謂 曰: 可 一君子之 忠恕 獨 日忠恕而已矣,則 一還多在忠上,多 恕即 又曰: 用 「有一言 忠,盡物之謂 又曰: 兩 須 道四 恕 忠之用也。」 一:●「不然,多在 字, 得 則 「忠恕 忠 . 是。 自 而 未 一忠 丘未 以 見 可 盡 爲 只 相 恕 以 山 恕。 在 這 所謂 問 終 以 推 恕 身 公 用 不

「恕」,四庫本作「信」。

范

曾子守約,有受道之質,故夫

[「]曰」,四庫本無。

四

子 E 如 則 之治天下,惟忠恕 在 矣 無 人 不 待 日 誠 無問 忠,恕於 也 而 語 辨。 恕 之以 則 人如 無 以 道 而已矣。」 不 貫之者, 在 如己之心也。 己日 子 唯 恕。 無 而 二也 己 堯 舜 在己 亦 忠 弗

可。 下 恕 共 而 利。 吕曰 忠,則待天下以 道之所以行於天下 本 ·末貫 徹而不可不 誠 者,非 恕 則 然者, 此 與 天 忠

雖 敏 計 見 所 聖人多才多藝,蓋其道出於生 (之之理 以 竭 以 當,牛羊茁壯長, 之,知其無不知也 成 名。 此 其 求之也。 謝 聰 日 仁者見之,知其 道 : 與 明 〈参與 不不 才力,僅 「夫子 羣弟子既 亦 賜 難 明 非 也。 乎? 得其 於 特克 雖 不 庶 蓋曾子之學,其本 無 乘 能 宜其聖人語一 一體,有 物、察於人 勤 田 不 徧 小 愛也 而 委吏之賤,會 觀 物,抑亦 知之,亦能 耐 志於學, 博 倫 識 智者 以 見 無

> 日 曰: 不息; 也。 恕之 子得之 也 盡 地 其 知 心。」「如何是充擴 謂之恕心?」明道 故曾子聞之,不復致 出 矣。」 心者 變化,草木蕃。」「充擴 於 一貫之理矣。」 無忠做 論 且 守 「天地閉,賢人隱。」察此,可 「昔有人問明 當以天地 知知 而 約 ,不難以 恕,譬則 又問 不疑? 其性」,如何是盡 恕不 夫子之 忠恕 出 訓 之理觀之: 萬 來。 日 得去底氣象?」曰: 意 於忠恕之論 道先生日: 詁 物 或 之别。 、疑於其 謂 恕,如心 問問 散殊。 解,特恐學者 「擴充得 日 惟 不去時 斯 曰 : 間。 其 孟 知此, 忠,譬則 而 可 心? 「如何 去,則 可 己。 見 以見盡 何 「猶 子 如 愈 則 也 以 · 言 『 盡 何? 語 謝 形 見 斯 可 不 此 恕 子 可 而

游曰:

「夫道,一

面

已矣。

天

地

子不自 於此, 說。]則其師資之際,朝夕相與 不足 也。 也。 違 誠、樂莫大焉。」此仲尼告曾子之道也。 盡 曾子之知不足以及此,則仲尼不以告, 一參乎,吾道 而 道 之而 1,宜不 (誠於忠恕,則于一道亦何遠之有? 爲邦而已, 以 然則曾子豈有隱于是耶? 行,求仁莫近焉。」此曾子告門人之道 孟子曰 也 一吾與 恕所 此 誣。 及 其 豈 忠 不惰。」又曰: 此, 少矣。 未 以 恕 : 今日 口 能 彼 盡 而强告之,適足以滋其惑,使 以貫之。」曾子曰: 所 言終日,不違 己 「萬物皆備於我矣,反 物 忠恕 以 而《論 則 以 所 其所 違 則 貫 能 欲求人道者,宜 而已者,所 道 之也。 預 語》 不 不遠也。 哉 「於吾 載者,皆 所 ? 如愚。」又曰 言 載 此 言無 止 以告 蓋門人智 而默 忠 「唯。」 子 忠 於 恕 契於 所 身而 門人 莫 問 而曾 日 所 所 使 爲 不 子 强 沂 以 以

由

授受者 者 不 所 也。」 過 不 忠 得 恕而 聞 也 己。 所 由 不 此曾子所以爲善學而善 此 得聞, 觀 之, 面 順 所 仲 以告門人者, 尼、 曾子 所

恕; 恕; 及人之幼」,孟子之忠恕。其地 矣。」忠恕固未足以 『施諸己而不願,亦勿施之人』,●子思之忠 者安之,朋友信之,少者懷之」,孔子之忠 以語此,故告之曰: 之,蓋當其可也 出 是 子出,門人問,蓋曾子之門人 而求之,則於一以貫之,其 如 或問 一無 「老吾老,以及人之老, 此 日 : 伐 話。 侯子忠恕之義。侯子曰: 善,無施勞」,顏子之忠恕, 「曾子未 仲尼與天地造 故曾子曰 盡道,然 「夫子之道,忠恕 嘗問, 而違道不遠矣, 唯 m 化合,故别 、庶矣乎?. 夫 則默 位 幼吾幼,以 子 也 至此, 以 丽 未 是 識

「之」,傳經堂本作「於」。

說

盂 精 義

遠,如 然後 不 已是違道。 思之忠恕 妙,愈高 箇道 未嘗 萬物之謂命,春生之,冬藏之,歲歲如是,天 同?」侯子曰: 其 見得 ·思只 忠 道變化,各正 下長短,各得 ĴΠ 勿施 理,直是坦 乎; 一歲誤萬物也,可謂忠矣。 日 何?」侯子曰: 見 忠 忠 發 明 愈 恕 於 明 道 諸 遠。」 無忠做恕不 施諸己而 若聖人,則不待施諸 功 恕 二字,要除 \Box 地 字,何也?」侯子曰: (也。」曰: 用 「伊 天之命,於 易明白,後人只管去求玄求 其所欲 性命,恕 變化,草 日 之謂 維 川說得尤有 不 天 「子思言忠恕 恕。」 「此是子思地 出來。誠 願,亦勿 一箇除 可 也。」何以言恕字不 之 木蕃,不 「曾子言忠恕, 謂 命 穆 曰 : 恕 不 不得。」正 矣。 施諸 已,忠 其 萬 己 穆 功。 有 而 不 明 物洪 是 位。 違道 聖人 無 不 已 天授 道 心 也 願, 子 纖 有 恕 ൬ 這 不

> 此 與 ? 日

物

忠恕違 而已。 之。]則二子之學,淺深可見也。] 推己之 夫子不 忠 而 恕 理 識 尹 一事也,主於内爲忠,見於外爲恕。 待問 畢矣。 其答門人則曰忠恕者,盡己之謂忠, 日 道不遠者也。 之爲 謂 恕。 而 然,始 告,曾子聞之亦弗疑 道無二也, 曾子於聖人之門造道 然 則 謂 忠恕果 若夫子貢,以 之曰: 一以 可 貫之,天 以 吾 也 夫子 貫 又曰 乎? 地 多

於利 子曰: 伊川《 惟其深喻,是以篤好。 解》曰 君子喻於義,小人喻於利。 「君子之於義,小人之

故君 利。 不 人之所見者小,故君子義足 顧 子惟 范曰: 其 義者,宜也,事得 官 與 日 不 義,不 「君子存 宜也。 日利; 其 心於義,小人存心於 君子之所 宜 一, 則 以 兼利 利 見 惟 在其 者 日 (中矣。 利

利而忘義也。」

也。」 日曰:「喻者,聞見而心解,通達者

也。 大,喻於利則小,此君子小人所以分也。」 義 心 蓋其平日處 也。求濟一身之欲者,雖 謝 日 : 「以天下 心 積 慮 ·爲心者,雖有不善 如 此。 有善,亦利 然喻於義 「, 亦 則 心

已,不知利之爲利故也。小人反是。」死,孰肯舍生而取義乎? 蓋其所喻者義而言之,則人之所欲無甚于生,所惡無甚于害人,則人之所欲無甚于生,所惡無甚于

尹曰:「惟其深喻,是以篤好。」

子曰: 「見賢思齊焉,見不賢而内自

省也。」

若是。見不賢而内自省,蓋莫不在己。」 伊川《解》曰:「見賢思齊,有爲者亦

惡之心 謝 觀賢 日 不 賢 以明善之心觀道 則 易。 審 於 知 則難, 人 () 昧 於自 以 好

> 齊; 思齊 知 能近思矣。」 ,於賢不 而 惡不善之心切,故能内自省,亦 内 自 賢 雖 省 也。 審 於我 好善 何 之心 加 焉 切, ? 故 故 可 能 必 謂 思

修矣。 學矣; 楊曰: 夫如是,乃可 見不賢而内自省,則知 「見賢思齊焉, 以 進德。」 則知所 所 以 琢 以 磨 道 自 問

之,自修之道如此。」 尹曰:「見賢思齊之,見不賢而自

省

不違,勞而不怨。」子曰:「事父母幾諫,見志不從,又敬

不得已 怨。』與此一 於無過, 者,悅則復諫也。 於微,不待于著也。『見志不從,又敬 范曰: 也。 則 必諫 也。 曾子曰: 「幾諫者,見微而諫 其漸,至於有大過而 古之忠臣孝子,將處君父 微諫 不 倦,勞而 也。 不違 諫之 不

吕曰: 「見幾而諫,不至於犯,如先意

一八

承志,喻父母於道之謂。」

謂。 又敬 黨州間者 從,又敬不違,勞而不怨」,以愛孝而 己之謂。」 \Box 體易, 幾諫, 不違,此 謝 日 以 也。 諫於其微也,則志不 養 非從父之令,蓋必非 志 以敬孝易,以愛孝難 勞而不怨,竭其力而無 難。 「事父母 幾 拂 諫 得 丽 3 罪 易 見 養志之 從。 以 志 以 於 有 鄉 不 養

蓋 違,其可得乎? 幾 不陷於不義。」 矣,故又敬 志不從,不敬而違之,則必至於責善而 有諫 諫 也。 楊曰 而不從,則 : 幾 不 「先意承志,喻父母以道, 而 違。 諫, 故曰 勞而 則父母之過未 號泣 不怨,若親之過 而 【父有爭子,則身 隨之者,雖欲不 形焉 相 所 夷 見 謂

其 而 温 侯曰 、說多忤。 柔 忠厚 事君 者 事 君猶是,況事父乎? 其 有 說 顯 多 諫 行; 者, 有幾 訐 直 諫 强 者。 子 勁

> 咎,非 日 濟說 之諫 雖 者,加誠敬而不違,幾諫之初心 不格姦」,舜之所以爲功也。 未從,則加誠 號泣 行,不傷父子之仁, 父 善事親者也。 『幹父之蠱,小有悔,无大咎。』雖无大 常先 而隨之,亦末矣。 加敬,以感格之。故「烝烝乂, 意 承 志 幾諫之時,若父母之志 諫 於幾 《易·蠱》之九 至於事 所謂又敬不違 微 也。」 之先, 形 而諫 則

侯曰:「夫爲人子者,昏定晨省,承顔

● 「從」下,四庫本有「之」字。

孝子之心哉?」 養志,朝夕不敢忘也。遠遊與無方之遊,豈

以所聞而記之,故又見於此。」 范曰:「此夫子之所常言也,弟子各

也。」

三年無改,以見其義。」無方之遊乎? 若此類皆於父之道,故又記無方之遊乎? 若此類皆於父之道,故又記楊曰:「一跬步不敢忘父母,況敢爲

則以喜,一則以懼。」子曰: 「父母之年,不可不知也。一

不可不知也。於此因以察其氣之强弱焉,而況於年乎? 則視年而爲供養之齊量者,寢處,一日之間,猶在視其早晏寒煖之節,寢處,一日之間,猶在視其早晏寒煖之節,謝曰:「孝子之事親,雖於衣服飲食

未老而氣先衰,安得不懼?」 使其年已老而氣則彊,安得不喜? 使其年

侯曰:「喜其壽,而懼其衰,人子之心楊曰:「人子愛日之義也。」

尹曰:「知親之年,喜其壽懼其衰也。」

子曰:「古者言之不出,恥躬之不逮也。」

言,則出諸其口必不易也。」●是以輕言之。言之如其所行,行之如其所出之,非言之難而行之難。人唯其不行也,出之,非言之難而行之難。人唯其不行也,不得已而後

必逮矣。」 謝曰:「此非言顧行之意,善言不出,躬 謝曰:「此非言顧行之意,善言不出,必爲惡行。蓋積於

1 「其」,四庫本無。

---0

楊曰:「言出而行不掩焉,宜學者之

所恥也。」

能踐履; 未能踐履而言之,所以恥也。」侯曰: 「古之學者,非獨言之,皆是實

尹曰:「行不逮言,爲可恥也。」

范曰:「奢則過禮,儉則不及於禮。子曰:「以約失之者,鮮矣。」

也鮮,則是以奢失之者多矣。」 唯奢儉則然,故約近於禮之本。以約失之

其失鮮矣。」 楊曰:「約言爲之節,出入不踰大閑,

則

曰:「不必只儉約,凡事皆要約之以禮,然侯曰:「約近於禮,故失之鮮。」● 又

又要得中。」❷

子曰。「君子欲訥於言而敏於行。」

0

「要約」下,明抄本有「約」字。

全句作

「不必只

約,凡事皆要約。

約之以禮,然又要得中。」

欲訥; 性情,亦可謂在道不在物矣。放言易,故言 文; 斯,心亦可謂之不放矣。] 謝曰: 樂主於盈,養德者常以 力行 1難,故 「禮主於減,養德者常以 行欲敏。 反爲文。 果能從 考於 進 於 爲

也, 行欲敏,敏則有功也。」楊曰: 「言欲訥,惡其以口給取憎

尹曰:「言欲訥而行欲敏,君子之志侯曰:「忠信徙義,求仁之方也。」

氏語曰:「凡事約則鮮失,非止謂儉約也。」下「又曰」一條當係尹氏《解》。又按《論語集註》引尹 此句下,明抄本尚有「尹曰凡事約則鮮矣」八字,則以

方外,敬義立而德不孤。」爲善者,各以

其

類

故君子務學,則有朋自遠方來,充其道

范曰:

「《易》曰:

一敬

以直内,

義

以

也。

子曰:「德不孤,必有鄰。」

此則 也。」 朋 礙,左右逢其原也。」 孤。『德不孤,必有鄰』,到德盛後,自 存,舍之則亡,然而持之太甚,便是 日 與此「德不孤」一也。●爲善者以類應,自有 故德必有鄰。」 「一敬以直内,義以方外,敬義立而德不孤」, 而正之也。 自 不 伊川《 正是剩一箇助之長。 遠方來,充之至於塞乎天地,皆不孤 抓 「今志於義理而心不安樂者何 又曰: 與物 解》 亦須且恁去,如此者只 「一德立則百善從之。」 Ĕ 同,故不孤 又《語録》曰: 「事物莫不各以類聚, 也。 雖則心操之 「敬義立而 必 又 日 是 有 也? 無 則 事 又

至於塞乎天地,其可謂不孤矣。」

楊曰: 「易知而有親,則不孤鄰,有親之謂。」

而

有

鄰

矣。」

必有鄰。」。 一里曰:「事物莫不各以其類應,

子游曰:

事

君數,

斯

辱

矣

朋

友

伊川《解》曰:「數,煩數也。」

數,斯疏矣。」

道合則服從,不可則去,難進而易退,則不范曰:「數者,煩促以求合也。事君

也1。 外書》卷八作「「敬以直内義以方外」與「德不孤」一 ●「與此」,和刻本校云:「與此」當作「此與」。按《二程

_

故

德

辱

不疏矣。 矣, 朋友忠告而善道之,不可則止, 君臣朋友,皆以義相 與,故其 事 則 司

也。」

辱; 也。」 又改 吕曰 事一君,至於數,則君不信,所 朋友亦然,至於數,亦不信,所以取疏 : 數, 亟 改 也。 事是君 Щ 不忠, 以取

成。 數也。 取 者其理則 朋友數也,此不幾於實、灌之所爲乎? 忠告善道 者必量而後人,全交者不盡人之歡,蓋恐其 徑 疏。 行 謝曰: 事君數也,此不幾於馮婦之所爲乎? 而已,而況君臣朋友之際乎? 諫行言聽,無不可也,而期於功之必 無不可也,而惟予與汝以求助。 也,故相制也必取辱,相逼也必 「君子之處世接物、豈特直 故 事 兩 君 情

善道之,宜皆不可則止也。

苟至於數,斯辱

楊曰:

「大臣以道事君,朋友忠告

而

疏 矣。」

尹 日 數,煩數

也。」

朝 諸

老 先生 論 語 精義卷第二下

國

國朝諸老先生論語精義卷第三上

公冶長第五

間 此者爲識道,語此者爲語道,則於師弟子之 言不足以命物,則 士,及尚論古之人。 而已,何汲汲於斯 ",其可以已乎?」 謝 E 此一 乎? 在我 篇大 然爲君子者,當求諸己 者可 蓋知不足以知人, 概多語當時之善 知矣。 是故識

戮」。以其兄之子妻之。容,「邦有道,不廢",邦無道,免於刑容,「邦有道,不廢",邦無道,免於刑中,非其罪也」。以其子妻之。子謂南中,非其罪也」。以其子妻之。雖在縲絏之

以兄之子妻南容,而以己之子妻公冶長,何或問:「孔子以公冶長不及南容,故

乎? 人也。 之; 配。 也 大不是。 或時前後,皆不可 此,何更避嫌也? 若孔子事,或是年相若, 至公,何更避嫌? ?!伊川曰: 或兄之子不甚美,必擇其相稱 己之女美,必擇其材者妻之。 凡人避嫌者,皆内不足也, 如避嫌 「此亦是以己之私 知也。 事,賢者且不爲,況聖人 凡嫁女,必 以孔子爲 量其 避嫌 理自如 聖人 心 材 者妻 mi 看 則 求 自 聖

容之慎,知其不爲非義也。」縱或不幸,不免困辱,必非其罪。雖不若南縱或不幸,不免困辱,必非其罪。雖不若南横渠曰:「雖在縲絏之中,非其罪也。

辱,則是有罪 言,無所苟也。 之,孔子欲 至者,我 范曰: 謝 曰 何 !與焉? 妻以子,故辨其 「公冶長繁於縲絏,時人 而 以智帥人之謂夫。公冶長、 有罪 得軒冕者,亦可以爲榮矣。」 若 無 非 罪,在我 罪 而 非 得 罪。 縲 加 絏, 已,自外 聖 八或疑 以 人之 爲

所以 陷於 長 以 知 IIII 在 其 容 死 不如葵者異矣。」 刑戮 不 縲絏之中,而可謂之智乎? 人之行可 ,智矣,聖人 可以 · 廢 ,雖聖人 知長之賢矣。 其默足以容,故免於刑戮。 以行 非 有所不免,至於不爲桎 道於家人矣。 私其子以 南容其言足以興, 爲 可 非其罪 然則公冶 托 也 與 而

又曰: 於刑 之有異焉,君子不爲也,況於聖人乎?」 異,非知聖人者也。 後,適當其可而已。 以其兄之子妻之,蓋或以其齒,或以其時 之賢,宜貶於南容矣,而以其子妻之,南 子也,何擇乎? 處 南 其兄之子,固 戮,而不累其室家,皆可妻也。 楊 「孔子以其子妻公冶長,以其兄之 日 容。王 「聖人所以求於人者薄, 元澤曰: 不 誠如所言,是聖人猶有 同 夫兄弟之子猶子也,處 世儒謂 也。」曰: 『君子之處其子, 有 處 兄弟之子 人處己之 公冶長 可 先 容 免

> 其厚於兄而薄於己耶? 私 不求其他,故可法也。」 美惡,必求其對 二人可託以女子之終身。 意 也。 聖人不容有 ,所妻先後,未必 私 意,若二女之少 記此者,特言如是 且聖人爲子擇 同時,安在

四

也。 於刑 子及兄之子,何所容心哉。」 聖人至 戮,皆能不陷於不義,非 尹 日 公而已,於事各 雖縲絏 而 非 其罪, 有 所當 慎 行 邦 者 無 不 道 其 免

者,斯焉取斯?」 子謂子賤,「君子哉若人。 無 君 子

伊 川《解》 曰: 斯 助 語。 詩

恩斯勤斯

乎? 信如 魯 無 范曰: 君子,則子 丘者焉。」十室 夫子賢子賤 子曰 ,賤何所 而 . . 且不無人,況 取 知一國之有 『十室之邑,必 而學之? 人, 於 然則 有 忠 魯 使 或

事」,四庫本作「是」。

消。 天 也。」 非 無 地 君 世豈嘗 閉, 子 也, 人隱。 蓋 無人乎? 有之而 小 人道 不 亂 用 則 也 長 隱, 則 \sim 易》 否 君 則 子 消 道

耶 ? 也。 以言其多助也。當是時,使天下皆如魯, 大體 漬之使然也?❶ 又豈天之降才獨多於此 時,區區 王者不作,文武之道其墜乎? 楊曰: 使其得邦家者,其作人才當如何哉?」 ,皆具體 故曰: 謝 日 小國,乃有此人,豈非見聞 「君子取諸 語 而 『魯無君子者,斯焉 小成者也。 君子之名雖不一, 人以 當世 爲善,魯多君 此夫子之力 衰 取斯? 道 熏 陶 微 論 雖 地 漸 其

知之,故孔子曰:『魯無君子者,斯焉取知之,故孔子曰:『魯無君子也,魯人未嘗

子

故子賤

有取而成德也。」

尹曰: 「因子賤之賢,知魯國之多君

「女**,** 子 貢 器 問 也。」 日 日 賜 也 何 何 器 如?」子 也? 日

「瑚璉也。」

又曰: 問 器,故曰瑚璉也。」 賈之才,可使於四方,可使與賓客言也。」 璉之器答之者,瑚璉,可施 玉,見其飾之美。」 貢文勝,故 瑚璉 伊川《解》曰 『賜也何如?』自矜其長 也 「子貢之器,如宗廟之中可觀之貴 一。」瑚璉 云 器 貴器,飾之盛 也 0 又《語 「器者,尚 復問『何 録》日 於宗廟, ,而孔子以 者,② 器 飾 之物。 也」,日 字皆 「子貢 如 瑚 從 子

所至,故問曰: 『賜也何如?』器者,各適范曰: 「子貢自賢其才,不能知己之

- ●「漬」,四庫本作「積」。
- ❷ 「盛」,四庫本作「勝」

其 뫲 用 璉 則 而 貴 不 矣,未若君子之不器 能 通 乎 變者 也。 子貢 也。」 小之,又問

成 形 也 者 乎? 間之國器,未可執 窺 而 見,設未 E 使其 謝 者 曰 孔子以器許之,猶後 能 ? 輝光,何 子貢 能從容而安之,亦可 「器者成 ,聖門之達者,於 害其 方論 材之謂,學 也。 、爲不器,何 世以 者 通 不 謂 道 達 害 充 事 之 其 實 體 小 無 爲 時

器 問 忧 異矣,蓋抑其方人也。 『賜也 也,其器足爲宗廟之用,則進乎君子 聖人抑 楊 日 何如」,曰『汝器也』,則與君 揚 「子謂子賤『君子哉」,故 其 訶 如 此,所 然瑚璉者,宗 以長 善 而 子 之不 廟之 子 救 不 遠 其 貢

與 ? 子 尹曰 貢 雖 未 「器,有 至 於 用 不 者 器, 也 然 其 瑚 器 、 璉 宗 之貴 廟 者 之

或 日 雍 也仁 而不佞。」子曰: 焉

> 其 用 仁, 佞 ? 焉 用 禦 佞? 人 以 口 給 屢 僧 於 人。 不 知

也? 無 録 · 日: 於不 口 過 伊 一,佞 川《解 善,故夫子言『焉 「苟仁矣,則 何 》 日 害 哉 ? 「佞, 若 П 示 無擇言,言滿天 用 辯 知其仁,焉 佞』。」 才 也 有 又《 用 則 佞 下 多

人

也。」 謂 不仁,仁 佞 者不 雍 也仁而 范 必能 日 則不佞。 : 行也,仁者不必 不佞。 「佞, 多言而 口 夫子亦惟 才也, 尚 時 能 П 人以 者,取 好 言 仁 也 故故 爲 而 憎之道 惡佞。 賢 佞 故故 則

佞。」 而 吕曰: 不 佞 則 可 \Box 3 給, 不 無其 面 實 佞,不 而 取 若仁 足於口 圃 也 不

以 見 爲 其 爲 謝 而 日 人 官 不 佞,疑 簡 「夫子嘗 重 矣。 其 不足也 謂 簡 仲 重 弓 則 多 可 然 默 使 不 南 知 故 面 默 或 ൬ 想

識 之,不 言 而 信,存 乎 德 行 則 焉 用 佞 ?

諸 世 佞」爲問。 非 方以佞爲悅矣,故 道 楊曰: 則 然佞足以 爲佞者乃 「不有祝 悅 所 或人以「雍也仁 鮀之佞,難免於世 以 流 取 俗 憎 而 也 已,君子 而 mi 求 不 則

因 其 所用之乎?」 不佞 言佞者禦人以 尹 ,故問焉。 日 「佞, П 子謂 口 給, 才 也 屢 既仁矣,惡所用佞? 爲人所憎,仁者安 雍 也仁矣, 或 疑

信。」子說 子使漆雕開 仕。 對 日 吾斯 之 未 能

也。 對。」 明 能 者,漆雕 能 故 自信,不可 信,道著信,便是 明道 也 如言吾斯之未能信,皆是古人此 又 開已見大意,故說。」 日 日:「 以 「只 治人,孔子所以 即 、是這 止 目 也。 所 學 箇 理,已 便持, 又曰 又曰 說 上 吾斯 漆 却 雕 「子說 「未 之未 理 難 開 之

> 子說其 實也。 使爲宰」。 此言之,便是優爲之也 使治其賦』; 觀之,其仕有餘矣,兼孔子道 未可 也 伊 仕 篤 如子路志爲千乘之國,孔 對以己學且 川 志。」 由、求之徒、豈止如 加 **>** 孔 冉有志欲爲邦,孔子止曰 日 子使之仕,何 又《語録》曰 一未能信,信 子 使 漆 可 也 雕 此? 謂 以 開 子 ? 自 或問 仕,必 止 仕 得 孔子. 日 其 漆 故 使 如 夫 可 可

開

禄

進而 之仕 願 乎 其 無 范曰 正 ,外,此夫子所 而開自以 ,於仕也 「漆雕開學可 道未 有 以 難 能 說 而 信 之也。」 無 **"易"**求 以 則其 仕 諸 於 故 學 夫 内 子 也 而 有 使

人 出 聖人之所不能 術之微,則一毫不 於天 許 其 謝 資 可 日 (),聖人 以 仕 漆 小必 知, 不 雕開 自 其 敢 而 得,不 以 材之已成 之學,它無可考,然 漆 未信疑 雕 開 害其爲未信,此 其 也。 者也。 自 知之矣。 至於心 材 聖 或

材 其 雖 聖人 可 日 以 此 其可量乎? 仕 一,其器 信 其 不 用 安於小 不得不說 心 豈 博 成 丽 也。」 則 無 它 統 日 平 所 ? 其

之爲 進 也。」 彼 方自 乎信矣,亦可以 己 楊 謂 日 如 未能,則其充之必有未 是 二,其 「漆 孰 雕 仕也,故孔子使之仕。 能禦之? 開未能信 而 子之所 不自欺 至者。 以 說 學 然 蓋

仕? 夫子說其篤志也。」 尹曰:「以己學且未能信,奚可以

子曰: 由也好 其 由 勇過我,無所取 與?」子路 道 不行,乘桴 聞 之 材。」 浮 喜 於 海。 子 日 從 我

路 賢 也 喜 **材** 其 以 君 爲 也 伊 裁通 川《 實 而謂 子 欲 解 用。」 路 浮 其 **>** 勇 日 海 不 於 也,故喜 能 又《語録》曰: 義、故 度量 一 浮 海 事 夫子 謂 .居 理。 其 夷, 與 能 取 己。 譏天 從 材 材, 己。 下 與 裁 夫子 裁 子 無 度

> 子路 言 皆以天 也 同 其不 言 不 由 能 知 下 又 但 斟酌 日 無一 ,便謂聖人行矣,故曰 好 勇 也。」 賢君, 「孔子欲 過 孔 子 道不行,故言及 乘 丽 桴 不 浮 能 海 裁 無所 度 居九 適 取 此 於 爾。 裁 夷 義

所 能 中 可 勇 好 行 九 故 召 夷。」 往 、欲往而 取 勇 必多疑故 勇,故可以受此言,它人則不 可居之理 日 材。 而 而 . 范 所以受教 然 不能怯也 『雖蠻 日 不知 材之言裁 而 卒不往者,明 一, 則 也。 孔 不 子未 道無 一貊之邦行 必明之。 而不去也 必往焉,此 故故 由知夫子之可 必乎不 也 必行,未必 勇則 無 其可往而 矣。」又曰: 在 公山 誠 所 知 過 取 無 進 於 裁 弗擾、佛 居 往 從,知 能不惑, 夫子 而 焉 而 已。 不 ; 不 不 知 可 海 能 仲 肸 欲 而 有 退 也 無 折 無 由 之 居 可

言。 吕 然卒不行者,不忍絶 日 浮 海 居 夷,歎 中 道 或 不 也 行 道 而 不 有 行 是

其喜。 所 m 不知。 去,子 然子路往而不返,不及知變,故不許 無所取材者,不適用 路之所知 孔子以子路勇於 不 忍 進 絶 也 退 中 國, 故 許 子 路 同 其

好勇寧不過也。」

好勇寧不過也。」

好為者? 子路不知其意,直以爲然,此其若人猶將從我而行也。然聖人豈終乘桴浮者,故孔子稱之,謂我若爲憤世過中之行,

聖人之勇不可過,過則無所取裁矣。」子路聞之喜,與率爾而對一也,故退之。夫子略聞之喜,與率爾而對一也,故退之。夫楊曰:「乘桴浮於海,非果者不能從。

行其道。 師 尹曰: 程 孟 不知也。」又問。子曰: 武 頭 E 子路勇於從命,無所 伯 可使治 問 浮海居夷,譏 『古者材與裁 其 一子 賦也,不知其仁 路仁 天下無賢君 通 乎?」子曰: 用 裁 「由也、千乘 度也 也。」 以 臣

> 仁也。」「赤也何如?」子曰。「赤也, 一也。」「赤也何如?」子曰。「赤也, 是,百乘之家,可使爲之宰也,不知其 是,百乘之家,可使爲之宰也,不知其

爲仁,故非三子所及。」
復禮無欲者能之,苟有願乎其外,則不足以有以自樂者也,故不知其仁。夫仁唯克己如此,是習衰世仕於諸侯大夫之事,而不能如此,是習衰世仕於諸侯大夫之事,而不能

也。 言 不仁 武伯 可 三子爲不仁,特於此未可以觀仁也。 子不容無也; 使治賦 非仁者不能 夫子既稱其材,而又曰不知其仁,非 謝日: 可易以斷矣。 能如子貢問管仲伯諸 與 爲宰, 「仁之爲道,自其一體論之,三 由全體觀之,三子不 也。 然千乘之國,百乘之家, 與東帶立於朝,與賓客 然而不以仁許之者, 侯之事,則 能 使孟

人之語道,非若諸子之漫無統約也。」

也

亦 小人而已矣。然觀三子自言其志,其 已,不正言其不仁也, 害爲 ,止於是,故夫子所以處之者如 、之分 而 楊 君子。 日 仁者也。 也 道二,仁與 故對 然君子而 由、求、赤之賢,雖曰未仁, 孟武伯之問,日不 不仁者 正言其不仁 不 <u>.</u> 而 此 有矣, 八力分 知 則 m

如

也

吾與女弗如

也。」

武 使 以 而 加 伯 伯 亦 朝 治 可 以 伯 不識仁,又以子路盡 問子路仁乎,若夫子答 可 ,與賓客言,若能 賦 侯曰 知矣。 知 知 與爲宰,固 爲仁之方也已。」 : 者通上下而 武伯問三子之仁,而孔子 而夫子言不知其 非 仁者 觀 其 仁 不 進 以 能 則 而 退 知 仁止於是也。 仁,則不唯使 仁者,以 周 而 旋, 束 則 帶 孟 其 立

盡 之道 日 斯斯 可謂之仁,是以 「三子之才, 則 對 可 知 \Box 也 不 知 必 其仁 也

> 知 日 子 + 謂 子貢 賜也 賜 日 也 聞 何 敢 「 女 以知二。」 望 與 回 回 子 回 日 也 愈?_

或問: 勉己, 孔子 「與」如 也。 又曰 録》曰: 而 吾 與 與 回 又 ·; 則 貢 問問 以 8 曰 女 孰 伊川《解》曰: 喻聖人之言 吾與女弗如也,使子貢喻其言,知其 愈。 爲 何?」日 與 弗 以爲 「『吾與女弗如也」與『吾與點也』之 不喻,亦 聞 回 「子貢常方人,故孔子答以 吾與女 如 子貢既 也 也, 雖聖人 知十,聞 孰愈,所 . 所 可 弗 「與 以 能 使慕之,皆有教 則 「子貢· 尚 如 勉 自 知 也,勉 字 一知二,舉多少而言 不 以 其 謂 勉進己 可及,不 則 抑其 進 喜 何 進 敢 也 方 (方人 學者 用 望 人 也 能 處 回, 也 也。」 故 之言。 不同。 又《 故 問 云 其

也。」 曰 十 則 ·,若到後來達 謬矣。」 「子貢之知亞於顏子,知至而未至之 又曰 理了 . 雖 顔 億萬 子 亦 亦 只 可 能 通。」 聞 知 又

子聞 恐不及,是以幾於聖人。 能及也。 貢 ,故其才有限也。」 知己之不 范 日 以知十,子貢之知足以知之,而 : 顔子之於道也,進而 如 「夫子之教人亦多術矣, 顔子,是亦 自子貢以 教誨之也。 不已 下, 學 使子 則 而 夫 . 顔 書 唯

也。」凡物有對,舉其偏而知其對者,子貢也,凡物有對,舉其偏而知其對者,子貢也,日曰:「知類通達,至極其數者,顏子

謂。 未爲優於入德。 之愚,參之魯,蓋 能之,此顔子之才也, 在夫子之門,惟賜於此爲 謝 日 聞 不害於人德 П 以 雖 聞 知 非語 十,知 知十, 其 造 明 近 如賜之達, 而 道 血 亦未肯 然 成 好 德 如柴 篤 之

則悮矣。」不如回,●何疑之有? 若以此較有餘不足,以此自多於其間也。然則聖人之於此以謂

揚 口 望洋向若而知 顺 審矣,反以問子貢 ·則曰「吾與女弗如也」以悅之,皆聖人 好方人,故以顔子 其詞而磨切之也。」 楊曰: 回、 自 厂勵 賜之賢孰愈,孔子宜知之 ,爲問。 也。 蓋 子貢之達,其徒鮮 至其自 蓋將以抑之, 間謂不 敢望 抑 使 儷

以勉子貢進學也。」 云吾與女弗如者,豈聖人真所 人,故問其與回也孰 尹曰: 「臣聞師程 愈。 |頭日: 既曰 不 何 · 及哉 敢望回, 「子貢喜 方 所 而

行, 今吾於人也,聽其言而觀其行。子曰: 「始吾於人也,聽其言而信其糞土之牆不可杇也。於予與何誅?」宰予畫寢。子曰: 「朽木不可雕也,

「之」,四庫本無。

於予與改是。」

疑田 言。 彊 是乃忠義,孔子何羞之有? 闙 又曰: 宰我是也。 因責 常不 1 伊 又《史記》載宰予被 ĬI 爲 宰予畫 其 陳常所 敗, 「彊者易抑,子路是也, 解》曰 不 何緣被殺? 踐 寢, 一般,亦字子我,謬誤如 平日之言 孔子以其質惡,因是 「人既 殺 耽 若爲齊君 ,孔子羞之。 惑 及觀《左氏》, 又《 難 以 弱 語 者難 此。 語 録 而 學

不 而 人,自其 後已,惟恐其 而 無實, 美,不足 待天下以 范曰: 故夫子深責之。 不足以有行也。 畫 寢 以 不 「君子之於學,惟日 有成 ,而夫子始不信其言, 不及也。 勤、蓋因宰我以 也。 宰予晝寢,自 宰予以言見 朽木、糞牆,言 雖聖人不以一人 誨 9 孳 也。 取 以 棄 其 於 其 孰 斃 華 質 其 而

而

己。

邪 ? 者, 豈特是 後改是,蓋聖人於人之情僞,有因 乃深誅之也。」 然 成 予 則聽言而信行,容有未盡者,然必待於予 非自彊不息,不足與語 明,猶有待於更事之多也,而況於學者?」 蓋聖人之道,雖得於生知,至材全而 溺,蓋以志昏 謂 湯不邇聲色異矣。 也 楊曰: 聖門 於予與 是亦不屑之教誨也。 之高 而已哉? 何 而氣 「朽木、糞牆 弟, 誅者, 又曰: 、喪,尚 則 聖人始信之,終疑之。 其 聰 豈以予爲真不足誅 道 應之也 明 口 調 「有言不必 ,故責宰予以是。 過 於予與何誅,是 與 無質 人道 一,能不憚 者 是 也。 乎? 語 面 有 後 知 其 見 而 益 與 淫

逮者矣。 年之喪,復於此,皆 亦 日 善言德行。 尹曰 《傳》曰 字字 於其 予以言 深 書 責 對 居於内, 之,蓋 哀 語 公 稱 問 於 能 聖 社 問 言 門, 其 及 而 問 疾 孟 行 不 子

謝

日

剛

爲近仁,養心莫善於寡欲

神

龍

惟

有慾,是以

人人得

求

其

慾

而

制之,亦得

范

日

剛

者

天

德

惟

無

慾

乃

能

之。

而

食之。

聖人無慾

故

天下萬物

不能易也。

無

欲

則

能

無

心,

無

心

則

能

至公,至公然後

吾

也。 也。」故 以 朽 木、 糞 牆 譬其質 悪 ٦, 難 以 語 學

子 棖。]子曰 日 「吾未 帳也慾,焉得 見剛 者。」或 對 剛 日 申

謂

欲? 氣 能 佚皆然,此皆有以使之也。然則何 知 害人也。 不 又曰: 屈 室、慾。」一本此下云:「曾子之三省,窒慾之道 在養之可以至焉。」 則至於滅天理而不反。 於慾也。」 伊川《解》 日 至鼻之於香,口之於味, [思而] 人之爲不善,慾誘之也,誘之 「凡人慾 已矣。 Ĕ: 又《語 學者莫貴於思,惟 則 「人有慾 録 不 》 曰 : 剛。 故 則 目 至大至 「甚矣 四 無 欲色,耳 一肢之 剛 以 一剛之 室其 於 思 丽 慾 剛 也。」 爲 安 欲 弗 則

故

所

剛 無 害 0 孟 亦以 子謂『浩然之氣至大至 慾之害氣也。 剛 直 養

而

有慾則 於威武, 志者多。 慾,故常屈於萬物之下。 慾 剛 或 故 以 不 謝 日 剛疑之,然不知兹所以爲慾乎?」 不 可 則 不屈 常 知 剛, 屈於物我。 伸 ,其爲人得 宜乎夫子之未見也。根 於 於名勢,則 剛 萬 與 物之 非 要之,有 一相反 上 自古 屈 倖 於貨 倖自好者乎 也, 有 爲 意則有慾, 志者 色 物 能 掩 勝 少, 也其 不屈 之 物 ? 無 謂 之

尹 楊 日 : 「有慾必有狗於物、焉得 「人有慾則無 剛 剛 則不屈 剛 ? 於

慾。」

子貢 所 亦欲 及 也。」 無 日 加 0 諸 我 人。」子曰 不 欲 人之 . 加 賜 諸 也 我也, 吾

亦 欲 伊 川《解》 無 加 諸人』, **>** 日 我不 欲人之加諸 施 諸 己 而 我 不

者, 以其 句。 願 近於仁矣,故曰 欲人之加諸我也,吾亦欲無 者能之,故非子貢 所不欲,勿施於人」者也。 爾所及也。」 非子貢所及。」 「施諸己而 施諸己而 亦勿施於人」, 然此兩句甚難行,故子曰: 有欲字耳。」 不 不願,亦勿施於人」,正解此 非 又曰: 願者也 又《語 恕也。 爾所及。 所及。」 録》曰: 「不欲人之加諸 恕或能 此無伐善無施勞 無加諸 又曰: 然未至於仁也, 加諸人」, 勉之, 「《中庸》所 人者 「賜 「我不 恕也, 也,非 我 兩 則

我

也

者矣; 也。 不能必 難。 犯乎? 顔子之行,犯而不校則已矣,豈 范 也。 日 「己所不欲, 而欲 故非子貢所及也。」 己欲無 「君子修其 人之無 勿施於人」,則無 加於 加於我,雖 在己者,其在 人 易, 使人 聖人 能 無 加 人者, 使人 於 不 加 能 於

謝曰: 「孔氏注,言不能止人使不加

非義於己也。

1。」 楊曰:「惟仁者能之,非子貢所及

在人。 也。」 也, 子貢 尹 曰 日 : 在己 夫子之言性與天道,不可得 可 無 「夫子之文章,可得 必也,在人不可必也 加諸人在己,欲人不 而 加 而 聞 聞 諸

此? 人如子貢之才,六年中待作多少事 場,六年然後歸,則子貢之志亦可見矣。 聞,亦可謂之鈍矣。 子貢之才,從夫子如此之久,方數不可得 而 可 聞 得 明道 也。」子貢蓋於是始有所得而歎之。 而 聞 也 曰: 夫子之言性與天道,不可得 「子貢曰: 觀其孔子没,築室 「夫子之文章 力,豈肯 於 以 如 他 而

歎美之言也。」 伊 川《 解 × 日 又《語 此子貢 録》曰 聞 夫 子 性 至 與天 論 m

消 之辭,言衆人不得聞。」 又曰 不言 未達此,後能達之,故發此 偂 識之也。」又曰: 又曰 非自得之則不知,故曰「不 . ,其意又淵奥如此,人豈能易到?」 「唯子貢親達是理,故能爲此歎美 「性與天道,不可 「性與天道,子貢初 歎辭。 得 而 可 得 單 非謂 要 侕 聞。 在 孔 默 子

爲得,必以了悟爲聞,因有是說。」語之矣。聖門學者,以仁爲己任,不以苟知道,不可得而聞。既云夫子之言,則是固常,不可得而聞。既云夫子之言,則是固常横渠曰:「子貢謂夫子所言性與天

與天道 足以 智足以及之,而仁未足以與此 之於門人,各因其材之大小高下 章。」文章者,德之見 ※ 乎可 知聖人,故其文章可 范曰: 得 ,則未嘗以 而 聞也。 「孔子稱堯 語子貢。 然知其不可得聞,是其 乎外 日 得 者 自子貢以 也。 而 『煥乎其 也。 聞也。 而教之,性 子貢 上,則 、之智 有文 夫子

> 學 非 不言也,弟子亦自有所不聞 夫,非躐等也,言近而指遠也。 ·隱情 不躐等, 吕 也,衆人自 曰 非 隱 吾 也, 無 有 隱 所 未 乎 不 可 爾, 識 也 與 性與天道,非 竭 人爲 以微罪去, 兩端 善 於鄙 也。

所以 文章; 識 子,言性與天道多矣,其言紛紛,使人彌 性與天道、夫子雖欲言之、又安得而言之? 聞夫子之文章,於其間知所謂性與天道。 他人聞夫子之文章,止於文章而已, 與天道; 之聞矣。」 書於章句之外,毫髮無所得也,亦異乎子貢 不足以知之,則安能 善言乎? 者,亦異乎夫子之言矣, 不可 謝 曰 夫子之言性與天道,異乎人之言性 得而聞也。性與天道,使子貢 子貢之聽言,異乎人之聽言也。 子貢可不謂 「夫子之文章,異乎人之所謂 語此? 善聽乎? 則夫子可不 後世學者, 後 子貢 世 觀 不 謂 智

三五

子不謂 人有所 得而 之於君臣,至聖之於天道 聞者,亦有所不能知之謂 聞 游 者,●可 命 不能知焉,況子貢乎? 日 也。」論性之妙 孟 以與 子曰: 知之謂 也。」 而與於天道 ,命也,有性焉 「仁之於父子, 也 3 聞即是知 不 미 一,雖 得 不 而 聖

有二 哉? 天日 則 也。 無二 言之異耳。 命道,三者一體而異名,初無 將進乎此矣。」 又曰 命,在 致焉,學者非默而識之,則不可 也,聞者自異耳。 子貢至是始與知焉,則將 楊曰: 夫子之文章,乃所 所謂 「天命之謂性,率性之謂 人曰性,率性 「夫子之文章,與言性 天道者,率性 子貢至是始 而行 以言性與天道,非 二致也。 是也 日 進 1道,特 平此 〕,豈遠 與知焉, 與天道 得而 道 矣。」 所 故 平 從 在 聞 性

天道 ,非如文章可得而 尹 日 「子貢於 此 易 聞 始 有 所 得 知性 與

> 子路 録》曰: 而 有 未 伊 子路有聞, 川 聞,未之能行,唯恐有聞 能 「人之所可畏者便做,要在 行, 解 唯恐 曰:「子路果於行者,故有 未之能行,唯恐有聞 復 有 所 聞 也 聞 見 又《語

聞

勇矣。」 爲弗及也,故著之。 范曰: 「子路聞 善,勇於必行, 若子路,可 謂 能 門 用 自 其

以

九層之臺。」

如

登

唯 餘 待見而 美歟?❷ 事矣。 力行,然後可 謝日 後 夫勇於 : 知 蓋道 「未能 不 以 口之於味,必待食而 有 如 知道。 行 行, 豈必以 是,不足以 圃 恐 譬如目之於色,必 有聞, 遷善 有 知 蓋 改 也 以 後 渦 聞 蓋 爲 爲

⁰ 字,今從之。 按《游馬 「美」下,原空 不得 而 山集》「不得而聞」四字作「可得而聞 開一和 字。 刻 本校云。 四庫本「美」下無空字,徑接「熟 「不得聞」 恐 可

勇於爲善,其孰能之?」楊曰:「尊其所聞,恥躬之不逮也,非

能行,唯恐復有聞也。」 尹曰:「子路勇於行者,故有聞而未

是以謂之「文」也。」也?」子曰:「敏而好學,不恥下問,也?」子曰:「敏而好學,不恥下問,子貢問曰:「孔文子何以謂之「文」

其質,外有其行,而後可以名之也。」舜亦由此以爲大。 夫所謂文也者,必内有而無已。不恥下問者,取於人以爲善也,雖而無已:「敏則有功,而能好學,則有進

交錯,乃謂之文。」學,居上者多恥下問,今孔文子不守一偏而錯,不守一偏,乃所以成文。敏者多不好錯,不守一偏,乃所以成文。 似事之交

謝曰:「諡法固非一端,知孔文子之

謂之文,與文王之所以爲文則異矣。」楊曰:「敏而好學,不恥下問,故亦可

之文矣。」 (敏而好學,不恥下問,是以謂

子謂子産:「有君子之道尹曰:「勤學好問爲文。」

四

其

其使民也義。」 行己也恭,其事上也敬,其養民也惠,

歟?」 横渠曰:「使民義, 不害不能教愛, 猶

孟 精

物故有 之小心,惠鮮鰥寡,不替義德。 以文王之至聖,不過於不敢侮鰥寡,有事君 民 義 謝 本末。 以 事 子産,古之成人也,其端己接 行己恭,事上敬, 語之,要之, 至理 養民 有是四者, 當如 惠 使 此

知 爲政,不害其爲君子之道也。」 日 「以惠養民,而 使之以義, 雖不 蓋可以爲君子矣。」

子。 子曰: 尹曰: 子産兼之,故曰 「四者,人有一焉, 「晏平仲善與人交,久而敬 「有君子之道四焉。 得以爲君

Mi 能 敬 伊川《 ,所以爲善與人交。」 解》曰: 「人之交久則敬衰,久

之。」

如是; 也。 以爲法矣。」 上交不諂,下交不 范 有諂 有瀆 「久而能敬,所以 則非敬也。 ·濟、君臣之相與亦當 有常 若平仲,足 而 不 厭

> 交一 常者能之。 常者,自不狎侮矣。 大夫,其善固多矣。 節 謝 而已。 日 蓋非有意於久交也,而德盛 晏平: 所謂 仲當周衰 久而敬之,必 聖人於此,特 時, 德 亦 論 盛 其 可 謂 而 與 有 督

爲善也。」 敬弛焉,人之常情也,故以久 尹曰: 楊曰: 「交久則敬衰,久而能敬,所以 「交之道,久而益親 而敬之爲善。」 則 而

子日 其知也?」 : 「臧文仲居蔡,山 節藻梲, 何 如

采同。 知 失禮 也。 ,安得爲知?」 伊川《解》曰 大夫有采地 山節藻稅,諸侯之事也。」 . 而爲 又《語 世 謂 Ш 臧 節藻梲之事 録》曰: 文 仲 知 蔡與 僭 L

爰居之義, 横渠曰: 同歸於不知宜矣。」 「山節藻梲,爲藏龜之室,祀

范曰: 「子曰「智者不惑」,以其明於

梲非 是 之爲美也; 以言知矣。 非 其 而 (所宜 取 舍無疑也。 夫僭禮者,非不知侈之爲惡,儉 ,胡爲不明 不能以義制欲,而犯義以從欲 蔡非其所居,山節 於是 而 處於非 ", 不 可

開當時之惑,以爲智者不如是也。」知爲僭上害禮之事,於我何益焉? 蓋夫子納曰:「臧文仲當時必以智稱,然不

焉,故私心勝而明有所蔽也。」

申ヨ:「罪莫大於曆,習者爲之乎?養養鳥也,焉得知?」 楊曰:「以山節藻梲居蔡,是猶以己

虚器是也。」《左傳》稱仲尼謂臧文仲不智者三,有曰作《左傳》稱仲尼謂臧文仲不智者三,有曰作尹曰:「罪莫大於僭,智者爲之乎?

知。焉得仁?」「崔子弑齊君,陳文子取,必以告新令尹。何如?」子曰:「未政,必以告新令尹。何如?」子曰:其言色,三已之,無愠色。舊令尹之子張問曰:「令尹子文三仕爲令尹,

然乎? 問 子獨 是仁也。」 是忠,不可謂之仁。若比干之忠,見得時便 忠矣,孔子不許其仁,何也?」曰: 之,亦只是清忠也。」 或問: 爲之,是仁否?」先生曰: 則非也。 尹,無喜色, 日: 之。 邦,則又曰: 有馬 「令尹子文之忠、陳文子之清,使聖人 稱其舊政告新爲忠,斯可見矣。」 伊川《解》曰:「令尹子文三仕爲令 「仁矣乎?」曰: 人不能見其色則可矣,謂其無喜愠 苟無喜愠,何以知其未仁也? 何如?」子曰: 十乘,棄而違之。至於他邦, 猶吾大夫崔子也。」達之。之一 三已之,無愠 「猶吾大夫崔子也。」達 「未知。焉得仁?」 「不然。 色。其然,豈其 「清矣。」曰: 「令尹子文 聖人爲 「此只 或 則

皆未足爲仁。仁者必有及於天下,非自足范曰。「令尹子文之忠、陳文子之清,

四〇

清忠,而仁不足道 就之義,不免於有 退之義者也; 後去,是不知去就之義者也。 吕 「子文至於三仕 陳文子至於崔子弑 也。 懷 行至於有懷 三已,不 不知 進 齊 退 雖 君 知 去 進 而

以仁疑 子於仁 仁了非以二子爲 馬 於令尹子文、陳文子一時之善士 無喜色,三已無愠 風未熄之時,蓋有不待學問 久,故小子有造。人有士 識 也 十乘,違而之他邦,其立心高 何有? 也。 不仁 之。 曰 未 使子 「文武之澤人人也深,養 容有質厚者亦能之,是以 可 斷 張知清忠之非 不仁,特恐子張識 色,舊政告新令尹 也。 其 君子之行,則 日一未知 而 入德者矣,況 仁,其於 矣,故 也? 三仕 清 , 與 忠 子張 其遺 人 焉 知 而 得 夫 棄 也

> 干、伯夷可也,降是寧足與此 可 若可以爲仁,故子 之朝,棄十乘而違之,可以爲清矣。 私於己者也,故可以爲忠矣, 之政必以告新令尹,是事君 以迹論之故也。」 楊 日 三仕三已 張以 是爲問。 ൬ 無喜愠 人不爲 乎? 不立 然 忠清 於惡 容悅 舊 蓋仁 若比 **\$** 不 疑 尹 而

矣乎。 乘,亦齊之富大夫也,崔子弒 禮、得於智者也,其色有歉於心,則不可謂 上告天子下請方伯而討其賊。 僭號之君, 之術、皆非所謂盡仁者也。 之仁矣。 焉得仁?」蓋仁者理之得也,得於義、得於 仁之功,或言 仁,其餘或以一事而名仁者亦有之: 侯曰: 孔子對以清 以全體言之,唯踐 而不知正其名; 「子張問令尹子文、陳文子仁 近 乎仁,或爲仁之方,或 與 忠, 圃 令尹子文,相 形者 陳文子有 齊君 日 令尹徒以 可以 而 「未知。 爲 不 馬 或 謂 其 之

爲之,只可謂之清與忠而已,故夫子 區之忠而告其新,文子以孑孑之義 之色,與棄馬 地,是皆不 『未知。焉得仁?』謂未知仁道 知 爲臣 而逃、皆末事 爲仁之道也。 也,何足爲仁之 也。 雖 使 無 皆 而 聖 避其 喜 E: 温

矣,仁則未知也。」 尹曰:「觀二子之事,謂之忠清則可

「再,斯可矣。」季文子三思而後行。子聞之,曰:

「再則定,三則私意起矣。」 又曰:矣。至於再則已審,三則惑矣。」 又曰:曰:「爲惡之人未嘗知有思,有思則爲善矣,至於求遭喪之禮,則過矣。」 又《語録》 伊川《解》曰:「使晉時也,其再慮當

思,思之,弗得弗措也。」聖人有不思而得思可矣,不必於至三。《中庸》曰: 『有弗志曰: 「思所以求通也,多則惑,故再

事事必三思而後行,故孔子以爲過矣。」而思之,夜以繼日,則不止於三也。季文子者,有深思而得之者,不執一也。若周公仰

理。 之,有可爲,則行: 不能 以解其惑,而曰: 外猶有思焉,恐不免於妄也,必無 之,有未可焉,則止, 謝曰: 有人聞季子之風,能不悅乎? 無擇也,是以再思。 「天下之事,有是非 『再,斯可矣。』 此之謂再思。 以爲不可 以爲可 -利害, 也,徐思 也,徐思 夫子所 中倫之 再思之 君子

思止於再,可也,三則惑矣。」楊曰:「事有可不可,兩者而已。故

過者也。」
惑。若文子使晉,而求遭喪之禮以行,思之惑。若文子使晉,而求遭喪之禮以行,思之善,可也,至於三,則

伊川曰。「邦無道,則能沉晦以免患,則愚。其知可及也,其愚不可及也。」子曰。「寧武子邦有道則知,邦無道

也。」 故曰不可及也。亦有不當愚者,比干是

亂邦之害,●此所以爲不可及也。」 道則晦之。 也 范 知與愚,本於其心,而 曰 道隱乎心,而迹著乎外, 「治則見, 亂 則 有道 隱, 則 出 明之,無 處 以免於 之 洂

於知,過也。」
日曰:「以聖人之行爲不可及,則過

知 長,知有所短也。 原其初心, 豈欲 已。至於此,然後知武子之愚不可 者,不絶於春秋之時,優游卒歲,惟叔 則愚,大知也。 而德不形者乎? ,亦不得已矣。」 謝曰: 「邦有道則知,知也, 邦無道而 先公後私數? 觀 如武子者, 莊子所謂 其 八無道 不愚,以隕身失族 而愚,則有道 蓋才有所 邦無道 及也。 才全 向 而 m

事者。言不可及,則過中道矣。」 楊曰:「有知愚之名,則非行其所無

也。」

一

中

一

一

打

無

道

而

愚

、

蓋
人

之

難
能

者

《樂》,已前簡策甚多,如《詩》、《書》皆千餘 也。 方,諸弟子編集已成章,但未知所 付諸弟子編集,然後删定。 篇,豈是仲尼一人獨力能爲之? 言弟子狂簡,志大而行不揜,故率然能 使羣弟子編緝之也。」 故仲尼在陳思歸 章,不知所以裁之。 是時,孔子將反魯之時 『吾自衛反魯,然後《樂》正、《雅》、《頌》各得 仲尼删《詩》、《書》,作《春秋》,定《禮》、 子在 伊川《解》曰: 子狂簡,斐然成章,不知所以裁之。」 陳日: 魯而裁正成書也。 「歸與,歸 「夫子之删《詩》、《書》, 又《語録》曰 故仲尼周 與。 蓋當時皆 吾黨之小 以裁擇, 故曰: 流 此 成 四

范曰:「狂者進取,簡則未能居敬也。

免」,四庫本作「見」。

若 世 裁 琴 之, ,此夫子所以欲歸 張 則不 曾 哲、 ·得其 牧 皮 中, 者 傳之於書, 也。 是 狂 而 른 或誤 不 天 知 所 下

者尚 乎 進 不 自 m 行 中 非 取 卒 聖人, 歸 也 矣,其不 則 固 调 日 乎立言, ,既不得 己 9)雜然成章矣。 立言舉不能悉合乎 中者尚 狂 中行 則聖人之不遇可知矣。」 者 簡 有所 當 而 在 爲 取 裁 不 狂 狂 成章則達 议 爲,不爲 狷 狷,又不得其行 就 中 中爾。 狂 者 矣,其 則 不 進 道之 未 取 合 中

成 知 欲 心 吾 就 反 之 其 巾 其 不 之,而 魯 門 卒 存 爲 謝 .時 木用 焉 當是時 東周乎?』則 日 心也。 (),豈不 況英才乎? 而況 也,不復夢見周 雖 夫子嘗曰: İ 狂 當是時 吾舍此 得 狷 其 天 乎? 下 傳於門 此 英 雖不 其 孟 及其 公也 才 如 如如 子 得 而 人,非夫子初 來)所謂 中 有用我 世 鳳鳥不 教育之,所 ,將以其 何 狂 ? 者 猶 者 道 又 此

不可得,又思其次也。」

所。 故 自衛反 禮》、《樂》能成文章,而 思 尹 楊 其 魯 日 次 也。 然後《樂》正、《雅》、《頌》各得 孔子在 道不行 狂 簡 小子, 一陳,不 則私 不 能 於《 得 淑 裁 諸 中 者也。 詩 人 消 *\ \(\sigma \) 而 而 己。 與之, 書 是以 其

子曰:「伯夷、叔齊不念舊惡,怨是用

希。」

問: 清,若 粟 又 乃 峻 \pm 可 Ē, ,有之乎?! 誠有之也。 以 也,然其 處 伊川《解 推其 「伯夷、 然却 世矣。」 不 居 所爲,須不 爲它不念舊 念 》 日 叔 之以 孟子 日 舊 齊 : 吅 悪 又《 寬,故怨 日 此 馬 伯夷、叔齊之節 語 叩 · 容 面 『惡,氣 於世, 清 録 馬 諫 伯 則不 岁日 者 希 武 夷隘 王 之量。」 . 必 象甚宏 一,義不 可 不然, 一。一只 負 知, 伯 石 食周 此 非 赴 夷 則 至 便 之 不 高 或 河

地 獨 伯 如 夷 甚 年 所 見 望去之,則 須是聖人語『不念舊惡,怨 夫。 念舊惡,故孔子特發明其情。 何?」曰: 心 一好,然只說得伯夷 載 禮 隘 夷、叔齊知君臣之分,不知武 矣,安得父死 也。」 食他 諫 而 處 死唐虞揖遜墟」,亦有是理。 石曼卿有詩,言伯夷『恥 不 肾非 禄 知聖人 君 可 鄉。」 或曰: 了, 非 臣 謂隘 尊 不葬之語? 也。 觀其清處,其冠 餓 卑, 之變,故隘 矣,疑若 而 「伯夷、叔 八介處。 武 天 不 王伐 下 食 之常 也。 有惡 是用希」說得伯 商,即 要 韓退之頌伯夷 齊 知伯夷之心, 不 理 居湯 至 王順天命 武 矣,然 不 食 不 也 如《 位 正,便望 周 王伐紂, 念舊惡, 首陽 武 已十一 伯 (史記 粟 干 却 夷 只只 乃 戈 誅 知

有 此 惡 者 「爲其 而 范 不忘,則志未平 E (樂 天 伯 順 :夷、叔齊之美多矣,夫子 理 可可 也 以 爲 法 平之在己, 也。 夫與 己 稱

在

河

中府虞

怨。 不 念, 吕 謝 不念舊惡,乃遠怨之義。」 則 日 日 人 亦不 「君子於所親,當怨也 「夷、齊聖之清者,清則 怨矣,是以 怨之者 希 一、然猶 能 也

生? 於念 人也 我則 宿 怨焉, 心舊惡 已矣。 談笑而道之,其待我以 圃 乎? 況於疎者乎? 蓋於攻 能不念舊惡,則 人之惡,有所 越人彎弓 横 逆,曰此 怨 不暇,而 何 而射 自 亦 妄 不 而

齊 則 好惡 ,蓋亦所過者化也。」 楊 不在 日 : 我矣,何 「公天下之善惡,而不爲 念舊惡之有? 若 私

亦隘 其 觀 其 中宏裕,怨是用希 矣 尹曰: 清 0 而 至於衣冠不正 宜若無所容者。 「伯夷、叔齊 也 則 之 惟 望 節 其 望 可 不 伙 念舊惡, 謂 去之,不 高

子 日 微生高 直 ? 或 乞 醯

不 亦 四 庫本作「則

乞諸其鄰而與之。」

鍾之禄,從可知也。故以微事斷之,所以教聖人於人,觀其取予一介,而千駟之馬,萬其不直。夫害其所以養心者,豈在大哉?謂無,曰直。微生以直聞,而夫子因乞醯知謂無,曰直。微生以直聞,而夫子因乞醯知

不可不慎也。」

楊曰:「循理而行,無矯揉之私,則直而意已傳矣。今未可以乞醯認爲不直也。」爲直? 然在當時之事,其設心恐不如是不害其與人交也,若以周濟急難,亦何害其不害其與人交也,若以周濟急難,亦何害其

其枉雖小,害直爲大。」 尹曰: 「君子敬以直内。若微生高,

恥之,丘亦恥之。」之,丘亦恥之。匿怨而友其人,左丘明子曰: 「巧言、令色、足恭,左丘明恥

其人,推其類,其可恥有有甚於穿窬也。●謝曰: 「巧言、令色、足恭,匿怨而友

● 上「有」字,四庫本、紫陽叢書本無,和刻本校云:

何足言,欲使學者知立心以直而已。」左丘明恥,則其所養可知矣。知恥在夫子

是四者之不可爲,又以進丘明之善也。」而曰『丘亦恥之』者,蓋示人以行,使學者知而曰『丘亦恥之』者,蓋示人以行,使學者知楊曰:「恥是四者,於孔子爲不足道,

丘明,古之聞人。」外諂者也。 匿怨而友其人,内詐者也。左外諂者也, 匿怨而友其人,内詐者也。左尹曰:「足恭,過恭也, 巧言、令色,

者懷之。」 志。」子曰: 伐善,無施 友共,敝之而無憾。」顔 志?」子路曰: 顔 淵、季路侍。 勞。」子路 「老者安之,朋友信之,少 子曰:「盍各言 願 車馬 日 淵 衣 日 「願 輕 一表,與 聞子之 「願 無 朋 爾

只是要理會語言,要識得聖賢氣象。如夫仁也。」 又《語録》曰:「凡看《論語》,非言志,夫子安仁也,顏淵不違仁也,季路求言地,失子安仁也,顏淵、季路與夫子之

子。

『無伐善,無施勞』,是它顏子性分上

孔子言『老者安之、朋友信之、少者懷

之』,是天理上事。」

又曰:

「『老者安之,

矣; 賢氣象。」 日 馬 子 亦猶是也 乎人,而不知羈靮之生由於馬。聖人之化, 勒以御馬,而不以制牛,人皆知羈靮之作在 物,而己不勞焉,此聖人之所爲也。今夫羈 友信之,少者懷之」,猶天地之化工,付與 子之言,出於有心也。 大而無以加矣。然以孔子之言觀之,則 賢氣象,他處也難見。 便見得聖賢氣象大段不同。若讀此不見聖 者安之,朋友信之,少者懷之。」觀此數句, 0 衣 日 輕 無施勞,則仁矣。顏子之志,亦可 願 裘,與朋友共,敝之而 無 盍 伐 各言爾 又 曰 : 又曰: 善,無施勞。」孔 志?」子路 「願無伐善,則不 「顔子所言,不及孔 至於『老者安之,朋 學者須要理會得 子曰: 無憾。」 日 : 願 萬 私 顔 謂 車

道也。」 爾。 但 朋 利拘之哉 心揀擇善惡? 言,分明是天地 數句最好。觀子路、顔淵之言後觀聖人之 之,朋友信之,少者懷之」如何?」曰: 「此 若聖人,則如天地。」 私己,故無伐善, 之而無憾。」此勇於義者,觀其志,豈可以 者安之,朋友信之,少者懷之」。」 多矣,安得爲天地? 故聖人之志,止欲「老 天地也。天地 「子路曰: .有小大之差,皆與物 友信之,少者懷之」, 「老者則安之,朋友則與他信,少 ,無施勞」,此仁矣,然尚未 若善者親之,不善者遠之,則物不與者 又曰 ? 「願 蓋亞於浴沂者也。 中何物不有? 「子路、 車馬衣輕裘,與朋 氣象。」 切涵養覆載,但 知同於人,故無施勞。 顔 共者也。 乃 或問: 又曰: 天 淵、孔子皆一意, 地之道也。」 /者則當懷之,乃天 天地 免於有爲, 顔淵 原無 顏子不自 「『老者安 「聖人即 處之有道 又曰: 友共,敝 何嘗 勢 著

> 蓋 安之,朋友信之,少者懷之。」此聖人之事 顏子大賢之事也。● 子路有志之事。 滯迹於此,不得不爾 也。 子曰 『老者

與賢者共敝

横渠曰:

「仲由樂善、故車馬衣 顔子樂道,故願無

裘

伐善

施

哉? 之,如 牛,人皆知羈靮之生乎人,而 之,而有我存焉, 乎馬。聖人之教,亦若是而已。」」 事而已。程子曰: 功也,老者當安之,朋友當信之,少者 幾矣,無伐善,無施勞,仁者之事也,雖 范曰: 堯舜之治天下,禹之行水,行其 聖人樂天,故分內外而 萬物各正其性命,吾豈 「子路所願,志末也, :「羈靮以 若夫子之言,則天 成其仁。」 不知羈 御 有心於 馬 不 顔 其 當 地 子 所 間 無 則 無

爲己,不倍於人, 吕曰: 「子路喜功,與人共利, 孔子體天,不言而信。」

也 和刻 本校云 也」字恐行

小乎? 之問 心與? 發矣, 其 志乎 病。 者如 施勞』之語 勞」, 篤志不足以言之也, 友信之,少者懷之」,此非志也,聊以答季 無憾」, 不害其未化 之,非問 睫之間,不 子路願 日 4、與朋 而已。 何,又從而振德之也。 志可以 「盍各言 由 謝 又安知 與回 \Box 乘肥 此篤志者也, 使 不可 「願車馬 之也 能 顏子聞此 友共,敝之而無憾」之語,能 待 使季路聞此言也 放在 馬 中人以上者也,夫子姑使之篤 也 問 兩人者不由 爾志」, ,蓋教之也,欲省其 門弟子 無 衣輕裘,●與朋友共,敝之無 而 衣輕裘 樂其 學者則爲 使之捐志乎? 可 言 知。 則二人者於此 所 庶 也 幾乎? 「願 與朋 存 一,則「願無伐善, 今 是大有以啟 切,論 「老者安之,朋 於 夫 無伐善,無 則「願 友共,敝之 由 子 蓋 至道 切 與 不可 爲善 可以 又日 車馬 問 得 回 則 無 迪 近 於 m 也。 「, 亦 無 白 路 施 其 省 衣 而 爲 間 思 眉

> 作用。」 子,自然合做的道理,便是天之所爲,更不 少者不能立者,便懷之。 亦是要做 孔子便不然,老者合當養的,便安之, 好 事 底 心 君君臣臣父父子 顔 子 早 是 參 彼

矣, 施 友莫不信之矣: 者皆致其孝,然後老者莫不安之矣; 友信之,少者懷之而 下之爲父者皆致其慈,然後少者莫不懷之 足以與此。」 雖若自抑,而非 於國,達於天下,亦不 游曰: 使天下之爲朋友者皆先施之,然後朋 「孔子之道,修於家,行於 盛德之善治於人心者,亦 此所以 已。蓋使天下之爲 過使老者安之, 爲孔子之志。 使天 其

楊 顔 日 志 淵 於 願 「季路之志,推之及 無 者之事 伐 善 無 也 施 善 绺 推 於 則 其 裕 朋 爲 乎 友 此 丽 而

不 辭

已。子曰『老者安之,朋友信之,少者懷

之」,是則仁矣,無事乎推也。」

求仁。臣聞師程頤曰:『欲見聖賢氣象,尹曰:「夫子安仁,顔淵不違仁,季路

内自訟者也。」 子曰:「已矣乎,吾未見能見其過而

當於此致意焉。」

不置,能無改乎?」矣。然知過非難也,能自訟之爲難。自訟矣。然知過非難也,能自訟之爲難。自訟

激怒不得見之,所以警夫不能補過者也。」以寡過矣,非好學者不能也。故曰已矣乎,以事過矣,非好學者不能也。故曰已矣乎,

過而内自訟者鮮矣。已矣乎者,蓋甚言其楊曰:「小人之過也必文,則能見其

過

不可

·勝改也,其惟能推好己之心好人者

之乎?」

未見也。」

訟不置,能無改乎?」 尹曰:「知過非難,自訟爲難

苟自

如

丘

學也。」
即不異於人,人不若己之好學耳,所以勉人則不異於人,人不若己之好學耳,所以勉人

學而不爲矜也。」

學而不爲矜也。」

學而不爲矜也。「十室之邑必有忠信者,不誣 學而不爲矜也。」

學而不爲矜也。」

是以自名好 學是正之道,然後能成,故稱己以勉 是人也,不如丘之好學者,不自誣也。忠信 是一人也,不如丘之好學者,不自誣也。忠信

質厚者皆能之,故十室之邑必有。」聖人之質不免爲鄉人而已。自盡不欺,苟功,可使愚者明,柔者剛, 苟不志於學,雖 日曰:「所貴乎士,學而已矣。學之

誠其身者,其惟好學乎?」誣十室乎? 然不明乎善,不誠其身矣。欲冬裘,渴飲而飢食,皆所謂忠信也,其敢厚冬裘,渴飲而飢食,皆所謂忠信也,其敢厚善謝曰:「父父子子兄兄弟弟,夏葛而

皆以身教之也。」
夫子不以聖賢自居,而勉人以學,若此類,信如丘者焉,不如聖人好學以成之耳。蓋儒如丘者焉,不如聖人好學以成之耳。蓋殊也,未有無其質也。雖十室之邑,必有忠殊也,未有無其質也。雖十室之邑,必有忠

於學則不如己之好焉,所以勉人云爾。」 尹曰:「忠信,質也,人誰無質乎?

國朝諸老先生論語精義卷第三上於

國朝諸老先生論語精義卷第三下

乎?」子曰:

「雍之言然。」

亦

甲

居

簡

而

行

乃大

马

居

敬

而

行

簡

以

臨

其

雍也第六

子一《异》子:「中子十惡,丁屯為一子曰:「雍也,可使南面。」

也。」 伊川《解》曰:「仲弓才德,可使爲政

之言皆治國之事、《論語》可見矣。」

范日

「仲弓

可以

爲諸侯,故夫子

與

射目:「篤以ニン・主以位と、爲し、不言を治国、言い言言・主り多し

之道也。仁而不佞,其才宜如此,故曰可使謝曰:「簡以臨之,莊以涖之,爲人上

楊曰:「仁足以長人,然後能治其國

面

尹曰:「南面謂可以爲政也。」

仲号問子桑伯子。子曰:「可也簡。」

多却 簡者 要直; 也。 旨者。子桑伯子之簡 却 來喚做敬。 乎簡矣,然乃所以不簡。 夫子云可也。」 又《語録》曰: 是不簡,只是所居者 一居敬 一簡也。 伊 又曰: 川《解》 内存乎簡, 則自然簡; 居敬則自 「敬則自虚靜,不可把 居敬 則爲 「内主於敬 則 雖 然 E 心中無物,是乃 疎 居簡 可 簡。 剩 蓋先有心於簡, 略。 取,而未盡善, 簡字。」 圃 居簡而行 仲弓可 「居敬而 III 行簡者, 簡, 謂 則 簡 爲 似 故 則 知

敬以 之於 臨 下 直 簡 范曰: 以 簡。 而 内,簡以臨 已。 子桑伯子其 「易者乾德 居敬而行簡,堯舜之道 人,故 處 堯 也 己亦若 舜 簡者 修 己 坤 待 以 敬,而 德 也。

口 使 伯子之言爲證。」 南 吕 面, 日 不見可 此 兩 章 使之迹,故以 相 .發明。 子 後章對子 日 「雍 也

不 簡 行簡 「可也簡。」其所以可,以其簡故 點因問三子之言如之何之意同 語,因以問子桑伯 而 可 行簡,不事事者也。 以 謝 ,以臨其民,舉其大而畧其細者也。 南 日 面 乎? 「此仲弓聞夫 子 可 不 仲弓 미 也,與 子可 所知如此 也。 也。 使 大夫子 子曰 南 居敬 與 面 一,其 居 m 之

若主之以敬而行之,則簡爲善。」 游曰:「子桑伯子之可也,以其簡。

非 簡 以 矣 其 臨 簡 下之道 楊 故 也。 簡 : 而廉。 也。」 夫主一之謂 「子桑伯子爲聖人之所 居簡 而 敬 ()居敬 行 簡 則大簡 ,則其行自 山 者 矣,

於敬 而 尹 日 行 簡 不亦 以以 其 河乎? 居 簡 故 若居簡而 日 可 也。 行簡 主

則大簡。

日: 過,不幸短命死矣。 哀公問。 者也。 有 顔 「弟子孰 回 者 好 爲好學?」 學, 今也則亡,未聞 不 遷 孔 子對 不

發也, 其 學。 出 矣,外物觸其形而 五行之秀者爲人。 也,然則顏子所獨好者何學也? 日 「然。」「學之道如何?」曰: 人之道也。」「聖 復行,不貳過 己,故不遷。有不 焉,曰 性鑿矣。 夫《詩》、《書》六藝,三千子非 伊川《解》曰: 五性 「『聖人之門,其徒三千,獨 喜怒哀樂愛惡 」具焉, 是故覺者約其情使合於中, 也。」 人 動於中矣,其中動 曰仁 善、未嘗不 其本也,真而靜 可 又《顔子 顔 欲 義禮 學 子之怒,在 加 情既 智信。 天 至 知,知之未 所好何學論 地儲 歟?」曰 熾 學以 不習 稱 而 形 顔 物 而 益 既 其 子 至 而 不 聖 好 在 诵

之安, 性; 已 其 知之 勿聽, 矣。 範 諸 故 制 也 必於是,出處語默必於是,久 固,仁義忠信,不離乎心,造次必於是,顛 乎信道篤,信道篤則行之果,行之果則守之 面),中正 之、縱 心, 誠 曰情其性。 心 故顔子 未嘗復行也,此 也。 視聽言動皆禮矣,所異於聖人者,蓋 : 非禮 知 知 動容周 不遷怒,不貳過。」有不善未嘗不知 得一善則 以其情 「思日 其性,反 其 所養,然後力行以求 加 故學 性 誠 勿言,非禮 所 一, 故 ,則聖矣。 而至於邪僻, 旋 凡學之道,正其 事 必 | 睿 中禮 拳拳 則曰: 日 盡 圃 「,睿作聖。」誠之之道,在 性 其 誠之,聖人 其好之篤,學之之道 服 , 勿 其 心, 加 作 而 君子之學,必 情 動。」仲尼稱之, 邪 盡其 梏 非禮勿視,非 僻之心無 勿失之矣。」又 心 其 而弗失, 至, 所 愚者 也。 心, 性 ,養其性 而亡之 謂自 則知 則不 故《 自 先 則 洪 其 知 則 禮 生 居 沛 明 明 m

子曰: 子則必 與 而 也。」又曰: 者,生而知之者也, 今謂可學而至,其有 踰矩」是也。」或曰: 而中之謂也。 謂 幸短命死 心,假之以年,則不日 所未至者,守之也,非化之也 謂 輝之謂大,大而化之之謂聖,聖而 至,而爲學之道遂失。 、聖人 知也。 化之者,入於神而 神。」顏子之德,可謂充實而有輝 則 不 相去 思 思 「堯舜性之也,湯武反之也。」性 後人不達,以 矣,蓋傷其不得至於聖人也 而 面 息。 後 得 「孔子則生而知 得, 孔子曰「 不 必勉 勉 孟子 稽乎?]曰: 自然,不思而得,不勉 而 『聖人生而 而化矣,故仲尼 而後 不求諸己 謂聖本生 反之者,學而 七十而從 中, Ė: 中,故 從 0 也,孟 容中 以其好學 充實 心所欲,不 而求諸外 知 知之者也, 不 然。 道 子則 光矣, 知之 口 非 而 顔 學可 知 有 者 不 所

「輝光」,四庫本互乙。

怒也 者也; 蓋 遷 君 待顔氏 也? 否?」曰: 怒,如舜之去四凶。」 彼,隨物以應之。怒不在此,何遷之有?」 又《語録》曰: 物,以至無所不怒,是所謂遷也。 乎血氣者,其怒必遷,●若鑑之照物,妍蚩 至於道者 小人之怒出於心,作於氣,形於身,以及於 忽怒。 因人有可怒之事則怒之,聖人之心本無 來便見是惡物,鏡何嘗有好惡也? 又曰: 便道易 博 0 聞 語 如舜誅 而後能?」曰: 强 猶之鏡焉,好物來便見是好物,惡 不在血氣,則不遷。」 ,此莫是最難,須是理 「小人之怒在己,君子之怒在物。 記巧文麗 録》中有怒甲不 ,則今之學與顏子所好異矣。」 「是。」曰: 四 「喜怒在事,則理之當喜怒 凶、怒在 幹 爲工,榮華其言,鮮 「若是則甚易,何 或問: 「只被說 四凶,舜何與焉? 遷乙之說,是 會得因 「不遷怒, 又曰:「動 得粗 君子之 T 何 須 何 在 有

> 别人者,忍得 心 事,自家著一分陪奉他,此亦勞矣。 說 役物,小人役於物。 人,則因 此,學者可不勉乎? 焉,蓋寡矣。 當其怒,能自反於義理之所歸, 人 如止水。」 話,能無怒色乎? 固有怒於室而 物 而未嘗有怒, 豈不是 顔子之好學,孔子所 如此,已是煞知義 色於市者, 今見人有可喜 有人能 且怒一人,對 怒一 此 遷 難? 理。 人 則 稱 怒者 那 聖人之 可 雖 而 乃 或遷 君子 若 先 不 也 奴 平

再。」 其身,愧於己 不知,知之未嘗復行,故怒於人者 怒於人者不使遷於己,慊於己者不 横渠曰: | 者 「顔子 不輒貳於後也。」 於天下,有 不 不 ·使遷 使 善 又曰 未

● 「之」,四庫本無。 作「必」。今據明抄本及《遺書》改。 ● 「必」,原作「不」,明抄本作「必」、《二程遺書》卷十

淵,他門弟子皆不與 聖人,非治心養性不能至也。 也 而 中 范 不貳 節 日 謂 過 之和 示不 者,知幾 故 怒者,性不移於怒也 雖怒而不離於道 馬, 也。 然則知好學者鮮 學者所 夫子 獨 以 一未嘗 學爲 稱 顔

之至者也。」
之至者也。」
之至者也。」
是謂不遭怒。有不善未嘗不知,知之未嘗復行,是謂不遷怒。有不善未嘗不為人之所怒,是謂不遷怒。有不善未嘗之有惡,已必怒之,不使可怒之惡反遷諸己之至,則好學不厭。人

過,蓋過不害其爲改; 中 之謂之貳。 己之學也。 改矣。顏子不遷怒,不貳過,則其所 節 忘人欲; 謝曰: 至於遷怒,則 聖人之所以爲聖,●以其 古之人不貴不怒,蓋怒未 衆人之所以爲衆人,以 移此 而之彼謂之遷,繼 必不中矣。 至於貳過 2,則必 不 其 好 得 患 必 滅 天 乃 而 京 理 不 有 副

者也,豈其所學止於見聞而已乎?」焉? 是以謂之好學。今也則亡,未聞好學理而窮人欲。顏子之克己,其於聖人孰禦

得其正。」今至於不遷怒, 惡於怒哉?《記》曰: 之爲難耳。 動,故無過; 早,不復見之行事也。 謂自强矣。不貳過者,一念少 矣。喜怒哀樂,不可無也,每思要發皆 者,遷其怒之甚者也。不遷怒,則發而 溢怒之氣也。《傳》所謂『室於怒而市於色』 心,而行不貳焉,則於修身之學,可謂 有不善始萌於中,而不及復行, 游曰: 文武 一怒而安天下之民,則 「不遷怒者,怒適其可而 顏子能非禮勿動 蓋惟聖人能寂 『心有所忿 則於正心之學可 而 差, 是其 己。 懥 加 止 則 中 中 節 或 何

「爲聖」下,和刻本校云"據下文,「聖」下當脫「人」

五.

學者, 好學,而 IE 則 心 顔 心 似 以 無 子 秋 修 所 所 身,彊 天德 於正 以三 月不違仁也。 而 而已矣,此聖賢之辨 ,身無所 不 息, 於修 此 孔 " 曖 若 子 然似 夫 所 絶 謂

已矣。 學也歟? 識 顔淵克己復禮 爲 務,則 遷怒 日 其去聖學也遠矣。 如子張之賢,猶以干禄爲問,彊 貢 ,則進斯道矣,兹其所以爲好 學問之道 過者,皆放而 無 他,求其放心而 不知求者 也。

善未嘗 君子 庾。」 栗九百,畔。 日: 子 尹 日 齊也,乘肥馬,衣輕裘。 冉子與之粟五秉。 周 不知,知之未嘗復行,故不 使於齊,冉子爲其 「與之釜。」請益。 急不 「怒在物不在己,故不遷, 繼富。」 子曰: 原思爲之 毋,以與 子曰: 母 日: 吾聞之也: 宰, 貳。」 栗。 「與之 「赤之 與之 里 子 有

請

華

不

乎。

也。」 直拒他,然冉子終不喻 得,又請益,再與之亦少。 爲宰,宰必受禄,自有常數,故不得辭。 之爲 則與之少,原 餘,則分諸鄰 則與之粟九百,辭其多,故謂之曰: 赤苟至乏,則夫子必周之矣。 意,故自與之粟五秉,故夫子非其繼富。 不達而請 之請,夫子與之釜者,所 之,自不是,故聖 出使於齊,師 夫子使,義也。 伊 又《語 川《解》曰 益,則 思 里 録》曰: 使弟子,不當有所請。 鄉黨。」蓋思之爲宰有常 與之庾。 爲之宰,則與之多者,原 而冉子乃欲資之而 夫子之使子華,子 也。」 與之少。 「冉有爲子華 以示 求猶未達夫子之 聖人寬容,不欲 不當 原思爲之宰, 他 與 理 也。 「苟有 冉子 思 求

四 庫本作「自 四 庫 本《游集》作「自强

0

妄施 華則不 焉 又 不 鄉黨所當 日 繼富,以 可以 也。 范 與,非 日 與則 取 及 故雖多不得 爲天下之通義,使人可 予者,義之端也。 也 與,可以 「夫子之道 爲吝也; 推此 一辭,義 無 以及天下,無不均之 一,循理 與 在 則 原 可 無 以 思 而 君子無 與 則 已, 取 繼 也 當與 則 也 故 所 鄰 周 在 **分**非 里 子 荷 急

吕曰:「富而與人分之,則廉者無辭

得者 得 有所 也。 **豈以一己之私分害天下之公義哉**? 耳目哉? 我 富 於肥馬 不 如 謝臼 君子之於辭受取舍之際,豈欲悅 此 如 . 文稱其 何 與之釜,與之庾,意其禄秩所當 輕裘之家,則其於所識 「此聖人示人以辭受取 也? 至於與之粟五秉,則 情而已,故 此 可 以爲 修觀 富 有所不繼。 前 繼富矣。 窮乏者 舍之道 故 人之 不 禄

> 潔,而 以 非所當辭 意,至於無 則 舜 爲 (禹之於天下,何敢受也 惠 不可以爲義。要之,二者皆未免乎有 也。 而 意 宰而 不 者,則非所當與 辭 非 受粟,義 貪。」 也 ? 而 辭粟 此 不與 可 於爲 以爲自

有餘 賙之義。」 蓋義所當得,則雖萬鍾不害其爲廉。 思爲之宰, 猶 游 日 可以及鄰里鄉黨,蓋鄰里鄉黨 而 辭禄不受,則 餼 廩 稱 事 所 食功 以 食 之義 功 也 廢矣。 借使 今原 有 相

思之賢,猶不免是,況世之紛紛者乎?」 吝,寡取爲廉者,皆不知此也。 受堯之天下,不以爲泰。 非其義,一介不以與諸人, 楊曰: 「君子之於辭受取 而 苟 一或以 以冉求、 以其道 予之際,荷 嗇與 一,舜 爲 原

也。求不達其意,而請益,與之五秉,故夫而冉求乃資之。與之釜者,所以示不當與尹曰:「赤之適齊也,乘肥馬衣輕裘,

一五八

荷 子 有 非 而 己。 餘 之。 則 分諸鄰 又 日 里 鄉黨者 原 思之辭 ,凡取予一適於 常常 禄 使 其

子謂仲弓,曰:「犂牛之子騂且角,雖

欲勿用,山川其舍諸?」

色騂且角,縱不爲大祀所取,次祀小祀終必人之。所以,可用時也。」如此,可用時也。」如此,可用時也。」如此,可用時也。」如此,可用時也。」如此,可用時也。」如此,以不過,以不過,以不過,以不過,以不過,以

父而 改父之過,變惡以爲美,則可謂孝矣。 取 色 之。 范曰: 有禹,古之聖賢不係世 言大者苟立,人所不棄也。」 「以 瞽瞍爲父而 類尚矣。 有舜,以 子 鯀 能 爲

也 미 用 以 牛之子 用 吕曰 Ш 可 JII c 知。牛色雖不純,但騂 「祭祀之牛,角繭栗,角握 蓋大者立,小者未純,猶未 且 角,猶 害 則

謝

日

此

言人不繫其類也。

牛色繫

:

不 有 於 在念與不念耳。」 如 騂 氣 乎 禀 且 ? 角 如 何, 蓋 雖 人性 欲 幾 勿 有 異 用 不 於是,聖與 不可得 可 變 者。 者,可以 然 愚無定也, 犂 牛 人而 ·之子

此。」 一樣母:「苟騂且角,雖犂牛之子不廢 一樣母:「苟騂且角,雖犂牛之子不廢

者,人所不棄 取,次祀小祀 雖 非 純 尹 日: 全,然使其 也。」 一臣 亦 必 聞 (解色且 取之。」謂 張 載 日 角,縱不爲大祀所 仲弓苟立其大 「犂牛之子,

餘則日月至焉而已矣。」子曰:「回也,其心三月不違仁,其

善則 月言其久,過此則聖人也。 於仁,非能 服 伊川《解》 膺 "弗失" 至仁 日 也。 . 其餘日月 「回三月不 又《語 不 至 録 違仁,是 焉,至謂 違仁, 》日 心存 得 無 纖

相 至 恭先固請,先生遂親爲改定此說。」 久,天道小變之節。蓋言顏子經天道之變, 索久之,庶幾 而 此 然」下有「非」字。 「三月不違仁,言其久也,然成德事。」 一本 似 馬 私 爲仁如此,其終久於仁也。」 段周恭先所録,乞改。 ,其意味氣 欲 而已矣,與久而不息者,所見規模雖 少 自 有 得。 私 象 欲 迥 先生 然别,須潛心默 便是 又曰: 日 不 「如此 又曰 _ 「三月言其 是頭 : 又曰: 本 著 識、玩 日日 注 書也。」 조 略 月

與日月 循 而 不 横渠 曰: 能 至 焉 已,過此幾非 内 外賓主之辨,使 「始學之要,當知三月不 在我者。 心 意 勉 循 違

而 可 馬 至 弗 失 矣,有能 知 范 也 日 獨 其餘則有時 稱顏子三月不違,其可 夫子之於仁,慎其 「回之於仁,一時而 日 ·用其 、力於仁矣乎,猶 而至焉,不若 所以 不變, 取 與 不 愈 則 得 其

> 息 終,❷無有歲月之限。 能勝 於悠久博厚高明,莫之能已也。 之,則氣 如聖人則不可以久言。」 若夫從心 有不能守也。 至於三月,久之猶不能無違,非欲違之,氣 盛衰。如顔子之所養,苟未成性,其於仁 則氣之守有遠近,及其成性,則不繫所禀之 「君子之學,必致養其氣,養之功有緩有速, 而未能性之,故久則不能不懈。」 爲至之久近也。三月不違,可 ,行者莫能至。 日日 賢者身之,可 與天 所欲不踰 地 則日月至焉者,從 仁之爲 一,故其 唯聖 久而 矩, 故 已 爲德自彊 可 則 人 兼 又曰: 久則賢人之德, 其 性 容 一之,然 久也,以身之 義 遍 其 體 將 何如矣。❶ 下 其次則 一大而 不息,至 與 隨 又曰: 後 舉 天始 其 能 者 世 力 化 莫

「義」,賀云:「義」疑當作「氣」。

不 遠 里, 也。 也 而 可 於 踰 成 得也,非仁之有所不足守,蓋 ,其氣亦不 哉 m 或 雖 ? 性 化 矩 力 猶有力者,其力足以負 如 不 與日 力既竭矣,雖欲 不不 則 不 顔子 必 可久賢人之德,顏子其幾矣。」 勝矣。 不繫所禀之盛 繋所 勉 月至焉 勢使之然, 所禀之厚,所養之勤,苟未 能 而 禀 中,不思 故君子之學,必 無 所 衰,雖欲 者 養 加 有間,然至於三月 非 之 以 而 衰,所謂 盛 致 勉而 得者,安得 衰 養 鈞之 百 之 鈞 氣 故 不違仁,不 功 致 重 加 有 紒 其 養 不 1/2 日 不 爲 違 其 里 能 能 所 行 至 德 之 欲 氣 之 百 任 於 移 或

其

於行

仁,又安得以仁存心三月之久

如用

用

其

力於仁矣乎?」當時之人,不能

日

日

則顛

常

依

於仁

矣。」

顔

子力

哉

?

違者,對依

而言之;

不違,

矣,特· 去 從 學,然鄰於 三月,特 或 謝 未足 亦 一月則復 日 不 以 . 其 可 以 生知矣, 久 爲 「回之爲人,語其 語 勉强 詩 故 聖 人 也 也 以 矣。 古人 語其 亦未達 三月 日不 成 = 功, 所 見 月 不 間之稱 知,雖 無 違 如 雖 \equiv 君 仁、仁熟 未至 月 則 出 兮, 弔 一於 於

聖

孔子

許

顔子者

1,常在

欲

化

未化

不 仆 猶 夫 足 餓 飢 子 以 踣 之於 游 聞《 爲 日 而 韶 人 食 殞 \Rightarrow 焉。 命矣。人心一 ,渴之於飲,一 仁,人心也,不 月 仲尼嘗歎曰 不 知 肉 味 日 日 皆 不 闕 可 久 『有能 依於仁 之, 之 須 、臾離 意 則 必 巾

聖人 而 不 日 而 知 : 復 其 ,知之未嘗復行, 也 不足以與此。」 復 侯 楊曰 『中心安仁者,天下一人而已。』蓋 過此 日 不 遠 一,則 「顔 「三月不違,未能 則通天 與日 子三 通 月 則其不違 又曰 一月不 地, 至]: 焉 違 無 者 有 無 有 미 異 間 違 知矣。」 便是 矣。 不善 斷 也 3 \sim 便是 不 未 嘗 非 遠

[「]違」,原作「爲」,今據四庫本、傳經堂本、公善堂本改

顔子 一元之氣,化育流 ·所以 自 處 亦 如 行,無 是 纖 又曰 毫 間 息,斯 如 可 天 謂 地

日月至焉,心存於仁而不久故也。」無間斷矣,此顔子於聖人未達一間者也。尹曰: 「三月言其久,若聖人則渾然

子曰: 日: 季康子問: 從政乎何有? 也可使從政也與?」曰: 賜也 達,於從 賜 「由 也 也 可使 「仲由 果, 政乎何有?」曰: 從 於 可使 政 從 也 政 從政也 「求也藝,於 與? 乎 何 與? 有? 日 「求

用 非 冉 有其 惟三 也。 伊 一子者, (才可以從政乎,夫子答以 川《解》曰: 人各有所長,能取其長,皆 季康子問 仲由、子貢 各有 所長。 口

子各以 范 其才 日 而告之。 季 康 子問 子 謂 弟 仲 子 由 可 可 用 使治千 之才, 夫 乘

> 之國 之門猶如此,臣是以 以使四方,而貨殖爲之病。三子者,及聖人 其相季氏也,爲具臣而已矣。 民,蓋二子之志止於如此,故曰 謂 爲千乘之國 賦 冉 求 口 可使 使 有 知天下之才難也。」 百 通,求 乘 之 也 宰。 子貢之達, 自 果 謂 Ħ 丽 藝。 可 由 使 也 足 自 可 及

裁,皆可使從政也。」 吕曰:「果則有斷,達則不滯,藝則:

問於夫子,蓋 己 子,聖門學者,其性行或侃侃,或行行,於克 果、達、藝,有一於此,然後足以從政 也, 徒 授之以政,不達,雖 誦說 獨善,雖季氏猶知其 此豈優游不斷, 謝日: 云乎? 陋儒之所 「夫子嘗謂: 『誦《詩》三百 故將事事 多亦奚以爲?」學者 無智不才者能之 短 有餘 IE 而 在 也 見於民 乎 ,而特以 此 物之間 也 從 乎

質直而好義,察言而觀色,慮以下人,然後楊曰:「片言可以折獄,以其果也,

之藝。三者有一焉,則於從政乎何有?」唱之達, 知禮、樂、射、御、書、數,然後謂

可用也。」 一人各有所長,能取其所長,皆

「善爲我辭焉。如有復我者,則吾必在季氏使閔子騫爲費宰。閔子騫曰:

汶上矣。」

夫之家者,閔子、曾子數人而已。」 伊川《解》曰:「仲尼之門,能不仕大

之 子欲應之。 然者,公山 彘,又從 以樂道而忘人之勢, 夫,亦不仕於諸侯。 依歸,彼其視季氏 謝曰: 范曰: 若顔、閔者、夫子之得邦家、斯仕矣。」 ITT 季氏 弗擾、佛肸 臣之,豈其 「閔子,顔淵之倫也 「學者能少知内外之分,皆可 雖 不臣 以仲弓之賢,猶 不義之富貴,不啻 心哉? 況閔子騫得聖人 一,夫豈不知我 亂人也,召夫子 在聖人有 不不 爲 住 如 於大 季 ,, 夫 爲 不 犬 氏

> 哉? 豈不 聖人 死於 見惡 也。 欲殺之,亦 磨 欲 而 以 而 衛,求 能早見 人,在聖 則閔子其賢矣乎!」 不 爲 蓋 下,剛 宰 既 也 也爲 不可 無 涅 而豫 一人則 則 先見之 而 関 得 必取 不 子 季氏 待之乎? 也,況 可,在他 緇 辭 禍, 智,又 附益,夫豈二子本 之 蓋 何 柔 得 其 也 人則不 則必 變化莫測 無 而污之乎? 如 ? 克 由 取辱,関 蓋 亂之才 也 可。 居 不 亂 得 邦 雖 其 謂 自

確乎其不可拔,於二子見之矣。」任,蓋隱而未見也。樂則行之,憂則違之,任,蓋隱而未見也。樂則行之,憂則違之,

者,閔子、曾子數人而已。」 尹曰:「仲尼之門,不仕於大夫之家

也! 伯牛有疾,子問之,自牖 一亡之,命矣夫! 斯人也而有斯 疾 斯 也 也 執 其 而 手, 有 斯 日 疾

范曰:

夫子於顏淵之死,

冉

伯

牛之

一六二

取也; 也。 之下。」盡其道而死者,天之所爲,非人之所 死 者,故曰命。 天之所爲也。 至於命。故孟 人之道,則能窮理,窮理則能 易》曰: 立巖牆之下而死者,人之所取,非 命也,言天之命 子曰: 顔淵、冉伯牛,皆盡其道而死 窮理盡性以至於命。 『知命者不立乎巌 也,非人之所 盡 性、盡性 能 能 牆 則 杰 爲

斯人也而有斯疾也!」」
斯人也而有斯疾也!」」
斯人也而有斯疾也!」」
斯人也而有斯疾也!」」

斯人也而有斯疾也!」」

斯人也而有斯疾也!」」

斯人也而有斯疾也!」」

而至者",伯牛無是也,故曰命矣夫。」楊曰:「不知慎疾,則其疾有以致之

侯曰:「夫子嘗以德行稱伯牛矣,於

命之意也。」
也而有斯疾也!」言非可愈之疾,亦不幸短之,命矣夫! 斯人也而有斯疾也! 斯人其將亡也,宜其重惜之。故再歎曰:『亡

不欲人見,恐其不然也。」 尹曰:「牖,牖下也。包氏謂有惡疾,

飲,在陋巷,人不堪其憂,回也不改其子曰:「賢哉,回也! 一簞食,一瓢

衆。賢哉,回也!」

陋巷 改其 日 夫子稱其賢。」 也,不以貧窶累其心而改其所樂也,故 伊川《解》曰:「顏子之樂,非樂簞 「貧賤 與貧賤 而 在 或問: 在 陋巷者,處富貴則失其本 硒 巷, 「顔子在陋巷而 何 以 異?」先生 瓢

說。 已。」日 之謂 顔子 焉。」 士,仁義在躬,忘其貧賤 之人主。 改。 逐物 心 樂,惟反身者得之,而極天下之欲者不 獨 曰 吾今始識伊 樂者 極 不 顔 先生在講筵,當於文義之外反復推 及講、既 一,荷 ,王佐之才也,而簞 改其樂?」曰 君 也 在 子矣。」侁以 顔子 「仁者在 又曰: 謂 ,仁而已。」 外 不 及當講此章,門人皆疑 其 若顔子節 ,皆憂 在 知 使顔子 所樂者何也?」曰: 畢文義,乃復言曰: 陋 學,安能 ĬII 己,何憂之有 巷 也 面 顏子簞瓢 : 語 猶 飘,在他人則 以 是, 鮮于 毘 樂 「知其所樂, 道 不 天 陵鄒 又曰 食瓢飲; 爲 處 爲 知 ,非樂也,忘也。」 富 可 富貴所 人主崇高,奉 ? 命,故不 貴 公浩,公日 樂 凡不 猶 一天下 憂, 而 將 則知其不 「樂道 「顔 移? 樂之,則 季氏 何以以 哂 而 明, 在 巷之 有 子 與 顔 爲 歸 存 至 m 何 此 又

> 國之 後 世之監 潚 也 乎?」聞者歎 而 富 於 周 公。 服 魯 君 用 捨 如 此 非

猶以 貴 是人 得天 貴亦不能 顔子豈樂夫 而 八之所欲 下亦 爲病, 能 范 憂。 日 移矣; 不 此富貴之憂也。」 博施濟衆,修己 陋巷哉? 也 加焉,其所學者道 顔 子之樂,一 夫處貧賤 貧 與 處貧 賤 賤 是人之所惡 以 而 館 安百 能 而 也 瓢 樂,則 不 不 姓, 變, 富 損 與 堯 處 則 0 也 富 富

貴,何以吾之憂樂?」疑♥ 吕曰:「禮義悅心之至,不知貧賤宮

欲 П ,此所謂 也 謝 日 不 與 天下之至樂。 物交,故無 「有所欲, 不 所 於此將 得 欲 所 無 欲 以 不 則 求顔子 得 不 其 所

「瓢」,四庫本作「食」。

樂。」「何以」作「可爲」。「疑」,四庫本作小字「闕」。吕氏曰:「禮樂悅心之至,不知貧賤富貴可爲吾之憂「何以」,明抄本作「可爲」。按《朱子語類》卷三十一引

次?--之用心果何所在,且不可得,而况改其總

動其 心, 游 日 改其樂 :「非樂簞 也。 知其 瓢 哂 巷 所 樂,則 也, 不 知 以 其 貧 不 Ê

w。 賢之。學者知顔淵之所以樂,則可與人德焉? 豈陋巷簞瓢之貧能改之哉? 故夫子焉? 豈陋巷箪瓢之貧能改之哉? 故夫子

衆人之所憂改其樂,故曰賢哉。」 尹曰:「簞瓢陋巷,非有可樂,能不以

也。」子曰"「力不足者,中道而廢。冉有曰"「非不說子之道,力不足

今女畫。」

今汝自止,非力不足也。」不足者,乃中道而自廢耳。所謂力不足者,道,力不足也。夫子告以爲學爲己,未有力道,力不足也。夫子告以爲學爲己,未有力

堯舜之道,行之則是,豈曰不可爲哉?」患力之不足,此丘陵學山,不至於山者也。范曰: 「冉求學於夫子,不能有終而

自畫而已。」
足廢,决不能行。 冉有不行,非力不足也,足廢,决不能行。 冉有不行,非力不足也,

使其知說夫子之道,豈肯畫也?」力,豈有不足者? 其亦未知夫子之道與?不足,其亦未知用力與? 使其知所以用足, 能爲而不欲爲,是之謂畫。以畫爲力是, 能爲而不欲爲,是之謂畫。以畫爲力

蓋求也退,故孔子每進之如此。」楊曰:「今女畫,謂其非力不足也。

求也非力不足也,自止之也。」 尹曰:「力不足者,必中道而廢, 今

人需。」子謂子夏曰:「女爲君子儒,無爲小子謂子夏曰:「女爲君子儒,無爲小

伊川《解》曰:「君子儒爲己,小人儒

爲人。」

此。 子; 意其 以害天理者,皆利也。 殖貨財之謂? 以私滅公,適己自便,凡 人之分,義與 謝曰: 遠 志於利則小,是以謂之小人。君子小 者大者或昧焉,是以夫子語之以 、利之間也。 「志於義 子夏文學雖有餘,而 則大,是以謂之君 然所謂利者,豈必 可

楊曰:「君子小人之分,善利之間而

尹曰 徑,非公事,未嘗至於偃之室也。」 乎?」曰: 武城宰。 「君子儒 有 澹 子曰: 爲己,小人儒 臺 滅 明者,行不 「女得人焉 爲 人。 由

> 者引自一小路歸。 道 便於往來,由之何害?』」 須要回就大路。若此,非中理。若使小 類,不必不由小路。昔一人因送葬回,被僕 否?」曰: 伊 $\|$ 又《語 「只是不正當 解 録》 日 : 已行數里,方覺不是,却 或問 不 處, 由 徑 如 一徑 履 動 是 田 必 疇 小 從 之 路 IE

澹臺滅明以不至 以無人而治乎? 矣,故夫子先以得人爲問。 人 可以無人也,而況天下豈無其人哉? 不召之臣,則君尊而 焉。子游爲武城,得其人,則治 范曰: 「武城之爲邑小,而 偃室爲賢,天下之大必有 故舉武城則天下可知矣。 國重矣。」 夫以 武 未嘗 城 道 斯 無 其 猶 口 腎

徑,非公事,未嘗至於偃之室,亦可以知滅之,如觀水之瀾,可以知其有源也。行不由謝曰:「觀善人者,於小事猶足以知

可見矣。」 觀此,則澹臺滅明簡易正大之情媚悅人: 觀此,則澹臺滅明簡易正大之情公事,未嘗至於偃之室,蓋其意不爲喣濡以明之賢矣。行不由徑,蓋其意無欲速, 非

非孔氏之徒,其孰能知之以爲得人乎?」者,人必以爲迂, 不至其室,人必以爲簡。而不求於人,不能若是也。後世有不由徑人爲問。如澹臺滅明者,非直道而行,正己人爲問。如澹臺滅明者,非直道而行,正己

策其馬,曰: 『非敢後也,馬不進也。』」子曰: 「孟之反不伐,奔而殿,將入門,尹曰: 「行不由徑,動必從正道。」

美。夫子之於人,苟有善必稱焉,取其合於有爭,故以讓爲美, 功必有矜,故以謙爲勝者以先爲功,不勝者以後爲功。凡衆必勝者以:「有功而不伐,唯禹能之。戰

孟之反不伐,則以言以事自揜其功,加於人

一等矣。」

術也。 者,欲上人之心無時而忘,蓋亦未知所 也。」則其於不伐亦誠矣。 滅,天理自明,大道其必得之矣。 於學則已,有志於學,師孟 入門,策其馬,曰: 可以矜己夸人者,皆爲餘事矣。奔而殿,將 謝曰: 擇術之要,莫大於不伐,久之,則凡 「人能操無欲上人心,●人欲自 『非敢後也,馬 之反可也。」 後之學者,無 然不 不進 以 知 擇 學

子稱其不伐,則其功著矣。」 楊曰:「殿而後,而自謂馬不進,故夫

有其功,故稱其不伐也。」 尹曰:「師奔而殿,是難能也,而又不『非敢後,馬不進也」,可謂不伐矣。」 侯曰:「孟之反殿魯之師有功,而曰

●「人」,四庫本無。

理者以教人,●若孟之反可以爲法矣。」

目

「人之不伐、能不自言而

「人心」,和刻本校云:「人心」間疑脫「之」字。

六八

子 美,難乎免於今之世矣。」 日 「不有祝鮀之佞,而 有宋朝之

當衰世,非此難免。」 與宋朝之美,難免今世之害矣。」 又曰: 之令色,難乎免今之世,必見憎疾也。」 祝鮀佞,所謂巧言, 語録》曰: 伊川《解》曰: 「佞,才辯也。不有祝鮀之佞, 「無祝鮀之巧言與宋朝 宋朝美,所謂令色。 又

之哉?」 時人之好佞也。 之令色,而無鮀之巧言,猶難於當世,此 范曰: 「祝鮀口柔,宋 人君豈可不以佞爲戒而遠 朝 面 柔。 有朝 疾

患。」 吕曰 0 「惟巧言令色可以免今世之

吕曰:

出

而

不能不由户,則

미

行

而

世之治亂者 謝 日 如 「蓋惡直醜正,衰世之風,善觀 此

給 相 傾, 楊 日 非巧言令色以取容說,難乎其 世衰道微 ,遊談之世,方 以 免 辯

> 矣。 尹曰: 侯 言此 日 蓋 傷之也。」 「而字疑爲不字。」 無鮀之巧言與朝之令色,難

免乎今之世,必見憎疾矣。」 子曰: 「誰能出不由户? 何莫由

斯

道也?」

必由其道 伊川《解》曰: ,猶出入之必由户也。」 「道不可須臾 離 也 事

知出 之而 必 人皆知出必由户,而不知行必由道。 由道,則無非僻不正之心矣。」 必由户,則無穿窬由徑之行矣, 范曰: 不 知 者凡 「行必由道,如出 民 也,知而 由之者賢 入必 人也。 由 蓋由 知行 户。

0 非 達道也哉?」 氏註 可 行 日 而非達道」不文。 出而不能 不由户, 按《朱子語類

哉?」則「可」作「何」。

則何

行而 》卷三十

非

道也

二引吕

寞矣。」 際,果可以離人乎哉? 仁義,或絶滅倫類,然後人始疑道爲虚無 可 離 也。 謝 日 近在父子夫婦之間,視聽 . 「道之得名,以其人由之 自異端 起,或搥提 食 而 息 寂 不

耳。 乎? 楊曰: 猶之出必由户也, 「道 無適 m 百 非也 姓日用 , 孰 不 而 由 不 知 斯

文質彬彬,然後君子。」子曰:「質勝文則野,文勝質則史。

正如此也。」 又《語録》曰:「史乃《周官》『府宜也。」 又《語録》曰:「史乃《周官》『府宜也。」 又《語録》曰:「史乃《周官》『府宜也。」 又《語録》曰:「君子之道,文質得其

范曰: 「凡史之事,皆文勝質者也。

不野不史,然後謂之君子。」也。庶人之在官者亦曰史,則與野人異矣。矣,何以文爲? 故野拎髮史,●文質之反於文而已,無取於質也。野人則曰質而已失其義,陳其數者,史也。國有史記,亦主

質猶文也,則其容僬僬可以爲君子矣, 僬; 於自然,見於面,盎於背,施於四體者也,此 於史,其惟君子然後能文質彬彬乎? 之理。欲直情則不免於野,欲修容則不免 然而皆不君子者,蓋德不足,必無文質相稱 日文猶質 謝曰: 君子攝以威儀,故其容多濟濟。 也,則其容濟濟可以爲君子矣。 「禮不下庶人、故其容 多焦 此 如 發 如

●「拎」,原本存疑,明抄本此句作「故野於史」,則「拎」

觀 人之大要。」

野。」 矣,雖有文,將安施乎? 以 勝 可 文, 受采也, 以 相 楊 則有其質矣,猶之甘可以受和,白 日 勝,故文質彬彬,然後君子。 「文猶質也,質 文勝 m 至於滅質,則 然則與其史也,寧 猶 文也 其 然質之 本亡 可

子文質得其宜。」 尹 日 「史,文勝而 理 不 足 也。 唯 君

子曰: 免。」 「人之生也直,罔之生也 幸 而

(生者,幸而免。) 明道曰: 生理本 直。 罔,不 直 也, 而

也; 亦 伊 川《 | 罔而免者,幸耳。」 解 **>** 日 8 人 類 之 生, 以

直

道

也; 也。」 横渠曰: 直其生者,非幸 「生直 理 福 順 則 於 回, 吉 則 凶 免 莫 難 非 於 正

苟

幸。」 殆。 此豈 也。 罔之也。 罔 也; 則 其性 范曰 結繩 生 衣服 罔, 暗,故學而不思則罔,思 無 以 哉? 在 罔 躬 佃以漁亦 知 則 「人之性善,故其 而 也 爲惡 不能明於善也。 不知其名爲罔,愚之至也, 生於鄙 將 日罔, 無不至,其 詐之心,非人道 以 生 禽 直。 直則生明, 魚 而 能 無 不 直 學 免 知 則 誠 而

於世 網 無常者也。」 3 吕 E 無 常之人,其免也幸 「凡人之生,直道 而行,足以 而 尼。 图 免 如

所 作,不見非於明, 好 不直者,不惟 安佚恬愉,此其 也。 共惡也,此 謝 人無 日 一 不 其不死 内 「順 焦 所 理 不見 慊 以 勞 於理 爲直 能 於 亦幸矣。」 責於 生 IMI 天 義 氣 妣 亦 於罔 則 地 其 仰 神 天 地 則 m. 人 不 神人 不 愧 之 氣 直, 所 俯 亦 將 不 共

於」,傳經堂本、和刻本並作「與」,公善堂本作「也」。

也。

理,故能 盡 生之經,與直養之直同。 「直者,循 理之謂 也,),惟 至於姦 其 循

則去直也遠矣。」

者也。 則心得其正矣,以乞醯證父爲直,不得其正 之生也直,是以君子無所往 之道焉,其生也,幸免而已。」 不助長,故其生也直。不誠無物則罔 也有素矣。」 楊曰: 古人於幼子嘗示無誑,所以養其直 「人者,盡人道者也,不益生, 而 又曰: 「人 不用直。直 了,有死

幸 而 尹曰: 免,謂得免者幸也。」 「直,性也, 罔,失性者也。

子曰: 不如樂之者。」 「知之者不如好之者,好之者

則己 造道 者也 物 道曰: 耳。 好之者如 然只 「篤信好學、未如自得之樂。 能信道,亦是人之難能 遊它人之園 囿,樂之者

> 也; 理? 之?」 又《語録》曰: 之,則爲己之所有。」 底事,果能造次顛沛必於是,豈有 必求之,求之必得之。 伊川《解》曰: 好之者,雖篤而未能有之, 又曰: 「知之者,在彼而 古人此箇學,是終身 一非 「知之必好之,好之 : 有 所得,安 我 不得之 至於樂 能 知之

已也,故不知手之舞之,足之蹈之。」樂者, 天下之至和也。」 語成矣。孟子曰: 者不如樂之深也; 范曰: 「知之者不如好之篤也,好之 學至於樂之,而後可以 『樂則生矣,生則惡 म

183

不可已也。」 日日: 「知之則不惑,好之則勉,樂則

之者; 者; 楊曰: 謝 至於樂,則無欣厭取捨,性於是矣。」 日 好之者,未必 「夫婦之愚,可以與知焉, 知 有是理,未必爲,故不如好 無 所厭,故 不如樂之 則

七

--

好樂之辨也。」至也, 好之矣,必心有得焉而後樂。此知之非難矣, 知之而不能期月守者,好之不

也。一者,好而未得也, 樂之者,有所得而安之者,好而未得也, 樂之者,有所得而安之善,好曰:「知之者,知有是道也, 好之

明道曰。「上知高遠之事,非中人以人以下,不可以語上也。」

下所可告,蓋踰涯分也。」

而已乎? 曰: 亦有可進之道也。」以下,此謂才也。然則中人以下者,終於此入也?」 又《語録》曰:「中人以上,中人伊川《解》曰:「才卑而語之高,安能

語上,由學與不學故也。」以語上,一人之性善,有可以語上,有不可以以語上,中人以下,可入於下愚,故不可以語上,一中人以上,可入於上智,故可

.益。」 語其操術淺深。蓋未足以及之者,語之語其操術淺深。蓋未足以及之者,語之。 謝曰:「此論上下之分,非不移之品,

無

特

尹曰:「才卑而語之高,未有能喻者不失人言,唯知者能之。」 楊曰:「有中人上下者,氣禀異也。

「仁者先難而後獲,可謂仁矣。」神而遠之,可謂知矣。」問仁。曰:樊遲問知。子曰:「務民之義,敬鬼

先事後得之義也,仁之事也。」 遠之,所以不瀆也,知之事也。 項梁立義帝,謂從民望者是也。 祀以求福 而褻之者,蓋惑也,故有非其鬼而祭之,淫 之聚之,所惡勿施爾也。 先難,克己也。」 明道曰: 知者則敬而遠之。」 「民之所宜者務之,所欲 又曰: 人之所以近鬼神 「務民之義,如 先難後獲, 敬鬼神而 又曰: 與

行 浪 日: 又不 說 神 録 知 可 不 擇日之事 惑 而 以 人之賢,知者安可 「亦未 知 遠之。 信 也 知 不 所 ? 西 不信。」「然則 也 鬼 行,有 こ、又問 亦 敬 難 能 伊 又却 是也。 說 神之道, 盡 鬼 Ш 爲 敬。 所以爲知。」 行忌太白之類。 到 則 , 今人信者必惑 神當 先, 民 如此 解 初 是 人 且人多敬鬼神者只是惑,遠者 能 行 不 亦 在 丽 敬佛 敬 日 敬 深遠 日 佛當敬乎 然 知 不 東 「今人奉 也 忌,次 慢 能 也 後 9 計 方居, 者惑, , 也 處。 遠, 所 親 能 能 不遠, ? 務人之義, 又曰 獲,仁也 而 敬 從 日便不忌,次 ?! 日 不 可 不敬 不成都 求之, 佛 如 且大綱説當敬 能 至 百 謂 : 太 則 信 如 莫 遠 姓 「只此二句, 知矣。」日 白 佛者只是孟 至於瀆。 者 陰 : 是 否?」目 則 之 不 在 亦 陽 知 惑 「佛是胡 所 非 得 八卜筮 西 是 也。 否? 又《 知 義 方 日 西 孟 也 不 向 不 不 . 敬 鬼 語 浪

> 鬼神 偶 獲 成 中 不 也 ,如利仁 者 亦 衝 耳。」 太 勞 矣 白 也 是也。 如 ? 又曰 行 .遇風 如 : 古人惟 使 雨之類。 太白 有 爲 知 爲 大抵 爲 而作者,皆先 一人爲之, 人多記 一而已, 其 則

皆先獲

也

難 而 而 明,敬而遠之,所以 後 已 獲者,所以育德 范 務民 之義,所 君子之所 也 以 明民 振 有 民 事 也; 也 惟 振 鬼 者 神 民 幽 育 難 德 M

行所 仁之實。 吕曰: 知 憚 ,所難 「當務爲急,不求所 爲。 此樊 遲 可 難 進 知 於 知 斑 力

時 不 非 敬 有 易之謂。 志 淺 鬼 ,可以見仁焉。」 ,若跣之視地 近 神 謝 者 日 而 遠之, 所 其 可窺,是以 務民 心 知 不 ,若臨 鬼神之情狀 之義 ·易,其 謂之知 深 知 岩若 必有獲矣,於此 以 履 義 也 薄 爲 難 皆 利 如 兩 者 射 其 者 也 之 皆

之得 問 樊遲 也。 日 : : 知 故問仁以先難後獲告之。」 學稼 以 無 继 楊 是告之。 明異 Ż 禮之近 訒 \Box 圃 乎? 死 . 域, 而 民 知 人情者非其至。」蓋惡 務之 致 而 仁者其言也訒,爲之難, 則 者 死 致 不 事 之, 親焉,知者 可易爲 知 而 已, 知者不 義 非 也,在熟之而 而 義 不 不爲 爲 也。 去 也 也,故 是 《記 っ 又 其 也 褻

爲先,而不計其所獲,仁也。」鬼神當欽者,親而求之,則非知也。以所難鬼神當欽者,親而求之,則非知也。以所難尹曰:「能從百姓之所義者,知也。

動,仁者靜。知者樂,仁者壽。」子曰:「知者樂水,仁者樂山。知者

於運 言其體也。 Ш 一之定 又《語録 動 伊 一",若 川《 止 解 水之流 知者樂,凡運用 日 知者得其樂,仁者安其常 日 通 樂水樂山 仁者樂於安靜, 處皆樂 好 ,與夫動 也 知 靜 者 也。」 樂 如

> 言之? 仁,如· 合。」 壽 形容之。」 樂,靜則自壽。 仁如山之安。 以 則 人之身,統 靜 有四 而 壽 肢。 又曰: 動靜,仁知之體也 非體 而 言之,則只謂之身, 可 又曰: 樂 以 知之深者,不能 兼 山樂水, 知 知如 知 不 水之流 氣 口 動 别 類 則 以 如 此 自 m 兼 相

靜則能 者 其 安於 德 也。 范曰 久 所 故壽。 止 故樂 知 者運 非 山 深 而 於仁 不 動 息,故 則 知者,不能 能 和, 樂 水 故樂; 形容

世,庸 壽 言 L 其效。 吕 非 日 壽 : 乎? 精義 Ш 水言 入神,庸 I 其體 非 樂 動 乎? 靜 言 其 澤及 用 樂

水 不 同 知 所 必有 也 謝 以 日 不 所偏 . 内 同 有所 也。 故其 感, 知 以 合謂之聖。 斯 趨 其 外 向 動 有 各 所樂 是 異 以 則其 自 此 周 非 樂 成 :聖人, 功 而 Ш 樂 亦 不

物,是以 名之、蓋其所樂有不存焉者矣、況壽乎?」 無所不樂也,動亦靜,靜亦動,仁知不足以 用,故樂; 以 其 動 行靜, 以盡 以 是以 |其性,故壽。若夫無樂也, 其 成 獨 己,是 立 圃 不改。 以 靜。 以 以 其 得 其 成

孰

享國皆可長久。 性,可以保身,可以養生,可以 逐 也。」 一末,不忘本,不逐僞以喪真,不殘生以 游曰: 「仁者安仁,得於所性之妙,不 若堯舜文王,皆度越百 盡年,故享年 歲 傷

莫得而 利,故動; ,●故壽。 楊曰: 攖 焉, 安,故靜。 故樂; 利之故 樂水,安之故樂 批 靜 則 大 郤,導大窾 復, 則 與 天 ~; 物 Ш 爲

靜 也 也。 ,猶山之安靜 尹曰: 知, 動 得 也 其樂者知也,得 ,猶水之通流 其常

0

子曰: 齊一 變, 至 於魯

至於 道。」

日 弑君,無君臣 俗尚權詐,急衣食。 在, 不之魯,太公亦未嘗之齊。 學天性。此只說風俗,若謂聖賢,則周 尼居之,當時風俗亦甚美。 修廢舉墜而已, 之遺法變易盡矣,故一變乃能至魯。 制,齊由桓公之霸,爲從簡尚功之治,太公 不以爲齊勝魯也 又《語録》曰: 愈於齊國,故 伊川《解 「言魯國 \approx 上下之分也。不然。」 日 雖衰,而君臣父子之大 可一變而 一變則至於先王之道也。」 「齊經管仲霸政之後, 魯之風俗不如此,又仲 |? 然魯猶存周公之法 「夫子之時,齊彊魯弱 至於道。」 又謂 至漢尚言 齊 經 魯之 公自 魯則 倫 田 猶 常 風 又

性,與 命,復命曰常」有 則 「命」字。 八天爲 傳經堂本作「性」,則「性」字連上讀, 按王弼注《老子》「歸 「静則復命」之語。 則 根日 静,是 作「静則復 則 復 疑

横 渠 曰 魯政 之 弊, 御 法 者 非

而 己。 齊因 管仲,遂并壞其法,故必 再 其 而 人

後 至於道

典法存焉,可舉而措之,一變而 子之於魯乎?」 「如有用我者,期月而已可也。」魯有周公之 其變也易。 人之所 變,可 范曰 難也。 '使如 齊一 齊 孟子以齊王猶反手也,況夫 變,可 魯有太公周公之餘化,故 周 公之有道也。 使如魯之治時 至道,●非聖 子曰: 也

周 禮 ,故幾於道。」 吕曰: 齊政雖修,未能用禮; 魯 秉

故 先 不 其 王 同 ,人存而 氣 隆 謝 日 骨 禮義者多矣。至於魯,獨以弱守國, 齊自管仲之後,與 有近於王道,而況 政 舉, 「齊魯之異,非 變可以 晉楚爭霸,而 至於道 周公之典籍 周 公太公遺 矣。」 不 猶 法 化

游

日

齊

雖

彊

大

,經威公一變而

爲

之道 高然 三則猶. 則 王 在。 丕變矣。 道 不 有王者作,取 復 存 焉 魯 雖 法於魯, 削 弱 則 而 文武 周 公

霸

焉 存者,未嘗變亂。 之法盡矣; 至於魯而已,魯一變則至道 尹曰: 楊曰: 齊更管仲, 魯雖 「魯雖失道 齊自管仲用霸 則 故齊一變至於魯,魯一變 日廢墜,周公之法而 其法併亡矣。 ,而周公之法 道, 變亂 故齊 尚 太 猶 有 公 存

也。 而 子日 失 伊川《解》 觚之 其 故 君 臣 爲器,不得 之職 而 「觚不觚, 失其君之道,則 日 則 爲 觚 觚哉 其 虚 丽 法 位 失其 1 制 "; 則 觚哉 爲君 (形制 又《語 非 不 觚 君 則 録》 也。 非

臣

日

觚

0

至於道也。」

至」下,四庫本有「於」字。

趙桓諱。 庫本作「桓」。 原本作「威」、蓋避宋欽宗

舉一器,而天下之物莫不皆然,天下之事亦

猶是也。」

吕曰: 「名失其實,非特在觚。」

楊曰:「名者人治之大,故孔子爲衛,禮,非義之義,雖禮非禮也,雖義非義也。」者一不中節,雖賢者猶爲過之。則非禮之也,器不合度,尚何觚之可名哉? 猶學也,器不合度,尚何觚之可名哉? 猶學謝曰:「觚之所以爲觚者,以其合度

如是而已。」
君必盡君道,爲臣必盡臣道。推之事物,亦君必盡君道,爲臣必盡臣道。推之事物,亦尹曰:「觚之不觚,不得爲觚矣,猶爲

以

正名爲先。

觚

而

不觚

,則何爲哉?

焉」,其從之也?」子曰:「何爲其然宰我問曰:「仁者,雖告之曰「井有仁

也,不可罔也。」也,不可陷也,可

欺

道。」 陷以 罔。 而 從之否? 子曰: 非 明道曰: 其所履; 又曰: 「宰我言如井有仁者, 「言可使之往,不可陷 可欺以其方,難罔以 『君子可使之往 非其 當 下 可

知,可欺以其方,不可罔以非其道。」謂不然,君子可使之有往,不可陷之於不難,雖告之以赴井爲仁,亦從之乎? 夫子難,雖

子産是 也,而 可 子以爲不然,君子可見不善則去,可逝而 告之以井有仁焉,其將入井而 我信道不篤,憂爲仁陷害 欺以其方,不可陷以非其道,如校人之欺 范曰: 不可使爲不 也。 **豈以井有仁而遂從之乎**? 「宰我以爲仁者唯善之從,或 ·義,入井則陷於非義 ,而不知孝子仁人 從之與? 也 去

之乎?」之於不義,雖君父之命亦不從也,豈得而罔

口 施 也,君子可 仁術 欺之以可救,不可罔之使必救。」 吕日 也。 往以思救,不能自陷 己已自陷,仁將何 「井 有 馬,猶 言 施 自 以 投 行 當 陷 是時 救; 穽 以

者之用心,則信乎仁者之難知也。」所爲,正不如是。宰我親炙於聖人,尚疑仁不信也, 可陷可罔,則是不知也。仁者之不信也, 可陷可罔,則是不知也。仁者之謝曰:「不可逝不可欺,則是逆詐億

君子可使有往,不可陷以不知, 可欺以其之以赴井爲仁,亦從之乎? 夫子謂不然,不信,則疑若可陷也,故宰我以是問之。」 楊曰:「君子之於人,●不逆詐,不億

可以弗畔矣夫。」 子曰。「君子博學於文,約之以禮,亦

不可罔以非其道

之次也 約我以 己。 者 由 必 於規 也。 至 多聞擇其善者而從之,多見而識之,知 於 明 汗 禮,欲罷不能。」是已知之而進不止 ,與此相近。顏淵曰:『博我以文**,** 矩 道 漫。 也,未及知之也,止可以不 日 所謂: 博學於文,而 約之以禮者,能守禮 不 約之以 一畔道 而

道, 聖人最切當處。 則是淺近說 於文,約之以禮,與此同否?」曰:「這 謂,約是使之知要也。]又問: 人,只此兩字。博是博學多識 之,將以反 之以文,而後約之以禮,所謂博學 「博我以文,約我以禮。」曰: 亦 伊川《解》 可 以 說 弗 言多見聞 約 違 曰:「博學而 也。 畔 聖人教人,只是如此, 於道 博 與約 而能 矣。 相對 約束以禮 守禮,雖 、多聞 「此是顔 君 或 子博 聖 而 問 多見之 詳 既 子 未 簡 知

「人」,四庫本作「仁」。

遠。 守也 禮 者 知 知之次 顔 未 也。 之次 成 子 能 ,所學: 多識 否 知 如多聞擇其善者而 可以弗 也 也 「? 三 曰 渞 多聞擇其善者而從之,多見而識之, 又曰 於夫子之謂 ,以勉中人之學也。」 前 庶 言往 聞 畔 幾 : 見 矣 可 與 「亦未 行 大,此 「君子博學於文,約之以 以 知之甚異,此只是 而 弗 也。 能 畔 從之,多見而識之, 是小成, 非 不 又問: 於 自 犯 道 非 得 也,勉 禮 去知道 此 「此莫 者 爾,非 聞 而 甚 是 見

故可使不得畔而去。」 横渠曰:「博文約禮,由至著入至簡,

之以禮 農夫之無 於道 寡聞 范 『,則不 而 日 則 己。 疆 無 場也,其不人於異端邪說 至於流矣。」夫如 約也。 博學於文,而不約之以禮 楊雄 日 學文者莫不 _ 多 是 聞 僅可 ·欲博,能 則 守 之以 者 以 酒 約 不

> 道 約 也雖未深造,亦可以弗畔於道 禮 ,非其至者,然 吕 日 貴 在 造 人事莫非當 約 愈 約 愈 深 博 故 於 文

也。 業 知約 統; 然 蓋 由 不 事 此 猶 業故有文, 由 謝 道 反而 知約 日 舉 博 知 而 求之一 而 而 四 徑 措 不 旁 知 知博,則失於 欲 由 之 而 博 身,則 取 理 天 識 而 下, 約者, 義故有禮 中 不 央 有 則有 也,故 知約,則 不 恐不 無徵。 可二之理義 不可 其 可 免 禮 以 失 於 窮之事 由 雖 弗畔 邪 於 博 遁 無 而

不 或 出 畔 矣 ; 於大防, 楊 日 : 約之以禮,所以 則弗畔矣。」 「博學於文,不知所以 裁之趨 裁之 於 中, 則 而

以

「予所否者,天厭之! 天厭之!」子見南子,子路不說,夫子矢之曰:

一七九

禮也, 禮也 也 否。」 得 也。 我至此者,天命 予所 者,天厭之! 日 如是,蓋天厭之,猶天喪予也。」)與? m 君行道,反以非禮見迫,歎曰: ? 人,使見夫子,夫子 拒之? 子路不悦,故夫子矢之曰: 南子之欲見孔子,亦其善心 不得已之故,而謂之曰 伊 以 邦必見其 子路以夫子之被 「子見南子,子路不悅,以孔子本以 而必曰天厭之乎? 然子 又曰: ĬII 否則安得 否塞者,天厭 使 孔 解 路不悅, 天厭 日 「孔子之見南子,禮當見之 寡小君,則孔子之見南子, 面 也。 不歸之天厭之哉?」 得 之!」否,音乃泰 孔子 志, 之! 矢,陳也。」 南 雖 强 不 子 則 也 何以不告之日是 願 非 曰: 放不 斯 天厭之!」言使 見, 正 人 吾道之否塞 也,聖· 者 道 悅。 安能 「予所 又《語 衛 之將 何 又曰: 君 不否之 所 一人豈 拒 以 容 興 否 見 之 爲

孔子見,於是時豈得不見?」之禮。靈公以妾爲夫人,既以夫人處之,使曰:「見所不見。古者大饗,夫人有見賓

也。 則禮 也。 天 以 子路未達,故不悅。 厭之者,棄絶之也。 禮告也,直誓之 予所否者,有不合於禮不由其道也。 南子以不正聞 范曰 當見之,既以 「古者仕於其國,必 於諸侯、夫子以事 而已,所以 爲君、豈以 夫子以子路之野,不 責之使深思 略 見 其 小 禮哉? 衛君, 可

所 所 以不 以 天厭乎吾道也。 不遇。 吕 悅, 日 孔子以爲使我 小君禮 「道之不行,天實厭之,此 所當 矢,陳也。」 見,南 不得賢 子無德,子路 小 君 聖人

「者」,四庫本無。

八〇

悅哉 以 我之所否者,非人也,天之所厭者, 有際 夫子,是以不說。 爲 故於子路不悅也,直其 非 謝 可之仕,至於此,則行道 禮 曰 樂天而已矣。」 . 在 見見 子 南子,在 路之意獨 孟子嘗謂 當 不然,直 時 理 夫子於 君臣宣 之 而 意 語 其 之日 胡爲不 衛 以 淫 亦 靈 爲 Ē 公 浼

?

之也; 矣。 孔 然當是之時,窮爲旅人,不得 衛 中,則失所謂 如之何 寡小君,則孔子安得而不見? 不見 處 否 厭之也 子 靈公之妾,以 使孔子而得位,則 而亨之道。衛人以爲過吾國者必 而 楊 E : 可 否則 以見之乎? 「子見南子,包承者也,此 子路 無 孔子而得位, 包承者矣。」 妾爲妻,五霸之所 可爲之時 不說,包羞者 以 子路所 ,則天實厭之,人 妾爲妻者固 固將正之也。 又曰: 加 以不說 也、蓋 正之者,天 不容,況 「南子, 則亂 過乎 將 見吾 大人 E 羣

> 寡 衛之人皆以爲 包承小人吉,此大人處否而亨之道也。」 小君 則 孔子安得 小君 而 而謂 不 過吾國 見之? 者必見吾 否之時,

正,而 予也。」 曰 : 也,故不悅。 見,安能 尹 吾道之否塞如是, 衛君以爲夫人,使見夫子,夫子 曰: 拒之乎? 夫子爲陳不得已之故,而 臣 聞 師 子路 程 蓋天厭之,猶天 頤 以 日 夫子 「南子 爲 被 响

願

子曰: 民鮮久 人矣。」 「中庸之爲德也, 其至矣乎

行,鮮 其道者也 合中庸 「中庸 伊川《解》曰: 之爲德,民 有 一,可 中 謂 庸 至矣。 之德 不 ·可須 也。 一中庸 自 世 教衰,民不興 又《語 天下之至 、民鮮有久行 理, 日

也 范曰 君子之行,不爲過 「中庸者 則爲 無 過 與 不 及。 不及 夫 而 可 常

也 而 不 鮮 舜 矣。」 能 及 故 中庸 也 是 以 明 爲 不 八平 難,民言鮮能者,人皆 山 中庸之道,則 常,此道之所 人皆 以 不 可 有 明 以 是 不 德 爲 行

以 爲 所 之爲德也 至。 也,是鮮久矣。」或問 則 自 渦 待 處 不 謂 爲 口 人所常 及,上 吕曰: 者常過 過,未至乎中則爲 己 人皆日予知,擇 爲 極 楊 謝 中中 也 日 也 曰: 則],極有] ,其至矣乎!』何 行 庸 焉 如 中不可爲,是以 而 所 ; 之 則 「夫道 中不 中 以 以 屋之極 爲 何?」曰: 不能至者,不 庸 其 處 過 止於中而 可 者 人, 所賤者事 乎中庸 過, 一,所 不及也,故以 或或 孔 經 如 者 此 民鮮能久矣。」 是以 處 也 德 「高 而 日 子 則 則 ?! 曰: 達 能 已矣, 君親 至矣。 不 日 是聖賢 道,人 謂 久 明 能 之至 「高 而 也, 則 期 (中庸 過乎中 下是 中庸 中庸 月 所 明所 至 所 而 以 守 共 可 爲

> 異也。 高明 賢 爲 極。 中 高 婦之愚所與 乎行止疾徐之間,非 以 爲 常失之過,道終不明不 而 巾 堯舜之道,孝悌 聖人 至。 高 明 也,百姓特日用 不 而 及 明 而 屋 高 亦 以 夫中 以 不道 中 乎 極 夫道若大路,行之則至,故 猶 明者中庸之體 出 高明處己,中 高 亦 庸 所 乎中 中庸,則賢智之過也, 知 謂 明 析 也者,道之至極,故中 謂 者,雖 爲 之極,以其 則 至 則 圃 二致,非 而 也。 過, 愚不肖之不 已矣。」其爲孝弟 不 舜、顔不 有 中 知耳 未至則不 甚高難能之事 行,與愚 庸 待 庸者 中 又曰 知中 而 能 高 及 、則聖人 庸 高 離 不肖者 ·及,故 明之用 故 此 孟 者 也 又謂 道 子 而 也 道 也 小皆夫 乃 止 處 唯 日 無 世 中 在 儒 之 以 己 庸 中 於 以 極

《易》之《恒》曰: 識 得 中, 侯 日 則 手 動 民 足 不 履 『君子立不易方。』恒、久 能 無 識 非 中, 中者 故鮮 故 能 能 久; 久

也。聖人得中,故能常久而不易。」

守也,故曰民鮮能久矣。」庸,可謂至矣。人知擇乎中庸,而不能期月,可謂至矣。人知擇乎中庸,而不能期月,可問。「中庸天下之正理,德合乎中

莫非己也, 認得爲己, 何所不 己,自不與己相干,如手足不仁,氣已不貫 此言最善名狀 明道 何如 仁? 子貢曰: 夫仁者,己欲立而立人,已 ? 日 能近 也聖乎? 可謂仁乎?」子曰 取 「如有博施於民 「醫書 譬,可謂仁之方也已。」 仁者以 以手足痿 天 堯舜其 地 至? 萬 . 而 物 痹 欲 猶 「何 爲 爲不仁, 若不屬 達 病 而 諸 事於 體, ? 達

也。

違道不遠是也。」

日: 豈不盡仁? 已。使人求之自反,便見得 衆,非聖人不能 近 及 仁者,立人達人,能近 取 此 譬 「以己及物,仁也, 博 反 施 分身之 濟 然教人不得 衆 ,何干仁事? 謂 乃 也。 功 用 取譬,可謂仁之方也 也 如 又 推 也。 此 日 故特曰: 己以及物, 指殺。」 又 雖然,聖人 曰 博 施 恕 濟 能 又 夫

者豈 故 食肉 曰 : 至,惟聖人能盡仁道。 衆,堯舜猶病 日 乃 也, 食 也 非聖人之所欲? 語》有二處 伊川《解》曰: 「恕者爲仁之方也。」 惟 肉 ,然其所養有所不膽,此 患 何 一者,聖人之心非不 事 力 其難 於 不 說堯舜其 能及 仁? 也。 耳。 博 然仁可通上下而言 然 必 聖人濟物之心 施,厚 圃 猶 也 聖人者,人倫 五十乃衣帛, 欲少者 病 聖乎?」 又《語録》曰 施 諸 病施 也, 夫博 之不 亦 博 衣 無 而 之 博 施 又 窮 及 七

皆不屬己。

故

博施

濟衆,乃聖人之功用

仁至難言,故止

日

:

己欲立而

立人,己欲

令如

是觀仁,可

以得仁之體。」

又

日

施

濟

衆,云

必也聖乎者,

調

不

足

圃

達人。

能

近

取臂,

可謂仁之方也

四

被 則 仁不足以盡之?」曰:「既謂之博 姓,亦猶是也。」 過 窮,聖人必欲使天 者,猶難之也。 濟衆亦仁也,愛人亦仁 推 也 其 病 無 其所,然亦不能,故曰 大小,至於仁,兼上下大小而言之, 吾 此 也 九 諸 州者, 澤 盡 治已 以求,修己以安百姓,則爲病可知。 然 濟 博 濟衆,仁者無窮意。」 遠 也 衆 施 所 日 者 足,則 濟 近 治 聖人之心非 與聖 豈 堯舜之治,非不 有 衆,則是聖矣。」 有 非 間 博則 聖 所 何 便 聖 或問 ,勢或不能 下 人之心, 不及,此病 以異?」曰: 不 人 無 廣 是 之 圃 一人之惡,無 也。 「病諸。 不欲四海之外 所欲 聖 無極,衆則多 何 博 欲 堯舜其猶 又曰: 及 時 濟之不衆 ? 施 修己以 也。 四 或問 加 濟衆 海 然 己? 施 人只見 之外皆 ,堯舜 以 又曰 而 濟衆, 何故 安百 博 亦兼 此 物 聖則 而 病 治 也。 其 施 苟 觀 諸 不 無 不

謂 欲立 也。」 方也 道。」 或一 也。 乎? 則 也。 不識仁,只以 大抵盡仁 曰仁 孔 仁,則吾豈敢」,此又却是仁 濟衆問 丽 不足以盡之,故曰必 使 聖大。 子言[何 自 事是 之方也 已」,何也?」「蓋若 既通 而立人,己 而已,此通上下言之也。 聖人,人倫 又曰: 得之以爲仁也。」 得 又曰: 殊不. 來事 道即是聖人,非聖人 人理之極,更不可有 仁,亦可謂之仁,至於盡 事 可 己。 所言爲仁也,故 於仁? 以通上下言之也, 知此言是孔子見子 大,故曰 欲達而達人。能 「孔子語仁,而 「方,道 之至。 博 施 圃 必 也聖乎?」 何止於仁? 也 能 倫, 也 便 __ 濟 聖 以 又 理 衆, 一與聖 乎」, 日 爲仁 但言仁之方, 如日 日可謂 則不能 也 又曰 加。 固 近 聖 責 便 取譬, 俱大也 仁道, 「若聖與 「方,術 又曰 則 若今人 則 問 必 謂 也, 反 盡 其 也 博 使 極 亦 施 極

譬是也 於仁? 於民 各自 博 濟 聖惟恐所及不遠不廣,四海之治也,孰若兼 公平,公平固在,用意更有淺深,只要 不濟事,亦須實見得近 木乃仁也,龍乃聖也,指木爲 爲能盡仁,然仁在事,不可以爲聖。」又問: · 堯舜其猶病諸, 果乎?」曰: 「此子貢未識仁,故測度而設問也。 立人達人,爲仁之方,强恕求仁莫近,言 聖乃仁之成德,謂仁爲聖,譬由 海之外亦治 施 也 天 地 濟 而 體認得。」 事大,故仁不足以名之。」 能 爲一身,而天地之間 衆乃聖之事 力行,學之近乎仁 必也 濟 衆, 又曰: 聖 乎? 可謂仁乎?」子曰: 或問: 乎?」仁聖何 事,舉仁 是 剛毅木訥,質之近乎 嘗以 處。 一而言之,則能近 「子貢曰 也。 ,品物萬形爲 其 爲病也。 龍 理 若夫至仁, 别? 可 雕 「誠然也。 固 乎? 木爲 又 曰: 惟聖人 不 博施 「何事 自 博 出 曰 龍, 加 得 取 故 施 平

及人,乃其方

也。

必欲

博施

濟

衆,擴

之

天

横渠曰:

「仁道有本,近譬諸身,

推

以

風 仲 支離 哉 肢 故 而 己。 也。 ? 而何 頑 尼 百 謂 所 多端而求之自外乎? 體, 聖人之至仁, ? 之四體 以示子貢爲仁之方 夫手足在我,而疾痛 夫人 世之忍心無恩者,其自棄亦若是 豈 不仁,爲其疾痛 有 獨 視 能 四 體 肢 也。 故能近取譬者, 是 不與 百 心 體 不以累 而 知焉,非 書謂 而 不 愛者 其 手足

聖之任,言能以天下之民爲己任 尹曰 乃 及,乃可爲博施, 也 衆者,人無所不濟也。 下,施之無窮,必有聖 可 爲濟衆 范曰: 夫自以爲不足,則將 「一夫不獲, 博施 此雖 億兆之衆,無 者 時 堯舜 人之才能弘其 ,德無所不施 普天之下,無幽遠不 予之辜。」孟子以爲 有餘,伊尹任之, 亦 病 未 一夫不獲。 而思濟之 能 也; 道 也。 伊 濟

聖之事。 故 天 夫仁者也。」 以 地 爲 也 辜 夫學者以大爲小,以 堯舜性之,故以 子貢 、疑此 未 盡 於仁, 爲 病 小爲大,皆 而 此 不 所 知 以 乃 未 參

教 子貢有志於仁,徒 濟衆,乃聖人之事,堯 衆,聖之事也。苟非 方,雖博施濟衆,亦由 以 於己取之,庶 吕 博施 事高遠,未 近 其 於民,仁之事 此 舜猶 而 人,道不虚行。 進。」 可 人,是乃爲 病,非子貢 知其方,孔子 3 所及。 博施 能 濟

方所 立 日 特不 之名不於此得也。 而 草 而 識仁,並於聖而不識也。故夫子 立 謝 「必也 木蕃 已。 日 人,己欲達 鮮 知方所 聖乎?」又 「博施 可以 而 子貢直以聖爲仁, 濟衆,亦仁之功用, 知天地之心矣。」 斯可 達 人,亦非仁也,仁之 舉仁之方也。 以 知仁 一,猶觀 語 己 則 天 欲 地 之 非

楊

堯舜之仁不徧愛,急親

賢

而

衆乎? 矣。 之, 己。 民如承大祭。」則所謂 仁。一仲弓問仁,則曰 謂是哉? 仁之方,使知所趨也,由是而求之,斯得 雖堯舜不 故 顔 天下之廣,人物之衆, 我欲仁,斯仁 淵 觀孔子 問 能不 仁, 所以 以 則 : 爲 三至矣。 仁者,何事於 티 : 告其門人,其義可 病 一出 也。 「克己復禮 門如見大賓, 故又告之以 而欲博 君子之仁, 博 施 施 而 爲 爲 知 濟 使

仁? 之仁,亦可謂之仁,至於盡仁之道,亦不 施 過九州,若此之類,病於濟之不能衆也 之治,非不欲四海之外皆被其澤,然其治 可 贍,若此之類,病 人非不欲少者衣 以 濟 尹 曰: 通上下而言,聖則其 衆,堯舜 也 聖乎?」非 「五十者衣帛、七十者食肉、 猶 病 其 帛食肉也,然於養有所不 其 施 難 之 故曰: 小 不 (極也。 能博 而聖大也,蓋 也 今有 一何 聖人 事 於 博

矣。」

一八七

或 朝諸老先生論語精義卷第四上

述 而 第 七

子曰: 我老彭 「述而不作,信而好古,竊比於

川 解》 Ĕ.

則 而 皆述也。信聖人不欺後世,故能好古,不信 好之,自比 述而不作,聖人不得位,止能述而 已矣。 不能好也。 竊比於我老彭,所以尊古人,言不 於 「夫子之於六經,未嘗有作焉, 堯舜稽古,亦述 老 也。」 「傳述而不作,信古 又《 而已矣,亦信 語 己。」 而

> 於人哉 其矜己 必其則古昔稱先王以名世者。」 於老彭耳。 作之殊。時 夫子謂二三子之意,以 謝 而 日 造異也。 亦述而不作,信而 彭之爲人,不可考其 有古有今,至於道,則無古今之 事有 述 其義若曰 有作,至於道 爲 好古,竊自 我既聖矣、恐 誰 我何 何, , 則 以 無

齊桓 《春秋》所爲作也。故曰《春秋》天子之事 前此未之有,謂之作者以 三者加損焉,蓋亦述之而 後《春秋》作。」然則孔子亦有作 子曰: 『王者之迹熄而《詩》亡、《詩》亡然 自比之者,述而不作,信而好古而已。 春秋之時、《詩》非盡亡也。 國風》,則《雅》之詩亡矣。《雅》亡則 晉文,其文則史,其義則竊取之,於是 楊曰: 「孔子於我老彭不同道, 已矣。」 是。 《黍 然而 離》降 . 與? 其 (無政, 티 : 而 圃 爲 孟 竊

尹曰: 老彭不可考也,蓋信古 而 傳

者皆老彭之事,故孔子取之。」

我始也。

人君豈可不以先王爲法哉?」

日日:

老

聃、

彭

祖,殷周之老成人。

作者云耳。」述者也。孔子亦然,信古而傳述之,不敢當

倦,何有於我哉?」子曰:「默而識之,學而不厭,誨人不

也。」 終日,不違如愚,退 學也,惟顏子能之,故孔子曰: 仁也 也。 省其在己者,亦足以 ,可謂善學者也。」 者也 子 伊 川《 仁且智,夫子既聖矣。」以仁智而 貢 又《語 日 解》 何 録》曰: 有於 日 「學不厭,智也 而省其私。」言顔子退 我 「默識 發此,故仲尼知其不 哉 「默而識之,乃 而 勉人學當 無 『吾與 厭 倦者,有 教不倦。 所謂 如 是 而 言

子自以爲有之。」 而 識 不倦,仁也: 之者,不言而喻也; 范 日 「聖人之於言,皆不得已。 三者皆進 德 學不 而 厭 不 智也 已,故夫 默

吕曰:「默識所以存諸心,學不厭所

之道也。我之道舍是三者,復何所有?」以成諸己,誨不倦所以成諸人,合内外物我

與道 暇 有 默 誨 罪其掠美攘善,特哀其德之棄也。 己與道未免爲二物也。 而 識之。 發於言語之間哉? 所 不倦,子貢常論之矣。」 而 見所聞或終身誦之者,可謂 契,譬猶以水投水,方且滿意 識之,猶曰默 謝 日 有書諸紳者矣,非默 「識非知識之識,乃誌識之識 而 不忘也。 此道聽塗說 至於 默 蓋 而 而 好 識 人 學不厭 之於道 自 識之,神 之 ,聖人不 矣,非默 1得, 何

也。 也。」 能 及者, 楊曰: 仁且 智, 學而一 則既聖矣,是乃 默而識之,蓋有言意之所不 不厭 智也 誨 所 人不倦,仁 以爲 夫子

以 德之序也; 教 人,孰 尹 日 能若孔子者哉 充而至之,則聖人矣。 默 識 而 心 通 ? 一,力學 則 而 而 效之,人 日新, 何

於我,是以勉學者云耳。

能徙,不善不能改,是吾憂也。」子曰:「德之不修,學之不講,聞義不

伊川《解》曰:「憂如是,則德日新

以爲人法也。」明,徙義以崇德,改過以修慝,憂此四者,所明,徙義以崇德,改過以修慝,憂此四者,所范曰:「德必修而後進,學必講而後

哉 ? 棄矣。 道。言道易,惟講學然後 教,聖人有憂之」,其意同 不能徙,與不聞同。 憂也與? 孟子所謂『飽食煖衣,佚居而無 謝曰: 聖人則以爲終於此而已,此非聖人 此四者,自衆人觀之,亦豈 「見道易,惟修德然後可以 不善不能改,則安於 可 以 明 道 爲 顯 聞 之 過 自 得 義

> 乎? 明,見善能徙,改過不吝: 要 也。 尹 苟未能至之,聖人猶憂之,況學者 日 德 必 修 而 後 成 此 四者,日 學 必 講 新之 而 後

嚴厲。 不慢,可否?」曰: 氣。」或問: 亦著此四字不得。 皆弟子善形容聖人處也。 夭,温裕之貌。」 又《語録》曰:「申申 盡,故更著夭夭字。 和樂中有中正氣象,夭夭是舒泰氣象。 伊川《解》曰: 子之燕居,申申如也,夭夭如也。 嚴厲時著此四字不得,怠惰 「人之燕居,形氣怠惰,● 除非聖人便自有中和之 今人不怠惰放肆,必 「申申,和適之貌, 「安有箕踞而 爲申申字說 心不 放 肆 而 慢 不 太 夭

膏》紫卜乀乍「薑」。「氣」當作「體」。按"《二程

足以行之,則難於進德矣。

是宜憂也。」

之不講,則

無

明善

明

乎

善

2矣,而

勇不

0

楊曰:

「德之不修,則無以誠

身,

九〇

敬,不可令拘迫 ? 趸 其 吕 儼 與 然 叔 危 來 拘拘 坐 緱 迫 氏 可 則 謂 閒 難 敦 居 久矣。」 篤 中 矣。 ', 0 學者 某 嘗 須 窺

惟敬 進 也 德 與 而 申以言其體,夭以言其心。 范 不已也。」 和 日 而 E 中 在外則敬,在内則和 申, 舒遲 也 君子之行, 夭夭, 一此以 和

夭,屈而不失其和,皆温舒之貌。」 吕曰:「申申,舒而不至於倨, 夭

形 時,是以其色夭夭。 容之時, 三子無 蓋 謝 周旋 目 時 是 不觀 以 「善觀 中禮者,必其盛德之至,是 其 省於斯焉。 容 申 聖人者,可以得 此之謂中節。」 申 燕居 非 踧 非鞠 踖 屏 之 躬 於儀 氣之 如 以 不

愉 也 燕居 不 「申 爲容 申 , 其 色,故 容舒 如 是。 也,夭夭, 蓋其 其 廣 色.

體胖,而形諸外者自爾也。

裕之貌。」 申,和適之貌, 夭夭,

温

夢見周公。」 子曰: 「甚矣吾衰也! 久矣吾不

復

如 忘; 者,心無老少之異; 所 人與衆人夢如何,夢是 不復夢見周公。」因 日 故孔子曰: 行周公之道; 著 何?」曰: 或 日 事善,夜夢見之無害乎?」曰: 伊川《解》曰: 及晚年不遇,哲人將萎之時,故 「孔子初欲行周公之道,至夢 「人心所繫著之事,則夜見於夢 『吾衰也久矣。』」 又《語録》 『此誠 及其老也,志慮衰矣。 此 -「夫子盛時, 意 行道者,身老則衰矣。 說 何物。 所感,故形於夢。」 夢 便 『高宗夢 미 致 寤 思, 寐 寐 /傅說 雖是 思 自 常 謂 聖 不

「閒」,原作「問」,今據傳經堂本、公善堂本、和刻本及 「閒」,原作「問」,今據傳經堂本、公善堂本、和刻本及

0

事,公下力之。 儿事 可长关,

問 衰 周 害,捨此 調夢 孔子昔嘗夢寐 何?」曰 相 聖人無夢乎?」曰: 應。 事 公之道, 知周道 見周 則 心 聖人 聖人 成夢 亦 公, 之不 妄 故雖 夢 此 動 固 岁,或不 動。」 異於此 大 嘗 也 間 聖 可行,不復夢見也。」 夢 0 段 ... 人 日 夢 凡 害 見周公乎?」曰: 思 周 存 . 寐 ,高宗夢傅說 事 事, 公、後不復思耳。 而 「有。 誠 不忘 有 夢, 即 孔子夢 處 兆 夫衆 非 亦 也 朕 周 是舊習 聖人。」 見 人 人 夢 周 真 H 欲 及既 者 有 有 公 氣 日 行 傅 類 所 或 加 無

地 m 一、欲不 周公。 之化,縱心而不 横渠 也。 踰矩也,不願 縦 E 故曰 心 莫如 一吾衰也 無 ·踰矩, 意 夢。 乎外 我 人矣。 固 見 老 也, 必, 周 而 安死, 公、志 順之至也,老 然 後 也。 然後 範 車 不 不 天 說

在傅巖

也

范曰: 「吾衰者,老將至而道不行

之乎? 如周 也 公之盛,復夢見 又 閔時之不 日 . 孔 復 子 興 猶 習 也 不 周 可 公, 得 蓋 丽 況 常 於 欲 目 天 覩 下

乎? 也。 也。 事 復夢見周 故於吾道之衰,不必言明王不興,特曰 後無意於經世,則其不復夢見周公,不 息,不以愛身而自 ,夢寐以之。 何以 豈 謝 然非聖人之私意 曰 惟 公。 知天之無意於斯文? 以 此 聖人 知 及 天 鳳 佚 開物成務,誠不厭, 心? 鳥 也。 ,蓋天之無意於 不 至,河 聖人亦自 故孔子於 不出 觀 聖人 東周 「考也。 圖 吾 亦 斯 健 可 之 宜 文

與盛 見不 或形 甚矣吾衰也 於夢 時異矣。 可 楊曰: 復,況欲 寐 方其 道不 以其身親爲之乎? 久矣吾不復夢見周公。」則 盛 行,天下 時, 思 欲 無 爲 可 周 爲者, 公之事, 故 日

尹曰:「夫子有意於當世,常欲興周

日

志

所存,據所執,依所行,游

歎曰不復夢見周公也。」 公之治, 及其志不能就,以至於衰老,故

子曰: 「志於道、據於德、依於仁、游

於藝。」

其中。」 也,在己者可以據。依於仁者,凡所行 有理,精微要妙 著於仁,兼内外而言之也。」 伊川《解》曰 又《語録》曰: 無 窮,當志之耳。 「學者當如是, 「志於道 凡 德者 游 物 必 泳 依 得 皆 於

存,故曰游。」
「藝者,日爲之分義也。涉而不有,過而不仁,則小者可游而不失和矣。」 又曰:
 横渠曰:「志道則進,據者不止矣,依

明於此四者,則可謂善學者矣。」也,故依之, 藝者,可以廣業也,故游之。德者,得於身也,故據之, 仁者,無不愛恋曰。「道不可須臾離也,故志之,

所養。」

之遊。」 之不害爲小人,故時出而習之。 顛沛造次不離也。 譬履地,有方所矣; 謝 志道 曰) 譬則 志 戴天,舉 於道,志 藝,無之不害爲君子,有 依於仁,猶魚之依水, 目 無 猶 不 言 在 游如覊遊 趨 向 闕 非

也。 大常。 無 其固萬物莫足以傾之; 無思也,惟精也 志於道之效也。據於德者,止其所 念念不忘,則將有以宅心矣。 偏,此道之大中, 游曰: 自得於己,無待於外,則有以勝物,而 堯授舜,舜授禹,至於允執 「志於道者,念念不忘於道 ,無爲也,惟一也。 惟一則無變,此道之 獨立不懼,而其守 宅心於道者, 厥中,則 而自 惟 得 則

向在道, 小人非盡不善,然趨向非道。」作: 「志於道,志猶言趨向也。君子有時不善,然趨此句原本「趨向」與「非道」間有脫文。明抄本全句

九四

不違仁 言依 何; 不可 德 也。 乎天 威武 息,無時 所 也 以 世 mi 知 足矣, 須臾離也。 地之 不能 所依矣。 莫得 又不足 君子依乎中庸,亦若是 體 德者,地也 人而 此者也。 夫者,妻之天也,而妻依之,不 孟子所謂「富貴不能淫,貧賤 ,則依於仁之效也。 義,宜 道 至於遊於藝,則所以閑邪 丽 間 以 屈し 也。 違 非 不仁,如 易之, 於 謂 仁也。 此 以其仁 猶之父者,子之天也,而 則據於德之效 依於仁、出 倚一 義 依者,違之反 故 ,故言據; 者也; 則 乎? 日 樂何?」是故君子 所 一而已; 偏 仁者,人也,人之成 據 也。 道 之 人而 禮,體 人起居,視聽 依於仁,所 地 而 孰 仁者,人 已,爲· 也。 也 不然,則 미 謂 天也 不仁, 了,顏子 謂 此 三月 也。 之闕 據於 不 者 中 得 也, 能 故 依 三月 不 如 也 以 皇 庸 而 子 且 移 故 淖 禮 ; 皇 於 成 之 依 位 食 久 違

> 子常示 内志 焉。 何 内外,交進而 是 無 是 游於樂,所以遵其 六藝之正乎? 何 無所用心,則心之放 奕固惡矣,而其惡止於博奕。 「不有博奕者 志於 \equiv 非 加 患 舞勺,成童 而 所 《傳》曰 於弗克哉? 得 已,是皆操心之術也。 學者,庸詎知大人不失赤子之心,不 而 不 道 平? 至 無誑,六歲學方名,十年學幼 直外體 苟 哉? 未 故 舞 不遺 乎 至 也。 游 故游於禮 是以聖人寧取 象,以至於 ? 於 張 於藝,所以守仁也。 和 御也, 縱 則於宅心而 爲之猶賢乎已?」夫 而 也 逸 心 不 ; 弛, 文 熱焦火 ,所以防其躁 則 書也,數也, 灑 游於射,所 先王之 必 埽 於博 若飽 武 有 應 執厥中,亦 而寒凝 息 不 對 時 奕 食終日 遊 能 進 ,自幼 儀, 也 亦若 以 之 也 也。」 博 Œ 況

且久矣」、《游廌山集》此句作「可謂之悠且久矣」。 可謂之且久矣」,原有脫文,明抄本此句作

0

者,對 於游 必於藝焉,所以閑 也 **臾離也蓋** 則 據於德 違之稱,依於仁, 縱 如是。」 而 則 至於放者 所 於 其内也。 居 道 而 有矣,故君子之游, 則 則無 安者 心 夫道之不可須 之所 違 無 仁也。 非 之 德 無 也。 。人之 非 道

游者,涉而不有,過而不存。」之,依仁以居之,若夫藝,則游之而已。尹曰:「志道以致之,據德以行

焉。」 「自行束修以上,吾未嘗無誨

以 既以與人己愈有,既以分人己愈多,成 者、未嘗無誨焉。 成己也。」 范曰: 「夫子誨人不倦, 老子曰: 聖 苟 人 能 不 以 人所 禮 積。 見

嘗不教之。」 見之禮皆然。言及我門者,苟以是心至,未見之禮皆然。言及我門者,苟以是心至,未

楊曰:「苟以是心至,斯受之而已,故

不倦也。」

子曰:「不憤不啟,不悱不發。與尹曰:「苟以禮,來者無不敎也。」

隅不以三隅反,則不復也。」

不發。 固; 教人,惟指其非,故曰: 却須且爲它說, 之,思而不得,然後爲它說便好。 徹,久將理來低看了。」 往而知來者,則其知已深遠矣。」 反,則不復也。」言三隅,舉其近,若夫告諸 人好問之心。」 語學者以 明 待憤悱 道 蓋 日 不待 所 而 見 憤悱而發,則 後發,則沛然矣。 「孔子教人,不憤不啟,不悱 未 又曰: 不然,非獨它不曉,恐止 到之理,不惟 「舉一隅不以三隅 「學要自得,古人 知之不 所得 學者深 若初學, 又曰 能 不 深 思 堅

待其誠至而後告也。舉一隅不以三隅反,伊川《解》曰。「不憤不啟,不悱不發,

一九六

則 意 不 復 見於辭色也。」 也 旣 告之, 必 待 其 自 得 也 憤 悱

是也。」 五 **悱之類是也**; 「有成德者」,「有達材者」,「有答問 必 也 自 勇,悱則其慮也深,因 得矣。 范 有 日 如 「夫子之學,猶 孟子曰、君子之所以 時 『有私淑艾者』,舉一隅之類 雨 化之者」, 顔 而啟發之,則 發 憤 忘 子 食, 是 者」,憤 教者 也 其 則 進

言。」 「憤者不得於心,悱者不得於

以其心 能啟 隅之理 隅亦 謝 不識 不在焉故也。 非不 不以三隅反,豈惟 矣,語之無益。 一非 欲發也, 不 欲啟 識一隅,必無 要之不悱則不能發。 也,要之不憤則不 復 不能 如 推類、蓋 有 復 不 於王 識 雖

楊曰:「善教人者,使人繼其志,欲其

自得之,故如是。」

告耳。以三隅反者,通類之謂也。」其誠至而後告之,告之,必待其自得,乃復尹曰:「憤悱,誠意見於辭色者。待

子食於有喪者之側,未嘗飽也。子於。以三隅反者,通類之謂也。」

者在側,豈能甘也?」
伊川《解》曰:「食甘美則飫飽,有喪是日哭,則不歌。

也。哭與歌不同,不惟恤人,亦所以自養也。哭與歌不同,不惟恤人,亦所以自養則不歌,哀樂不可以無常,無常非所以養心則不歌,哀樂不可以無常,無常非所以養心更不以教人,所以使民相愛也。子於是日哭, 並曰:「此所依於仁也, ●故聖人推其

謝曰:「於此可以見聖人情性之正

結,此句以「仁心也」結,蓋串行脫文。一字。按"二十一字約合一行之數,上句以「仁也」之類所以異於禽獸而不相害者,以其有仁心也」二十一所」下,明抄本有「謂」字。「也」下,明抄本尚有「凡人

生者故 歌 也 過 其哀不變者,使其終日之間其哀不變,●亦 耳。」 而 飽 臨 不 能 化矣,蓋其他感物而樂亦有之,特不 識 也。聖人哀樂中節,未有終日之間 喪哀也; 聖人之情 是日 性, 然 哭則不歌 後 可 以 學 哭 道 非 謂

他也。」 楊曰:「方匍匐救之,而飽食於其側, 是樂也,故哭則不歌。於此見聖人忠厚之 是與一,故食未嘗飽, 異 是一,故學,因,故食未嘗飽, 異 是一,故學則不歌,哀樂不相襲也。」

唯我與爾有是夫。」 子謂頗淵曰。「用之則行,舍之則藏,

合, 不加焉, .用之則行,舍之則 」者也。 卷之 明道 雖 則 日 行藏何累於己?」 窮居不損焉,不爲堯存,不 退 藏 「《中庸》之言, 於密。 藏。』君子所性 孔子 謂 放之 顔 雖 淵 則 爲 大 日 彌 行

> 曰: 於 益於得而不求者,非能不求者也。」 命,故言必曰命,然而安之不以 所 伊 遇 安於遇者,命不足道也。 川 者 解 也 **>** 日 或 用 舍 然 無 則 所 命。 知 預 君 命 於己,安 子知 知 矣 求 有

所謂 遇 而 與 道,ۅ然後窮居獨善,不見知而不悔、《中庸 見,無道則隱,君子疾没世而 悔,與聖者同 有是夫。 有 爾 懷居不可以爲士,必也去無道就有道 有是夫。」 惟聖者能之。 道 横渠曰: 而 顔子龍德 貧 且 能。 「用則行,舍則藏,惟 1賤,君 仲尼所以獨許顏淵惟我 而 又曰: 隱,遯世不 子恥之。 「天下有 名不稱 舉天下 見 知 我 蓋 道 而 與 無 則 不

^{●「}使」,原本字跡漫漶難辨,四庫本作「若」, 傳經

書本並作「無」,今據補。
● 「無」,原爲墨釘,四庫本、傳經堂本、公善堂本、紫陽

所 同 楊 天 日 下 文明 樂 ,則孔子而已矣。」 則 行之, 憂 則 違 之, 孔 顔 之

子必與己,故夫子抑而教之。 也。 子路 伊川《解》曰: 日: 必也 日 「暴虎)臨事 馮 子 河,死 而懼,好謀 行 「子路自 三軍 而 無悔者,吾不 則 負其 而成者也。」 誰 與? (勇,謂 夫 子

也。」 也。 意 甚於匹夫矣,故每言必抑之,凡勇者皆 河 其 ,然君子有 范曰 臨 必與己也。 事 而 懼 勇 「仲由好勇,故以行三軍 丽 好謀 由之勇雖不至 無義爲亂 而成,此 放其 勇而 一於暴 害 能 F 爲問 虎馮 怯 也又 不 者 與

也。 同 也 妄。」 臨 吕 事 Ħ 可 以 : 「用之則行,舍之則 m 仕 懼 則 則 仕 備必豫, 可以 止 則止 好謀 孔 藏, m 子所 孔 成,則 顔 所 獨

謝曰:「聖人於行藏之間,無意無必,

乎? 謂。」 其行 於行三軍乎? 夫子 夫位 在聖人豈有不 而 之分者也。 不 -藏,是 言臨事 不謀不成,不懼必敗,雖小事尚然,況 慕夫禄而有利心 非 至謂子行三軍則 貪位 以惟 其 而懼,好謀而成, 至有欲心者,不用而 正乎? 蓋懼特慎 心有所恐懼,則 藏 П 非 可 獨 與於此。 也,然勇也,能 善 誰 I,始 與,其 特因其失而救 可 子路雖 謂 論益卑矣。 不 求行, 而不忽之 真 得 無 知 其 舍之 非 固 物 貪 必 我

故問 勇而 子行 無禮 楊曰: ,非所以 軍則 「子路以孔子行藏 誰 行 與 三軍 ? 也,故孔子以是退 意 其 與己 與顔 也 氏 同,

子必以與己也。 之。子路負其 遇,命不足道也 尹 日 勇 用 謂 故抑之曰: 舍 惟顏子幾於聖人,故 無 子行三 與 於己,行 軍 搏 則 虎 誰 藏 而 與,意孔 因 涉 亦能 其 河 所

死而不悔,如是之勇,吾不與也。」

亦爲之"如不可求,從吾所好。」子曰"「富而可求也,雖執鞭之士,吾

得乃有命,是求無益於得也。」亦爲之,不憚執卑以求富,求之有道也。然亦爲之,不憚執卑以求富,求之有道也。然

而已矣。可違道以求富也哉?」也,而況其上者乎? 如不以其道,則從志惡富哉?● 苟以道得之,雖執鞭之士可爲惡言哉?「富,人所欲也,聖人其欲貧而

惟得之有命,故無心於求。」
日曰:「居卑居貧,君子有時而願爲,

惟夫子真知其不可求也,是以從吾所好。」謝曰: 「天下之人,徒能言富不可求,

其在天,無可爲之道也。」 楊曰:「君子非惡富貴而不求也,

以

義,則在外者也,故從吾所好。」 尹曰:「可求者,義在我故也,

非

子之所慎。 齊,戰,疾

之事爲多矣,能察知所慎,善觀聖人矣。」伊川《解》曰:「三者夫子所重慎。人

養己之功,無過於疾。」之至,莫先於齊, 用人之先,無慎於戰;之至,莫先於齊, 用人之先,無慎於戰; 目曰:「三者,神、人、己而已。事神

交鬼神,誠則有,不誠則無。戰與疾,如臨謝曰: 「以誠敬維持之謂慎。齊所以

■ 「其」,傳經堂本作「豈」。

深履薄,如何不慎?」

於是? 命, 懼,好謀而成, 蓋其慎之如此。」 疾所以 楊 是故孔子齊必變食, 傷 「齊所以交鬼神,戰所 吾生,君子之所宜慎者 康子饋藥、未達、不敢嘗、 必也臨事 以 孰 用 大 而 民

「不圖爲樂之至於斯也。」子在齊聞《韶》,三月不知肉味,曰:

字。

字 之誤也。 歎其 音 當固滯如此。 不知肉味,當食而聞,忘味之美也。 字,誤分爲二也。 (美也。 伊川《解》曰: 在 齊聞《韶》音。 聖 作三月,則於義爲不可。」聖人不 人所過者化,不應忘味之久 又《語録》曰: 不圖爲樂之至於斯也, 「子在齊 音字分爲三月,傳 「三月本是 聞《韶 三月乃 》,三月 寫 音

斯也。」門人因此記之。」《韶》雖美,直至三月不知肉味者乎? 以聖人聞《韶》音之美,當字誤,當作音字。此聖人聞《韶》音之美,當字誤,當在音三月不知肉味者乎? 三月也。」 又曰:「聖人不凝滯於物,安有聞也。」 又曰:「聖人不凝滯於物,安有聞

圖爲樂之至於斯也。」《史記·世家》有「學之」二之深也。 夫子不意學樂至如是之美,故不加此也,故學之三月,不知肉味,誠之至,感加此也,故學之三月,不知肉味,誠之至,感

則泊然矣。程侍講以三月爲音字。」
月之久,尚時有感於心者,不忘至於踰時,間,無一日之忘,則以幾於固矣。蓋志於累間,無一日之忘,則以幾於固矣。蓋志於累別,無一日之忘,則以幾於固矣。蓋志於累別,以意逆志讀

凰來儀。」蓋前古所無,而後無繼者,則《韶》楊曰:「《書》曰:『《簫韶》九成,●鳳

●「簫」,原作「蕭」,今據傳經堂本改。

財

利,

大者知有權勢,其上乃知有名而

「介甫曰:

「塗之人小者知有

立郢爲太子,曰:

此

靈公命也。」野曰

樂之 謂 之盡善盡美,可 之久也。」 寫之誤也。 至於 「在齊聞《韶》音,音字分而爲三月, 斯 聖人所過者化,不應忘味如是 也,故聞之不 謂至矣。 此夫子所 · 知 肉 味 以 伊 不 傳]1[圖

與輒 師 味,曰不圖爲樂之至於斯,歎其美也 程頤 悔,夫子以爲賢,故知其不與 否乎。 尹曰: 伊 日: 何怨?」出曰: 日 叔齊何人也?」曰: E : 川《解》曰: 有 日 「怨乎?」日: 「諾,吾將問之。」入曰: 仁人讓國 「三月當作音字,傳寫之誤。」」 「子聞《韶》音,當食而忘肉之 「夫子馬 「夫子爲衛君乎? 「夫子不爲也。」 而逃,諫伐 衛君平?」子貢 「求仁而得仁,又 「古之賢人也。」 輒 而 也。」 餓、終無 「伯夷、 臣 問 聞

仁而 之則 知 以 問牛意異。 以爲侈,知權勢之可以爲驕,知聲名之可 名,固民之欲也,先王因民之欲,而節文之 無所德,其不得之無所怨,故孔子曰: 有此三者,知求仁而已。 宋、已而之晉趙氏。靈公怨其出奔也,謂少 則當如此,●非機巧也,與趙廣漢欲問馬 則瞢瞢者豈足悲乎? 之徒,於天下之理晰 爲夸,而莫知仁之可以安且樂也。 子郢曰: 有 禮樂,欲民之仁也。 怨 財 楊曰: 得仁,又何怨乎?」夫財利、權勢、聲 利 也,奪之則怨; 『吾將立若爲後。』靈公卒,夫人 知有名 辭欲巧,亦學者窮理一 衛大子蒯聵得罪於靈公而 也, 毁之則怨。 矣,尚疑伯夷之用心, 然後世知財利之 大意知察言而觀色, 求仁在我,其得之 知有權勢也 伯 事也。」 自子 夷 不知 「求 奔 先 以 可 黜

如」,和刻本校云: 「如」疑爲「知」字誤

受也 其不爲 故國 兄而 叔齊弟 君,宜夫子之不告也。 不 拒之,不得入。夫蒯 之立,正也。 子,子游問諸 義之所不與 夫伯夷、叔 宜若可然,故冉求以爲問。 不宜有衛也。 則世子亡 非其 於其 ,況得罪於其父乎? 人立其中子,而夫子賢之,子貢以是知 讓之,伯夷以爲父命也,不受而 人之子輒 昔者公儀仲 君 也。 衛 大夫,況 「,爲子 加 君 齊,孤竹君 也。 立嫡 父欲立叔齊,而 也。 趙簡子欲立蒯聵, 孔子,孔子曰: 衛人以 在 而不授於其父,而 伯夷 其 孫 何以言之? ,不敢當。」於是衛 國 禮 子之喪,舍其 職得 爲兄、叔齊讓之,猶 君乎? 輒爲 故子貢以 二子也。 也 罪 則蒯 君矣,則 夫君子居是邦, 然則郢之讓, 於 叔齊以伯夷爲 居 蓋爲臣 靈公,出奔, 「否,立孫。」 聵不宜有衛 伯 而衛人以兵 夷齊問之。 衛 孫 有 夷兄 m 其 人 而 逃去, 其 拒之 ൬ 問 立 7 國 也, 弗 不 衛 軱 其 衈

立時 時,聵 賢者立之,乃善。」又問: 疑, 盡。 以夷齊爲問?」曰 國人 者宜 之立 明矣 賢,必待問 世子 父子之争,雖庸 爲善兄弟 書世子所以 故《春秋 伽 夫子爲衛君 以 又與 職得 如何?」曰: 拒之 奈 輒 以父争, 則 何 在 夫人以 》書 郢 蒯 夷 罪 m ? 爲辭 之讓,則 而 何 聵當爲 齊 先君,而 立 趙 罪輒也。 一子貢 去位 後 辭 事 輒 野,則 靈公之命而 鞅 ,其庶幾叔 夫愚婦 知 焉 頗 便 帥 : ? 耶 悪 從 世子故 「伯夷不得罪於先君。」 合 相 「向 自以意對可 師 輒乃 ? 其義 之可 父子之争 避 類,故 而 然則蒯 納 知之矣,而謂 位 失其旨矣。」或 輒 衛世 先 嘗解此 齊之義乎? 也。 兩 也,拒之不 立郢,受之可 亦何自而 君之命,此 伯 以 得矣。 國 子 聵之人,爲輒 問 夷 人 可 蒯 蒯 也 當 也。 擇宗 職未 知 段,亦未 聵于戚 說 初 何 求 立 可 當 者以 若 室 賜 **夫**惡 耶 當爲 其 必 問 也。 也, 是 更 可 輒 ?

浮雲。」
「飯疏食飲水,曲肱而枕之,樂公,孔子賢夷齊,則其不爲衛君也可知矣」。

衆,飲水 何事 實 無 明 事。」 道 曲肱,樂 日 又曰 : 樂 在 其 百官 亦 中。 在 萬 其 中, 務, 萬變皆在人,其 金革 須 知 白 所 萬 樂 Z 者

伊川《解》曰:「雖疏食飲水,不能改

不義而富貴,視之輕如浮雲也。」其樂,故曰樂亦在其中,非樂疏食飲水也。

貴,亦如浮雲,而況不義乎?」無所樂,天下之至樂也。如此,則視義富義水不足以害其樂。然則夫子蓋無所樂也,謝曰:「非樂疏食飲水也,蓋疏食飲

有?! 所不堪者,樂亦在其中矣。 學者能究其所樂, 孟能賤之,則視其去來之輕,真如浮雲耳。 吾身,天下孰加焉? 楊曰: 「天爵之貴,備萬 則不義之富貴,於我乎何 故雖 趙 飯 疏 孟 之富,皆具於 食飲水,人 之所貴,趙

尹曰: 「君子所樂者,非疏食飲水所

也,●故曰如浮雲。」能奪,故云樂在其中矣。不義富貴,非所重

以無大過矣。」 子曰:「加我數年,五十以學《易》,可

《易》 學《易》, 十也。 過矣。 聖人何嘗有過 過,皆謙辭也。」 之類,不能無 日 : 明 索》,則《易》之道可以 也,所以《易》道未明。 更 《易》後 加 我 始能 伊 「加我數年,五十以學《易》,則年未 可 云學,云大過,皆謙辭。」 、數年,至五十以學《易》,《易》道無 孔子未發明《易》道之時,如《八 古之傳《易》, 川《解》曰: 可 以 無 以 無大過矣,此大故失却 ※ 影亂; 過? ? 無 大 問: 如待學《易》後無大過,却 過。 日 「此未贊《易》時言 如《八索》之類 無大過謬。 聖人有作, 旣贊《易》道以黜《八 不知 加我數年,五 先 儒 聖 謂 X 言學 又《語 則《易》道 何 文意。 孔 ~,皆過 + 子 大 與大 索 也 學 以 Ŧ 大

> 時,學《易》者支離,《易》道 學《易》, 過差,《易》之道,惟孔子無大過。」 則學《易》。 曰 俟其贊《易》而後學之,其過鮮矣。」 學《易》者甚衆,其說多過矣。聖人使弟 我數年,五十以學《易》。」期之五十,然後贊 他經,唯《易》未嘗發明,故謂弟子曰 是未學《易》前 《易》道而黜《八索》是也。」 「當孔子時,傳《易》者支離,故言 何 言學者,謙辭。 以 知 嘗 其 有 大 可 八過也。 以 無 不明,仲尼 调 學《易》 又曰: 又 ? 聖 此 人 蓋 以 如 「前此 孔 五 旣 未 加

爲長,今從之。 語解》多襲伊川語,故和刻本、傳經堂本作「重」字於意。 《解》曰:「不義而富貴,視之輕如浮雲也。」尹氏《論本作「樂」,傳經堂本、和刻本並作「重」。按: 伊川重」,原爲墨釘,四庫本作「欲」,公善堂本、紫陽叢書

0

五

十

而知天命,故可以學《易》。

窮

理

盡性

范曰:

「夫子之爲是言,蓋未

五十

也。

「故」,四庫本作「過」,《二程遺書》卷十八作「段」。

乎? 舍己 以 日 也。 至 不 一於命 自 聖人 夫惟過 是故夫子以不善 必 與 故 其 舜 而 可 人同 無 日 以 能 也 改, 無 類 大 不遂其非 予 奚 渦 不 則 而 違 能 聖 汝 無 至 改 於 弼。」 過 人 ", 此 爲憂, 小 也 有 ? 過 庸 调 所 其 以 非 堯 乎 則 爲 调 舜 ? 聖

道 IE 如《八索》者蓋多,待夫子贊 删《詩》定《書》,贊《易》道以 自衛反魯之後乎? 然昔之說《易》,其殽 者言也。 可以大明。 謝 日 「因是 可 以 大無過,指《易》書之害 知正六藝非夫子 黜《 而黜之,然後 八索》,皆其 初 其 圖

學《易》,不敢自以

爲無大過

也。

然後 此 地 者 不 無過。 、欲學者當其可 日 楊 相 曰: 知《易》,然後 似,則 孔子之學《易》,宜不待五十,言 斯 知 爲 性 而不躐等也。」 過 知 可 矣, 以 天, 無 大 然 與《易》爲 過。 後 可 蓋 以 與 天 言

> 道未 過 《易》" • 日加 明。 子所 尹 如《 曰 雅言、《詩》、《書》、執禮、 八索》之類,皆 聖人有作,《易》道 我 、數年」,皆謙之辭 臣聞之 師 程 有 頤 渦 日 明矣。」曰『大 也。 也 ,所以《易》 「古之傳 皆雅

也。

禮人所執別。」「別」,一作「行」。 性 而 識之也 與天 明 道 道 日 則子貢亦不可得 又曰: 雅言,雅 「《詩》、《 素 而 所言也。 聞,蓋要在 書》統言,執 至 默 於

録》曰: 衆, 矣, 《詩》、《 君 如吳楚失於輕,趙魏失 伊 子正 書》、執禮,則必正其言也。」 川《解》 雅、雅素所常言也。」 其 日 甚 者, 「世俗之言,失 不能 八於重。 盡 違 也 旣 Œ 又《 惟 者 通 語 於 多 於

以《詩》、《書》明之,不然則執以禮。其所常雅亦常也。子所雅言者,常言也。每言必蒞曰:「雅,正也,惟正可以爲常,故

言,不出乎此,故曰皆雅言也。」

學《易》」。又曰:『《春秋》,天子之事。』故楊曰:「孔子自謂『加我數年,五十以言也,因記夫子談《易》之語,而以類記之。」謝曰:『《詩》、《書》、執禮,乃聖人之常謝曰:『《詩》、《書》、執禮,乃聖人之常

其語學《易》而類記。」言,必明以《詩》、《書》,或執以禮。弟子因故雅亦素也,雅言者,所常言也。孔子常故雅亦素也,雅言者,正也,惟正可以爲常,尹曰:「雅者,正也,惟正可以爲常,

所雅言、《詩》、《書》、執禮而已。」

食,樂以忘憂,不知老之將至云爾。」曰:「女奚不曰: 其爲人也,發憤忘葉公問孔子於子路,子路不對。子

惟自謂其好學耳。」
一世,以為學之篤耳。聖人未嘗自居於聖人也,發憤至於忘食,自樂能忘其憂,老將至而不於子路。子路以其不知聖人也,故不對。於子路。子路以其不知聖人也,故不對。於子路。子路以其不知聖人也,故問

也。」 謝曰:「發憤忘食,非濟欲者, 樂以 知年數之不足也。要其極,亦無我之事。」 楊曰:「葉公不足以知孔子,必有非 楊曰:「葉公不足以知孔子,必有非 必有因其所問而告之者,亦以發子路之 如年數之不足也。要其極,亦無我之事。」 必有因其所問而告之者,亦以發子路之 如此, 如有數之不足也。要其極,亦無我之事。」

求之者也。」
求之者也。「我非生而知之者,好古,敏以也。孔子所以語之,蓋不自居其聖者而已。」

信? 蓋必有生知者,然未之見也。凡云爲者,先生信乎?」先生曰:「若有,則豈不韓持國謂明道曰:「若有人明得了

學 性 ,存心養性,便是至**言** 皆 爲 此 以 下 論 也。 孟 子 日 盡 心 知

録》曰: 禮 學而 勸 學,然聖人必須學。」 知之,要學否?」曰: 而 出,須是問 如問禮老聃,訪官名於郯子,何害爲 人學 知之,學而知之,才也。」 文官名,既欲知舊物,又不可望空撰 知。 伊川《解》曰: 也。 「生知只是他生自知,理義 縱使孔子是生知,亦何 他先知者始得。」 敏,速也,謂 「非自謂 「生而知之,固不待 汲 或問: 「生而 汲 好 也 又曰 學 害於學? 也,所 孔子 者 又《 不 生 得 ? 待 語 以

或安而 不肖者之不及也。 及其成 或學而知之,或困而知之,及其知之,一也。 『好古,敏以求之』,所以道中 范 功,一 日 行之,或利 也。」此所謂 ~ 《中庸 而行之,或勉强 夫子不自 日 中 庸 「或 以爲生知, 無賢者之過, 庸也。 生 而 而 行之, 知之, 夫生 而

> 以教 而 所 知 也 以 之者,天也 帥 人者,學 3 而已; 學 而知之者 其 在 天者,非所 C, 人也

孔子誠以致學之功,而齊生知之德。」 日曰:「好古敏求,及其知之一也。

不居聖,其意則不讓矣。」學知之異。言我非生而知之云爾,其言則學知之異。言我非生而知之云爾,其言則

己。 也。 以學,使知所謂 敏以 升也 求之者也」。 ,門人如顏淵,猶曰「雖欲從之,末 楊曰: 其循循 故夫子自謂『我非生而知之者,好古, 善誘蓋如 「孔子之聖,猶天之不可階 不可階 蓋不以 是。」 而升,皆可學而 生知自居,而示人 由 也 m

者,非爲勉人也,●蓋生而可知者,義理耳,尹曰:「孔子以生知之聖,每云好學

作「非惟勉人」,則「爲」疑「惟」之誤。

0

二〇八

子不語怪、力、亂、神。若夫禮樂名物,必待學而後能也。」

神之事,皆不以語人也。」伊川《解》曰:「怪異、勇力、悖亂、鬼

未有不入於邪說者也。」以訓也。學者之言及此,則心術不得其正,道也,明庶物,察人倫而已。是四者,不可道也,明庶物,察人倫而已。是四者,不可

怪 怪 ,語神則聞者惑。」 3 則道不中,語力則德不立,語亂 吕曰: 闕力也 「怪,不中也,如素隱 亂,不治; 神,妙 理 則術 行怪之 也 語 不

不語亂,語人而不語神。」聖人語常而不語怪,語德而不語力,語治而聖人語常而不語也,可能治言。「怪,非常也。」蓋

不語 君子樂道人之善,惡言人之惡 亂者,聖人之仁也。 游曰 「夫子語治而不 且語治而已,則是 語 ; 亂, 則 語 何 治 也 m ?

> 戒? 非 美 惡 較 然 明 矣, 何 必 語 亂 而 後 可 以 爲

不語也。」 怪、力、亂、神,敗常亂俗,故

不語,恐惑人也。一尹曰:「怪異、勇力、悖亂、鬼神之事.

子曰:「三人行,必有我師焉,擇皆不語,恐惑人也。」

其

者而從之,其不善者而改之。」

楊曰:「學者何嘗師之有?● 苟可以

也。」 長 可 擇 善而 mi 救失,皆吾師也。 從 7.●不善者 可 省而 故三人行,必 改,是乃 得 有 師 善

吾師也,改之亦吾師故也。」 侯曰: 「雖聖人未嘗無師也,從之固

何?」 「天生德於予,桓魋其如予則善不善者,皆我之師,進義其有窮乎?」則善不善者,皆我之師,進義其有窮乎?」

人極斷置以理。」
又《語録》曰:「天生德於予,便是命。聖事而不懼者,鮮矣。惟聖人爲能安命。」
伊川《解》曰:「人莫不知有命也,臨

德矣,與天合德,則天且不違,況桓魋乎? 謝曰:「天生德於予,是夫子與天合假手於人者,命也。桓魋豈能違天乎?」盡,而後可以言至命。生德於己者,天也,盡可。「人事備,而後可言天, 性道

害,亦天也,故曰其如予何。」然聖人不敢必其不我能害也,使其能爲我

亦天也,桓魋其如予何哉?」 楊曰:「使孔子不免於桓魋之難,是

其如我何? 聖人安命故也。」 尹曰:「天其或者生德於予,則宋司

馬

隱乎爾。吾無行而不與二三子者,是子曰:「二三子以我爲隱乎? 吾無

丘也。」

日: 之。 及之,然後知其高且遠也。 窺見聖人,故告之以無隱也。」 高,則人不尊: 人則異。孔子常俯 孔子不俯 「聖人之道猶天然,門弟子親炙 伊川《解》 就,❷則人不親; 曰: 「孔子之道一也,其 聖賢之分也。二三子不能 而就之,孟子則推 使誠若不可及, 又《語録》 孟 子不 而冀 而 推 高

「善可」。和刻本校云。「善可」間脫「者」字

[「]俯」下,四庫本有「而」字。

0

俯 則 庸下者勉思企及,而 之者,好古,敏以 而 趨 進也。」 就之,日「吾 向 之心 示 幾於 求 無隱乎爾」、「我 之者也」。 怠 才氣高邁者,亦不 乎? 故 非 聖 獨 非 人 一之教 使 生 敢 資 而 質 常 知

惟 隱 恐人以己 范曰: ,欲其皆如己也。」 爲不可及而不學,故告二三子 「夫子之於人,無所不用其極,

m

莫非至教,常以示人,而人自不察。」 「聖人體道無隱,與天象昭

爾。 哉? 道乎?」 婦之 也,二三子特習矣而 間,視 若不與二三子共之,豈所謂 謝曰: 仰觀 俯察,無往 聽 「道在八荒之外,●近在父子 食息之際,雖聖人何得 不察耳,故曰 而 不與二三子共 1吾無 天下之達 隱 而 之 平 隱 夫

所以 與二三子者,甚易知 游曰: 聖 人語: 默 動 而易見也。 靜, 無 非 教者,其 惟其

> 能事 乎盡,孰謂夫子有隱於由乎?」 於死之說,可不 神之道,可以不學而能也。 知生,焉知死?」蓋能 四 之未嘗不言也。子路問 或疑其未嘗言耳。子貢既聞道矣,故知夫子 亦不離於文章也。 高不可測之論,大而 也。」是性與天道,仲尼固嘗言之,曷嘗有 子貢曰: 者,質諸己以實其言也。 之者自不能見 時行焉,百物生焉」。 ·人,焉能事鬼?』「敢問死?」曰: 『夫子之言性與天道,不可得而 ,則以爲有 問問 m 而學者自不能以心契,則 無當不近人情乎? 知 盡人之道 也。 事鬼神,子曰: 聖人亦天而 "隱耳。 故曰 【天何言哉? 告人之道於是 能知生之說, ,●則於事鬼 其 日 是 已矣。 丘 其 聞 也

222

[「]人之道」,傳經堂本作「事人之道」,按: 道 云 道」疑作「遠」,或 「道」下脫

之間 疑若 子者,是丘也。」 有隱焉。 ,夫何隱之有? 楊 8 「君子之道,不出乎 故曰: 而由之者自不知 「吾無行而不與二三 百姓日用 也,

弟子不能窺識,故曰無隱 尹曰: 「聖人作止語默,無非教也,恐 爾。

子以四教: 文、行、忠、信。

忠,存於中之謂孚,見於事之謂信。」 忠信也。 伊川《解》曰:「教人以學文修行 忠信本也,一心之謂誠,盡心之謂 ?而存

成則 爲能 忠信内也,教者必自外人,而文未嘗不先 日文、行、忠、信。」 行,行有餘力,則以學文。 范曰: 文所以成始,亦所以成終也。故舉其 「學者之序,必主於忠信,而後 文行外也,

謝曰: 楊曰: 文也,行也,忠信也。」 「教止於此 「博之以文,約之以禮,立之以 四 事。 其實三事

> 忠信, 使知所以進德。 教者之事,孰大於

是?

尹曰:

四者皆可以入德。」

子曰: 見君子者,斯可矣。」子曰: 而見之矣, 「聖人,吾不得而見之矣, 「善人,吾

難乎有恒矣。」

矣。

亡而爲有,虚而爲盈,約而爲泰,

, 得見有恒者,斯可

不得

處約 常分者也; 者,志於仁而無惡。」 善人,良善之人也。 横渠曰: 而爲泰,則妄人也,難謂之有常矣。」 伊川《解》曰: 若實無 「有常者,不貳其心, 「才德出衆,謂之君子。 而 有常、雖無 爲有 以以 善,而守其 虚 而 爲盈,

室,然則君子之次也。世衰 者,善人之次也。 范曰:「君子者,聖人之次也, 善人不踐 亂,則無 迹,亦不 入於 恒 有常

亡而爲有,故不學,

虚

而

爲盈,故

_

也。一受, 約而爲泰,故無度。此所以不能有恒受, 約而爲泰,故無度。此所以不能有恒

度,而 之體 善人不踐 耐 謝 所以不見善人,思見有恒者。」 不敢以亡而爲有,虚 未化。所以 迹,可 「聖人大而 以 制行。 不見 且化,君子得 聖人,思見君子。 有恒者 而爲盈,約 不越 循 聖 而爲 法 人

《易》曰 然後 仁無成 也。 不得而見之,得見君子斯可矣。然君子 公, 而已矣,何可久也? 通謂之六君子,則君子者,聖賢之通 對聖人之言,●則君子其次也。 可 『難乎有恒矣。』」 與爲 名,仁聖皆孔子所 曰 故善人不 『恒,久也。』以亡爲有,終亦必亡 善,苟無恒 「《禮運》自 可得而 虚也、約也亦然。 心,放僻邪侈,無不 見,思見有 禹湯文武 不居也。 成 有恒 故聖 恒 王 非 110 周 稱

尹曰:「猶言不得中行而與之,思其

次也。」

子釣而不綱,七不射宿

伊川《解》曰:「聖人之仁,不盡物,不

驚衆也。」

不遺焉。」
弗爲,是以小惡爲無傷而無去也,故一物而此所謂造次必於是也。若以小善爲無益而此所謂造次必於是也。若以小善爲無益而

取物之多, 不射宿者,不欲陰中物。」」 謝曰:「袁思正說:『不綱者,惡其

聖人不爲也。記此,餘固可知也。」 弋有時而爲之。然盡物取之,出其不意,亦 楊曰:「魯人獵較,孔子亦獵較,則釣

可知。」
不射宿,不欲暴物也。推是心以往,其大者不射宿,不欲暴物也。推是心以往,其大者,于曰:「釣而不綱,不欲盡物也, 弋

子曰:「蓋有不知而作之者,我無是

也。多聞,擇其善者而從之, 多見而

識之,知之次也。」

人作事皆不知,惟聖人無不知者。」可以次於知之者也。」 又《語録》曰:「凡之,若能多聞擇善而從,多見而記識之,亦聖人固無所不知也, 在衆人,雖未能知聖人固無所不知也, 不知而作,妄作也。 伊川《解》曰:「不知而作,妄作也。

不知者耳。」 又曰:「見而識其善,而未果於行,愈於也,妄也,夫子所不取也,故曰我無是也。」 横渠曰:「世有不知而作之者,蓋鑿

知之道也。」
 知之道也。多聞而擇之,多見而識之,指學者以致也。多聞而擇之,多見而識之,指學者以致人亦若是而已矣。故不知而妄作者,無有人亦若是而已矣。故不知而妄作者,無有

者目之所及,聞者知所不見,從者敏於行,之學,雖曰未達,而所行所知未悖於道。見日曰:「不知而作,不免乎狂。聞見

其序也。」
於心。聞廣於見,從愈於識,識愈於知,此識者識之心而將行,知者明之而已,亦不失

故爲知之次。 作之者與? 故曰我無是也。 知之至,然與夫不知而作者蓋 擇其善者而從之,多見能 物,物格而后 楊曰: 「孔子述而 知至,多聞多見 夫不知而後 不作,況 識 有妄作,多聞 之,雖未足以 亦有間 未足以 夫致知 有 不 矣。」 與此 在 知 爲 能 格 而

不善者而改之,次欲知其道者也。」是也。」雖未知其道,若能擇善者而從之,其知其道而作之者,妄也,故孔子曰:『我無知其道而後可作,蓋不尹曰:「事必知其道而後可作,蓋不

「與其進也,不與其退也,唯何甚? 人互鄉難與言,童子見,門人惑。子曰:

潔己 以進,與其潔也,不保其往也。」

物之弘也。」 當與其潔也,豈保其往而不善乎。聖人待 不善也,拒絶之,則太甚矣。 者,皆習使之然也。 互鄉之童子來,而門人 難 怪之,子曰: 與言善者也。今四方之俗,有頑惡 伊 ,川《解》曰 與其進也之志善,不與 「互鄉之人、習於不善 人潔己而來, 難治 退 而

於 新其 帝猶不絶也,而況於聖人乎? 「雖有惡人、齋戒沐浴、則可以事上帝。」上 童子能 夫子猶 八德者 范曰:「聖人嘉善而矜 以禮見者乎?」 ,必與之進,雖惡人不絶 欲與 之 加 不 拒 也。 不能。 是以 孟 也,而況 子 能 互鄉之 E 改 而

生與之 蓋 生長 |人苟有潔己之心以進,亦可與也,豈保其 者抗禮之意,此門人所以惑 謝 日 進 則 進,不與之 童子委贊而 進則 退, 退, 蓋本 庸 也。 何 無 .傷? 然先 與 先

> 異 日 弗 畔 哉?

人何 也。 至,斯受之矣,於互鄉 始學之事也。 鄉 然人潔己以進,則與其潔,苟以 所 楊曰: 難 與言,童子見,在始學者不能 不容?」則裕乎此矣,況孔 「可者與之,其不可者拒之,蓋 子張曰: 又何擇焉?」 「我之大賢 子乎? (與,於 是 不 1 惑

互

之,則已甚矣。 其進之志善,不與其退 安可保其往也?」 善者也。童子見,門人惑,故夫子曰: 尹曰: 「互鄉之人,習於不善,難 人潔己以來,當與其潔也, 而 不善也,若絶拒 與言

子曰: 矣。」 「仁遠乎哉? 我欲仁,斯仁至

未有力不足者也。」

伊川《解》曰

爲仁由己,欲之則

己,故不遠,欲之則至矣,行之則是也。不 范曰 : 「仁者,性之所 有 也。 爲仁由

求之己 |而求之外,則遠矣。|

謝 目 「我未見力不足者,我欲仁,仁

至矣。」 楊曰:

矣。」 尹 日 爲仁· 爲仁由己,欲之則至,何 由己, 則我欲仁,斯仁 遠之 至

有?」

子曰: 乎? 君 之,曰"「吾聞君子不黨,君子亦黨 日。 而知禮,孰不知禮?」巫馬期以告。 司 君取於吴,爲同姓,謂之吴孟子。 敗 「知禮。」孔子退,揖巫馬 「丘也幸,苟有過,人必知之。」 問 昭昭 公知 禮 乎?」孔子 期 而 進

『丘也幸,苟有過,人必知之。』

不 告也。」 乎,●夫子以知禮答之,而司敗以爲黨,在 否,不 答也。 川《解》曰: 又《語録》曰 成說不知禮也 而復自云 「陳司敗問昭公之知禮 有過者,巫馬期約 「彼國人 如 陳 司 敗數 /來問 以 昭 君 知 復 所

> 知禮不知禮,却要回報言語也。聖人只有 過於己?」曰: 者,以陳司敗必候其反命,故須至答 他。及巫馬期來告,正合不答,然孔子答之 失禮之事 箇不言而已,若說道我諱君之惡,不可也, 是陳司敗欲使巫馬期以取同姓之事去問是 言諱君之惡,是否?」曰: 「丘也幸,苟有過,人必知之。」」或問: 又不成却以取同姓爲禮,亦不可,只可道: 而問之,則有所不答,顧 「非是歸過於己。 . 「是。」「何以 左 此事 右 뻾 却 歸 注

焉? 不可揜也,在夫子則當諱,於陳 倫,故聖人謹之以爲民之防 范曰: 夫子引爲己過,所以存君臣也。」 「天地定位,而有君臣紀 也。 司 昭公之行 敗 何 綱 有 人

過小,彰君之惡,其過大,乃所以爲義。」 吕曰: 「此與以微罪行同義。 黨君之

之」,四庫本無。 程氏經說 並並

也? 不復問,直以爲黨,聖人豈復辨以我爲 知禮與 孔子豈敢 與沈同問 謝 不知 日 對 禮 以 燕可伐與不可伐於孟子同也 陳 ,則孔子當別有論。 不知禮? 司 敗 泛問 若復問 昭 公知 取 禮 同 陳 與 司敗 無 姓 不 调 爲 知

然夫子既自以爲過,則昭公之不知禮 也。 知禮 知之。」受其 反命,故孔子曰: 馬期以告者 知矣。」 司敗揖 蓋居 楊曰 : 「陳 是邦而 過 ,司敗之意也,欲得孔子之言以 巫馬期 ൬ 司 不 加 問 敗問 丘 辭,不爾,則 進之,謂孔子爲黨,巫 其 也幸,苟有過,人必 君,其對之宜 昭公知禮 無 乎,子 答可也。 一亦從 如 此 日

之」者,以巫馬期請復命故 所不答也 者 宜 尹曰 也。 圃 「人 司敗以 云「丘 問 孔 國 也幸, 子爲黨, 君 知 也。 荷有 禮 否 而 過,人必 乎,對 陳 其事,在 日 知

> 正不食 伊 子 川《解 「,席 與 人歌 不正不坐同 而善,必使反之, 「歌必全章 也 而 也,與割 和 之。

美,凡皆如此也。」 之善,其有不 范曰: 勉而進之者乎? 「歌之善者猶樂 之, 君子成人 而況於德

善之義。」 吕曰: 「使反之而後和之,亦與人爲

也。 謝 「記 聖人與人盡歡,非 貌 親

君子樂取諸 楊曰 . 人以爲善者如 「反之而後和,所以繼其 此

子日 則吾未 尹曰 「文,莫吾猶人也。 「此記孔子樂善與人同 有得。」 躬行君子, 也

之

「人於文采,皆不曰 人,實行 伊 ,川《解》曰: 則 未 之 見 吾猶人也,皆曰勝於人 也。」 「常人於文飾則皆欲 又《 語 録 日 勝

爾。 至於躬行君子,則吾未見其人也。」 得

又曰 「文皆欲勝人,至躬行則 未嘗

四 以進而不已也。●《中庸》曰: 君子也。文不能勝人,行未得爲君子,此所 [,丘未能一焉。] 責己所以勉人也。] 躬行君子,則吾未之有得者,行未 范曰 : 「文, 莫吾 猶人也,文不能 『君子之道 得爲 勝

君子,自謂未得耳。此非謙辭,亦庸言庸 子自謂我之文章得不與人同乎? 但躬行 之至,聖人有所不能。」 吕曰: 「莫之爲言,猶曰得不也。 孔 行

猶言君子道者三,我無能 能躬行君子,斯 「文,雖聖 口 人無不與人同 焉 以 聖,故不居。

君子,未之有得。」 楊曰 「學者旣其文而不孚其實,故

「子言文則吾莫 能 過 人 也 , 至

於躬行君子,則未之見也

子曰: 之不厭,酶人不倦,則可謂云爾已矣。」 公西華曰: 「若聖與仁,則吾豈敢? 「正唯弟子不能學也。 抑爲

遠,而誨人不倦,故歎曰: 不倦,非己有不能也。公西華見聖人之道 聖,然行之而不厭,以誨人而 伊川《解》曰:「夫子謙, 「正唯弟子不能 不倦。 自謂不 敢當 不厭

學爾。」

倦, 且自謂不能、蓋所以爲能也。」 范曰: 横渠曰: 「仁、聖之次也。 「君子於仁聖,學不厭, 誨

也。 聖,故能聖; 華以爲二者乃所以爲聖仁,故弟子不 仁也。夫子自言能此而 厭,所以學於聖也, 不敢當仁,故能仁。爲之不 誨人不倦,所以 已,蓋謙 聖人惟不自 也。 志於 西

進 四庫本作「盡」。

不

矢,故曰正唯弟子不能學也。」 謝曰:「學不厭,教不倦,則聖且仁

乎?」則仁與聖宜若相遠矣。 IE 仁且智。夫子旣聖矣,有其實而不居其名, 聖人,則人倫之至,無以尚之也。然孔子所 其仁。]語仁之至,非大人其能當之? 於仁,皆可謂之仁,故雖管仲,亦曰: 敢居也。蓋仁者通上下言之也,苟有 聖與仁,則吾豈敢?」則仁與聖,皆孔 不敢居者,名而已,爲之不厭,誨人不倦,則 唯弟子之不能學也。」 楊曰: 「子曰: 「何事於仁,必 又曰: 若夫 口功施 「如 也聖 子不

口: 弟子所不能者,正以此耳。」厭,誨人而不倦,則知仁備矣。 故公西華盛仁道。 夫子自謙而不敢當,然行之而不盛仁道。 夫子自謙而不敢當,然行之而不一,知曰:「盡仁道即聖也,唯聖人爲能

子路對曰:「有之,誄曰:「禱爾於子疾病,子路請禱。子曰:「有諸?」

皆有過,無善可遷,故曰丘之禱久矣。」 夫禱者,悔過遷善以祈神之祐也。聖人未子曰: 有是理乎? 子路以古人之誄對。 上下神祇。J.子曰: 「夫子病,子路請禱。

理有 意亦足矣。 使其無,不 於鬼神之理也。 也, 謝曰:「此非夫子不禱,語子路以禱 禱可 不可以誠意交,則 故曰丘之禱久矣。」 也 鬼神 可 使其有,則夫子之誠 以 誠 意 禱之理 交,則 無也。

禱也久矣。」

楊曰:

「聖人與鬼神合其吉凶,則其

尹曰:「禱者,悔過遷善,祈祐於神

也。 聖人未始有過,無所不善,自求多福而

已,何事於禱?」

子曰: 「奢則不孫,儉則固。與其不

孫也,寧固。」

伊川《解》曰: 「奢儉皆失禮也,而奢

之害大。」

爭,爭則亂之所由生也,故聖人戒之。」 之奢,不若失之儉。儉猶得禮之本,不孫則 范曰: 「奢儉皆非禮之中也。 與其失

故日不孫。」 上之過則亡也。至於奢,則豈特過中而已, 謝曰: 「儉特不可謂之中道,犯禁陵

亂之道也。 楊曰: 奢 則 僭上,故不孫; 不孫,

也。 故與其不孫也,寧 固。

儉不由禮,則

固而已矣,然猶近

尹 日 「奢儉皆失中也,而奢之失爲

子曰: 「君子坦蕩蕩,小人長戚戚。」

> 伊 明道曰: 川《解》曰: 「君子坦蕩蕩,心廣體胖。」 君 子循理,故常舒

泰 小人役於物,故多憂戚

險,故多懼。 使人辨之也。」 自取之也。夫子言君子小人必相反,所以 范曰: 「君子居易,故常泰, 有諸内必形諸外,二者皆其心 小人行

得失之心,所以長戚戚。」 謝曰:「不憂不懼,所以坦蕩蕩,

而行,則旣得之又患失焉,故長戚戚也。」 尹曰: 楊曰: 「居易俟命,故坦蕩蕩, 「君子循理,故常舒泰; 小人 放利

役於物,故常憂戚。」

恭則不安。」 人也!」 又《語録》曰: 恭而安,德容之盛也。善哉門人之能觀聖 伊川《解》曰: 子温而属,威而不猛,恭而安。 「子温而厲,威 「衆人安則不恭 而不猛,

二九

懷

也,恭也,三者性之德,

厲

也,不

猛

也

安

,

也

, 三者德之修。故能

中

和也

吕曰:

言

温

圃

厲

故

孫

出

而

可

法

3

猛

故不

· 暴

恭

而

安,

故不

· 勞。

温也,

威

范

H

温

而

厲,

故不

柔

威

而

不

安 如 勿 (助長,工 Œ 當 勿 志 勿 助 長 之間 須 子 細

威、故不猛 體 認 取。二 楊 3 以 由 禮 直 而 而 恭, 温 故安。 故 厲 如 是 以 然 德

後

而

温 爲盛德。」 面 尹 曰: 厲,威 而 不 聖 猛 人 和

順

積

中,英華

發外,故

而

安。

非 善

恭

൬

安、故

動

容周旋中禮。」

色威

而不猛,故望之儼然,即之也

温

貌

者,不能形容至此。」

安。」 於中 不 厲 强 木 年 威 温 在 安,安則不恭。 則 不 成 學箇恭而安不成。」明道曰 ,其唯聖人之時然後温 兩偏。 ,蓋德威 面 謝曰 不 安肆 醉面 有 又《語録》曰 温 多少 : ,安肆必放縱不恭,恭如勿 若下惠則 盎背 也。 「三事皆聖人之仁義禮智充溢 威則 病在。」謝 而然。 心 如伯 猛 : 慢 不 温 而 夷、柳下惠之氣象, 在他人,温則不厲 子 横渠當言 猛則 勝 貌 Ė 厲 恭 而 ",若伯· 厲乎? 不 則 威; 凡 雖 可可 恭 恭 夷 吾十 則 恭 謹 知 威 而 是 則 厲 非

勝

猶

五

朝 諸 老先生論語精義卷第四 上

國

國朝諸老先生論語精義卷第四下

泰伯第八

以天下讓,民無得而稱焉。」子曰: 「泰伯其可謂至德也已矣。三

之,二讓也, 之,而聖人謂之至德。不立,一讓也, 也,爲天下也。其事深遠,故民不能 被天下,故泰伯以天下之故讓之也,不必革 基成王業,故爲天下而三讓之,言其公也 讓者,不立一也,逃之二也,文身三也。」 使紂賢,文王必爲三公矣。] 伊川《解》曰:「泰伯之讓,非爲其弟 明道曰: 「泰伯三以天下讓,立季歷,則文王道 文身,三讓也。」 「泰伯知王季之賢,必能開 又《語 識 而 逃 稱

> 德,與文王同,而讓道之美,無以加矣。」 能知之,非夫子,後世無述焉。 舜克讓,聖人尊之。泰伯三讓天下,而 或 者貴乎禮。 范 讓之道達,而天下 生民 以 來,有 欲 必 故 和 有 是 爭,故 稱其 民 以 莫 至 堯 爲

德,當文王與紂之事,亦可以朝諸侯有天下德。』周未有天下,而曰三以天下讓,以彼其好名者能之,唯民無得而稱焉,是以爲至好名者能之,唯民無得而稱焉,是以爲至謝曰:「王元澤曰:『三以天下讓,

實而無其名,兹其爲至德也與。」 於隱微之中,故民無得而稱焉。 有讓之之謂泰伯以天下讓者,蓋推本言之也。讓之時周未有天下也,然文王之興,本由太王,時周未有天下也,然文王之興,本由太王,

已矣, 泰伯三以天下讓民,無得而稱焉,天下有其二,以服事殷,周之德可謂至德也侯曰: 「夫子之言至德者二: 三分

之元 其 以天下之故而讓焉 也,泰伯犯之,皆得罪於君子者也,何德之 夷之爲 可 一言及於讓,又無得而稱者也。其心 得 稱哉? 미 子,貴 而 謂 也,而身親之。三者皆有害於名教 稱 至 故 德 也 又其讓也,非濟濟之相 也,唯聖人 也 ,逃焉,是不肖也。 已矣。 謂之至德,非聖人 泰 能 伯 知泰伯之心。 所 謂 。文身斷 至 德, 讓也, 則欲 孰 民 知 無 君 實

師 也,文身三也。」 程某日 尹 日 : 民 泰 無 伯 得 圃 逐 名之,夫子謂 不立 也,逃 至德。

子曰: 子篤 則 葸,勇而無禮 民 不偷 於 親 「恭而無禮 則 則亂,直 民 興 八於仁 則 而 勞, 無 慎 禮 故舊 而 則 無禮 一不遺, 君 則

慎 川《 m 無 解 禮 ₩ E 則 多懼 恭 故故 而 無 葸 禮 則 勇 而 無 禮 故

> 録》曰: 私 其身,要人道 禮則勞也。 是心生,亦是太以敬來做事得重,此恭而無 安,令容貌必端,言語必正者。 自然底道理,故勞而不自在也 非體之理,是自然底道理也。 則 意,只是箇 不 又 順 日 故舊 故 「今學者敬而 不遺,則 恭者,私爲恭之恭也 亂 君 循理而已。」 如 何。 子篤 直 民化 只是天理合如此,本無 而 於 不見得又不安者, 親, 而 禮 篤 則 則 厚。」 ş 好 民 非是道獨 只恭 訐 興 須是恭 而 圃 故 禮者 又《語 不爲 於 只

慎 於 德也,苟無禮以節之,則爲害。 慎不葸,勇不亂,直不絞,民化而歸厚矣。」 上 一, 故 理 而 范曰: 則不過矣。 横渠曰 無 亂 禮 則 直 多 「禮者,理也。恭慎 「人道知所先後,則恭不勞, 加 懼,故恵; 恭而 無禮 無 許 禮 則 勇 已 而 治身者豈不 絞 卑,故 勇直,必 無 禮 四 者 則 犯 中

以禮爲 天下莫不怨,治天下在知其要而 歸厚 子不遺故舊,豈獨 「惇叙九族」,治道未有 人君善於父母 是以 也 急 ·堯親睦九族,舜慎徽五典,皋陶 敬一人而天下 也),则 私其 民興於厚宗族誤則民 又曰 人哉? : 不先於此者 無 不悅 立 愛必 所以 棄 己。 自 使民 矣。 親 人 興 始 於 而 德 君 日

勇無節文,則暴而上人, 則 而 罷 賊恩。」 於 日 接接 物物 禮所 慎無 以節文也。 節文,則畏而失我, 直無節文,則切 恭無 節 文,

我, 就理故也。 在己養德 則不止 不遺,則德自厚。」 謝 . 一於當。 亦 故有勞葸亂 性 如 是。 有所偏,才有所 不止於當,則 篤 於親 絞之弊。」 ,則仁 爲 長,未免有 無禮,不 又曰:

·
恵 楊曰: 勇於義 則不 恭 而安則 亂 直 ൬ 不 温 勞, 則不 慎 絞 而 有 節 此 成 則

歸

爲

免矣。

本立 德 推 則 親親之道以及人,則民歸厚矣,故不偷。」 反是。」 也 尹曰: ,故民興仁, 非 有 禮以裁 又曰 禮者,節文之而已。 恭而 之,不 故舊不遺,推親之道也, 「篤於親,爲人之本 足以 與此, 故 無禮 也 無

恵 民化 禮 則好計,故絞。」 上之所好,下必有甚焉者也。」 崱 而仁愛; 不安,故勞; 勇 而 無禮 不遺故 則不 又曰: 慎 順 舊, 面 故亂; 無 則民 君子 禮 則 篤於親 化 直 名 而 IIII 懼 篤 無 則 槽 故

夫! 小子!」 一个而後,吾知免 一般予手!《詩》云: 『戰戰兢兢,如臨 曾子有疾,召門弟子曰: 「啟予足!

君子保其身以殁,爲終其事也,故曾子以全伊川《解》曰:「君子曰終,小人曰死。

范曰:「父母全而生之,子全而歸之,

孝之罪 孝也 其親 乎? 故 身體 猶 將 死, 不 可 虧 手 心也,況 足 無 虧 毁 其 知 行 免 以危 於 不

以明德體 日 亦 無所傷; 啟手足者,非特全其 推易簣之事 軀 可見其 而已,

謝曰 君子無時而 不 戒慎恐懼

也; 非 孝也歟。 謂 之,子全而歸之,可謂孝矣。不虧 能戒慎恐懼,不辱其身也。 辱其身,可謂全矣。] 啟手足,示 能全 死 無加於孝,若曾子者,其庶幾乎?」 生 「戰戰兢兢,如臨深淵,如履薄冰」,示 日 而 無 觀曾子之啟手足,與夫易簣之際, 歸 變於己不足 之,而人子之責免矣。兹其 「《祭義》 與語 日 夫如是,然後 此。 了父 母母 夫聖人之 不 其體,不 虧 其 而 體 牛 口

> 吾得正 而 今 曾子有疾,孟敬子問之。 而 而斃焉斯已矣。」非 後 知 免 夫。」 及 有 其 易 得於道者, 曾子言日 簣 則 日 能

矣; 事,則 貌,斯遠 言也善。 鳥之將死,其鳴也哀, 有司 出 辭 君子所貴乎道者三。 氣 慢矣。 斯 遠 鄙倍矣。 正 顔色,斯 人之將死,其 近 豆 信 容

信 旋 而不 矣; 中禮、暴慢斯 明道曰: 外求,故曰: 出辭 氣,正 遠 由 容貌,舉一身而 正顔色,則 中出,斯遠鄙 籩豆之事 不妄,斯 丁,則有 言 倍。 也, 司 正 周

於誠 日。 動之間 伊川《 也 鳥畏死,故鳴哀, ,皆有法則。 ,故善。 解 ≫ El 君 子所貴者 容貌莊敬,則可以遠暴 「不問 將 而 ,慎之於身, 死,而 自 言, 其 故 日

尹

「父母全而生之,子全而歸之。

終

圃

啟手足,爲是故也。

其

四

之細, 力。」 慢; 明,若是生事,便說得蹇澀。但涵養久,便 中,自然言語 孟子曰: 得自然。 是於言語 焉,政在修己,身正則官治,若乃事物器 使至於鄙倍。 則有司存焉。」 顔色正 「師死而遂倍之。」籩豆之事,則有司 若是慎言語,不妄發,此却可著 上用工夫否?」曰: 記順理。 鄙謂偏僻,倍謂違拂義理,倍、背通 則自知其 今人自底事說得甚分 或問: 信, 辭 「須是養 「出辭氣,莫 氣之出,不 用 於 存 用

之,則心正而身修矣。」 吕曰:「貌也,色也,言也,皆以道正

意同。孟子之養浩然之氣,蓋出於遠暴慢也。信,以實之謂也,與禮樂不斯須去身之自收處,故暴慢鄙倍不生於心。遠,自遠特係所養如何耳。動也,正也,出也,君子善。人之應事,不過容貌、辭氣、顏色三事,謝曰:「人之將死,無物我心,故其言

鄙倍之學。」或問 焉,故曰: 終歸妄誕。 矣。學佛者,知此謂之見性,遂以 之桃仁、杏仁、言有生之意。推此、仁可見 癢,謂之不仁。桃杏之核,可種 仁,死者爲不仁。今人身體 者三,三者皆以道也。」凡二十四字。 非禮勿言動否?」曰: 嚼字,咬文嚼字却是巧言。」吴本有: 之,修辭也,修辭立其誠也。修辭不是咬文 己之謂也。 得,自然遠。正顏色,自然近信。 否?」正色曰: 貌,暴慢自然遠。」又問: 人說謂己說?」曰: 氣 何也?」「仁是已。」「仁者何也?」「活者 , 先生嘗謂要緊 正顔色近之。 聖門學者,見此消息,必加 雖不敏,請 「自然。 「是。」」下注云: 在 「是謂己也。 上三字。 動容貌,正顔色, 動容貌,暴慢著 「下三句 出辭氣,遜 又曰:「心者 麻 斯 如 「君子所貴乎道 而 痺,不知 語矣。」「雍 下 信,有 爲了 生者, 問 換 方 旬 動 出辭 得 以 功 爲 出 輔 謂 痛 不 容 故

自 出 者,從此 故曾子 雖 大而化之,合於自然, 點檢, 木 辭之謂 敏 Ė 何嘗正 請 廣大心中流 乎? 事 「動 斯 夫人一 一,何 容貌 語矣。」仁 ."嘗動 出 則正、動、出,不足 日間, 顔色容貌, 試 正顔色, 也,以私 操則 怠慢 存, 而已。 出辭氣。」出 意 發 舍則 言 若 夫 豈

敬 不 誠 正 慢,若曾子之修容而閽 其 不莊,則不足與立,故正 (失也。) 善,因 子 所宜與也,故告之。 顔色未必有諸己,故近信 言也善,反本 而剛大之氣形諸 ·,魯之大夫,宜以道事其 楊曰: 物有遷耳。 「生而善,天下之性 故 也。 外, 窮則反本, 然其言此,必有以救 人避之是也。 夫動 則鄙 顔色而後近信, 而已。 君,有司之事, 倍斯遠矣。 容貌,斯遠 故其 也; 修辭 (將死, 戲 其 孟 立 然 慢 暴 爲

尹曰:「養於中則見於外,曾子蓋以

修己爲 司 存 焉。」 政 之本。 若 乃 事 物 器 用 之 細, 則 有

曾子 者吾 ; 友當從事於斯矣。」 日 有若 以 實若虚 能 問 於 犯 不 能, 而 不校 以多 問 於

問 也。」 日 爲 吾又 也。 觀其言曰 日 之,能保天下。 人之善,矜人之惡,不計校小大彊 孟子曰: 語 者 録》日 亦若 何校焉? 犯有 伊川《 「彼之事是,吾當 『有若無,實若虚,犯 又曰: 顔 子勇否?」 當 是。」豈 『惟仁者爲能以大事 解》曰: 報 「凡人 『舜何人也? 犯而 者, 是以君子未嘗校也。」 犯 不 有所計校者 而不校,亦樂 則 曰 是 顔 不校,校則私,非樂天 是 師之, 勇? 子能無我矣。」 循 而 孰 理 予何人也? 不校。」先儒 又曾 而 勇於顔子? 小。」仁者欲 彼之事非, 己。 天 子稱: 順 弱 理 而 者 或 又 又

爲顏子,是豈不爲大勇乎?」

淑艾以教人,隱而未見之仁也。」 横渠曰:「以能問不能,以多問寡,私

若 日益 順理也。」 『惟仁者爲能以大事小。』犯而不校者,樂天 則君子反求諸己,自修而已。孟子曰: 犯而必校者,不能樂天也。 能進而不已,故曰日新, 雖多,而自以爲寡; 虚 了,故能受。此顔子之好學也。 唯聖 范曰: 顏子潛心於聖人,其道如此。凡人 「君子雖能,而自以爲不 有若無,故不伐; 以虚受人,故 人待我以横逆, 能 實

在人, 爲 寡 在人。 謝曰: 有若無,實若虚,不知有餘 犯而不校,不必以得爲在己,以失 惟忘物我者能之。」 以能 問 於 不 能 在 以 我,不足 多 問問 於

無一物之非仁也,夫誰與之校?」 又曰:楊曰:「無伐善,故能若此。視天下

「孟子三自反,不如顔子之不校。」

非幾於毋我者不能也。」 尹曰:「先儒以是爲顏淵。觀其事,

百里之命,臨大節而不可奪也,君子人曾子曰:「可以託六尺之孤,可以寄

與? 君子人也。」

矣。」伊川《解》曰:「節操如是,可謂君

子

可。」
其無流離餓莩之患,必其才有大過人者乃使死者復生,生者不愧, 寄百里之命,使使死者復生,生者不愧, 寄百里之命,使

也。雖未足盡君子之道,亦可謂君子矣。里之命,臨大節而不可奪,此忠義之士可及人爲足以盡君子之道。託六尺之孤,寄百人爲足以盡君子之道。託六尺之孤,寄百

尹曰:「三者其節操如此,故足以爲

君子。」

後已,不亦遠乎?」道遠。仁以爲已任,不亦重乎? 死而曾子曰。「士不可以不弘毅,任重而

重擔子須是硬脊梁漢方擔得。」
又曰:「士不可以不弘毅,任重而道遠。不弘,則無以居之。《西銘》,言弘之道也。」明道曰:「弘而不毅,則難立, 毅而

也; 毅 重任 而 不弘 而遠 伊川《解》 毅,奮然 二,則隘 到。 Ĭ 也 陋。 . 又《語録》曰: 弘 弘 而 大剛毅,然後能勝 不毅,則 無規 弘 寬廣 矩

楊曰:「君子之學,求仁而已。仁之毅。任重道遠,自任以天下之重也。」謝曰:「顏子之德近弘,孟子之德近

是塞淵,然後騋牝三千也。

又如《駉》之詩,

尹曰:「所養剛大,則能任重而致遠。故士不可不弘毅也以是夫。」以勝其重, 非毅則不能力行之,無以致其爲器重,其爲道遠。非弘則不能擴大之,無

《詩》; 《詩》,觀其言,是興起人善 禮義, 皆是此意。 無 曰: 也, 立於禮,自 中而歆動之,有吾與點之氣象。」 「《詩》興起人志意。」 所 子曰: 用 伊川《解》曰: 「興於《詩》者,吟詠情性,涵暢道德之 安之而和樂,德之成也。」 言近而易知,故人之學,興起 力 禮者,人之模範,守禮所以立其身 處。 然有著力處; 如言「秉 「興於《詩》,立於禮,成於樂。」 又曰: 心塞淵,騋牝三千」,須 「《詩》發於人情,止於 又曰: 心。 成於樂,自然見 「夫子 「興於《詩》, 汪洋浩大, 又《語録》 言興於 又曰: 於

禮

旣

廢

人倫不明

至治家皆

無

法

度

怎

生責得學者?

是不得

興於《詩

业也

起

於《詩

後世老師

宿

儒

尚

不

能

曉其

義

巷草

野童稚,皆習聞其

說

而

曉

其

義

得 ?

古人於《詩》,如今人歌曲

於《詩》,

立於禮,成

於樂,如

今人

也。

又曰:

一天

下

· 有

多

少美才,

而

威

至於如

此,

則

又非

手舞

足

以

立

也,「不學禮

· 無

以立。

樂者所

不知手之舞之足之蹈之也。

也,樂則生矣,生則惡可已也

;

美刺

歌誦之以

知善惡

治治亂

廢興。

思無

邪者,蓋爲

非

此

則不能

坰牧

也

坰

牧

是

賤

事

其

中

却

Ė

思

無

邪

 \sim

白

言以

蔽之者

在

此

旬

坰

牧

O

日

學者之興

起,

莫

先

於《詩

~

不

崩

於天下,故不得

有所成就。

安則久,久則天,天則不言而信,●神則 若夫樂則 惡可 且古 般, 故故 怎生 蹈 只 禮者 以 而 行詩 已 詩 者 爲 之 能 雖 不怒 成 必 安, **> >** 間 會 興 道 事 德 所 有 又 要 則 膕 聲音以 得 樂, 《書》則 力。」 處 意 灑 簡奥,今人未 鄉人,用之邦國 人作之,如《關 不樂學。 成材也難。」 之,是不得成於樂也。 不 故 ~,故 故 掃 得 則 立 應對事 日 漏 日 日 養其 誦 於 興。 又 立,此禮之文也。 成 詐之心人之矣,不和樂 且教之歌舞,如《詩》三百篇 讀,其善惡 日 禮 ,此樂之本也。 耳目 人無禮 也 長之節,令朝夕歌之,似 易 又曰: 雎》之類,正家 「古之學者 日使 曉 古 舞 ,别欲作詩 人 是非 蹈 無 人聞之。 有 以 古之成 以 「教人未 歌 爲規 勸 養 中心 詠 古者玉不 戒,有以 其 必先 之始 略言教 以 矩, 材 IП. 此等詩 斯 見 也 養 脉,今皆 則 須 學 則 故故 意 易,今之 其 無 身 不 起 ^ -去身, 趣,必 皆古 情 詩》, 當 其言 所自 無 一發其 童 用 和 性 無 所 有

0 久 則 一按《二 天」, 程遺 傳經堂本作雙 書》卷十 一並作「安則 行 小 字 久,久則天,天 久 則 天 天 則

養其 所以教 無 由 故 養之至也。」 m 不 氣 養之者備矣。 去琴瑟,自成 ,故才高者聖賢,下 童 義理以 一人學, 者亦 養 四 其 + 爲 心 而 吉士, 一禮以 出 仕

也。」 興 以此,治天下國家亦以此。此其先後之次 興,有定而後可立,有和而後可成: 樂所以和人心,故非樂不 於《詩》; 范 日 $\overline{ }$ 禮所以定民志,故無禮 詩 》所 以 序 成。 人 倫 。有序 故 丽 學 不 後可 治身 立 者 N

生。 生 不 反 諷 誦 日 . 善言,所 沛 然 興則 自 以 起好,立則不 得,手足舞蹈,所 起 好, 莊 敬 反,成則 日 强, 以 有 所 有

知 心 正位可 自和順於道德。」 ,使有 謝 日 立 所 興 「《詩》, 樂 發, 則 吟詠情 存 禮則 養 其 動 (善心,使義精 性,能感動 必合義 7,使 人之

> 出言 得詩 矣。 如之。 非所謂 觀《關 其 爲 何也 《詩》之興 矣; 言之文爲 昔王裒有至性,而弟子至於廢講《蓼莪》,則 之義修矣; 感發於善心 言 辭 婉,其氣平,所謂 ? 有章矣,豈徒考其文而已哉 人之志也,得 仲尼之教伯 ,發乎情也 游 |雎》、《鵲巢》之風,●則夫婦之經正 觀《伐木》之詩,則朋 可以 言者心聲也,不得其 日 蓋《詩》之情出於温柔敦厚,而 、發善 興於《詩》,則所求於《詩》者外矣 興也。 也。 觀《棠棣》之詩,則兄弟之愛篤 興 心,於此 一,其持心也厚,其 於《詩 魚,固將使 如觀《天保》之詩,則 其 然則不學《詩》,無以言 心,斯得其所以言, 人言也深疑要歸必止 》,言學《詩》者 可見矣。 心,斯不得於言 之興於《詩》 友之交親 ? 望 如以考其 人也 詩 其言 君 可 矣。 臣 m 以

^{▶ 「}觀」,原無,今據四庫本、公善堂本及《游寫山集》補。

미

乎? 乎禮 《詩》,故可以化天下 老 發之意。」 其用 乎齊之音者有勇,明乎商之音者有義,亦 師 樂 義。● 心,何患其不能 宿儒所不能爲,曾謂 而 不 又曰: 淫,怨 有 君臣之義焉,有父子之倫焉 誹 「《詩》之文,蓋有 言哉?」 而 而 不 師 解, 後世。學者苟 始學者而 所 又曰: 謂發言爲 能之 後 明 得 # 咸

安、故立。夫樂也者、言而樂之是已、非行 成者,終始之辭也。」 久,久而至於神,天則不可有加矣,故成。 綴兆興羽籥作鐘鼓之謂也。 楊曰: 「風以動之,故興, 樂則安,安則 有 禮 則

者 性 著乎法度,防民之僞而教之中,可以立其身 也 以 一言近而 尹曰: 成其德矣。」 樂,樂之也,樂則安,安則久,久則 易知,可以興起其 「三者學之序也。《詩》發乎情 志者 也;

> 之。 與知,非可以家至而日見 先王所以爲治者,非有 明道 子 H 日 一民 可使由之,不可使知之。」 民 難 與慮始,故 也。 隱蔽,但民不足 不可使知

之心? 耳。 比屋 不可 能使之皆知也。」 景 知之也。 人不使民知之否?」曰: 「非也,謂不可使 知之者,非民不足與知也,不能使之知耳。」 温 或問: 「民可使由之,不可使知之,是聖 使知之。 說 夫欲使人盡知之,此是聖人不能,故曰 미 伊川《解》曰: 此兩句,他道 是後 封 蓋聖人設教,非不欲人家喻户曉, 也,不可故也,但能 世朝三暮 若曰聖人不使人知,豈 又《語 「民可使之由是道,不 朝三暮四之術亦 四之術 録》曰: 使天下由之 也。 「不可使 聖人 與謝 不 可

0

人言也深」六字作「其入人也深其」,則全句作「其 所謂」至「禮義」,諸本皆存疑。 ,其氣平,其入人也深,其要歸必止乎禮義」。 按《游鵙山

皆可使由之,不可使知之事也。」 天下 德 天 近 民 無 無 而 亦 人情處亦有,豈有爲朝三暮四之術哉?」 聖人亦有之。● 止矣。 爲 服。」又曰: 不 范 知 ,而萬物不知 曰 : 所 《易》曰: 『聖人以神道 以治。 「君道 「神而化之,使民宜之。」 至於羣黎百 此 天 所以生; 大 地 故 也, 無 民 義 姓 君 理 徧 則 無 設 說聖人 爲,而 物 教而 爲 也 爾

不至,适以起機心而生惑志。」
日曰:「不可使知,非以愚民,蓋知之

也。 者 聖 「, 則 人 與民 謝曰: 於禮樂法度之外,自有覺處 共 由 「禮樂法度,莫非妙道所存, 也。 民特不 知 耳。 %,所謂 乃 若 學 知 蓋

(詩)者

而已。」

暰 無 民 蛇蛇 己, 而 愚之哉? 游 虺得之而毒螫 泛 日 而 觀 之則 夫先 蓋 道 無 E 無方也。 一豈以 物 厚者見之而 其術智 虎 豹 反 得 m 籠 之 觀 天 爲仁, 之則 下之 圃 猛

> 特使由 《盤》、周《誥》,至敷心腹腎腸以告之,其 儒以 之, 曲 辭、辭害意之過也。 智術籠天下之愚而役之,失其旨矣。 之心而已。 韓,則民 薄者見之而爲惡。 或不良,而竊窺其端倪,則适足以逞其不 訓 諭, 謂民可使由之而已,不可使知之,務爲 楊曰: 以其日用而不知,故不可使知之。 之而已哉? 不可使知之理可見矣。 無所不盡,則欲其 此小人之童觀所以无咎也。」 「道者,民 觀老子之學 孟子之言,非止 爲是說 所日 (知之也至矣,豈 用,故 者,皆以 變而 蓋 可使 其氣 爲 爲 文 夫商 申、 說 害 委 由 肖 質 世

子曰。「好勇疾貧、亂也。人而不仁、

聖人亦時有之」。

^{● 「}亦」下,明抄本有「時」字。按《二程遺書》卷十八並作

吕曰:

「亂,謂志意失其序也。

好勇

0

疾之已甚,亂也。」

之, 不盡教養而惟疾之甚,必至於亂。」明道曰: 「人若不仁,君子當教養

不仁而無所容,皆必爲亂也。」

伊川《解》曰:

「好勇而不安其分,與

皆迷謬不思之甚,故仲尼率歸諸亂云。」者愛人,彼不仁而疾之深,其仁不足稱也。仁不安貧,則其勇將何施耶? 不足稱也。仁横渠曰:「勇者不懼,死且不避,而反

爲仁,已甚則流於不仁. 皆失序也。」本以禦寇,疾貧則必自爲寇, 疾不仁本以

則絕其勸勉愧恥之心矣。故必至於亂。」則必用其才。不仁爲可矜,至於疾之已甚,則必用其才。「好勇則宜小有才,至於疾貧,

應之"皆亂之道也。」奪, 人而不仁,疾之已甚,必有不肖之心奪, 人而不仁,疾之已甚,必有不肖之心楊曰: 「好勇疾貧,其弊必至於攘

無所容者,皆致亂之道也。」 尹曰:「好勇而不安其分,與不仁而

吝,其餘不足觀也矣。」子曰:「如有周公之才之美,使驕且

餘不足觀已,●甚言驕吝之不可也。若言雖又《語録》曰:「有周公之美,使驕且吝,之甚也,雖才美奚爲? 才美謂威儀技藝。」伊川《解》曰:「居富貴而驕吝,無德

亦有「其」字。亦有「其」字。按。《二程遺書》卷十八「餘」上。四庫本有「其」字。按。《二程遺書》卷十八

=

才如周 又曰: 歉 嗇者,於財亦不足,於事亦不足,凡百皆有 吝,兩字正相對,驕是氣盈,吝是氣歉。」 則 不 日 : 有 歉之色也。」 驕,此句却有意 周 言 不吝,化煞高,不吝未足以言之。 上大則 公 「若以大而化之解此則未是。 一之德, 公,有驕吝 「何謂吝? 不 驕 則 化 不 思,人只爲 亦 可 則 日 不 下 不吝, 可 驕 吝 也。」或問 吝,嗇也。 小 此 字。 便驕也。 語 如 然大則 此 何? 且觀 驕 「横 言 與 化 雖

之吝。 周公亦 未 驕 日: 取於人,吝則不以與人。 廣 與吝,損德之大者也,故其 則 范 自 也 同 自謂多才多藝,不欺己也。 曰:「古之聖人,才美者莫如周公。 廣 吝者自小之道,不必 ·人于宗,吝。』《易》之言吝,皆以其 吝於財則不足, 吝於德 以 狹人, 吝則 自 故有 私 餘 而 財 司 皆 不 也 謹 一不足 則 以 驕 出 有 及 《易 則 納 謂 不

以周公之才猶如此,況其下者乎?」

以長其不善而已。」
人共利。其志已入於不仁,雖才如周公,適人共利。其志已入於不仁,雖才如周公,適

之,然必無公天下之心,卒歸於小人。」 物,故吝。 謝 日 有才而 不不 能 驕且吝者,功業蓋 忘 我, 故 驕 不 世 能 容 忘

子曰。「三年學,不至於穀,不易得

也。」

不善學也。」
「爲學三年,而不至於善,是

得穀,然後爲有得焉,故福謂之戩穀,禄位范曰:「穀者,善之實也。農播殖而

者也, 功; 謂 亦畫 IIII 已,治國亦然,未有求治三年而 之方穀,皆以 而 不至於善,未之有也。 而 已矣。 日 九我 無 故 其實言之。 三年學, 得於善,此豈力不 夫 子 以 是觀之,不 人未有 無 學 足 唯 得 必 於治 求 哉 \equiv 有 年 道 成

者

也。」

易得也。」
 楊曰:「雖子張之賢,猶以干禄爲問,

不 而 ·易得 不 知 侯 也。 日 善 . 則 「學所 誠 意 不 以 <u>寸</u> 率 性 民 而修道 斯爲下矣, 也。 故 三年

足哉 乎善也。 也 心矣。 尹 **日**: 不能 知其 自强 難 一年學, 而 故 自 也。 强 而 不息,則其 不 不 易 至 得 於善,豈 者,言難 至 一於善 力 得 不

> 則 子 不 隱。 λ, 日 : 亂邦不居。 邦有道,貧且賤 篤 信好 學, 天下有道 守 焉, 死 善 恥 則 道 也 見, 無道 危 邦

道、富且貴焉、恥也

道 子曾嘗之,說與 者,只是知之淺,信之未 未 人,小人非不道好,只是 日 不違道,然卒違 又《語録》曰: 知味。 不違道,終不肯違道 而 富 伊 貴 川《解》曰 守死善道,人 爲可 恥而 一今語 君 道 子,君 ; 不 君子處身如是。 語君子曰 處 小 非 篤 特 無 子 人 譬 不 日 須 愛心,其 如 立者能之。」 知,終不 愛; 不 牲 不 達道 牢 達道, 之味, 實 說 肯 只 與 則 知 爲 是 小 君 則 無 日

之素業 以 俟 死, 范 E. 也 期 於得 危邦將亡,故不 篤 IE 信 而 古 斃, 人 所 則 以 爲 善 好 道 學; 亂 邦 無 此 士 身

禄 無道則隱 加於小人,故士恥富貴。使士恥 加 故 於 不 君子,故士 此士之出處也。 此 士之去就 恥 貧賤; 也。 邦 邦有 無 有 富貴,則 道 道 道 則見 則 則 爵 爵

(國豈

不殆:

哉?」

也。 君子彙征之時,故不仕則恥, 大人處之乎? 學者立志當如 得 志之時,故仕則恥。」 愛其身,危邦不入; 也。 謝 非王者興則不仕。如斯人者,其當以 日 身可 「舉世毀譽不爲勸 死,志不 可移,守死 潔其身,亂 此。 沮,篤 邦無道,小 邦有道, 善道 邦 信 不 者 好

事

也。

貧且 焉,恥也,故隱 可去之義,不入可也,所謂 道得之也, 楊曰: 賤焉,恥也,故見, 亂邦未至於危,則去之可也。 「君子見危授命, 邦無道 蓋 邦有道 而 富且 量而 邦無道,富且貴 而 貴,必不 貧 則仕危 後 且 人者 賤,必以 邦有道 蓋 邦 如 無

> 道 得 之也 一,故君子恥之。

出 守死善道者能之。若夫聖人,可以仕則仕, 可 矣,或見或隱,皆適其 以 處去就,有不待兆見者也。」 尹曰: 止 則 止,可以 「危邦不人,亂邦 速則速,可以 時 而已,唯 不居,則去之 久則久,其 信好學

伊川《 子曰: 解》曰:「不在 「不在其位,不謀其 其位,則不任

其位 不可以侵士之官。故坐而 公之職,三公不可以爲卿大夫之事,卿大夫 .則謀其政者,職也。天子不可以 范曰:「自天子至於士,皆有 作 無不各敬其事。如此,則天下之理 若君大夫問而告者,則有矣。 m 行之,謂之士大夫, 論道,謂之三 於抱 位 治 關

謝 日 君子 止 其 思不出 所也 「其位。 」

其

子曰。「師摯之始,《關雎》之亂,洋洋

乎盈耳哉!

雎》之樂,其聲洋洋盈耳哉,美之也。」明道曰:「亂,治也。師摯之始,《關

我者朞月而可,豈虚語哉?」 選海以去亂。聖人俄頃之助,功化如此,用 其後伶人賤工,識樂之正。及魯益下衰,三 其後伶人賤工,識樂之正。及魯益下衰,三 其後代人賤工,識樂之正。及魯益下衰,三 其後代人賤工, 一 其後代人賤工, 一 其後代人賤工, 一 一 當治之,

矣,而不能終也,是以記之。」以禮樂爲急,若由此正之,舉而措之無難《關雎》之亂,洋洋乎盈耳哉,美之也。治國《關雎》之亂,洋洋乎盈耳哉,美之也。治國

師摯始,故稱之。」 楊曰:「中正之音,不作久矣,其亂自

魯,然後樂正、《雅》、《頌》各得其所。」其正,徒能洋洋盈耳而已, 孔子自衛反尹曰:「師摯,魯太師也。其初樂失

不信,吾不知之矣。」 不信,吾不知之矣。」

之甚也。不可得而知之也,謂非常理也。」控控則必信,自當然也,而不然者,僞妄伊川《解》曰。「狂則必直,侗則必愿,

「以謂」,傳經堂本作「亦謂」,四庫本作「以爲」。

之質也。 故曰吾不知之矣。」 則宜 范 日 愿 反是則爲 狂者 悾悾者誠 無 進 灬常,必 取 則 慤 有 則 宜 所陷溺 宜信 直 侗 其心, 者 此學 無

者旣未 信道。 謝 曰 有 聖人亦未如之何 知, 「狂者旣 復不謹愿; 進取,復不 也。」 悾悾旣 循 無實, 理 侗 復

是則失常矣,非所知也。」適,故宜愿, 控控則無險詖,故宜信。反適,故宜愿, 怪控則無險詖,故宜信。反楊曰:「狂則肆,故宜直, 侗則無異

也。 宜愿 尹 曰: 故曰吾不知之矣。」 而 不愿 ,誠慤者 「進取者宜直 宜信 而 而 不直, 不信,反 無 其 知 者

子曰:「學如不及,猶恐失之。」

言 志 則 也。一又曰: 不得,況學道 伊川《解 終日不食,終夜不寢以 Ē 『朝聞 而悠悠,安可得? 博 奕 道,夕死可矣。」不 小數,不專心 思,無益,不 仲尼 致

> 也。」 知聖 及,猶恐失之」,才說姑待來 是生知,猶云 理 又曰: 會,須是求所以 人有 甚 「學如不及,猶恐失之,不得放過 事,迫 爾者,所 如 切 此 Î 以 何故 乃 教 如 人也。 始得 日,便不可 此 0 文 意 學 聖 也。 如 人 不 固 難

無以 也。天子不學,無以治天下, 諸侯不學, 皇皇,其已久矣。古之聖人,莫不以學爲急 其已久矣。堯、舜、禹、湯、文、武汲汲,仲尼 以學爲急也。 道,顛沛不違於仁。 治國 范曰: 「道不 大夫不學,無以治家, 楊雄曰: ·可須 自 天子至於士,未有不 曳離 『學之爲王者事 也。君子造

學,無 也。」 以治身。 凡學者,學修身治人之事

及。 故子路 謝日 0 一如 未之能 追 行,惟 寇讐,如此其急,猶恐不 恐 有聞。」

若無,實若虛,以能問於不能,以多問於寡, IE 猶恐失之。 謂此也。」 楊曰: 自謂 學者日孜孜焉,常若不及, 至 焉 ,其失遠矣。) 顔淵有

之,雖堯、舜、禹、湯、文、武、仲尼,猶皇皇汲 汲,況其下者乎?」 尹 曰: 「學者常懷不及之心,猶恐失

子曰:「巍巍乎,舜、禹之有天下也 而

不與焉!

與 明道曰: 順它天理,茂對時育萬物而已。」 「聖人之於天下事,自不合

與求。 范 伊川《解》曰: 日 巍巍乎,其德之高也。」 「有天下而不與焉者,無 「舜、禹得天下,而己不 心於

> 天下, 之心,則不足以有天下,此舜、禹 己。視天下之悅而歸己,猶草芥也,唯舜爲 不可及也。 而天與之,●人歸 孟子曰: 『天下大悅 之也。 夫 所 有 而 以 求 將 天 歸 下

然。「禹亦如是而已。」

得喪。」 吕 日 「舜、禹以天下爲 心 丽 無 心

於

下。 ıŗ, 謝曰: 不與,猶曰乃天下之天下,非我之天 一由 匹 夫 而 有天下,非舜、 禹

爲 焉? 非會物於一己者,其 舜、禹也與?」 楊曰: 「聖人藏天下於天下,我 誰能之? 兹 何 其 與

理,茂對時育萬物而 尹曰: 「聖人無爲 已,此聖人所以 而治者也。 類巍 順 乎天

- ·及」,原作「失」,據傳經堂本、四庫本改。
- 讀作「而天下之人歸之也」。 與」,四庫本作「下」。按: 若從四庫本,則 當連下句

不可及也。」

乎其 乎 民 子 Ī 無 日 有文 能 唯 名 天爲 「大哉 章。」 焉。 大,唯堯 巍巍乎其有成功也, 堯之爲君也 則 之。 蕩

巍崇高 巍 廣大不可得而名言也。其成功可見者則巍 乎崇高 伊川 ,其文章則煥然 ,其大與天同 解》曰 「大哉堯之爲 至盛 也。 蕩 蕩 乎,其德之 君也 巍

平 如 堯 然其高也不窮,其大也難名,其成功如 而 是矣。 ·章百姓 授之天 亦曰大哉。天運於上 范曰: 協 以《堯典》考之,明峻 下,止於如 「孔子贊《易》乾元曰大哉, 和萬邦,命羲和,咨四岳 此 而 無 己, 爲 可 德 而 謂 以 物 至 親 成 「舉舜 簡 九 四 肼 亦 稱

臨天下。此爲《堯典》而言也。」寒暑之始終萬物,其文章如日月星辰之

照

功,有文章。」神。有内聖之德,必有外王之業,故有成神。有内聖之德,必有外王之業,故有成謝曰:「盡天之道則大,民無能名則

五刑也以天討,皆天也。 叙,庸五禮也以天秩,章有德也以天命, 爲哉?❶ 而 而有巍巍之成功,煥乎之文章,亦若是而 四時行焉 楊曰 則天而已。故 ,百物生焉。 「天之爲天,莫之爲而爲之也 莫之爲而爲之者, 其惇 堯之爲君也,夫何 五 典 也以天

者,其功業文章,巍然煥然而已。」之,以治天下,故民無得而名焉。 所可名之,以治天下,故民無得而名焉。 所可名尹曰:「天道之大,無爲而成,唯堯則

有亂臣十人。」孔子曰: 「才難,不其舜有臣五人而天下治。武王曰: 「予

事殷。周之德,其可謂至德也已矣。」焉,九人而已。三分天下有其二,以服然乎? 唐虞之際,於斯爲盛。有婦人

二,而 有 至德處也。」● 當誅兮,天王聖明。」道得文王心出來,此文 婦人,邑姜也。」 然又有婦 亂 臣十人,以唐虞之際方之,周爲盛 伊川《解》曰: 尚 「韓退之作《羑里操》云: 人焉,惟九人耳,才之難得如 事於殷,可 又曰: 「舜有臣五人,而武王 謂至德也。」 「三分天下有其 又《語 臣 此。 也 罪

言罔攸伏,野無遺賢,此天下所以治也。」 之類,夔龍、伯夷之屬,猶不與焉。孟 而 ,係賢 相之,則恭己正南 范曰: 已。五人者,禹、稷、契、皋陶、益諸 『堯舜之仁不徧 人之用舍。 「舜之治天下,其道至簡也,任 愛人,急親 五人旣舉於 面 而 已。夫天下之 賢也。」 則 子 得 臣

> 德而 翼。」文王之德足以代商、天與之、人歸之、 以 又 之小心。《詩》曰: 是,不能有天下。」 叔、閎夭、散宜生、泰顛、南宫适。 其後武 於武丁,其臣一二人。至於文王,則 夏、商有不及也。周公作《君奭》,自成湯 十人者同心同德,以濟 伐商革命 不取而事之,所以爲至德也。古之聖人,論 民之心,仁之厚也。」有君民之大德,有事 「下之事上也,雖有庇民之大德,不敢 叔猶不在 王之時,人才之多,比之前世 日 四人成功,而太公、周公、召公、畢公、 並 不 也 計 天下 功。 ,順乎天 焉,亦足以見其臣之多矣。 孔子曰: 。周之盛 未 當無 [而應乎人而已,不足以 「惟 獨 又曰: 天下,此爲難也。 才,才之大 【《武》盡美矣,未 稱文王者,武王之 此文王,小心 「孔子曰 有 有 如 王

■「文」下,四庫本有「王」字。

善也。」

事殷。皆爲至德。」讓,民無得稱。文王三分天下有其二,以服讓,民無得稱。文王三分天下有其二,以服

爲人臣亦何以異? 故有君民之大德,有事 之至可見矣。」 取。爲商之民 之才難。 君之小 不蘄得民,而民 謝曰 才非世之所謂才也。」 以 「稱舜與武王之事, 晉魏之事觀之,則文王之 與爲吾民何以異? 自歸之。 其勢可 而 臣 取 歎 又 人 日 天 而 德 與 不 下

之所命,乃在天下既平之後,故其命益 方者,五臣 之初,天下猶未平,洪水横 天工者,二十有二人,而獨 才者止此,可不爲難乎? 誠、齊聖、廣淵,不在 而已,孟子之所稱 「古之所謂 此 列。 才者,非明 然舜之時所與 流,爲之宣力四 稱五臣者,蓋舜 以虞周之盛 者 是 也。 允、 日 而 亮

> 王曰: 作而行事者也,故言此四人而 與奔走往來者異矣,故不及也。」 亂,自周召、太公、畢公、榮公,皆論道之官, 叔而下能往來兹迪彝教,所未能往來者,蓋 有二人,有不與五臣之列,亦其時焉耳。 與烈山澤而焚之,禽獸逃 『武王惟兹四人尚迪有禄者。」蓋四 一若予上下草木鳥獸。」言若 「予有亂臣十人。」而《書》又曰: 匿 異矣。 门,则 已。若夫十 非 人自 號

與?」而猶服事焉,得時中之義也,兹其爲至德也一焉,則猶非獨夫也,雖德力皆足以勝之,又曰。「三分天下有其二而已,紂有

曰:「三分天下,周有其二,而猶不失臣如此。● 孔子歎其才難,謂才難得也。」 又尹曰:「舜與武王有天下之其得人止

0

[「]舜與武王之有天下其得人止如此」。

節 服 事 商, 此文王 一所以 爲至 德

子曰: 宫室 致孝乎鬼神,惡衣服 而 盡 「禹,吾無 力乎溝 閒 洫 而致美乎黼冕,卑 然 0 矣。 禹, 吾 非飲 無 閒 食 而

明道 日 0 「言德純完, 無 可 非 間

伐, 無 勤 者,惡榮也; 至於祭祀黼冕, 間 而有所用其力,儉而有所用其美,此所以 此其盛者也。 然者與? Ħ 禹之德,惟儉與 至於溝 則 菲 有所 食惡衣者,惡華也; 洫 用其美也。 ,則有所用其力。 勤 有功而 卑宫室

無間隙可言其失。」

卑宫室,則禹之於天下何與焉? 飲食,致美乎黼冕而惡衣 下,非樂享太平之奉己也,致孝乎鬼 言」之間,猶言 謝 吕曰 E 間 我 如一不間 無 得 而 服,盡力乎 議之 於其父母 也。 溝 神 禹 昆弟之 有 而 洫 天 菲

> 致 飾者宗 楊 日 廟朝廷之禮,故能有天下而 「薄於自奉, 而所勤者民之事, 不

所

與焉 ,夫何間然之有?」

無 勤 得 而 間 者也。」

儉

未嘗爲

己也。

兩

稱

吾無間然,深言其

尹 曰:

「禹之貴爲天子,富有天下,

其

國 朝 諸 老 先 生 論 語 精 義 卷第 四 下

終

四

國朝諸老先生論語精義卷第五上

子罕第九

須尋自家穩便處,皆利心也。聖人以義爲 哉 ? 財利之利,凡有利心,便不可。 言利與命與仁,所謂利者何?」曰: 所言如此,亦不爲多也。」 義之和。」以義而致利,斯可矣。 罕言仁者, 以其道大故也。 也,蓋人不當以利爲心。《易》曰: 微、仁之道大、皆夫子所罕言也。」 録》曰: 伊川《解》曰:「計利則害義,命之理 子罕言利與命與仁。 蓋仁者大事,門人一 「子罕言利,非使人去利 《論 語》一部,言仁豈少 一記録,盡平生 或問: 如作 而就害 「子罕 「利者 又《語

利,故便不是。」利,義安處便爲利。如釋氏之學,皆本於

常多,故罕及於利。盡性者方能致命,●未常多,故罕及於利。盡性者方能致命,●未達之人,告之無益,故不以亟言。仁大難名,人未易及,故言之亦鮮。」

理盡性,然後能至。仁之爲器重,其爲道理盡性,然後能至。仁之爲器重,其爲道理盡性,然後能至。仁之爲器重,其爲道建。三者皆君子所力行而不可以易言,學者未足以及此,則不以告也。」

也」,始可謂之言命,如言近仁仁之方,始寇」,始可謂之言利,如『莫之致而至者命謝曰:「必如言『利用行師」、『利禦

^{▶ 「}先生」,和刻本校云: 「先生」二字宜刊。

書》卷三作「至」。

❷ 「致」,和刻本校云:「致」疑「至」字之誤。按《張子全

可謂之言仁。 知此,則夫子於三者固罕言

切。」 利? 言也。● 道得親切, 日: 本體,則未嘗言。」又問:「罕言利,是何等 方,蓋接之使從此來,以至於仁, 若仁之 何也?」曰:「孔子告諸弟子,只是言仁之 已,仁則未嘗言也。」 矣,亦曰罕言者,蓋子之所言,求仁之方而 後 上,乃可以與此,故罕言也。 問 可與言命,盡 尚 楊臼 日 「皆仁之方也,若正所謂仁,則未之嘗 又 曰: 孔子曰: 不敢當,且罕言之,則仁之道不亦大 故曰: 「《論語》言仁處,何語最爲親切?」 「一般若利用出人之利皆是。」 唯孟子言『仁,人心也』,最爲 知 「今學者將仁小却,故不知 心然後可與言仁。 『子罕言利與 義而後可與言利, 『若聖與仁,則吾豈敢?』 問 「孔子罕言仁, 然對問仁者多 命與仁。』要 知 中 性 親 以 而

丽

御矣。」

而

乎 日 ? : 由 然則 義行,非行仁義,所 所謂 合而 言之道 也 謂 合 何如?」 也

義 後至於仁: 尹 窮理盡性,然後至於命; 日 皆難言者也,故罕言。 「君子以 義爲利 計 盡 人道, 利 則 害

無所成名。」子聞之,謂門弟 達巷黨人曰: 吾何執? 執御乎? 「大哉孔子! 執射乎? 子 博 日 吾 而

執 ? 執之最下者。 故夫子聞之,而謂門人曰: 怪其不以一善得名於世,蓋不知聖人也。 得 稱 伊川《解》曰 成名也。 御乎? 執射乎? 達巷黨人大夫子之博學, : 「常人之學,多以 吾執御矣。」御, 「欲使我何所

范曰: 無 所 不學日 [博學。 無得 而

0 則 下, 四 庫 本 固

四 $\overline{\mathcal{H}}$

此 無 見 所 御。 而 成名 吕 達巷黨人,其名不傳, 人稱: 日 知者 聖人之道無不通,故 其大,而己處其 也。 無 所成名,聖也。不欲自居, 孔子不敢居聖,故自名爲 小,事之宜 m 知 人無得 聖人如此 也。 圃 見

굸 謝 『謙 日 而 不敢執。」 無 不 能 故故 不以 名 介甫

故

願 名

藝。」

吾執 弟子曰 不知 亦 予非多學之意。」 御矣。」御,藝之末 有 楊 所 日 謂 一吾何 達巷黨人知 以貫之者。 執? 也。 執御 孔子博學 故子聞之, 自謂 乎? 執御成名, 執射乎? 圃 謂門 르,

者博, 於世 目之也。 欲使我何所執 尹 蓋 而 日 慕 疑其 達 : 聖 巷黨人見孔子之大, 人 無 聖人道全 而得爲名乎? 而 所 成名。 不 知者也 而 謂不以 德備 然則 故 意 孔 不 吾 善 其 미 所 將 日 得 偏 名 : 學

泰

則

從

禮

知

禮之本故也。」」

謝

日

「介甫云:

儉則從

:

御 也 御, 藝之下者。

四四

從衆。 雖 子 日: **建衆**,吾從下。」 拜下,禮也, 「麻冕,禮也 今拜乎上,泰也。 今也 純

也。」 於義 不可泰也,寧違衆也。 從衆可也; 者, 伊川《解》曰: 從俗可 拜乎上 也; ,泰也,泰謂 麻冕用純,儉而 君子處世,事之無 害於義,則不可 簡 慢,事 無 害 君

欺。 非也。 舉 君臣之義,舉 從之,非也, 或違之,唯 故純 范曰: 聖人之道若 儉雖 世行之,亦不可從也。」 「衆人之所爲,君子酌焉,或 其是而已矣。 不 及 以衆爲 權 禮 衡,輕重 而 流俗 可 從, 以衆爲公義 而舉違 不可以 拜 上 之, 銖 虧 從 兩 亦

258

焉」 四 庫 本作「也」。

不 以 廢 違 楊 禮 日 而 異 禮 從 宜 拜 而 Ė 己。 而 泰 純 則 儉 不 而 以 宜 同 衆 則

m

褿

於從違,合乎義而 尹 日 聖人處世 己。 可 見於此。 蓋 非 有

也。 者任 之與 未 始則須從 古 在 于意 又曰: 則 發之前 有 我旣亡 意,必 己。 固 伊 子 渺 ·絶四: 我。」 又曰: 川 必 執 然 之後,必有事焉,此學者所 固 絶 ,則學之至也。」 解》曰: 「無自任 者必行,固者 我 四 又曰: 身在天地之間 殊也。」 去。」 又曰: 既亡之後,而復于喜怒哀樂 「不以己待物,而 毋意,毋必,毋固 私 「敬則無 「任意之與私 意,無 又曰: 「至公無 又《語 固 又曰: 而 執,我者私 必爲,無固 己可克,學之 録 「君子之學, 與天 私 ,毋我。 以 Ĕ. 大同大同 物待物 「意必 宜 地 盡 無 無 心 以

否?」目

「然。」

絶此 也。 是所 所言也。」 也; 利 異 意 必相近,須要分别出不同 無私 也。」 而 也 大夫 存 意發 四者,何用禁 意 毋我者,循理 問 處,意是發 何 而 無必爲,無固滯,無彼我,乃 礙 又曰: 當 焉 聖 則 又 ? 一人莫 是 日: 動 止 「毋,非禁 不可 佛 理也,發 ? 處 氏 是任 守己也 如 意 厭 處 毋 先 與 意 我 根 理 而 意 止之詞,聖人 意 者, 相 不 承 塵 而 與 ·當,是 近,固 志 志 不 不 又 則 别, 曾 妄 日 意 自 與 别 私

之,雖 善 由 正己而正物,猶不免有意之累 已當爲 有事焉,而聖不 之也。 ,利之也,假之也 横渠曰 善、皆意 而爲之,雖殺人,皆義 有意在善,且爲未盡,況 也。 「絶 미 知 正 四 也。 一之外, 己 無 뻬 意 物正,大人 心可存 爲善,性之也 又曰 也, 也。 有意于未 處 有 有 不得 也 心 蓋 爲 爲 必

養 待 古 合明,然後能無 行則 而 我 也 無 也 ? 無意 與 害矣。」 物 天 仲 固,不化 必 存 地不相 尼 又曰: 焉,非 固 絶 [我之鑿。] 方體 又曰: 四 也 似。」 誠 自 , 也 始 意 我,有方 學 無方體 「天地合德, 有 又曰: 至 四者盡 又曰: 私 成 也 也 以然後 德 去, 天 竭 四 「意必 能 日 理 . 者 則 兩 月 有 有

則 四 (之先,此知聖人之精微者也。) 能 有 也 而意與必主於外, 我近於意。 志 必 范 己,故 意者,己之私也,●動於内 日 必則守而不 有 是 我。 有意則 四 者 是三者皆出 固 皆 我主於内 移 有 生 我,有必則 故有 於 心 於意 固 而 ,此所以 係 固 於事, 故 有 固 近 固, 间 爲 於

> 亦 私 與 意 孟 也 子 ·異 物 (矣。」 存 乎 其 中 則 與 天 地 不 相 似

化 正即 者有一焉,與天地爲不相似。」」 楊曰: 意也; 謝 我 日 則 不 孟 「毋意者,毋私意 必如必信必果, 能 大 子 ,謂「必 同 於物。 有 事 而已; 張 焉 固 先 則 丽 生 所 勿 過不 正

與 意,則不可無也。 人,詳視 時偕行, 毋我則道 而默識之,不足以記 毋必則惟 通 爲 義 0 所 此 非 在,無 智足 固 若 知 則 誠

與天地不相似。」」 四者或有一焉,則蓋無之也。張載曰:『四者或有一焉,則尹曰:「聖人之絶四者,非止之之辭,

乎? 子畏於匡,曰: 於斯文也, 予 何? 天之將喪 天之未 斯 「文王旣没,文不 文 喪斯文也, 匡人其 也,後死 者 不 得 在 與 兹

■ 「也」,四庫本無。

我則無天。」

又曰:

孔

子

絶

四者

意

則

八無義

必必

則

無

命

占

則

無

故曰: 世、舍我其誰?」聽天所命、未能合一。」 欲 盛,與天爲一,出此等語,自不覺耳。● 孟子地位未到此 得與於斯文,則文之興喪在孔子,與天爲一矣。蓋聖人德 别。」謝氏所記云: 文也, 医人其如予何!, 喪乃我喪, 未喪乃 也,後死者不得與於斯文也, 未喪,我 有所受命之語。 唱道在孔子, *聖人以爲己任也。」 孔子免医人之圍,亦苟脫也。」 文王旣没,文不在兹乎,此聖人極斷置以 (平治天下,當今之世,舍我其誰 明道 『夫天未欲平治天下也,如欲平治天下,當今之 又曰: 自做 曰: 着天裏。 「文不在兹乎,文未嘗亡。 「於天之將喪斯文下,便言後死者不 『夫天未欲 若孔子謂『天之將喪 聖賢之言,氣 平治天 天之未 乎? 下 又曰: 又曰: 也 喪 斯 自 我 文 是 斯 如

此則天也,非人也, 若天命不害,人豈能聖人樂天知命,故不憂。如使惡人能害己,遇難,則有所不慊,道不可詘,命可辟故也。 范曰: 「《易・困》以致命遂志。君子

違之乎?」

乎? 也; 修 謂 壞樂崩,數千百年莫之能復,殆天之喪斯 命,以文之得喪任諸己。 無聖人則廢而已。 廢,文有得 在天,匡人何與乎?」 道則出 能傳文王之文章,文章者,前後 日日: 然道未嘗喪,苟有作者,斯文其 乎天而已。 有 「畏者,有戒心之謂。 道出乎天,非聖人不 故孔子以道之廢興付諸 斯文在己,斯 又曰: 及秦滅學焚書,禮 「道 聖 孔 有 文 子自 興 得 之 Ż 有 所

斯文,天也, 未喪斯文,亦天也。聖人,天不敢必,然命有在我者,夫子猶自必也。喪道之顯者謂之文。畏於匡,其死不死,夫子謝曰:「孔子師文王,故曰文不在兹。

[唱」,四庫本作「謂」,公善堂本作「倡」。

^{●「}覺」,四庫本作「欲」。按《上蔡語録》卷一、《二程外

文, 之所 我之將喪 也,故曰其如予何。」 不能 天之未 違 以斯文 也。 喪斯 也,使後 其 文,猶 言 天之將 死 日 者 我之未 喪 不 斯文, · 得 與 喪 於 斯 猶 文 斯 \Box

兹,人如之何哉?」楊曰:「斯文之興喪,天也。文實在

不在兹乎? **匡人其如予何?** 者,其道固未嘗亡也。 尹曰:「文王旣 然則文之喪與未喪皆末也, 君子之當患難,斷以 没,而 孔子以爲己任,故 文王 一所 以 爲 理 而 則 文

子多乎哉? 不多也。」牢曰: 知我乎 將聖,又多能也。」子聞之,曰: 太宰 何其多能也?」子貢曰: 問 於 子 吾少也賤,故多能鄙事 貢 日 「夫 子 一固 聖 「太宰 天 者 縱 與 之 ? 君

云

『吾不試,故藝。』」

「功業不試,則人所見者藝

而已。」

多; 在 人也,故夫子自謂由於少賤,又以 周公亦自謂多才多藝。 多 子志其大者遠者,而遺其小者近者,故不必 能 君之職,則當任人而治,恭己正南面 乎多哉?」 范曰: 謙也。 學者所患,不得其本而求之末也。 聖人于天下之事無 「夫子不自以 然而多能非 爲 聖,而 所 不試 不 自 所以 通, 以 故 爲

不多也。」 者 不 認多能爲 必多能。 謝曰: 孔子以在 君子,故曰: 多能 不害爲君子,然 下故多能,其 『君子多 乎 意 爲 哉? 恐學 君

其餘 也,賤故多能鄙事。君子多乎哉? 不多 子所當務者 日 事耳。 楊曰: 『固天縱之將聖,又多 ,大人之事而已,鄙事宜 蓋有大人之事,有小人之事, 多 能 非 聖 人之 能也。」多能 事,故 非所 子 乃

也。 也 9 繼 以 牢 日 . 「吾不試,故藝。」 蓋申 說

哉 ? 聖人之教人,使知其所以多能,以不試 我乎 恐太 又多 之多能,藝也。子貢 云 爾。 能 宰以謂君子必多能,故曰: 侯 不多也。」又曰: 『吾不試,故藝。』亦 也。」藝,聖人之餘 吾少也賤,故多能鄙事。 「夫子故嘗言遊於藝矣,孔子 日 : 一固 事。 故夫子聞之, 天縱之將聖, 君子多乎 『太宰知 故

道

事,蓋以少也賤故也,而所以 也 太 所 在乎多能 ? 宰疑之曰: 爲 君子者,在乎明 尹曰: 故 日 太宰 君子 子果聖 知 固有多能 道 我 ,不在乎多能 人 乎? / 敷? 爲君子者,實 者矣; 吾之多能 其多能 也 而 鄙 其 何 故

子曰: 問 吾 有知乎哉? 空空如 我 無 叩 知 其 有

極

其

而 竭 焉。」

教

親

乎

也。 聖人 知。二 問: 日: 不親, 人他 知,子曰: 嘗高其說, 삠 ? 兩端 不尊。觀於孔子、孟子,則可見矣。」 也 人,俯就之若此,猶 其高遠者, , 如如 當 孔子常俯 就 無 「吾有知乎哉? 吾無隱 者,如 聖人之道必 ĴΠ 横 何?」曰: 也 X 知 賢人之言則引 E 渠 不問時 也,與『吾 『知人。』舉其近者,衆人所知, 不高 兩端 言 、樊遲 乎爾。」無 雖聖人亦如是矣。 就 子 則道 猶 人 與木 問 聖 降而 7,不就則 日 日 「才說 仁,子曰: 無 不尊。」 恐 : 林 石同 而 隱 知之謂也。 無 衆 自卑,不 頭, 二三子 無 無 自高,不如 知 j 乎 人不親; 謂終始告鄙 也。」 以 知 又曰: 知 也」者、盡以 爾 ,便不堪, , 爲高遠 『愛人。』問 其與人言, 如此,則 因 同。 以 問乃 聖 又曰 此, 我 人之 而 爲 孟 有 告 叩 夫 是 或 又 則 人

五五二

莫不皆然,終始兩端皆竭盡也。」

知。 無 然言 由 兩端 兩端而 其 易》 知 知變化 吅 必 之盡 横 乃 無 是 告之。 因 渠 又 有 言 思 以 日 人爲 也 日 聲; 也 盡 無 鄙 0 夫 爲,受命乃 天下之道 變化,所貴乎聖人 然問者隨 八有問 仲 聖人未嘗 又曰: 有 尼應問 不 仲 知 則 才分各 雖 尼 如 有 鄙 洪 叩 雖 有 響。」 知, 鐘 夫 知 兩 加口 足,未 未 有 端 之辭者,以 兩 由 無 端 嘗 問, 而空空。 問 又曰 不 有 而 乃 必 必 知 竭, 有 11 則

是之謂 之,惟恐人苦其 故 不肖者言 爾。」不 人言,推 E 范 唯 日 兩 二三子 丽 門 端 下 推 人 之, 而上之,雖聖人 如 聖 樊遲 高 人 以 DĽ. 此 遠 於賢 鄙 夫 我 問仁,子曰: 而 爲 兀 不親 夫之問 愚未 婦 隱 乎 口 亦無 也 ? 與 嘗 亦 不 知 聖 必 吾 以 竭 焉 人 俯 無 加 其 人。」 與 隱 焉 而 誠 腎 就 平 朗

> 之言, 竭 此, 陶 問 焉。 知 過 湯 此 舉伊 此 其下則樊遲可行 衆 子 以 人 尹 往 所 : 一無餘 是 能 亦 知 知 愛 所 人 知 <u>_</u> 人 矣, 能 ',其高 知 行 故 人 者 也 日 則 而 愛 미 舜 已 而 其 湯 矣 舜 知 亦 兩 舉 者 孔 不 调 泉 知 ௱

有 問 吕 無不 曰 : 盡 焉 空空 無 知 有 感 必 應 雖 夫

故 雖 語 謝 下,形 日 「不竭 而上者亦 上下 無 兩 不 端, 盡。 非 聖人

意。 亦若是 則 我 也 在 吅 ,叩之則鳴; 然 其 所不告矣。」 楊曰 空 兩 而已。「有鄙 空 端 如 而 善待 也,故告之,若 竭 聖人之無 馬」, 問者 夫問 亦「吾 如 於我, 知 撞 因 夫 無 鐘 鐘 隱 有 空空 問 挾 乎 而 非 爾 如 而 有 問, 也 知

近 則衆人皆可與知 尹 日 聖人之言, 極 E 其至 下 皆 則 盡 雖 聖 即 其 人

遺 問 亦 夫之問,亦竭兩端以告之也。」 下,語理而遺物,豈聖人之言哉? 無以 加 加 ,兩端竭 盡,無餘知矣。 是之謂 兩 端。 若夫語 如答樊 遲 雖鄙 Ŀ 而 之

子曰:「鳳鳥不至,河不出圖,吾已矣

興而已。」

夫。」

而 貴祥瑞者,蓋因災而修德,則無損 必有禎祥, 事,果有之否?!日: 日 已矣夫」者,嗜欲將至,有開必先也。」 自恃,則有害也。」 伊川曰:「『鳳鳥不至,河不出圖,吾 「鳳鳥不至,河不出 人有喜事,氣見面目。 「有之。 圖,不知符瑞之 國家將興, 聖人不 因祥 或

羲、舜、文之瑞不至,則夫子之文章,知其已 横渠曰:「鳳至圖出,文明之祥。 伏

至,河圖出。夫子閔天下生民不得其所,傷 范曰: 「天下有道,聖人在上,則鳳鳥

也。」 也不逢太平之時,故曰吾已矣,言終不得見

雖明王之時,未必有也。其意止言明王不謝曰:「鳳鳥至,河圖出,是亦適然,

堯舜之治也,故曰吾已矣夫。」至,河圖出。孔子傷天下無道,其不見伏羲至,河圖出。孔子傷天下無道,其不見伏羲尹曰:「天下有道,聖人在上,則鳳鳥楊曰:「斯文不興,則孔子其已矣。」

子見齊衰者、冕衣裳者與瞽者,見之,堯舜之治也,故曰吾已矣夫。」

雖少,必作,過之,必趨。

成人者,所以教民慎獨也。凡天下之窮民,也, 敬有爵者,所以教民嚴上也, 矜不范曰: 「哀有喪者,所以教民恤窮

^{▶ 「}知」"原作「知」字"今據傳經堂本、公善堂本及《集註》校云" 「如」疑「知」字之誤。按"《論語集註》引張校云"「如」,原作「如」,傳經堂本、公善本並作「知」,和刻本

獨。 不 地則皆然也。」 廢 所 夫子見之,必爲之變,與帝堯、文王易 困 窮; ,聖人所重。 文王發政施仁,必先鰥 是故帝 堯 不 無 寡 孤

敬之道 謝 焉。 冕衣裳,貴者之服。」 「元澤曰: 『孔子於此, 有愛

體 過之必趨,所以廣愛敬也。瞽者人所易,以 蓋其愛敬出於誠心,而暴慢之氣不設 不見 凡此,皆自盡而已,非爲人故也。」 楊曰: 也 「於斯三者,見之,雖少必作, 聖人不以其不見 而加敬焉。 於身

間也。」

者、冕衣裳者與瞽者,敬之,理也,順 侯曰: 「聖人之道,明理是也。 理 齊 衰 丽

皆聖人之誠心,内外一者也。」 尹 曰: 「哀 有喪,尊有爵,不欺 其不

喟然 之在前,忽焉在後。 歎 日 「仰之彌 夫子循 之 循

> 在中間耳。 去孔子甚遠,顔子瞻之,只在前後,但 知道之無窮也。 不能。 明道曰: 欲從之,末由也已。」 若孔子,乃在其中焉。 既竭吾才,如有所立卓爾。 「仰之彌高,鑽之彌堅,則 我 瞻之在前,忽焉 以 文, 約 我 以 在 欲 達 罷

深

也。」 何?」曰: 已」,此顏子所以善學孔子,而深知孔 聖人立處,顏子見之,但未至耳。」 不及甚微,惟顏子自知,他人不與。卓 在後,過也。如有所立卓爾,聖人之中也。」 又曰: 《淵歎孔子,●曰「仰之彌高」至「末由 伊川曰:「瞻之在前,不及也, 或問: 「在前是不及,在後是過之,此 此是顏子稱聖人 「博我以文,約 八我以 最切當處。 又 日 爾 调 世

聖人教 形容者 業 以 之 也。 之以 不 高,見其 道 事,●處以 孑孑,如匹夫匹婦之爲諒 堅而未能 識 博是博學,多識多聞 个,真 一,在前在後 理 ,庶幾可 盡 學於孔子之謂 前言往行, 知要也。 ,便有進處,若 博與約 禮 横渠曰 人譬如 也。 高 更有 所謂 達 此理,又曾何足論 只是 閑 以 而 博學於文,約之以禮,雖未能 IE 也 疑 ,竭吾才則又見其卓爾乎 而能 不畔於道。 甚 未 博 又曰 相對,聖人教人,只此 「大中至正之極, 如 能至也; 學 事出得? 此顔子 0 此。 也 不犯非 加 不知 : 視世之仁 多見之謂; 詳 旣 得,則 得 說之,將以 知聖人之學, 博之以 又曰: 禮者爾 此言善 也。 此義 鑽之彌 ? 視世之功 義者,真 何 若 目 ,理,有 文, 人君子 文必 視 緣 知 非顏子所 約只是使 仰 堅, 反說 天 仰 得 而 兩字 之 能 名 測 來 煦 何 這 而 又 高 其 彌 約 約 簡 大 煦 知 致 鑽 事 事 盡

> 乎? 後 日: 極, 其 子之忽焉在後也。」 未見其止,故擇中庸 大 用, 則 可 中 惚 約 有。」 極其大,然後中 道 又曰: 必 前 不 能 後 미 感 又曰: 不 識,蓋 而 可 高 通 爲 得 明 顏子之歎 之象, 可求, 不 未 顔 善拳拳 可窮,博厚 至 氏 求 於 此 止其· 此, 服 龍 顔 也。」 噟 德 子 其 (中, 而 正 之 不 歎夫 視 聖 又 可 歎

人者。 彌 約 誘,故進而不已,學而能 미 測也。 堅 我以禮,亦顏子所學 范曰: ,不可至也; 顏子以己之學所至而言 是四者,言夫子之道循循然善 「仰之彌高,不 瞻之在前, 也。 至 也 可 文欲其多,故博 忽焉在後,不 度 也。 博 也, 我 見其善 以文, 誘

0

0

膏》卷二上並作「閑」。 「閑」,原本存疑,明抄本「閑」作「門」。 按"《二程遺

云"「來」疑「下」字之誤。按"《遺書》作「來」。

雄所謂 至也 其 堯 聖人者歟?」 夫子之高 子, ●非 司 舜 企而 禮 未達 如有 ボ 欲 貢以 深,則未 及之故 尊聖人也,然而以己之所學 其 所立卓爾,此顔子所 簡,故約 間者也。 謂 自 也。 有如顔子。 生民 旣竭吾 之。 宰我以 以 來 欲 罷 才者,終不 未有 此所 爲夫子 不 不 能 及也,楊 以 盛 者 賢 幾 而 於 於 夫 於 能 知 見

循 矣,則又卓焉者,如 禮,使有 善誘者也。 不可 吕曰: 趨 入 向 德之途。竭 「高、堅、前、 然夫子循 不 可 才而進,自 企而 後, 循 及之,此 善 恍 誘,博 惚 以 不 爲 皆 文 可 約 循 至 爲

瞻在 中 則 而 口 能 而 之學豈徇外 自 前 己。 謝 反 日 忽在 故故 又曰 後,此 日 學 : 然 者 『雖欲從之,末由 理惟顔子知之。 乎? 後 知 顔 不 將以 子學得 足。 求 仰 親 於 高 切 所 也 知 鑽 己。」 不足 如 性 堅 孟 >

> 先,大 則 得 無 約 顔 子。 味,遂生厭倦 又蹉却,以見聖人之道 聖人之道大; 來 不然,先使學者有知 其門人下稍, 守,便當 我 子看得極親切。 仰之 困 以 (要欲 無所 禮 彌 以 歸 得正 高 見處,如 ,故其學 禮 宿 瞻之在前 爲 頭 容謹節。 鑚 處 地, 溺 之 博我以文,使知 也。 彌 於形名度數之間,●行 喫木 無傳之者。 教他就 識 中。 堅 横渠教 即 其意謂世人汗 却從敬 札相 無 觀 不 上 及 此 限 似, 人,以 面 量 人。」 明 忽焉 段,即 識 做工夫。 也 更没 道 廣; 禮 先 在 以 滋 漫 牛 爲 知 後 見

卓爾而 欲之善充而至大,力行之積也。 及,故瞻之在前,忽然在後,見其 楊曰: 己。 謂之如,則非見之盡 「孔子聖而 不 可知, 也、蓋 大而化之, 如如 非 有 鑽 自可 所 仰 V 所

0 9

[「]謂」。四庫本作「爲」

[「]知」,四庫本作「之」。

[「]頭」,四庫本作「頗」,按:《上蔡語録》卷一作「頭」。

足 則 以以 非 非 及此 窮 力 神 行 知 ,餘人不與也 可 化 至 其 一, 故 孰 雖 能見之? 欲從 之, 末 故 由 惟 也 Ē. 顔 淵 爲 至

以 子則不勉而 許之亦然,亦是 我以禮,是克己復禮。 禮,此 侯曰: 是顏子拳拳服膺 中,不須言約 「博我以文、是致知格物、 感 而 遂通 顏子自得如此,孔 圃 天下之故。 勿失之事 ş 約 子 我 孔 約

卓 得乎中而已。 彌 雖有得而未得其止也,故欲罷不能, 爾 堅,不可入也; 、欲從而末由 於臣 臣。 尹 子疾病,子路使門人爲臣。 久矣哉,由之行詐 ļ 日 之手也, 吾誰欺? 且予縱 然非顏子則不能知之。 仰之彌高,不可及也, 也已,其未達 不得 無 瞻之在前,忽焉在 欺天乎? 寧 大 也! 死於二三子之 葬, 予 一間與 無臣 且予與 死於 病間, 而 位後,未 道 其 見其 鑽之 爲 日 其 有 死

乎?

心也。」 可 也。 行詐,罪至欺天。 而 吾得正而 不慎。 不知無臣 夫心一不正 范 티 : 夫子深懲子路,所以儆學者正 斃 不可 馬, 「曾子 ,則將無所不至,是以陷 爲 斯已矣。」子路欲尊夫子, 君子之於言動,雖微 有臣,此 將 死, 起 由其 耐 易 心術之失 簣 其 不 於

無 所以 臣 尊也。 ൬ 謝 爲 日 有 臣乎? 使其實有臣, 「子路之意,實尊聖人,而 夫子猶不 加 未 知 況

知行 欺 也。 可欺乎? 也 其子 其所 , 楊 日 無 路之謂乎?」 無事, 臣 蓋非 「孔子之無臣,人之所 而爲 往 知 往自陷於行詐 至 有臣,是 而 意誠 欺 用智自 天 而 而莫之知 己 知 1私,不 不不 天 其 可

孔子所以言子路之詐也。」 侯曰:「無臣而爲有臣,欺孰甚焉。

三五七

門人行 責之。」 家臣 日 一之禮焉。 「子路以 孔子惡其 夫子嘗 爲 不誠,故深 大夫,故 使

致敬 伯夷之居於海濱 所遇,此 以其道。 而 子、孟子亦如是矣。」 子周流天下, 豈不欲行哉? 然而 己。 盡 子貢 范 哉! 諸? 禮 日 則天也。若伊尹之耕於野、太公、 未有枉道以從人,衒玉以求售也。 日 ,則不足與有爲,故終身旅 士之待禮,猶玉之待賈也。 求善賈而 沽之哉! 「君子未嘗不欲仕也,又惡不 「有 一世無 美玉 沽諸?」子曰: 我待賈者也。」 成 於斯,鰛 湯、文王,則亦終 人君不 人 孔子、 (而無 沽之 而 藏

孟

由

之者,一冀其道之行也。 已,豈不猶韞 其道大而不容也。 謝曰: 「聖人非懷 玉 乎? 意 賜也以爲苟終於此 其 以其實 沽之哉, 沽之哉 必 有異 而 迷其邦者, 乎人之求 而

> 言必 楊曰 於沽也 我 待賈者也,言 非 求 也

爲也。」 矣。 之有 若夫求善賈而沽,則取賤之道,聖人不 美 人玉於 斯, 君子藏器於身,待時 韞 匵 而 不沽也,待賈 而 而 猶

豈不知聖人是待賈者也?」 是子貢少年 侯曰: 時。 「如子貢此問,非 若後 來對 叔孫 知聖人者,必 武叔之語,

謂我非 售,則不可也。」 尹曰: 不欲沽也, 「子貢以 待其可 美玉 也。自自 |喻夫子,故夫子 衒 而

有?」 庶遇 言忠信,行 於九 子曰: 横渠曰: 子欲居九夷。 夷,中國之陋爲 「君子居之,何陋之有?」 篤 「子欲居 敬, 或日 雖 蠻 九夷,不遇於中國, . 貊 可 顶, 知。」 可行, 如之何?」 又曰: 何 陋之

「可」,和刻本校云:

告人者,所以明道也。」處,則雖九夷可居也。夫子終不居之,而以行矣。君子所居則化,道無内外,不擇地而行矣。君子所居則化,道無內外,不擇地而 范曰:「言忠信,行篤敬,雖蠻貊之邦

謝曰:「素夷狄,行乎夷狄。」

之有?」

楊曰:「君子居之,則用夏變夷,何陋

也,亦乘桴浮海之意也。」可行。君子所居則化,何陋之有? 是言可行。君子所居則化,何陋之有? 是言尹曰:「言忠信,行篤敬,雖蠻貊之邦

《雅》、《頌》各得其所。」子曰:「吾自衞反魯,然後樂正,

樂,無其位,則正《雅》、《頌》而已矣。」於此,而能事畢矣。聖人有其位,則制禮作樂正而不淫,故《雅》、《頌》各得其所。學至樂正成,廢鄭聲,則

義者蓋多,如師摯之始,《關雎》之亂可見謝曰:「《詩》自未删之前,不止乎禮

矣。」

嘗治之矣,故不及《風》。」 「《雅》、《頌》各得其所者,因其舊而正之,非不敢作禮樂焉。則禮樂非孔子之事。所謂不敢作禮樂焉。則禮樂非孔子之事。所謂不敢作禮樂焉。則禮樂非孔子之事。所謂不敢作禮樂焉。則禮樂非孔子之事。所謂禮與《風》,何也? 曰: 有其德,無其位,

得其所。」 程徵也,故自衛反魯而樂正,《雅》、《頌》各足徵也,故自衛反魯而樂雅樂正,而魯猶

禮樂皆在魯矣,特殘缺不完耳。 日: 陋,然後樂正、《雅》、《頌》各得其所。」 天下,知道之卒不行也,於是反 在魯矣。」齊桓問 侯曰: 『未可取也,猶秉周禮 「韓宣子適魯,曰: 高子曰: ··· 如 「魯可取乎?」 魯,修廢 是,則周之 孔子周 「周禮 杰 補 流

一、孔子删《詩》正樂,反魯之年而後治成尹曰:「魯哀公之十年,孔子自衛歸

也。」

哉?」事不敢不勉,不爲酒困,何有於我子曰:「出則事公卿,入則事父兄,喪

道不尊,聖賢之分也,不爲酒困是也。」 所 困 明道 「聖人愈自卑而道已高,賢人不 處。 日 孔子於中間處之得宜。」 喪 事,人所 不 勉 處 高 則 又

度也。 後益 之者,不獨使夫資之下者勉思企及,而 子之常行,不困 忠信如丘者焉。」事上臨喪,不敢不勉。 也。」「我非生而知之者。」「十室之邑,必 無隱乎爾。]又曰: 『吾有知乎哉? 心怠矣,故聖人之教常俯 衆人之識甚殊邈也。 |知其高遠。既若不可以及,則趨望之 伊川《解》曰:「聖人之道如天然, 至日: 二三子以我爲隱乎? 于酒,尤其近也,而以 門人弟子旣親 而 就之,爲其莫能 炙,而 オ之 己處 無 君 知 吾 與

高者亦不敢易乎近矣。」

者,盡其敬也, 不爲酒 謂有之也。」 也。● 此四者,夫子之常行,故以告人,而 人則事父兄,●盡 范曰: 「出則事公卿者, 其孝 也 困,兼疑 喪事 盡 其 而 敢 忠 不 不 也 亂 觔

能。」 日曰:「庸行之謹,是迺所以爲難

● 「兄」下"和刻本校云" 「兄」下脫「者」字。

剛當之,過於深矣。」則傳經堂本作「安燕」,蓋近是。卑。……范氏似以『不爲酒困』爲不足道,故以燕飲不以『燕而不亂』爲『不爲酒困』如何?」曰:「此說本以『燕」,原本存疑,傳經堂本作「安燕」。按《朱子語類》

雖 聖人豈有異於人乎哉? 孔子之爲孔子,亦 以禮飲酒者,始乎治,卒乎亂,故多爲所困。 喪,皆是也。 長上,況公卿 聖人不敢 楊曰 : 有 乎? 凶事,人所忌而遠,故在所勉。 「爵、齒、德三者,天下之達尊, 其 m 喪事不必在己,凡民有 慢 其一,故出必事其

子在川上曰:「逝者如斯夫!不舍勉思而企及,其才之高者不敢忽乎近也。」之,所以俯就而教人也,使夫資之下者可以之,所以俯就而教人也,使夫資之下者可以

如是而已矣。」

有天德便可語王道,其要只在慎獨。」義。此見聖人之心純亦不已,此乃天德也。夫! 不舍晝夜。』自漢以來,儒者皆不識此明道曰:「子在川上曰:『逝者如斯

此,「往」,一本作「體」。這裏須是自見得。張繹伊川曰:「逝者如斯夫,言道之往如

然怎 日 . 生 此 箇 便 無 是無 窮 便道 窮。」曰: 1 却 他 固 是 道 無

天,厚 水流 乎晝夜,未當止也。 爲天運而 道故也。」 范曰: 而 德載物以地,見大水必觀焉,以其 不息,物生而 不 已,日往 一程 頣 日 是以君子自强 不 則 : 月 窮,皆與 「此道體也。 來,寒 往 道 則 爲 不 暑來, 體 息以 臣以 严運 似

以示之。」
理可窺易見者,莫如川流,是以聖人於此發理可窺易見者,莫如川流,是以聖人於此發謝曰:「已往者過,萬物莫不然,而其

則知有不逝者異乎此矣。」物流形。』流言逝而不反也。知逝者如斯,反,其猶川流不舍晝夜也。《易》曰:『品反,其猶川流不舍晝夜也。《易》曰:『品

天運 流 而 不息 而 尹曰 不已,日往則月來,寒往 物生而 臣 聞 不窮。 師 程某日 可 窺 而 則 易見者 此 暑 道 來,水 體 也。

如 川 亦不已焉。」 流 君 子法之,自 强不息,及其至也,

臭,此聖人之性也。以好色爲好德之心,則 惡惡臭,如好好色。好善如好色,惡惡如惡 可以入於聖人矣,故夫子未之見也。」 子曰: 范曰: 「所謂 「吾未見好德如好色者也 誠其意者,無自欺也,如

色,斯誠好德矣,然民鮮能之。」 謝曰: 「如好好色,誠也。 好德 如 好

惡臭,如好好色。」如好好色,則有誠意矣。」 學》曰: 臭,何患乎學之不至也?」 楊曰: 尹 曰: 「所謂誠其意者,毋自欺也,如惡 「言好德之無誠心也。 「使好德如好色,惡不善如惡 故《大

子曰: 也。」 止也; 譬如平地,雖覆一簣,進,吾往 譬如爲山、未成一簣,止、吾 惡

横渠 曰: 爲 山平地,此仲尼所以惜

> 顔 , 淵進未止,且與互鄉之進也

也。 之, 積小善必成大功,爲小惡必累大德故 其止也,雖大必棄之。 進,不欲人之止。其進也,雖 簣。1君子不以善小而不爲,不以惡小 「不矜細行,終累大德。爲山九仞,功虧 范曰: 中道而止, 「學者自强不息, 則前功皆棄。 召公戒 微必 聖人欲人之 武 則積少成 與之, Ŧ ·而爲 曰:

止。 至於大人矣,然不求至於化,不害其 謝曰: 「進則不可量,止則已矣。 爲

則行也: 止則止也, 楊曰: 亦各當其可而已矣。」 『未成一簣,止,吾止』者, 雖覆一簣,進,吾往」者,時行

未至 ,猶未成 尹 曰: 「爲學者譬 也。 孟子謂掘井九仞 如爲山, 雖 而不及 簣之

泉,猶爲棄井,亦此意也。

也。」
伊川曰:「語之而敬,故不惰,言好學明道曰:「顔子之不惰者,敬也。」
子曰:「語之而不惰者,其回也與?」

言也。 者 何 夫子之言,如萬物得時雨之潤,發榮滋長, 心,則斯須不去,造次顛沛未嘗違之。 惟恐有聞; 語之有時而 之,故語之不惰。 有於惰? 惟回而已,蓋顏子聞言語理,●一人于 范曰 然孔子獨稱顔子好學,語之而不惰 : 情。子路終身誦之,未之能行, 此門人所以不及也。」 口 子張書紳,非不力行,非不受 他人或不解孔子之言,故 聞夫子之言,心解 加 其聞 力行

事也。」 不惰。」蓋方憂親疾,所語者切務,不暇語他者,專心致志而已。《禮》:『父母有疾,言呂曰:「惰則志不在而之他, 不惰

不違,以神受之也。」
謝曰:「不惰與不厭之意異,聲入

而

游曰:「上士聞道,勤而行之。回心不違,以神受之也。」

於

弘之; 得所止 耳。 此 信人、志於仁、無惡 知欲仁矣。 子所以克己研幾,必欲用其極也。 其居,則無地以崇其德,與不及者同。 君子所以大居正 .與智,具體聖人,獨未 横渠曰: 又曰: 則 無中道 可 `樂正子不致其學,足以爲善人 以弘 「中正然後能貫天下之道、 而弘,則窮大 學者中道而立,則有位 丽 也。 而 至于大。 己。 蓋 得正則得所止 顔子好學不倦, 至於聖人之止 丽 樂正子、顏子 失其居,失 未至聖 此 顔

「聞言語理」,賀云:「聞言語理」疑有脫誤。

居,故惜夫未見其止也。」 人而不已,故仲尼賢其進, 未得中而不

未得其中而不止。」
謝曰:「吾見進未見其止,張先生謂

未嘗違之,是不惰也。惜乎吾見其進也,未至矣,未至乎終之而死,故孔子惜之也。」矣, 未至乎終之而死,故孔子惜之也。」矣, 未至乎終之,故未見其止也。顔淵知矣, 未至乎終之,故未見其止也。顔淵知

子曰:「苗而不秀者有矣夫! 秀而(其所止,●孔子所以歎之云。」

秀而不實者有之。人性質雖美,而不能學,范曰:「五穀之生,苗而不秀者有之,不實者有矣夫!」

有 于穀,然後爲賢。 則 面 不實。 如 長而不成者。 苗 加 苗必至于實,然後可食, 不秀; 人之學,必求成就,不 萬物皆然,有生而 雖學而 不能成德 則如秀 學必 不長, 可 如

苗而不秀,秀而不實。」

耨,耨而弗獲之譬。」 謝曰:「如《禮記》耕而弗種,種而弗

也, 秀而不實,學而不至於道者也。故申實矣。舍而不耘,或又揠之,則苗而不秀,實矣。」 然曰: 「苗而不秀,質美而不學者秀而不實有矣。知此,其知所養矣。」

曰:「仁在乎熟之而已矣。」」君子之於學亦然,是故惡夫畫也。孟子秀而不實者有之。然苗必至於實而後可,尹曰:「五穀之生,苗而不秀者有之,

足畏也已。」 今也? 四十、五十而無聞焉,斯亦不子曰。 「後生可畏,焉知來者之不如 之以下文。」

[「]長」下,和刻本校云"「長有」間疑脫「者」字。「所」,和刻本校云"「所止」之「所」恐衍。

五十 也; 之象也; ,所以畏後生也。若不能强學,至於四十、 [二十以孝聞,顔子十八天下歸 後生之學者,猶之冬至及夜半以 楊子 丽 范 旣壯 無 H Ħ: 夏至及日中以後者,遠玄之象 聞 而無聞焉,猶之夏至及日中以 「凡人進德,必 焉,其終亦 「冬至及夜半以 叮 知也,故不足畏 在于少之時 後者,近 仁焉,此聖 後 後 玄

聞者不足畏,見惡者至於終。」好惡習而成性,善惡已定,幾不可易,故無日曰: 「四十、五十,血氣盈而將衰,

也。」

而已矣。」四十、五十,血氣向衰,猶不聞道,則終於此四十、五十,血氣向衰,猶不聞道,則終於此之人可以並堯禹,故曰焉知來者之不如今。謝曰:「聞道無先後,造道之極,斯塗

畏,至四十、五十而無聞,斯亦不足畏也已。楊曰: 「有聞而後可進德。後生雖可

詞如此。」 蓋聖人與人爲善,又惡其怠而止,故抑揚

其

聞 若 是,故曰 如斯而已,故 侯曰: 後 人 生 、皆可 日不足畏。」 可 畏。 以 至 爲 四十、 堯舜, 五十 有 爲 者 亦

可畏也。」 矣。自少而進者,安知其不至於極乎? 尹曰:「少而不勉,老而無聞,則亦

是

也已矣。」 也已矣。」 也已矣。」 「法語之言,能無悅乎? 繹之爲

乎 景公知其禍,而不圖之,此從而不改也。 勿毁之。』此巽與之言也。王 宣王欲毁明堂,孟 『君君,臣臣,父父,子子。』此法語之言也。 」然而終不能行,此悅而 范 齊景 子對曰: 公問 政, 不繹也。人 曰:『善哉言 【欲行王政, 孔 子 對 則

子、孟子所以不能如之何也。」之患,在於有過而不改,聞善而不行,此孔

以裕己也。無以有諸闕。」而繹,從而改,然後有諸己。聞人之言,將言,故必從。說而從,特入乎耳也, 至說言,故必從。說而從,特入乎耳也, 至說謝曰:「以其巽言,故必說, 以其法

战?」 舞焉,是終不改繹也已,雖聖人其如何 其能改繹矣。其從之也,其悅之也,而不改 不受,猶之可也。其終或喻焉,則尚庶幾乎 好色好貨之類是也。語之而未達,拒之而 論行王政之類是也。 巽與之言,若孟子論 論行王政之類是也, 巽與之言,若孟子論

繹,小人則不 言,順理 必 棄自暴者也 面從,君子則必改,小人則不能。 侯 日 而言也。 「雖聖人無如之何。」 能。 法語之言,正也。 聞順言者必悅,君子則思 說 而 不繹,從而 聞 不改,自 巽 正言者 與之

所聞記之,故又見於此。」 范曰:「此夫子所常言也,弟子各以

志也。」 三軍可奪帥也,匹夫不可

心做主不得,更有甚?」得與也。惟心則三軍之衆不可奪也,若并主。若有人爲係虜將去,隨其所處,己有不主。若有人爲係虜將去,隨其所處,己有不

義。 是以 萬乘之主,有不能屈,況可 孟子論北宫黝、孟施舍之養 范曰: 志士皆養其志,孰可得而奪之乎?」 \equiv 軍之帥,衆可 「力不能勝德, 奪也; 勇,以明君子之 得 勇不能 兀 而奪之乎? 夫之志 勝

移,志不可移; 奪 ,是以 謝 \Box 謂 : 之志 我 心 死則可奪,志則不可奪。」 匪石, 可 奪非 不可轉 志 也 也 Ш 惟 岳 不 可 口

從之,不可以力而奪也。」帥, 匹夫之志,道之以其心之所同,然後帥, 匹夫之志,道之以其心之所同,然後

則非志也,僞也。」
帥, 匹夫之志在己,故不可奪。如可奪,帥, 匹夫之志在己,故不可奪。如可奪其侯曰:「三軍之勇在人,故可奪其

道也,何足以臧?」不敢者,其由也與? 「不忮不求,何用不恥者,其由也與? 「不忮不求,何用子曰。 「衣敝緼袍,與衣狐貉者立,而尹曰。 「人有志,則孰能奪之也?」

食,故夫子稱之。 范曰: 「子路志 夫恥 木 於 若 道 人, 而 不 則 恥 有 惡 疾惡之 衣 惡

於彼,故加之。 所以引之而至道也。」 未足更,未足以爲善也。子路自足於此,故抑之, 未足上者也。聖人之教人若權衡然,輕者抑之,夫子恐其自足如此,故勉而進之,使之至於上者也。聖人之教人若權衡然,輕者抑之, 人能無貪欲之心,則何用心,是害且貪也。人能無貪欲之心,則何用

求。」 日曰:「貧與富交,强者必忮,弱者必

初; 求,何用不臧?』未至于此,有改 求之心,夫何所施也? 心者,聞此言也,終身誦之,猶爲不忘 貉者立而不恥,其志過人遠 心不存,蓋生於此。由也衣敝緼 謝曰: 已造乎此,猶終身誦之,則幾於 又曰: 「恥惡衣惡食,學道者之病, 「子路衣敝緼袍,與 故曰: 其 ,❶則忮害貪 袍,與衣 過遷善之 『不忮 其 狐 成 不

● 「遠甚」,四庫本互乙。

二六八

者 欲 怕 此 此 ,只爲 立 却無下工 心因 侕 不 他 事出 恥, 心 一夫處。」 下 許 來,正 無 大 事 子 好著工夫, 此 等 孔 事 子 打 却 畳 只 得 不見 稱 過,不 其 可 如

也 此 忮,窒欲則 矣,非所以自進 修 恥 何足以臧?」蓋激之使進也。」 1,何以 楊曰: 德之事 不 與 而已,而 求,夫如 此 「非志於道 ? 於日 新也。 是,何 又曰: 子路終身誦之, , 而 子曰: 不臧之有? 不 以 能懲忿 惡 衣 則 是 惡 則 道 書 不 食

道 也。 惡衣惡食,故夫子稱之。 也,何足以臧?」蓋 無所用 侯曰: 孔子又恐其膠 志於道則仁也,故無貪求之心 而 「子路勇於進而志於道,不 不臧。 固 子路樂 爲 而 不忮不求,未足以 不 忮,害也, 通,故曰: 善,故終 以 求, 害其 身 是 誦 恥

尹曰:「衣敝緼袍,與衣美服者立,而

盡

善道故也。」

子又曰 之。 不 以 子路 爲 恥 誦不 者, 「何足以臧?」所以進之也。」 有守者之所 忮不求之言 能 以 爲至善, 也 故 孔 故 子 善

也。」 「歲寒,然後知松柏之後

彫

察其 乎前,而 何 知 君子。 以别之? 臨 范 日 利 不 : 小人之在 害、 可 人君惟先正 以誠 遇事 歲 寒然後 實 治世, 變, 欺 則 心,則 知松柏 與 君子小人之情見 聽 君子 其 言,觀其 邪正是非 世世 無 異, 亂 然 然 行, 交 則 後

矣。」
謝曰:「士窮見節義,世亂則識忠

臣

楊曰:「非險夷之異,無以見君子之

操。」

侯

君子節

義,

久

愐

益

堅,

無

他,

見善明故也。」

尹曰: 「臨利害,然後知所守者也。」

子曰:「知者不惑,仁者不憂,勇者不

也。 不 憂,故曰此仁也。 也?」明道 百皆然,但此三者,達德之大也。」 憂謂之智,不惑謂之仁乎? 凡名其德,千 憂,有曰 得此道而不憂者,仁 王彦霖問: 日 智者不惑,有 「此名其 智、勇亦然。 「道者一心也。 德 日 之事也,因 耳,其 勇 豈可反以不 者 有日仁者 不 、理則 懼 其 不 何

勇以行之。」
者不懼,學之序也。知以知之,仁以守之,不懼,德之序也,智者不惑,仁者不憂,勇不懼,德之序也,「仁者不憂,智者不惑,勇者

憂,勇者果於德,故不懼。《中庸》又曰:智者明於理,故不惑, 仁者無不愛,故不又曰:『智、仁、勇三者,天下之達德也。』 大行近乎仁,知恥近乎勇。』此學之序也。 二 《中庸》曰:『好學近乎智,

故

則知所以治人, 知所以治人,則知所以治【知斯三者,則知所以修身, 知所以修身,

天下國家矣。」

不謂之憂。」

日日

不不

憂謂

無

私

憂。

憂以天下,

則懼。 憂; 心, 往而 察理 0 則以勇名之。 謝曰: 不自得, 不盡則惑; 雖死 蓋自其不惑,則以智名之, 生亦分内 「天下之事若一二,本 則以仁名之, 名雖不同,要之其 本 事,本無可懼 無 可憂,有利 自其 ",中 無 無 害 自 可 道 恐 心 其 無 爠 無 主 則 則

事天,故不憂; 楊曰: 尹 日: 明 明 故無所惑,安故無所憂,决 善故 見義必爲,故 不 . 惑 不懼 存 IL) 養 性 以

無 子曰: 所懼 與適 道,未可與立, 也。 可 與共學, 未 可 可 與立,未可 與 適 道 與 可

二六九

思? 夫何 權 遠之有?」 室是遠 唐 棣 之 而。」子曰: 偏 其 反 而 「未之思也, o 豈 不 爾

是 進 立 立 此 則是 而 可 而 有二: 與 後 至 王 、適道者也,立是可與立者也。」 進 於 三十而立,進 一,則 霖 立 ,則進 問 有 是卓然 立德 立 而 而 後 進 一作「立」。 至 則是吾見其進也。 進,有 德 於立道處 先後。 定後有所進, 進 뻾 明 也。 至於 道 此進 立 有

重 物 篤 也; 權 與 而 志 共 而 有 也。」 學; 固 所 知 伊 人 可 ĬΙ 執 得 輕 則 又 與 而 日: 重 適 曰: 不 學而 則 不 者 又 U 道 可 變也。 日 權 也 「有 ,知其所往也, 與立; 善思,然後可 : 可與 衡 求爲聖人之心,然後 人 而 一人 權與權 無 知 共 立而 多 輕 權 以 重 衡 一矣,聖 化 與適道; 衡之權 知 反 則 之, (經合 可與立者, 所 不 以 能 則 人 同 道 求 則 知 口 爲 是 稱 之 與 思 可

難。

子

Ė

聖人未嘗言易以

驕人之志

言逸

詩

也。

或問:

聖人之道知

之甚

亦未

省言

難以

阻

人之進。聖人之道,不可

只是 思也 權 曰 便是 權 偏反,則喻兄弟相失也。兄弟相失者,言豈 棣之華,乃今郁李。 說 權之義。」 不爾思,但居 乃今千葉郁李,本不偏反,以喻兄弟。 所不及者,權量 詩》與兄弟之意。」 權 便是 又曰 其 稱 · 夫何遠之有?」 蓋言權 ,便是變詐,或是權術。 經 可與 實 道 錘之權也,能 也。 未 也。 又曰 「唐棣之華,偏其反 當反 立,未可 權只是 處 自漢 經 相 輕 : 遠 重,使之合義。 以下,更無人 用權 與權。」 「古今多錯用 爾。孔子曰: 稱 權 取郁李 又曰: 錘,稱 猶 乃知道,亦 衡, 實 不知 看, 輕 「唐棣之華 面, 又曰: 不 重 輕 識 權字。 便可以見 遠 權只是 才合義, 兩 權 重。 因 不 「未之 平 今乃 字。 權 叫 唐 而 權 故 才

字 遠 孟 耳 以 0 難 言有異 之有?」此言涵 即露筋骨, 子歸 易言 『夫道若大路然,豈難知哉?!下一豈 處 故 而求之,有餘 ,須自識 孔 子 聖人之言不然。『人病 蓄意 但 得。 日 思, 師。」此言却好, 至深至遠。 『未之思也 不求 孟 夫 子 何

愛,以權宜合義,主在遠者 蔡失道,反 王之詩,此 唐棣枝 尼以不必 後 反,左右 口 横 與 渠 類 <u>y</u>, 日 喻周公誅殛 一章周 相 棘 常存 . 不 矯 枝 因得 隨 惑然後 而 志學然後可 公制作,序己 去之。」 節 全體均正。 屈 ,言我豈不思兄弟之 可 曲 與 爾。 故其 、權。」 與適 《唐棣》本文 一情 華一 偏 道 而加之, 又曰 喻 偏 强 則 褿

而 必志 范 必 權 日 能 爲 於道, 有 難 可可 立也,故 者。 故 與 道 未 共學者 之用 可 未 與 口 也 與 適 同 道) 術 唯 也; 聖人 也 志 , 能 於 能 立 渞 學

與

又曰: 權。 孔 其高 爲 能權 其均 美矣,以 也,故以乞醯爲仁。 躬 可 而 然後物至 孟 反之矣,豈有先之以不正 道 子曰: 直 私 後世 ,甚矣其 子 唯不能權父子與信之輕 惟聖人能 也。 也 删《 與子之不如與賢 遠 自 ,故誅管蔡而天下不以爲不仁; 莫不以爲 漢 而 其 微生高 「此孔子所不 「權 詩》, 夫事 而 以 不 不 反 不 來, 能 知 而 盡 有 可銖 然後知輕 其所 唯不能權于與人拒 權 莫之愛; 儒 公, 大小 之,所以 也 者 兩 故曰事之大小,莫不 以不取者,蓋 取之詩也 也,故以天下與舜 論 是 ,未嘗 欺 周公唯權 亦 權 之,是以 重。』聖人心若權 經者道之常也 ,而可合於道乎? 爲 不 賢 重也,故以證 多 人倫之至。」 無 好 人 權 以 賢 可 親 輕重適 爲 唐棣之華 思矣, 而已矣。 此 人之 戚之不 反 之 經),旣 間 得 父 唯 有

立; 見道之全體 ,則可與權。」 吕 知道之在我, F 口 精 則 故 適 質 可 未 道 與立, 則 口 3 故 可 與 志 龃 權 可 未 適 與 學之終, 道 定, 共 又曰: 故未 學之中, 造道 「學 可 未 與 而 知

達

平。 矣。 葉 其 必能 與 强 稱 權 立 曲 然或作 謝曰: 物 而 節 學 行 皆相 至 得 權 不反 於 非 中 未 矣 權 機 或 照 丽 可 「可與共學, 時 巧權變之謂 ,未必能 輟者有之,故未 與 喻權變而得 、適道 中之謂 不及則 體常 ; 也。 質美者也, 酒, 能行 仰, 中 而 也。」 唐棣 過 盡 權衡之權 可 乃 變,故 則 與 可 之華 俯 以 然 中 未 滴 而 丁, 枝 則 以 可 能 消 未

說 可 足 者 與 以 立 明 楊 善 權者反經 知 而 時 後 知 措 可 爲 之宜 與 己,則可 而 滴 合道 道 而 後 賏 自共學推 可 信 共學 與 道 權。 世之 而 而 後 E 學

爲

中,是無

權

也

蓋

五寸之執,長

短

多

之體 物,約 權, 是不 所以 日 遠之有?」以正其不知權之失,亦以 非 者 之, 又有堂室之中焉。若居今之所, 今不中矣,堂固自有中。 室自有 焉,是中與 也 (詩》 「,猶 有反也。 蓋 至 則 殊 知權,豈非不 盡 之意也。」或問 日 知知 五 權 中有 唐 于 則 中。 . 變。 寸而 衡 棣 與 中即 所 、權固異矣。」曰:「猶 既 之 之 權 移 時 不知 執者 執之,中也。 權 華 乎不 而 关子 具 謂 知 特特 反 坐于堂,則向之所謂中者, 若 之中, 權 輕 權 知中乎? 圃 E : 必 稱物 日 遠 重 ; , 後合也。 則 用 矣 不等矣 斯 不 不足 矣。 「中所 之輕 合堂室 一未 故 知 有定所,必 尺 權,是 以 又 之 是 以 猶 重 不 唐 而 如 思 否 應 守向之中, 坐于此室, 以立常 而 而 知 執 以 厚 棣 ? 物, 也 觀之,蓋 取 不 薄 所 之 Ŧī. 一尺之 一,夫 中 楊 知 示 大小 有 華 寸 氏 删 中 何 況 知 權

之中; 有?! 中,而 權,非世所謂變詐之術也。 得矣。故權以中行,中因權立。《中庸》之 執一也。1權也者,權量以歸之至當,猶衡有 書不言權,其曰君子而時中,即所謂權也。」 而一反,如權則必合于道,故曰夫何遠 尹曰: 非厚薄小大之中也。 則釋五寸之約,唯輕重之知,而 「孟子有言: 唐棣之華,一偏 『執中無權,猶 欲求厚薄大小 其 中

國朝諸老先生論語精義卷第五上終

國朝諸老先生論語精義卷第五下

鄉黨第十

黨》分明畫出 想 形容聖人,不知者豈能及是?」 又曰: 傳道立言,深得聖人之學者矣。 及其至焉,一也。」 所載而學之,以至於孔子者,自明 鄉黨》所載 而 》之所載者,自 存之,如 伊 ĬΠ 日 ,善乎其形容也。 見乎其人。」 箇聖人。 」 孔子之道發而爲行,如《鄉 誠 又曰:「《論語》爲 而 明也, 又曰: 由《鄉 讀而味之, 如《鄉黨》 而 誠 黨 「《鄉 也。

也

二,言孔

子

言語之變;

自『君在

踧

如

吕曰:

「自「孔子於鄉黨」至「誾誾

如

也」至「私覿愉愉如也」,言孔子動容之變,

也。 明,隨其受光而照之。 坐」至「不親指」,言孔子應接事物之變。」 如 言孔子衣服之變; 自 也」,言孔子飲食之變, 君子不 謝曰: 聖人於此,本無意於中節。 以 「容貌衣服食息之際,道之徵 紺緅 飾 自「齊必變食」至「必 至「齊 有志者少察于斯,於 必 自『席不正 有 蓋 明 日月 衣 布 有 不

子曰: 以 大方矣,則不可謂之妄行, 無方之民而莫之悟,其爲害豈淺淺哉? 而 世之論者曰: 其身與道俱,故睟面盎背,而從容自中耳。 非禮者,是豈係心于儀容辭令之末哉? 雖語默食息之頃,升降俯 達觀自居,而信其說于天下,往往自 拘之。」則是禮無與于智者之事也。 楊曰: 了猖 狂妄行,乃蹈 「夫聖人由禮行,非行禮者也 『先王之制禮,誘天下之愚 于大方。』既 仰,各有 有猖狂妄行之 容節 故士 棄

道其庶幾乎?」

之間 名,則 用 門人皆審視 而 也。 不知者也。 ,非固遺形絶物也。 其 踰于大方也 乃若聖人之所謂 而詳著之,其知聖人 故孔子 必 矣。 於鄉黨 離 道,不 此 是 以言道 皆 八哉? 離 荒 動 乎 唐 學者 皆日 日 繆 用 悠

在目 貽後 於聖 欲 蓋 盛 潛 位。 心于聖人,宜於此求焉。」 德之至,動容周 世 人之容色言動,無不 尹曰: 雖 今讀其言,即其 然,聖人豈 「甚矣,孔子弟子之嗜學 旋 ~,自中 拘拘 事 謹書而備記之,以 宛 而 平 禮 爲之者 然如聖人之 耳。 也 1哉? 學者 0

者 止 一,故其自牧如此 一於信, 楊曰 孔 以 子於鄉黨,恂 自牧,不 故 : 在 鄉 恂 恂 黨,所 以 賢 怕如也,似不能言者。 一於誠 知先人也 先 如 也 此。 1,蓋鄉 與國人交, 似不 能 黨 尚

侯 日 鄉黨 敬 長 而 貴 老 以 誠 信 爲 娲

本 口 故 知 也 恂 恂 如 也 似不 能言 者 則

之誠

其在宗 廟朝廷,便便言,惟 謹

爾

言,惟謹 楊曰 爾。 「宗廟 便便,不擇事而安之也。 朝廷,以 敬爲本、故 言惟 便便

謹 爾、盡敬也。」

第

深

考此篇

,則於道其庶幾矣。」

侯曰: 爾 「宗廟 朝 廷 尚 嚴而 明辨, 故 便

便言,惟謹 朝,與下大夫言, 侃 侃 如也

3

與

F

大

夫言,誾誾如也

宗 尚 事。」自「孔子於鄉黨 数, 廟 吕曰 朝 恂恂 廷尚尊, 似不能言 「此章言孔子言語之變。 」至此 便便言謹 所以 一所以 事 長 禀 而 命 貴 讓 而 鄉 從

温 恭 故 謝 也 日 似 「恂 恂,信也 能言者,不 人 以 辭 親 信之, 氣 加 以其

0 「孔子」,明抄本作 孔門」 按《論 語 集 註 引 尹 氏

宗 蓋 和 下大夫,在我下者。」自「孔子於鄉黨」至此 樂 廟 推 嚴 朝 廷 恪 誾 不 尚 誾 以 嚴 中 事 ,故便便言, 親之意 Ė 上大夫,在 丽 惟 出 謹 以 爾。 事 我 其 L 侃 長 者 侃 L ,

如 也 也 置置 楊 侃 日 敬 侃, 和 也 「上交則 也。 ; 下 交則 敬 而 和 無 愐 諂 不 故故 . 瀆 誾 故 侃 誾 侃 如

交 和 也。」 樂 而敬也 侯 日 : 誾 敬則 誾, 中 也。 E 而 誾 敬 誾 也; 侃 侃 侃 上下 侃

君在,踧踖 如 也 ,與與 如 也

廟 横 容色不 渠 日 ·忘向 : 君也。」 與 與 如 也, 君 或 在 朝 在

與 所 大 主 夫 出 於 下 温 而 大夫言和樂,與 也,言不可以不明辨 范 恭。 屈 曰 : 于上大夫也。 宗廟 鄉 ,禮法之所在 黨者,父兄宗族之所 上大夫言中 鄉 「黨莫 故 (辨而 朝 如 Ė 廷政 惟謹 齒,所以 非 處 事之 輕 爾。 也 下

> 教 過 君 孔子於鄉黨」至此 則 視 民 勞 朝 相 與與 則極 親 與 其 者,無過 朝 恭敬 廷 莫 故 如 與 踧 爵 不及,皆中 踖 所 如 以 也。 教 節也。」自 民尊 夫恭 而

謝 日 「與與,承順之意。」

不 忘 向君也 0

楊

日

踧

踖,不敢寧處

也

與

0

行而 也。 黨」至此。 侃 尹 曰: 恭 也 侃,和樂也 ; 與與,威 恂 恂, ; 温 儀適中也。」自「孔子 誾 恭之貌 誾 中正 也 便 便, 踧 於

與立,左右手,衣前後,襜如 君召使擯, 如 也。 寶退,必復命曰: 色勃. 如也,足 躩 如 也。 也。 賓不 趨進, 揖所

君 也 横 渠 相 日 君 送 賓 君 去,則 召 使 白 趨 日 進 翼 如, 賓 ~<u>左右</u> 不

矣。」

0 朝」下,和刻本校云 疑脫 「或」字。 翔。

舒君敬 也

也。 君 加 命也。 馬, 范曰 敬之至 色至于勃如,容至於踧踖,皆無以 也 君召而使之擯,必變色者, 賓退必復命者,事之宜 尊

於所揖 矣,故以此復命。」 、欲其禮無違也。 謝 也。 衣隨 如,鳥 形 至於賓不顧,然後禮成 體,左右前後 斯翼之翼。 襜 禮 如, 有 擯 誠

趨 所與立,左右 舒遲,見所尊者齊遬。 使擯,以禮相 而 進翼如,其容修飾 楊曰: 退,必復命曰 「色勃如, 其事,故變色而 手,順所 『賓不顧矣。』」 也。 足躩如 向也。 變色 賓不顧 一而作 作。 衣前後襜 也,邀也。揖 而後禮成。 也。 君子之容 君召 如,

襜 如 尹曰: 者,揖左右衣之容也。 勃,色變也。 躩,盤辟之貌。 翼,謂張翼而

> 謝 入公門,鞠躬如也,如 日 「入公門、非必君在焉。」

立不中門,行不履閾。

恪。

謝

日

「立中門則當尊,行

履

閾

則 不

過 位 ,色勃如也,足躩 如 也。

謝 曰 過 位 與見君之几 杖, 則 起

同。

而 謝曰: 其言似不 足者。

倨 侮。 故言彌 「韓非謂慮 寡則 彌 事 敬, 廣 肆, 如 怯 則 儒 日 草 野

者。」

謝 攝 曰 齊升堂,鞠 : 心肅 躬 則 如 氣 也。 自 屏 屏 氣 於 似 此 不息者。 可 以

體

敬之理。

出

逞

顔色,怡

怡

如

於」,四庫本作「如」。

一七七

没堦 也。 謝 日 趨 進,翼 逞 非 肆 如 也,心能 也。 復其 使氣之意 位, 踧踖如

也]。」按陸氏《釋文》,此 横渠 曰 「没堦,趨,翼如,張拱 句無 「進」字。 而 翔

如 尊 攝 也。 如 避 不 也,下堂遠所尊, 氣 也, 所 齊升堂,鞠躬如也,屏氣似不息者,近 敢 翔 如 尊。 其言似 肆 楊 也。 容肅 足躩如也,不以虚位而易之,盡 此。」自「人公門」至此。 也。 日 行 也。 蓋 中門, 不足者,不爲 而 濟 履 人公門,鞠躬如 出,降一等,逞顔 濟 閾,非行容也。 則其 翔 君所 翔,朝廷之行容也, 容舒矣。 出 口 給, 也, 立不 以時 過位 色,恰恰 没 如 發也。 中門, 不 誠 色勃 故 翼 如 至 敬

也。 下 《怡聲 過 尹曰: 位 ,過君之虚位 ,如言不能足也。 「人公門,曲斂其身,如 也。 其言似 攝 齊, 摳衣升 不 無 足者 所容

> 堂 通 「人公門」至此 舒。 則 屏 没堵,盡也。 氣 似 不 能 息。 復其位,復其行列 出,降下 堦 則 也。」 顔 色

禮,有容色。 如 執圭,鞠躬 授,勃 如 如 戰 私觀,偷偷 也, 色, 如 足 不 蹜 勝。 蹜 如 也 如 上如揖, 有 循 下

色也。 矣。」 自堂 也。 享燕賓客之時。 愉 不 通 如 也。 而 過位,過君之虚 也」,此皆孔子爲大夫時出入起 伊 川曰: 復其位,復班次之序也。 出 降增,當此 私 覿,怡怡如 自己君 有容色者,蓋 一時,放 位 召使 也。 也,私 氣不屏,故逞 擯」至 出,降一等, 覿 享禮者 于莊 則 一私 又 居之 則 覿 「, 此 節 顔 愉

舒也。」 横 深曰: 「上堂. 如揖,下 堂如授, 其

者, 盛德之至也。」聖人内有其德 范 日 孟 子 日 : 動 容 故外 周 旋 有其 中 禮

欲修其 之間 宜 IĘ, 也。 日 民 其意。❶ 以禮。」語 一,宜則 如 Œ 德充于内, 曾子 承大 夫子之教 則無所邪 「敬 故語 八身者 取 成 意誠 i E 以 四 祭。」自顔冉 仲弓 規 直内,義以 重 顔 先正其 矩,所以方其外。 則 一、去四 淵 人,其 故 一君子 則 身正 輝 所以 日 則 光 心, 輕, : 成 日 所貴乎道者三。」楊 而觀之, 見 直其内; 身正 德 . 方外。」 出出 則 于 亦在 可 「視聽 外, 欲正 則 謂 如 無 心敬 則 于 非 之人。」《易》 其心,先 大學之道 見大賓 不 言 他 容 勉 動 中 則 動 則 人 止 强 可 禮。 無 必 得 言 面 誠 其 不 雄 知 使 皆 動 能

執輕如不 謝 克,執 二執 如不 圭, 虚 勝 所 如 鞠 執盈一之 躬 謂 如 執 也 語 如不克, 如 同 不 勝 重

法。

門弟子識

之以

爲此書,非

深

知

聖

人

者

故

顔

色、容止、辭

氣、

升降、

進

退

皆

口

以

爲

不

能

形容之也

饗 戰 其 享,以禮 循 垂 色, 手如授,此 事 而 舉前 私 不 臨 覿 曳 敢 爲 事 ,和以爲 踵 易 節 而 如如 也 升降之容 懼,兢慎之至 其 有循 (儀 貴 其 飭 (,故偷 升 而 矣, 節 則 不 舉 欲其 愉 敢 也 宜 手 也 越 如 如 及 也 足蹜 是 揖 物 也 旣 蹜 其 也 聘 如 勃 下 而 有 如 則

婦 緅 間 行,有 其 至 容舒 ,太莊則情不通 也 近 尹曰: 女子之飾。」 喪 謝 君子不以紺 如所 服 日 也 上 堂 ,何以 循 足蹜 如揖 曲 也 飾 文爲? ",所以 緅 斂其身,如 · 其 蹜 也 饗禮 飾 如 貌 有 爲 私觀,則 紅紫 有容色,響燕賓 恭 循, 紅紫 文 也 不以 也 不勝舉,斂 謂 3 非 舉前 又和悅矣。」 爲 下堂 IE 紺 褻服 近 曳 齊服 如授 主之 踵 慎之 於 m

楊曰:「齊服以紺,練飾以緅,故常服

「心先」,和刻本校云。「心先」間脫「者」字。

[「]身正」,和刻本校云。 二「身正」之「身」皆當作「心」。

不 以 爲 飾 紅紫靡麗,非 褻所宜。」

爲 褻服。」 侯曰 紅紫,上服之飾者也,故不以

用 服,飾且不爲,則不爲朝祭之服可 非正色,褻服且不以間色,則公會之服,必 正色可知也。」 尹曰: 「紺色近于齊 服,緅色近 知。 於 紅紫 喪

當暑,袗絺綌,必表而出之。

也。 袂』是也。」自「君子不以」至此 之]是也; 爲衣,不爲觀美,或取其 皆當然也。 締給出于表,表不可以親膚 范曰: 「言君子者,不獨夫子,凡君子 或欲其便于事、『褻裘長、短 絺綌所以當暑,必表者,爲其褻 適 于體、『表 也。 古之 丽 右 出

子所以非之。」 絺 絡必表 謝曰: 而出之。後世有綌縗繐裳者,縣 「服之本意,以不見體爲敬,故

楊曰: 「袗絺綌,則見體而近褻,故必

> 表 而 出之。 孔氏謂加上衣也

侯曰: 「暑服尚 疎,見體則近褻,故必

表 而 尹曰: 出之。」 「袗, 單也,絲謂細葛。

給,麤

葛 也 0 表,上衣也。」

裘。 緇衣,羔裘, 素衣,魔裘, 黄衣 狐

衣是朝服,素衣是喪服,黄衣是蜡服也。」 伊川曰: 「緇衣等各有用,不必云 緇

德之内外相 稱亦然也。」

范曰:「衣所以襲裘,故其色必如之。

日 衣以裼之: 楊曰: 謝 『羔裘豹飾,●緇衣以裼之, 日 「衣裘之色,欲相稱 「服色必相稱也。」 禮制也。」

也。

《記》

狐裘,黄

尹曰: 褻裘長,短右袂。 「衣所以覆裘,故其色如之。」

豹」、原作「約」、今據四庫本、傳經堂本、公善堂本改。

0

尹 裘 長 欲 其 温 體 袂 短 以 便

事 __

必 有 寢 衣,長一身有半。

齊之日必有寢衣,不服常日之寢衣,所 范 日 程頤 日 :「此必錯簡。 以慎 當是

也。 因言其制,故曰長一身有半。」」

尹曰: 「寢衣,今之被也。臣師程 頤

: 『疑上文當連齊而言,故曰必有。』」

E

狐 絡之厚以居。

范 日 狐貉之厚, 亦取其適體者

也。」 楊曰 : 「私服不致飾、取其便事」 而已。

狐善

疑,

貉

善

[睡,不

可以

從

事

丁,故

燕

居

服

尹曰 「居,家居 也。

去喪,無所不佩

范曰 「行禮吉凶不雜, 是故去喪,凡

所 當 佩者 無 不佩。《 禮 「父母存,衣

> 冠不 母,衣純以青, E 純 『具父母大父母,衣純以 素; 孤子當室,衣冠 如孤子,衣純以素。」此 不純采。一又 具父

之變也,非佩也。」

而 去喪,則無所不佩。 已,蓋若觿礪之類,皆佩焉。」 楊曰: 「凡帶必有佩玉,唯 言無 所不佩,則 喪否。 非特 故

身。 尹曰: 居 喪無 飾, 「佩,佩玉也,君子無故 故不 佩 去 喪 則 玉 復 不

去

也。」

非 帷裳,必殺之。

伊 ĬΙ 日 「帷裳固不殺矣,其他衣裳

亦殺也。」

幅, 如帷然, 則不殺。」

楊曰:

「裳

心必有

殺,唯

朝祭之服

用正

尹曰: 唯 帷裳 不殺。」

羔裘玄冠不以 书。

范 「弔必變服,故吉衣吉冠不 以

二八

弔也。 」

楊曰:「吉服不以與凶事故也。」

冠皆不以弔。」

侯曰

「吉服

不可與

X

事,故羔

、裘玄

范曰:

「明衣布者,浴衫

也。

此

亦非

:

尹曰: 「弔必變服。」

吉月,必朝服而朝。

伊川曰: 「孔子在魯致仕時,月朔朝

事

也。」

也。

事,猶將預焉。故請討陳恒,則沐浴而朝。」猶月朝於君也。月朝於君何也? 國有大猶月朝於君也。月朝於君何也? 國有大

孔子吉月必朝服而朝,致爲臣之義也。」 楊曰:「孟子不見諸侯,未爲臣也。

J去位。如未去,則不書也。」

侯曰:

「吉月必

朝

服

而

朝,時孔子必

齊,必有明衣,布。

尹曰:

「此孔子致仕居魯時也。」

伊川曰:「「齊,必有明衣,布」,欲其

皆惡其文之著而爲之也。」 潔也。明衣,如今涼衫之類。緇衣、明

常浴之衣也。」

尹曰:「先儒謂浴衣也。」

伊川曰:「齊必變食、居必遷坐,重其齊必變食、居必遷坐。

謝曰:「齊必變食,養氣體,欲其精一

● 「福」,四庫本作「神」。

衣,

於所 爲齊者。 居必遷坐,與申申夭夭之意

百

必遷坐,齊以交神明,故致潔變常以致敬。」 楊曰: 侯曰: 「齊必有明衣布,齊必變食,居 「齊必有明衣布、齊必變食,居

尹曰: 「齊所以致精明之德,變食以 必遷坐,所以致其敬也

養氣,遷坐以致思。」

食不厭精,膾不厭細

楊曰: 「食精膾細、非以窮口腹之欲、

蓋 養氣體,不以傷生,當如 此。」

欲,蓋養氣體當如此也。」 「食欲精,膾欲細,非窮口腹之

不食。 食體而餲,魚餒而肉敗,不食。 臭惡,不食。失飪,不食。

日 「窮口腹之欲者或食焉。」

0

不時,不食。

謝 日 注 說 謂 非 朝 夕日 中 時 屬 厭

> 而已,欲心不從故也。 人不爲飢而死,

食可也。」

備也; 也。 聖人豈有異于人哉? 厭精」至此 飪,不時,皆非所以養志氣也。 實志,志以定言,言以出令。] 色惡,臭惡,失 中于理而已。《傳》曰: 正不爲可知矣。不得其醬不食者,爲其不 養心體者,未嘗 范曰: 故割不正不食,席不正不坐,則事之不 割不正,不食。不得其醬,不食。 君子苟不備、雖美不食焉。」自「食不 「此不必齊也,凡食皆如是矣。 不以正,造次 飲食、居處、言語,必 『味以行氣,氣以 顛沛不可 君子之所以

謝 曰 膳食之宜貴和,春酸夏苦,秋

聖人飲食如此 楊 如此。 而不暇擇也。」 曰」,明抄本作「謝 然聖人之所不食,窮口腹者或反食之,欲心 語意與此則 極口腹之欲、蓋養氣體,不以傷生、 田」。 按《論語集註》引謝氏曰 、近似。

二八四

道則盡矣。」
甘,皆貴和之。謂古人欲心則寡,而衛生之
辛冬鹹,君子之食放焉。醯醢之美,調以滑

故 牲 失生熟之節也。 肉 割 至 體 臭 此 尹曰: 不正,不 ,禮有定數 日 敗, 魚臭曰 「饐,飯傷 得其醬,皆所不食。」自「食館 不時, 餒 濕 謂 謂 飪 也 熟 醯 非食時 醢各 也 餲, 3 有其 也。 味 失 變也。 飪 宜 折 ,謂 解 丽

肉雖多,不使勝食氣。

不飽,氣衰然後用以補之,故以不使勝食氣不飽,氣衰然後用以補之,故以不使勝食氣 謝曰:「食以五穀爲主。七十者非肉

者,不 浹 治 而 惟 伊 已可 酒 Ш 不可亂 無量,不及 티: 也。」 志, 飲 只 酒 亂 血氣 , 治酒 不 可 亦不可 使 市 醉。 脯 不 使亂,但 不 及 亂

謝曰:「沽酒市脯不食,與康子饋藥

皆衛生之道也。

先王於食有毉,所以治未

不敢嘗同意。

不撤薑食。不多食。

也。 其 之徒也。」自 酒 (理也。 市 不多食者,適飽 脯 范 日 ,其所從來 飲酒 「肉雖多」至此 「凡養體主於穀肉 無 多少,主於不 不可 而 得而 已,貪于飲食, 知,故君子不 亂 勝 而 食氣, 己。 四 凶

謝曰:「不多食,節飲食也。」

不食。 類。 類 食 陰陽之氣,不可以偏勝。 飪,謂失水火之齊。 志於味以 有矣,唯其時矣。君子之食,唯其 氣。 醬,若魚膾 楊曰: 臭惡,若螻廥之類。 五辛惟 肉,天産也, 窮口 「色惡,若 薑 腹之欲也,故 芥醬之類。 不葷,故 割不正 食,地産也: 狗 故肉 不 ^ 一,若宜 非其 赤 撤 詩 不 股鳥 雖 薑 時 日 多 物宜,故 食。 付時 聶 : 不 不使 皫 物。」 所 食。 而軒之 「物 凡此, 色之 以 勝 眷 其

此。 病 厭精 至此 疾毉,施於萬民而已,君子不與焉。」自「食不 也 至于 加 疾 君子之食常放焉,故其所慎 m 後用 毉 ,則末矣。 故《周官》 者如

臭,故不去; 故其說不撤薑食,則曰 不多食,飲食貴節也。」 今之養生者,凡葷物皆所忌食,非獨 尹曰:「先儒謂飲食事 若葷辛者,則去之也。 齊禁葷物,薑辛而不 皆因 齊 齊也。 圃 然則

祭于公,不宿肉。 祭肉不出三日。 出

三日,不食之矣。

敗、惡之則不欽、是褻鬼神之餘也、故寧 分之。祭肉者,家祭之肉也。 范曰:「神惠欲速及人,故不 出三日 宿 或 肉 不 臭 而

謝日 「宿祭肉與出三日 而食, 則 均

語。」

於常饌矣。」

食矣。」

楊 祭於公, 不宿 肉, 受福 於其

> 矣。 君,德其物,不 出三日則饐而餲,故亦不食。」 敢 易也。 祭於家, 可 以 宿 肉

則 不宿肉。祭肉不出三日,謂 肉必敗,人或惡之,是褻鬼神之餘也。」 尹曰:「公,公家。 神惠欲速及人,故 自 祭也。三日

食不語,寢不言。

明道曰: 「寢食不當言語時。」

君子 存 范 其誠 日 意,當食而食,當寢而 以事語人曰語, 發端曰言。 寢,言語

非 其時也。」 . 「聖人存心不它,爲物之終始,

謝

日

與 事在此而 心遊於彼者異。」

則 氣 室 楊 而不 日 . 通,語言恐傷之也。」 肺 爲 氣主,而聲出 焉。 飲食

尹 E. 「先儒謂直言曰言,答 述 日

雖 疏食菜羹,瓜祭,必齊如也。

道 曰 疏 食菜羹,瓜祭,必 齊 如

明

也,臨祭則敬也。」

其誠敬也。」《禮》曰: 食菜羹,及當 范 日: 食瓜 「鬼神饗誠,不在 而祭, 「瓜祭上環。」 亦必 齊 于物 如 故故 所 以 雖 致 疏

謝曰:「報本反始。」

自,况其大者乎?」 必齊如也。夫君子于一飲食之微,不忘其之祭,必見其所祭者,故雖疏食菜羹之薄,之祭,必見其所祭者,故雖疏食菜羹之薄,農,菜羹瓜則祭先圃,不忘其所自也。君子農,菜羹瓜則祭先圃,不忘其所自也。君子

之類。齊如,誠敬貌。」 侯曰:「食必祭其所先,如先農先圃

初薄而忘本廢敬。」 尹曰:「飲食必祭,無德不報也,不以

席不正,不坐。

本立,以此成聖人之功也。頤正吉者,所養『頤,正吉,養正則吉也。』童蒙之時,養正則范曰:「『蒙以養正,聖功也。』又曰:

有銘 所聞 皆以正養其外,所以養其内心也 無 非 7,行步 謝 E 者正言,所見者正 日 也。 有佩玉之節,登 是故人君 左右 道,几 車 前 杖 後 有 鑾 有 必 戒,盤盂 皆 和之聲, Œ

不正則不處。」
不正則不處。」
一數曰:「聖人心安于正,故事之小者,

所以養其内也。」 尹曰:「君子無非正也,以正養其外,

之,所以教民睦也。故鄉人飲酒,無有早范曰:「鄉黨以齒,老者先之,少者從鄉人飲酒,杖者出,斯出矣。

暮,惟杖者出,斯出矣。」

敢先, 人飲 也。」自「席不正不坐」至此 之序隨而不正矣,故不坐。 東向西向,以南方爲上。 楊曰: 酒,杖者出,斯出矣,蓋杖者未出,則 旣 出 不 敢後,所以 席南向北 所向不正 向,以 六十杖于鄉, 其 長 西 上當 一方爲 則 尊卑 F 不 鄉

侯曰:「堯舜之道,徐行後長者而已。

孔子之起居也如是。」

尹曰:「鄉黨尚齒。」

鄉人儺,朝服而立于阼階。

驅之也。」亦有此理。天地有厲氣,則至誠作威嚴以亦有此理。天地有厲氣,則至誠作威嚴以,伊川曰:「鄉人儺者,古人以驅厲氣,

也。 親。 所以 驚神,故以身安之。 之主,而有臣屬宗族故 其 存 范曰: 至于大夫士,奉宗廟祭祀,亦以 親 故 都 室神也。 邑必有宗 諸侯 「鬼神依人,故 有一國,則與一國 天子有天下, 非祭,故朝服也。」 廟,先君之主,有 也。 鄉 朝服立于阼階 人難, 則與 共 天 其 則 八身爲 下共 民 事 恐其 故 其

也。 君子 楊 日 無 : 所不 用 誠 其 則 誠 無 物 豈 苟 無 然哉 物 則 無 爲之 可

> 其 于 必 作階,亦致其誠敬 有 物 也 故 雖 鄉 而已。」 人 之所 爲 必 朝 服 m

立

尹曰:「儺者驅厲氣,朝服而立于阼

階,存室神也。」

問人於他邦,再拜而送之。

如親見之。故再拜而送之,以致恭也。」范曰:「人雖在遠,有問則誠意達焉

拜

他邦,如見所問者,故再拜而送之。」楊曰:「聖人無所不自盡,雖問人於

尹曰:「聖人誠意,無所不在,故再拜至此。 侯曰:「聖人之道,誠而已。」自「鄉人儺」

康子饋藥,拜而受之。曰:「丘未達送之,以致恭也。」

而

不敢嘗。」

范曰: 「拜而受之者,重其惠也。凡

二八七

可飲 爲 賜 而 欺 不飲 食 必 也。 而 い,則虚 一飲,不可飲而不飲,皆在其中也。」 嘗之,藥未 故曰: 人之賜; 知其 「丘未達,不敢嘗。」然 性 不知 則 不 而 可 以 知之,則 嘗 則 受

以未達,故不敢嘗。 謝 日 「康子饋藥,以受其勤,故拜 既不失己,且無傷康子

未達,不敢當,所以 而有禮,故其直 楊曰: 「大夫有賜、拜而受之、禮 不絞。」 慎 疾。 必告之,直 也 也

侯曰: 「聖人敬慎如此。」

尹曰: 欽人慎己故 也。

廐焚。 子退 朝,曰: 「傷人乎?」不 問

馬。

m 不 間 范曰 馬者 ,貴人賤畜,所以教人。」 「君子之行,必本 ·于仁。 問 人

故捐 清于 謝 日 此。 馬 非不愛也,恐傷人之意多,

> 離 公門,故問人不問 楊 馬。」

日

朝

言

不

及

犬

馬

雖

退

朝,

未

問。 侯曰: 聖人禮敬如此。」 馬 雖貴畜,異于人者也 不

親 親 而 尹曰: 仁民,仁民而愛物之意。」 「貴人賤畜 理當然 也。 君 子

君賜食,必正席先嘗之。君賜腥,必熟 而薦之。 君賜生,必畜之。

腥 生必畜之者,所以仁君之惠,不欲殺也。」 必熟而薦之者,榮君之賜,以 范曰: 正 席而嘗之者,如對 事 祖 考也 君 也

懷其核,況畜乎?」 謝 「皆敬君惠也。君賜之果,猶

殺也: 之; 而薦也 食則或恐餕餘,故不祭,唯 皆德 生則 「席不正不 君之賜,不敢易其物也。」 畜之,以待有事,無 坐,故必正席 腥 故 乃 미 敢 熟

賜,故當 生,必畜之,君子所以遠庖廚也。」 存亡皆饗君 IE. 席 賜,所 以 先嘗之; 以 熟而 薦之; 賜 腥 則 及於衆 至於賜

所 而薦之于先 以榮君之惠 尹 、曰:「正席先嘗,敬君之惠 祖 也。 畜之以待供祭祀者 也 熟

侍食于君,君祭,先飯。

民 便說 報 爲 位 君客之,則命之祭然後祭。」先飯 得之於天,與天下之人共戴也,必思所以報 祭,●食穀必思始耕者,食菜必思始圃者,先 君也,必思所以報其君, 王無德不報,固如此也。夫爲人臣者,居其 民 報君也。 ,食其禄,必思何處得爵禄 也 伊川在講筵講此,曰: 古之人君,視民如傷,若保赤子,皆是 。」每講一 又曰: 如人主所以有崇高 處,有以開 「《禮》云: 凡勤勤 「古人飲 導人主之心處 『若賜之食而 來 之位者,蓋 處,乃得於 辨嘗羞 盡忠者, 食必

> 客己也 飲 而 俟。 故 侍 食於君, 君祭, 先 飯 恐 君之

范 曰 君 祭則 先飯, 若 爲 君 食

也。」

之序徧祭之。」膳夫嘗食飲膳羞,以食爲先, 楊曰: || 禮 『祭食祭所先進,殺

故祭先飯。」 侯曰:

君抗 也。 君祭先飯,臣子之禮,不 敢與

尹 曰: 先飯,若爲 君嘗食然,不

客禮也。」

以 見,禮之宜也。」 范曰: 疾,君視之,東首,加 「疾不能興,君視之,則加朝衣 朝服 拖紳。

君。 楊曰: 君臣之義,不可以 「雖疾不能興,亦不以 疾故廢也。」 褻服

見

0 飲」 四 庫 本作 「欲」,按: __ 程 遺 書》 卷十 九並

敢當

之禮也。」 侯 Ħ 雖 疾不能興,拖紳, 疾者 見君

拖 紳 ,如朝服以朝也。」 尹 日 東首,君 面 南 向 也。 加 朝 服

君命召,不俟駕行矣。

之君則不然,當如孟子道不合則不見也。」 也,或不仕,或既老,召之斯往矣。 召之也。臣以爲此止謂魯君,不必有 范曰: 「孔子當仕有官職,而 若異 以 官職 其官 邦

知矣。 之」至此 其敬,蓋人之大倫,豈以人廢?」自「疾,君視 謝曰: 魯衛之君,何足以當此? 「觀 (孔子事君,則其事父兄可 孔子如此

可者 也。 則 孟子之景丑氏宿焉,則異於是,未爲臣 率土莫非臣矣。」 當是時,不得於齊,則之晉之魏,無 楊曰: ,故有不爲臣之義。 「不俟駕行矣,不敢稽君命也。 若夫天下定于一, 故

> 尹曰: 侯 日 不 不俟駕 ·俟駕 急趨 而 行,盡臣道 命也,如父召無 也。」

諾之意。」

入太廟,

每事問

尹曰: 朋友死 ,無所歸,日: 「欽慎之至。」

無所歸,則職在我矣。此亦禮 於壑之理。 謝曰: 使其有所歸,吾何與焉? 「人之死,自中古以來,無委之 「於我殯。」 稱其情也。」 (兆域 至於

故朋友死無所歸,於我殯而已。」 楊曰: 「古者族墳墓、葬必 於其

聖人在下位,其自任也如此, 侯曰: 朋 友死,無 所歸, 而 得 於 行其道 我殯

焉,則文王也。」

拜。 歸,則於我殯; 拜祭肉者,敬人之祖考也,爲其同 范曰: 朋友之饋,雖車馬,非祭肉,不拜。 「朋友有兄弟之恩,故死 有通財之義,故雖 車 於己 無 馬 所

親。」自「朋友死」至此

故饋唯祭肉則拜,敬神福也。」 日 朋友之思視兄弟,不 以文爲

拜。 死」至此。 故不得不 尹曰: 於祭肉則拜者,欽神之惠者也。」自「朋友 殯; .朋友以義合者也,死無所歸 有通財之義,故雖 車馬不

寢不尸,居不容。

伊川曰: 「寢不尸,無不敬也。」

於身體也。居不容,非惰也,唯不若臨 尸者, 豈惡其類於死哉? 亦惰慢之氣 也,居之容也。」 見賓客而已。子之燕居,申申如也,夭夭如 范曰: 「君子之於寢,未嘗肆焉。 祭祀 不設 不

收斂之慢。」 謝 日 「寢雖舒布其四體,然無 縱 不

哀

踧 ,覺則欲舒,引孔子不尸 楊曰: 「昔之論 養生者,以 州 爲證, 爲 理 睡 或 則 然 欲

> 也。 居不容,蓋申申 · 其體胖 也

居 不容,非惰也,如申申夭夭是也。」 尹曰: 「寢不尸 , 雖 舒其 體 而 不

肆

見齊衰者,雖狎, 者,雖褻,必以貌 必變。 見冕者 與曹

重記之,而其文不同。聖人之德有常, 范曰: 「夫子見此三者每如此,是 則人 以

見其未嘗有改故也。」

人之誠可知。 尹曰: 謝曰: 「齊衰意兼斬與功緦言。」 「夫子見此三者每如此, 門人所以重記之。」

凶 服者式之。式負版者。

伊川曰: 「子之在車中時如此。」

禮 》: 乎? 于天府。] 所以重民也, 人君其 有 范曰: 喪也。式負版者,重民數也。 『司民獻民數于王,王再拜受之,登 「此在車之容也。式 可以不敬 N 一服者, 《周

二九

則

聖

者,重有喪也, 式負版者,重民籍也。」木,有所欽,則俯而憑之,故曰式也。式凶服,知曰: 「此在車之容也。式者,車上横

有盛饌,必變色而作。

敬其事乎?」

彼如此,況食君之禄,荷君之寵,而可以不食如此,況食君之禄,荷君之寵,而可以不禮,變色而作者,至敬之節也。君子于人之一。知曰:「盛饌爲己設,則必敬主人之

故食于少施氏而飽。」
謝曰:「變色而作,敬其食我以禮也,

1、敬之節也。」 尹曰:「敬主人之禮也。變色而作

迅雷風烈,必變。

范曰: 「《易》曰: 「洊雷震,君子以

所以敬天之怒,自天子至於士,皆當然也。」雷甚雨,則必變,雖夜必興,衣服冠而坐。」君子因以爲戒。然《禮》曰:「若有疾風迅恐懼修省。」凡人當天之威怒,則必恐懼,故恐懼修省。」

謝曰:「虞天變也。」

楊曰:「畏天威也。」

曰:「溶雷震,君子以恐懼修省。」蓋此意尹曰:「畏天威也。《易·震卦·象》

也。

升車,必正立,執綏。

莊敬,無不在焉,升車則見于執綏也。」則心體無不正,而誠意肅恭矣。君子之于則心體無不正,而誠意肅恭矣。君子之于

車中,不内顧,不疾言,不親指。

言,不親指,豈止爲其惑人而已乎? 動容范曰: 「此在車之容。不内顧,不疾

周旋必以禮自防,故視必以禮。」

「升車」至此。 「正立而下,皆升車之容。」自

不中節也。」

楊

E

盛

德之至,

動容周

旋,

無

適

而

色斯舉矣,翔而後集。

必詳審也。」 知幾莫如聖人。翔而後集,不止擇居,凡事而後集,審擇所處。」 又曰:「色斯舉矣,而後集,審擇所處。」 又曰:「色斯舉矣,不至悔吝。翔

居。」君子難進 不 翔 君 m 後 俟 審 顔 去 視 范曰: 終 色不善, 也 下 日。1子曰: · 集。 翔而 「此二者,審知去就也。見人 則舉而去之,若有所就,必回 《易》曰: 而易 後集者,擇有道之國、有 退,不待惡言危邦將 「危邦不入, 亂 『君子見幾 而作 邦 不 至 德

貌衰則去之。翔而後集,不苟止也。」楊曰:「色斯舉矣,故有際可之仕,禮之君,然後就之,此夫子行止進退之常也。」

此

雌 嗅 此 子路聞之,竦然共立,後三嗅而 故共立之。孔子俾子路復審言詳意,故三 性,而人逢亂世,反 何字,又近唄字。」薄賣切。 順 雉 而起,庶子路知之也。」 ,恐後人簡編脫錯。嗅字又不知古作 ,時哉時哉! 伊川曰:「山 色斯舉矣, 翔 不 梁 得 雌 其 雉 所。 得得 又曰: 作。 其時, 子路 而後集。 文字如 「山梁 不達 遂其

具羞以饋。終食三嗅,示衆好而必察也,仲尼傷薄俗易流,所美非美。仲由不達,乃横渠曰:「魯俗一時貴山雉之雌者,

心也。 失之於此。 子路學孔子,不求之于心,而求之于言,故 之時 不至於失矣。」 故不 達其意。 也。 在是下。● 食 也。 范曰: 物得其所,而人不得其所,此君子可去 聖人教人不一端,皆以誠心 而 起。 夫子不食,所以諭子路使之求其 子路以爲時物而共之,非其本心, 然則學者必求聖人之用心,則 子路勇于順承夫子之言,而不 「山梁 聖人之言微隱,而其意未嘗 遠 也。 雌雉,伏藏之物 爲本。

也。言雌雉者,又見應而不倡。」自「色斯舉矣」山雉之作,有似乎此,故曰時哉,以況乎己也者,色斯舉矣,翔而後集之義也。孔子覩也者,色斯舉矣,知而後集之義也。孔子覩日曰:「孔子之於諸侯,未嘗三年淹

至此。

聖人之食,未必如衆 也。 文雌雉之諧髮,●而記 事,若以爲不達其意而拱之,恐不如 故言時哉 三嗅而作,亦如上記不食之類 謝 : 、時哉。 聖 賢 進 人屬 夫子於此不食焉。 子路拱之, 退 出 厭于所嗜,而它 一處,山 未 梁 特特 是之 必 雌 承 雉 哂 蓋 時 似

其意,故三嗅而作也。」 而人不得其時。 之,猶不食, 尹曰: 楊曰: 記此 「聖人之歎,雉在 歎 以 雌 子路以 申歎雌雉之意 雉 之時。 為時 圃 物 Щ 異 而 而 日子 共之,非 得 其 路 共

朝諸老先生論語精義卷第五下終

國

[「]下」,四庫本作「而」,傳經堂本作「也

[「]諧」,原本存疑,明抄本作「語」。

[「]國朝諸老先生」,原無,爲統一全書各卷義例補。

文弊,當世之人,自謂得宜,而以古人

後進於禮樂,君子也,謂其得宜。

質

朴,

伊川曰:

「先進於禮樂,野人也

,謂其

國朝諸老先生論語精義卷第六上

先進第十一

於禮樂,君子也。如用之,則吾從先子曰:「先進於禮樂,野人也,後進

吾從先進。」取其誠意之多也。」 文弊,而欲救之以質,故曰:「如用之,則其容止而文者也,故曰君子。孔子患時之,所質者也,故曰野人,後進之於禮樂,習而質者也,故曰野人,後進之於禮樂,有其誠意進,猶言後輩也。 先進之於禮樂,有其誠意明道曰:「先進,猶言前輩也,後

進。」 過 也 爲 前人爲野人,而自以當時爲君子, 樂,在今觀之,以爲朴野, 輩、晚輩。 先進於禮樂,謂舊時前輩 義 進於禮樂、文也。文質彬 君子者,文質彬彬之名。蓋周末文盛,故 衆。」「奢則不孫,儉則 用於時,救文之弊,則吾從先進,《小過》之 其文質彬彬也。 殷之輅。」 下則史。孔子從之,矯枉 今晚進之人於禮樂,在今觀之,以爲君子。 言其質勝文也 而吾從周,此止文一事, 於文也。 質 也。 朴, 又曰: 「麻冕,禮也; 又曰: 「先進 故 又曰: 孔 故曰: 「如用之,則吾從 子欲從古人。 3 如用之,則吾從先進,言若 先進、後 「先進於禮樂,野 後進於禮樂,君子也,言 固 於 今也 彬,然後君子,其 禮 欲救文之弊。 後進於禮樂,謂 進,如 又有不從處,乘 與 樂、質也; 其 純 古人非 不孫也 ,儉,吾從 今人 不知其 人也, 質 於禮 說 先 朴 前 後

307

二九五

之君子 問 儒 古 然當時謂之野人,是言文質相稱者 尼欲救之云爾。」 有 0 變文從質之說,是否?」 此 ,則過乎文者也。當時文弊已甚 孔子 之謂 何 也 以 不從君子而 不 必 惑 從 周 從野 曰: 之說 台也; 人? 固 一,仲 是。 謂 或

樂者 必爲,●所謂 則於禮樂 於禮樂者也; 也 横渠 仲尼 終 EI: 不 不願乎其外也。」 以貧 미 備 「不待 得 而 賤者必待文備而後進 而 後 行 備 至於禮樂,後進 加 矣,故曰 勉於 禮 謂 樂, 野 人而 於禮 先 進

故曰野人, 者,今之人也。先進於禮樂,質多而 如用之,則吾從先進。」所以適時也。」 子。 范 日 世 衰文弊,則當反之於質,故 後進 「先進者,古之人 於禮 樂,文質 也 相 副 故 文少, 後 日 進 日

大夫也。士大夫之文,不備物不行,如衣服吕曰:「野人,郊外之民, 君子,士

壞之時,必候物備,則文必墜地,故孔 世之急,寧失之野,以振斯文。」 而先進,在君子則必候物備 葉』之謂。 人之文,雖不備 不 具,牲 殺 蓋禮樂之文,在野人則不候物備 器 Ш 物亦行 不 備,不敢 ,如「野 以 而後進。 有死 祭 之 廛」、「瓠 當禮 子救

之則從 彬也。 質勝文也; 質彬彬,然 可 以先之者,謂之後進可也。言先進,則 進者,猶進於此道之進。 人,文多則爲 而文不至者,謂之先進可 知 楊曰: 謝曰: 周衰,文滅質矣,非過物不濟,故用 先進。」 言後進,則無質可知。 後君子。 「質勝文則野,文勝質則史,文 後進於禮樂,君子也,文質彬 君子。 「禮樂先有實後有文, 又曰: 先進於禮樂,野人也, 君子非彬彬之君子。 從先進,近本也。」 也, 周 監 質多則爲野 有文 於 而 則 無文 實 無 實 至

❶ 「曰」,明抄本作「自」。按《張子全書》卷三並作「自」。

焉耳。 郁 蓋周之文因二代之禮,隨時損益,救其偏弊 郁乎文哉。所謂從周者,從其監二代也。 也。」三代之禮,忠質之尚,至 使之統承先王,修其禮物,欲後之作者有考 已,與所謂從先進者,無二道也。」 乎文哉,吾從周者。蓋先王立二代之後 故曰: 「殷因於夏禮,所損益 周 而 備 故 可 郁 知

門,言此時皆無及孔子之門者。思其人,故明道曰: 「從我於陳、蔡者,皆不及

世俗論也。」
世俗論也。」
一世俗論也。」
一世子傳道而不與焉,故知十哲問不止此。曾子傳道而不與焉,問人之賢者,語、文學者,皆從於陳、蔡者也。」
又曰:類顏子已下十人,●有德行者,政事者,言類顏子已下十人,

者,有以德行人者。」以文學入者,有以政事人者,有以政事人者,有以言語人以文學人者,有以言語人以文學人,各因其才。 有

門也。 路 我、子貢可以使四 閔、伯牛,可以爲輔相,仲弓可以爲諸侯,宰 文學者,蓋思之而言也。 陳、蔡者也,時無在夫子之門者,故曰 不免厄於陳、蔡,此則天也。」 可以爲將帥、子游、子夏可以 范曰: 有德行者,有言語者,有政事者,有 「自顔子以下,皆從夫子厄 方,冉有可 夫子之門人,顔、 以 治兵賦,子 立制度,而 不及 於

六「類」字作「敷」。 「類」字疑。按:《二程外書

冉、雍; 間者,今不在此。故下云: 日 文學,子游、子夏。」 言語,宰我、子貢; 「孔子思當 時相 從於陳、蔡之 德行, 顔、閔、 政事,冉有、

者。 未易以一二數也,適不從於陳、蔡之行,故 門,故言之,因以第其學。孔子謂「赤也,束 者,失其旨矣。」 不及也。 而 帶立於朝,可使與賓客言」,宜在言語之科, 不與焉,蓋以七十子之賢,宜在此列者, 而說者謂於陳、蔡者皆不及門,無升堂 如顔淵、季路之徒,皆從於陳、蔡 「從我於陳、蔡者,適不至 其

矣。」

在門,故各言其所學。」 侯曰: 「從孔子於陳、蔡者,當時皆不

日 間者,時皆不在夫子之門,故思其人而言 有宰我、子貢、政事有冉有、季路、文學 尹曰: 有 「顏淵已下,從孔子於陳、蔡之 顔淵、閔子 騫、冉伯牛 、仲弓,

有子游、子夏。」

子曰: 所不說。」 回也,非助我者也,於吾言無

伊 ĬII 日 「於吾言無所不說,與聖人

有疑問, 同 耳。 横渠 曰: 則吾得以感通其故,而達夫異同者 「回非助我者,無疑

問

也

助我者也。」 之則心說而躬行之,夫子所與同道,故曰 若子夏之言《詩》,助也。 則 疑 范曰: 而問,問則有以起夫子之意 「夫子所與言者、皆其未知者、 顔子無所 而 發其 不知,語 言,

相 長 謝日: 也。 說 「答問之間,疑則問,教學 則不復問矣,故謂 之非 所 助 我 以

之「起子」是也 楊曰: 理 有因 無疑問 疑 問 則 無 而 發者,若子夏 相長之義,故

曰 非助我者。」

通 默 識,故說而無問難 「疑則問焉,回於聖人之言,心 也。 助者,猶起予

父母昆弟之言。」 子曰:「孝哉閔子騫! 人不聞於其

以處之,故人無非間之言也。」 伊川曰:「閔子於父母昆弟,盡其道

兄弟爲孝。」 閣傲聞於天下,然則閔子賢於舜乎?」曰: 人無間言,此難能也。」「舜之父母兄弟以頑 一舜以諧頑嚣瞽瞍底豫爲孝,閔子以善父母 范曰: 「子騫之行,能使其父母昆弟

是,故曰孝子成身。」 人不得而間焉; 日日: 「至行誠篤,取信於父母昆弟, 非成身之至,不足以及

道 行於父母昆弟爲孝。」 謝曰:「不得乎親,不可以爲人,故以

> 君子之子矣,夫誰間言之有?」 楊曰: 尹曰:「父母兄弟之間,人無間言,閔 「孝足以成親之名,則人謂之

子之行可謂至矣。」

之。 南容三復白圭,孔子以其兄之子妻

也。 此邦有道所以不廢,邦無道所以免於刑戮 范曰: 言者行之表,行者言之實,未有易其言 「南容欲慎其言、則必慎其行、

而能謹於行者。」

311

此邦無道所以免於刑戮,是則可妻也。」 楊曰: 謝 日 「三復白圭,誠於慎言也。」 「三復白圭,則寡尤悔必矣。

妻之。」 知所慎矣,故三復白圭。孔子以其兄之子 侯曰: 「君子慎於言而敏於行,南容

磨也; 尹曰: 斯言之玷,不可爲也。」南容讀 【《詩》云: 『白圭之玷,尚可 此

二九九

1100

戮,故孔子以其兄之子妻之。」可知。此所以邦有道不廢,邦無道免於刑三復焉,則其慎言可知, 慎於言,則其行

對曰:「有顏回者好學,不幸短命死季康子問:「弟子孰爲好學?」孔子

矣,今也則亡。」

理也。 言之,天地亦云富有也。」惠迪吉,從逆凶,常行之 矣。若以孔子之至德,而又處乎盛位 間,無損益,無進退。 化工之全耳。以孔顔言之,於一人有所不 五人焉,三人富且貴,而二人貧且賤。 人言之,則不足, 以父母言之,則美且 之,謂之不幸可也, 明道曰:「顏子短命之類,以一人言 以堯、舜、禹、湯、文、武、周公羣聖人 譬如一家之事,有子 以大目觀之,天地之 一,則 以二 是 多

子,與哀公同,而有畧有詳。於臣畧,於君范曰: 「孫覺曰: 『夫子之對季康

謝曰:「與哀公問同。」

也。」 楊曰:「孔子以顔回不遷怒,不貳過也。」

可謂好學也已矣。」 尹曰:「不遷怒,不貳過,如顔子者,

以吾從大夫之後,不可徒行也。」死,有棺而無椁。吾不徒行以爲之椁。曰。「才不才,亦各言其子也。鯉也頭淵死,顏路請子之車以爲之椁。子

而加厚。」 「喪稱家之有無,不以子之才

之,豈吾心 路之請 謝 則爲 也? 所識 「聖人脫 窮乏者得 **廖於** 舊 我,而 館 强 圃 勉 不 以 與 顔 阊

以才不才爲之厚 也 何也? 曰: 大夫之後不可徒行 苟無其實,君子不可虚拘,故惡夫涕之無從 哀而出涕乎? 也,說驂賻之。 而 (乎此矣,其視夫子猶父也,父之於子,豈 哭之,遇於一哀而出涕,●惡夫涕之無從 楊曰: 說驂賻之,所以 「孔子之衛,遇舊館人之喪,人 哀之有賻,猶恭敬之有幣也 顔路請子之車而夫子不與, 顔淵死,子哭之慟,豈特一 薄 哉 也,不以 致其 ? 鯉也死,夫子以 實也。 車 而 爲椁,豈 若顔淵 從 則

> 雖無椁可也,故不與。」 顔子之賢而與之乎? 喪具稱家有無而

夫子必有以處。」 夫子必有以處。」 夫子必有以處。」 大子之後,可徒行乎? 此聖人之制 一。若以車爲顏子之椁,則失父子之仁矣。 一。若以車爲顏子之椁,則失父子之仁矣。 與, 至父母之恩,則己之子與人之子不

之心 無椁,亦以從大夫之後不可徒行故也。 孔子言鯉之才固不可以並 其有餘也,雖舊館人之喪,有爲脫驂者矣。」 ,猶顏路之視淵也。 尹 曰: 顔淵 喪予! 死,子日 「送死之具,稱其 「噫! 若鯉之死,有棺而 顔子,然吾視 天喪予! 有 無 而 子 使 天

哀而出涕者,不期然而然也。」則作「遇」近是。「遇」,四庫本作「偶」。按《龜山集》卷十一:「遇於一

范

顔子與夫子同道,天喪予

痛道之無傳也。」

而誰爲?」矣。」曰:「有慟乎? 非夫人之爲慟頗淵死,子哭之慟。從者曰:「子慟

知。」 范曰:「哀發於誠心,是以慟而不自

而誰爲?』」「有慟乎? 非夫人之爲慟,慟也,故曰:『有慟乎? 非夫人之爲慟,其存亡與之爲一矣。其慟也,亦不自知其甚存亡與之爲一矣。其慟也,亦不自知其善楊曰:「顏淵死,孔子謂之天喪予,則

之慟也,不知其慟而慟矣。」與也,●故曰:『天喪予! 天喪予!』其哭與也,●故曰:『天喪予! 天喪予!』其哭

無傳,若天之喪己而重惜之,曰「有慟乎?」尹曰:「孔子於顏淵之死,自傷道之

哀傷之至,不自知其慟也。」

猶父也,予不得視猶子也。非我也,夫可。」門人厚葬之。子曰:「回也視予顔淵死,門人欲厚葬之。子曰:「不

二三子也。」

外,死而薄葬,則稱其德矣。門人以 朋友之恩,而不知於義爲不可,故夫子 厚葬,不循理 范曰:「喪具當稱家之有無,家 也。 顔 子箪食瓢 飲 厚 無 葬 求 貧 爲 非 於 而

椁,稱其財,斯之謂禮。」故無財不可以爲以爲禮。』孔子曰:『斂首足形,●還葬而無楊曰:「子路曰:『傷哉貧也,死無

^{● 「}首」,四庫本作「手」。

子猶 猶 則 以 悅 哀之至矣, 豈吝 子 欲 德,欲其以禮葬 而 厚葬,非其 父也,而 顔路請子之車以爲之椁 門人欲厚葬之,非禮 止 之日: 其 門人而 二車而 死也,夫子謂之天喪予, 故 『非我也,夫二三子也。』 也。 已疑。 不與之哉? 觀 也。 顔路請車之意, 故夫子不得視 則 顔 無 蓋愛之 淵 財 視 可 則 夫 知

子 淵 日 岢 也。」 以 也 厚 侯 『予不得視猶子也。非我也,夫二三 觀其 日 葬 爲 在 美也 「門人厚葬顔淵、非所 陋巷不改其樂之心, ? 夫子不得而 止之,故 以葬 則顔 淵 顔

言

非

我

,則其失有任

其

、責者矣。

門人厚葬之,非 顔 路 尹曰: 而 不 得 「喪具 專其事,歎不 也。 稱家之有無,顔淵貧,而 回之於孔 如 葬 子猶父也,以 鯉之得 宜

季路問事鬼神。子曰:「未能事人,

生,焉知死?」「敢問死?」曰:「未知焉能事鬼?」「敢問死?」曰:「未知

也。」 得。 生之道 也,更無别 所從來,胸中瑩然無疑,止此理爾。 著,亦不濟事。」 知得死理; 生之說。」蓋人能原始 深告之也。《易》曰:『原始反終,故 焉知死?]人多言孔子不告子路,只此 鬼之道。 果否?」曰: 未知生,焉 聖人只一 伊 又曰: 「子路問 ,則知死之道。 Ш 曰:「晝夜者,死 死生、人鬼,一而二,二而一者 理。」 知 死,蓋略言之,死之事,即 此 若不明得, 句 又曰: 或問: 事說有說 斷 盡 ൬ 盡 了, 死,曰: 死 知 則 事人之道,則 「佛言死 生理,便 無皆 故 雖 生之道 生存亡,皆 對 千 一、「未知 難,須自見 子 萬 生輪 能 路 孔子 般 也。 安 便是 要 知 生 知 排 紁 死 知

范曰:「事人者,爲臣則忠,爲子則

未

知生,焉知死?!

以知死。 人,能盡人道,則可以事神, 不足,修身以 則忠孝 能事人,則能 問 可 一死,非學之序,故不以告也 俟死,死 以 事 鬼 事 神。 神矣。 非 所當問也 忠信 君子爲 能知生,則 至 誠 善 聖 鬼 惟 神 人 教 可 H

此所以答子路,非拒之之辭。」 畫夜之道,則人鬼無異事,生死爲一貫爾。備, 知所以生之理,則死之理明。蓋通乎 吕曰: 「能盡人之道,則事鬼之道

不見以 聞 之理 死,莫如知生; 一之驗 也。 謝曰: 聞 天下之事,雖在八荒之外,猶有見 見驗,特知者以 獨死與鬼神之情狀,從古以來, 「此夫子深語子路以死 欲知鬼 神,莫如知人也。」 理考之。 故欲知 與 鬼神

探索之,則頤隱存焉。」

死,蓋 臘 尹 失其義矣。」 理 也 ,所以深告子路。 「能事人則能 事 鬼, 或以 知 生 爲 則 學 知

「若由也,不得其死然。」也, 冉有、子貢,侃侃如也。子樂。閔子侍側,誾誾如也, 子路,行行如

不少加飾。孔子知由之不得其死。」 伊川曰:「子樂者,弟子各盡其誠實,

誾誾 弟子 爲 路 得 因 辭,故其貌 其 其 子路之行行,冉有、子貢亦不能爲閔子 勇果,故其貌剛强; F 死し、 范曰: 也。 事 而 師 以其剛强 教之,此所以樂也。 四子各盡其 和樂。 惟至誠 「閔子恭敬、故其貌中正, 而不 凡子事父母,臣事君 而知之也。 (性以 可以欺。 冉有、子貢善 事夫子,夫子各 『若由也,不 閔子不 [爲說 Ž 能 門

子路之問

而不隱也。

蓋聖人之言常近

一告以

事

問

死,告以

知生

所

以

發

死

生,當源

源自見,初無二致也。

故

問

事

楊曰:

「通乎晝夜之道而知,則人

鬼

死之有?」
涉世之道,使子路由此少知進也,何不得其爲自得,故夫子樂之。行行不害爲直,然非

惡也。 審也。 義也。 是也。 以 乎 於義 所 形 傷之也至矣。」 有間矣。故孔子於其死也,若喪子然,其哀 死之,傷勇故也。故孔子聞 之,亦可以 不獲,亦可以死矣。 其行行,得之於眉睫之間,而知之如是其 謂得 於外,皆其力分之所至,故子樂。 而 楊 柴也其來乎? 子路爲 己。 日 然由之不得其死,亦志於仁而已,無 孔悝被劫而盟,子路往救之,救之而 其死者,非 雖不足以成仁,與夫求生以害仁者 無 若比干諫 死 孔氏宰,●食焉而不避其難 四 矣。 子侍 必考終命而後爲得也,死 然以 可以 由也其 而死,孔子謂之仁人 側,天下之英才也 孔子不爲衛君言 死,可以無 衛亂,曰: 死矣。」則聖人 夫君子 死,而 「嗟

> 不 其 ·進於温 死也。」 侯 日 恭 一若, 故不得其死,非謂 順 也 謂子 路只 行 行 便 順 長 不 得 而

子路剛强,有不得死之理也,故因以戒之云者也,各盡其誠,略無僞飾,夫子所以樂之。尹曰:「四子之容,有諸中而見乎外

范曰:「《論語》弟子之言,閔子蓋鮮不言,言必有中。」不言,言必有中。」, 「夫人如之何?」 何必改作?」子曰:「夫人

善?然當是時,其有不必改者乎?」謝曰:「事有當改,豈以仍舊貫爲焉。言而必中者,有德之言也。」

意於改作。故天下之事,非極弊,不如仍舊楊曰: 「三代相因,有所損益而已,無

● 「氏」,四庫本作「孔氏」。 按宋蔡節《論語集說》卷六引楊

貫之爲愈。」

至升堂,終有不和處。」
堂者。子路未見聖人時,乃暴悍之人,雖學子路於聖人之門有不和處,然學能至於升

而門人以爲夫子不取於子路,故不敬之。能和也。故曰: 『由之瑟奚爲於丘之門。』雖則勇矣,每不達聖人之意而非之,是其不韪則,每言其聲之相和。仲由學於夫子,如鼓范曰: 『妻子好合,如鼓

子而已。如子路,亦未可以不敬也。」室。」此所以不能和也,若琴瑟之和者,唯顔夫子釋之曰: 『由也升堂矣,而未入於

深,故夫子語之以此。」而不敬,不唯不知仲由,且昧於入道之淺故曰: 『由之瑟奚爲於丘之門。』門人以是謝曰: 「由立矣,和順於道德則未也,

子貢問。「師與商也孰賢?」子曰:門人遂有不敬之意矣,子所以釋之。」 尹曰:「由之於道,未能和順而已

與?」子曰"「過猶不及。」「然則師愈「師也過,商也不及。」曰"「然則師愈

不及,不及則怠惰廢弛。」
又曰:「才高者過,過則一出一人, 卑者狂,皆過也。然而行不掩焉,是無實也。」明道曰:「過猶不及,如琴張、曾皙之

也。」 日 也 失之毫釐,謬以千里。」 義,墨出於仁,仁義雖天下之美,然如此者, 處可見否?」曰: 君,®孟子推之便至於此,蓋 於楊、墨。 便至於爲我,其 只是不及些。 其始甚微,其終則不可救。 不及」,於聖人中道 伊川曰: 「師 或問: 商過不及,其弊爲楊、墨。 如楊、墨亦未易疑至於無 然過則漸至於兼愛,●不及則 (原同 「儒者潛心正道,不容有差, 師也過,商也不及,於論交 氣象 出於儒者,❷其末遂 一,師只是過於厚些,商 間 亦可見。」 如「師 其差必 也 楊出於 至於是 過,商 父 無 至

> 故過、不及,其失則均,皆不入於中也。 也。」夫中庸之不可能,唯有過與不及也,是 不明也,我知之矣,賢者過之,不肖者不及 我 其不及者也 人之道若權衡,其所以教人,唯抑其過而 知之矣,知 范 者 中 過之,愚者 庸》 日 不及也; 『道之不行 道之

出於二子。」愈於不及也? 後世楊、墨之學,意其源流,愈於不及也? 後世楊、墨之學,意其源流,愈於不及也。 謝曰:「德以中庸爲至,旣曰過矣,何

之,愚不肖者不及,則過疑於愈矣, 然而楊曰:「道主於中而已。賢知者過

[「]兼愛」下,四庫本有「矣」字。「厚」。按"和校是。「漸至」下,四庫本無「於」字。「喝」,和刻本校云"「過」,《遺書》、《近思録》並作

同」四字。 「原同」,和刻本校云:「原同」按《遺書》作「過不及

十七「如楊墨亦未易」六字並作「至如楊墨亦未」。「如楊墨亦未易」,原本存疑,按: 和刻本及《遺書》卷

猶不及。」 道同歸於不明不行,則其失一也。故曰過

出於二子乎?」曰:『過猶不及。』後世楊、墨之學,源流其曰:『過猶不及。』後世楊、墨之學,源流其矣曰:「過與不及,皆非中庸,故夫子

道而已。」 故聖人之教人,抑其過,引其不及,歸於中夫過與不及,均也。差之毫釐,謬以千里。尹曰:「中庸之爲德也,其至矣乎!

而攻之可也。」益之。子曰:「非吾徒也。小子鳴鼓委氏富於周公,而求也爲之聚斂而附

明,不能反求諸身,而以仕爲急故也。」氏之家,故爲不善至於如此,由其心術不氏之家,故爲不善至於如此,由其心術不

楊曰:「季氏富於周公,而求也爲之鳴鼓而攻之,所以深窒其源。」謝曰:「心以勢利移,則何所不至?

也。」 日 聚 斂 以附 侯曰: 非 益,與 吾 以 徒也。小子鳴鼓而 有若告哀公以 聚斂爲心,而爲人之臣,豈 盍 徹 攻之 異矣,故

人詎以聚斂爲事乎?」小子鳴鼓而攻之可也。」見冉子之陋也。大君子之存心哉? 孔子故曰:『非吾徒也。君子之存心哉? 孔子故曰:『非吾徒也。侯曰:「以聚斂爲心,而爲人之臣,豈

而攻之,以罪大而深責之也。」
周公。冉有無能改於其德,復附益之,鳴鼓此聖人所深惡也。夫季氏,魯卿也,而富於

柴也愚,參也魯,師也辟,由也喭。

以魯得之也。」
其後明道,豈魯也哉?」 又曰:「參也竟其後明道,豈魯也哉?」 又曰:「參也竟明道曰:「曾子少孔子,始也魯,觀

言,可以見矣。所傳者子思、孟子,皆其學聖人之道者,曾子也,觀其啟手足之時之明川曰。「參也魯,然顔子没後,終得

爲度。 也。 甚 誠 聖人之道益尊。 曾子傳之子思,子思傳之孟子,至孟 不及也。推此志也,禹稷之功,其所 實者,曾子是也。易實之際,非幾於聖人 思,便可見。」 子在時甚少,後來所學不可測,且如易簣之 游、子夏之言語,子貢、子張之才辨,聰 也 ,非大賢以上作不得。曾子之後,有子 箇誠 一多,卒傳聖人之道者,乃質魯之人。 篤 易實之際,心即理,理即心,聲爲律,身 , , 仲尼没,得其傳之正者,曾子而 語 實,聖人說忠信處最多。曾子於孔 又 日 日 又曰: 多也 曾子傳聖人學,只是一 魯。」 「傳聖人之道 如聖人之門,子 子,而 人要 優 以 明 己。 箇 爲 者 篤 者

傳夫子之道也。」 質多而文少,其學守約,賢於游夏遠矣,故者知其偏,然後能救其失也。 曾子之魯,蓋者知其偏,然後能救其失也。 曾子之魯,蓋

> 喭者,俗論 文,辟謂 吕曰 便 也。 而 少誠,喭謂俗 愚 謂 專 m 少 而 變, 少學。 魯謂 ^ 質 傳 而 稱 少

蔽,故語之使知自勵也 能 佛畔, 喭 楊曰 . 則 「愚則不明,魯則 禦人以口 0 給 不敏,辟 皆其 性 之偏 則 未

子曰:「回也其庶乎,屢空。賜不受爲學也確,所以能深造乎道者,以其魯也。」偏,則有以教之也。然而曾子之才魯,故其與曰:「四子之才,各有所偏。知其

命,而貨殖焉,億則屢中。」

而知。 貢 미 不受天命而 明道 mj 此子頁始時事,至於言性與天道 聞,乃後來事。 日 「顔子屢空,空心受道。 貨殖,億則屢中,役聰明 其言如此 則 必 億 不 度

於不受命而貨殖也。」

不受爵 否?! 問 拳服 經 足 曰 : 下 殖 解 曰: 所 殖 驕只是爲有己, 吝如不 不受命。 旣 之利也。」先生日: 以 ,非若後世之豐財,但此 有子貢,後 處 作 以 能 如貨 膺 明 亦多。」 伊 曰: 而舍之,習《戴記 ĬII 命 顔 賜不受命 與 顔子所以大過人者,只是得 屢 顔 殖。 空。 而 能 不受命者, 日 子 子屢空之賢 貨殖者,以見其 屢空耳。」「去驕吝 如 然。 人多以 先生云: 貨 又曰: 「屢空兼 何 而貨 殖 學 驕吝 便 孔 不能 貨 殖 生 「汝之是心已不可入 》,問其故 也。 能改過皆是。」 殖短之。 「孔子弟子, 子 馬 最是不 計 兩 「傳記中言子貢 順受正 命謂 到 心未忘耳。」 校 意 私於利之深, 八才計 此 唯 門 可 善之摠 。子貢 深 日: 爵 其 人有 以 命也。」或 邃處?」 校,便 命也 能 顔 爲 一善拳 虚 習 之 淵 屢 與 中 它 貨 决 又 貨 叔 容 是 m

> 不信道 詳 利也。」先生云云, 不止試于太學?」顯道對曰: 知扶溝縣事,伊川侍行,謝顯道將歸應舉。 者, 耳。 於 於 如 貨 堯 此。 要當去此 且貧富 舜 利 之道 也,故聖人謂之不受命。 哉 ? 有命,彼乃留情於其 矣。 特 心 瀬道 뻾 於豐 夫子貢之高 乃止,是歲登第。 後 可 約 『蔡人尠習《禮記 語也。」一本云: 之間,不 識 注云: 伊 間,多 能 有 曷 川 志 無 當 日 尹子言 决科之 於道 見 留 規 明 其 規 何 道

如 言 貧 改其 命,是不受 是。」 富 丽 非窮理樂天者也。 中 在 樂 范 日 天, 也。 是 使賜多言也。聖人之不貴言 天之命 而子貢 天下 屢 之物 空者 也。 以 貨 , 簞食瓢 夫子嘗日 豈 殖 其言 有 爲 動 心 而 飲 其 中 : 則 屢 中 者, 者 賜 絶 能 億 不 哉 而 幸 面 安 不

空空 有 數 無知,則無所不達,自得自生,豈見聞 ,故從億 吕 日 : 億 貨 度 殖 之學, 可 以 屢 聚 中, 所 聞 而 見, 不 能 而 悉中。 聞 見

度物, 以 知 未 殖 而 已,吾. 久, 則 幾聖而未至。」 窮。 平 未 亦庶乎前定而不窮矣。」 以己知求 ? 何與 始 空空無 有 不 受命 乎? 己 中,而 知 所以 者,), 則 又曰 然屢空 應物 不受命於天。 貨 道 殖 所 之學, 如 而 「貨殖之學,不 由 未能 響, 出。 聚 常空, 受於 聞 雖 空空 屢 見 所 天 無 以 面

知。 天 不 而 如 無 此,要之於貨 日 意必也; 「說者以爲子貢與 未能忘意耳。 屢中不免於億,未 受命 時 轉 販 山 則 謂 順 必

所 知存 能 致 命 不遠,則其空也屢 謂 也 忘之耳。 '則物或累之'故有至於貨殖焉。 楊曰: 貨殖,豈若世之營營者耶? 心養性以事天 無物 不 夫君子不億不信,一 空矣。 大 而化之, 而 ,然後能受命; 顔淵 已,故止 則形 大 而 於殆 未 色天 於誠 化 特 性, 庶幾也。 然孔 未能 於物未 而 而 無二 其 受 復

於胸次 子所以 多矣。」 問 矣。 億 知 小人勞力。」 子並耕之意,而 何?」曰: 之營營者耶? 殖,未能忘物也。 蓋 謂之屢,何如?」曰 謂之屢空,則有時乎不空。」 人之事,而 商賈之爲哉?」曰 孔門所謂貨殖者,但其中未能忘利耳 也 |有時而違也,然 雖 空也者,不以一物置其胸中 ,故不足取。」 屢 「子貢貨殖,誠 殆庶幾也。 中 乃其常 或問: 「此亦非爲利也,其 非 非 君子所 所 又曰 命之爲 特于物 也 善 孔門所謂貨殖者,豈若 也。 而其復不遠,則其 學至於聖人,則一 何 : 當 如史遷之言否?」 謂 「樊遲請學稼學 回未至此,屢空而已。 「其心三月不違仁, 小人者,蓋 言 億 務 未能 屢空?」日 者 屢 則屢中,非至誠前 或問: 也。 中 忘焉 所 也。 則 君子勞心, 願學,正 稼圃 耳。 其 八空也 物不 子貢 不 圃 「空必 -,豈若 乃小 日 此 中 顔

或

如

世

貨

屢

則

亦

命也。 猶役 空心 之所尚也。」● m 尹 於貨 受其 其言之屢中者,億 日 八道也。 殖 顔 子 苟以 館 貧 富 食 貨 百有命 瓢 殖累 度 飲 而 焉,子貢之初, 不 其 中耳,非夫子 心,是不受 以 累 其 心

亦不入於室。」子思問善人之道。子曰:「不踐迹,

然其始必循轍迹而後能人也。」善,有諸己之謂信,充實之可以至於聖神,也。孟子以樂正子爲善人信人。可欲之謂也。孟子以樂正子爲善人信人。可欲之謂其與,故爲邦必至於百年,乃可以勝殘去殺能自達者也。苟不履聖賢之迹,則亦不入明道曰:「善人,非豪傑特立之士,不

則賢 有 善也,故不止 不善而不能改也, (遠也 雖然,亦不能 伊川《解》曰: Ė 踐 爲 舊迹 善人而已。 造 「所謂善人者,不爲不 則昏柔無立之人,安能 而 道之遠奥也,苟能之, 已,有不善則能改之 若規 舊迹,雖

> 日 厚長者之謂 爲 舊迹,亦不能入聖人之室也。」 不踐已前爲惡之迹,然亦未入道 「不踐 善人 「踐迹如言循途守轍。善人雖不循守 迹,亦不人於室」之人也。 乎? 也。 乃今所謂 又《語録》曰 善 人 也 0 不踐迹,是 善人者 也。 又

人之室也。」

諸己也。不入於室,由不學,故無自而人聖也。●欲仁,故雖不踐成法,亦不陷於惡,有 横渠曰:「善人,欲仁而未至於學者

邦百年,乃可以勝殘去殺,治民之效如此其有常者斯可矣。● 善人者,君子之次也。爲范曰:「善人吾不得而見之矣,得見

- 「之」,四庫本無。
- 「志」。 「玄」,明抄本作「志」,按《論語集註》引張氏說並
- 宗趙恒諱。「常」,四庫本作「恒」。按:原本作「常」者,蓋避宋真

0

室覩 不能自 遲 善。」知善之可欲,故誠心好之,如樂正 是善人也。」● 也 聖人 立 踐迹者,蹈古人已成之迹而行之, 也。善人不止如是,然亦 之奥也。《孟子》: 可欲 不 子者 之謂 能

不踐其迹,亦不能入其室也,況聖人乎?」人之道。孔子以爲善人之德,雖曰未優,苟人之道。孔子以爲善人之德,雖曰未優,苟

與

色莊?」

也。 善人 善而 善人之道,非充而上之於人室則未也 也 夫踐迹 無諸己則非善人也。 楊 尹 日 日 而 兩言之,蓋謂之善人,是亦 而已,非有諸己也,故以 「所謂善人者,不爲不善者也, 「可欲之謂善,有諸己之謂信 故孟子謂樂正子 不踐 信人 洂

子曰:「論篤是與,君子者乎? 色莊也。」

不至

於

%循轍

而爲非,亦不能深造而至遠奥

之,必觀其行事乃可也。」 於人者,唯 色莊者乎? 明 道 曰 言之篤 未可知 論 厚者是與, 篤 也。 ,言之篤 不可 以 君 厚 論 子 者 篤 者 也 遂 乎 與 取

乎? 篤 加 與之, 伊川曰: 又曰: 是謂 「不可以言取 君子者 「言論 篤 乎? 實時,與 徒 能 今 君 色 以 莊 其

乎? 也。 此辨之,則君子小人之情可見矣。」 之於心,而求之於言,此君子小 范曰: 色莊者,色厲而 色莊者乎? 「論篤者、言必篤 言其未可 内荏 一者也。 知也。 厚 也。 所 君 以 子 難 不 求

然未必循迹而遺意。論篤是與,君子者色莊,以其能躬行也。善人雖未能有諸己,謝曰: 「踐迹止於色莊,君子者不必

- 「者」,四庫本無。
- ❷ 「躬」,四庫本作「於」。

三四

君子者乎? 問 子路問 尹曰 故退之。」 日 子曰「開斯行之」。 子曰「有父兄在」, 之。」公西華曰: 父兄在,如之何其聞斯行之?」冉有 : 「聞斯行諸?」子曰: 「求也退,故進之, 「若以言論之篤而 與其爲色莊者乎?」 「聞斯 行諸?」子曰: 「由也問聞斯行諸 赤也惑,敢問。」子 求也問聞斯行諸, 由也兼人, 與之, 聞 「有 斯 與 其

行,唯恐有聞也,故退之。」 伊川曰:「子路果於行,有聞而未能

求有聞斯行之,其當聽於父兄者不待教。於師,此則不待父母之命而行者也。使冉如此者不可專也。若爲仁由己,當仁不讓如此者不可專也。若爲仁由己,當仁不讓

也。聖人進退如此,所以成德達才也。」使子路聽於父兄,其有勇於行者亦不待教

所進。」 專輒也 所退。 專 輒 也。 謝 ? 有父兄在,其勢苟得以禀命,胡 然勇者或徒行而未必中義, : 然弱者雖義有時而不爲也,故在 「有父兄在,苟在於義,非 故 ボ m 在 口

也。 之,亦各因其材而篤之耳。 蓋 故 聞 則固能聞斯行之矣。 退由者,蓋子路有聞,未之能行,唯恐有聞, 聖人之於人,猶天之生物 由、求之問,隨 斯行之可也。 楊曰: 然聞而不行,學者之所病,而夫子以 「聞之而義在必行,雖父兄在 雖然,禀之父兄何傷乎? 其偏弊而救之,所以兩 以其兼人也,故退之。 也,其進之退 是

已。孟子所謂成德達才者是已。」● 尹曰:「聖人之爲教,各救其所偏而

子 死 · 畏 矣。」 於 匡 日 顔 : 淵 「子在, 後。 子 回何敢死? 日 吾 以 女

日: 敢。」 罪 行 便 須 難 非 顔淵 者,上足以告天子,下足以告方伯,以討其 何 何?」日 曰: 蕳 逃 當 耳。 則 自 顔 敢先?」死 使孔子遇 又問 有 去之,言我 同 止 子之事 親 伊 可 「豈特顏子之於孔子,若二人同行,遇 無可 ĬΙ · 贵 親 去 在, 豈得爲 相 : 無 用 又曰: 死 到 且 親 死之理。 力。 0 臨 也。」又曰: 「使孔子遇害,顔子死之否?」 者,非回之所當爲 ? 難, 時 若云遇害, 「死字當爲先字,」子在 譬如二人捕虎,一人力盡, 有親,是大不義。 如執干戈衛 但當 却 顔 死當 孔子死 自 淵 除 規 預先謂 有 非 避 爲先, 乎? 可死之理否?」 又不 是 也 親 鬭 社 吾有親 在, 稷,到 死,然 謂先往也。 當 也。 日 當此時, 言敢 則 或曰: 不可 如 當 急處 鬭 > 爲 不 死 親 回

> 不 爲 在 口 許 在,不可許友以死者,如俠士以親不在 ,不許友以 人報讐,甚非理也。」 友以死者,二人同行之事 死, 如 何?」 日 : 是 有親 也 在 有 方有 而 親

許 己 存亡。 師 以 吕 范 日 日 死者也。若夫子死, 顔淵 : 死謂死 「顔淵 「父母存,不許友以死,未有不 戦。」 志 道,以孔子之存亡爲 亦死之。」

死難矣。」
敢,猶言必死也。其意謂夫子不免,則回必敢,猶言必死也。其意謂夫子不免,則回必謝曰:「敢,非不敢之敢,乃果敢之

先, 傳寫誤也。」回 楊 日 日 : 臨 臣 難 聞 何 有相死 師 敢先,於理爲 程 頤 之義。 日 順 死 當

爲

季子 與?」子曰: 可 與求之問。 則 然 止。 問 今由 所謂. 與求也 吾以子爲異 仲 大臣者,以 由 冉 円 求 謂 (之間) 道 可 具 謂 臣矣。 君,不 曾由 大 臣

謂大 不 能 合則 能 父與君,甚季氏之惡也。」 諫 、臣矣。 以 服 生,雖爲布衣,楊雄謂之大臣。 ,退不能去,故夫子以爲具臣。二子雖 范 日 義 從,不合則去,明於進退之義, 正君,然君若爲大惡,亦不從也。 仲由、冉求仕於季氏之朝,進 「大臣者,不必在 E 位 事君 也 則 不 可 道

臣 止。二子事事非 之事。 謝 日 進退 「有大人之德,然後 行藏 事道者, (不係於利 氣不足以 故故 可 扶顛 不 以 可 爲 持 則 大

季氏旅 以 臣 由 危,其可謂之大臣乎?」 道 皆 、求爲問,意其爲大臣 楊曰: 事 不 君,不 於太 欲 丽 不 Щ 「由、求爲季氏宰,故季子然以 可 能 則止也。 而不能 諫 是謂 救, 可 然 與共 具臣 季氏 將 伐 成事功也。 矣 至僭用 顓 非 史,二 大 天 臣

> 伐顓 從; 不從 雖 自弑 日 等,便爲大臣,如孔孟之事 已。」「然則或許其升堂,且皆在政事之科, 季 與君,言其大者, 與 子 何也?」曰: 监當亂 氏 君 之禮 曳而不能止; 侯曰: 父與君而下,或從一事,則不得爲 也,由、求 亦 旅太山、伐顓臾而 「孔子言由、求爲 若弑 世,而 一則其 不從也,其庶乎二子可 父與君,則决不從矣。 「小事之失,亦未必皆從。 篡逆之心已兆 「觀 遇庸暗之主,一毫亦不 如是 蓋小者不能不從故 季 氏 而已乎?」曰: 富於周 旅 具臣,日 不 泰 君是也。 公, 矣, 能救之之事 Ш 侕 免 加 弑 故 不 求 矣。」 父 對 放 進此 故 能 也。 與 也 以 過。」 爲 救 孔 弑 君 弑 旧 父 父 亦

尹曰:「季氏執國命,仲由、冉求仕其

君

亦不從

也。」

是

乎?

雖然,以子路之勇而

好義,弑

聚

斂

以

附

益之

非

具

臣

而

何

事

道

者

如

備 其 家 數之 ,必不從也 m 不 能 臣 意其可 正 而 也,知其 己。 使從己 季氏 不 也 有 可 無 一,故又曰若弒 而 君之心,自 不 能 止也, 多得 逆之 可 謂

焉,何必讀 子路使子羔爲費宰。 之子。」子路 是故惡夫佞者。」 日: 書, 然 「有民 後爲學?」 子曰: 人焉, 子 有 賊 社稷 日 夫

治人; 也。 矣。 學 何可 m 也。 不 乃 ·知其 范曰: 欲 以 堯舜 聖人之道在方册,讀 使子羔以 不 道之本在於修身,知修身,則 知所以治人,則知所以治天下 禹必 讀 過,故夫子以爲佞。 書 「古者學而後人政、未 稽古 也? 政爲學,失先後 而行, 皋陶 先學 而 而求之者,將行之 後 可 亦稽古而言, 本末之序, 以 治民,子 聞 知 -國家 以 所 以 政

錦 吕 日 不使學製,況民人乎?」 「子路之禦人以口 給 而 己。 有

> 子路民 復求益 意有未喻也,是知尊所聞而不稽其弊者,不 羔之事。 謝 人 也,是以夫子特惡其禦人以 社 子路使之仕,所謂賊夫人之子也。 稷之語, 學 固 有 則是於賊夫人之子之 不必讀書者,然非子 口 給 而

.

矣。 不待讀 禦人也,故孔子曰: 賊之也。 楊曰: 而子羔之才不足以與此,遽使之仕, 書者。 子路以何必讀書 「三代而上,六經未具,其學 有民 人,有社稷,固 惡夫佞者。」 爲 解,是 足以 學 是 以

達; 於樂。」又曰: 立也與?」又曰: 人而不爲《周 詩 》,無以言, 侯曰: 使於四方,不能專對: 夫子 南 『誦《詩》三百,授之以政,不 》、《召南》,其猶正 不學禮,無以立。」 『興於《詩》,立於禮 嘗告伯 魚 雖多,亦奚以 曰 牆 又 不 血 日 一成成 學 而

多得其人」《論語集註》引尹氏《解》作 「多其得人」。

八

也 美錦,不使人學製焉。 學之先後故也。《左傳》: 故夫子曰: 也。子路問民人社 『賊夫人之子。』是子羔未嘗學而使之從故 爲?」民 禮之後乎? 一,而使學者製焉,其於美錦 人社 「使往 『是故惡夫佞者。』以子路不 稷 子路使子羔 而學焉。」子産曰: 固 可 稷何 學也,其 大官大邑,身之所庇 必讀 爲 子皮使尹何 書以 費宰, 、在學《詩 不亦多 拒夫子. 子 子有 乎? 》、學 日 知 爲

子羔所 夫子 給也 尹曰: 能及哉 羔 也 ? 子羔學未至,而使之治人,是 學 ·固有 子路必爲 不待 讀 之辭,故夫子惡 書者矣,然豈

賊

亦

此義。」

僑聞之,學而後從政,●未聞以

政

學者也。」

子路、 居 日 則 「以 曾哲、 吾一日長 「不吾知也。」如或知爾, 冉 有、 公 乎爾, 西 毋吾以 侍 坐。 也。 則 子

> 對日: 子者之言何如?」子曰: 三子者出,曾晳後。 日: 日 作,對日: 十,求也爲之,比及三年,可使足民。 何 而歸。」夫子喟然數日 人,童子六七人,浴乎沂,風乎舞雩, 如其禮樂,以俟君子。」「赤,爾何如?」 何如?」對曰: 有勇,且知方也。」夫子哂之。 之以饑饉,由也爲之,比及三年,可使 之國,攝乎大 點,爾 以 如 莫春者,春服既成,冠者五六 何傷乎? 何如?」鼓瑟希,鏗爾,舍瑟而 「非日能之,願學焉。 同,端 子 「異乎三子者之 國 路 之 章甫, 率 「方六七十,如五六 間, 爾 亦各言其 曾 而 加之 願爲小相馬。」 哲日: 對 「吾與點也。」 日 「亦各言其 以 師 「求,爾 撰。」子 志也。」 宗廟之 「夫三 千 因

從」,四庫本作「入」。

日 志也 非 七十如五六十而非邦也者?」「唯 之。」「唯求則非邦也與?」「安見方六 邦也與?」「宗廟會 已矣。」曰: 「爲 國 以禮,其言不讓,是故 「夫子何 同,非諸侯 晒由也?」 赤 則 哂 而

子 孔子之志,在於老者安之,朋友信之,少者 之,故孔子不取。 日 懷之,使萬物莫不遂其性。 沂,風乎舞雩,詠 聖人之事,而能知孔子之志,故曰: 見者小。子路只爲不達爲國以禮道理,是 特行有不掩焉耳,此所謂狂也。子路等所 同,便是堯舜氣象也。誠異二三子者之撰, 喟然歎 哂之, 若達,却便是這 「子路、冉有、公西華皆欲 道 曰: 吾吾 「孔子與點,蓋與聖人之志 而歸。」言樂而 曾點,狂者也,未 與點 也。」 曾點知之,故孔 氣象也。」 得其所也。 得國 必能 又 浴 而治 曰: 又 乎 爲

曾點、漆雕開,已見大意。」

學 ; 外,然自身却只在此。」 是實事。後之學者好高,如人游心千里之 路、公西赤言志如此,夫子許之,亦以 也。」今之學者,往往 澤之潤,渙然冰釋,怡然理順,然後爲 後之序。今之學者,却只做一場話 而已。常愛杜 伊 然游、夏一言一事,却總是實。 川曰: 元凱 「古之學者,優柔 語 以 游、夏爲 如如 江 海之浸,膏 厭飫,有 小,不足 說,務高 此 如子 白 得 先

何?

赤也爲之小,孰能爲之大?」

不出 狂 不在 而 治人也,故使門弟子各言其志。視其所學, 可與賓客言。蓋三子之志與其所學,未嘗 可治千乘之賦,冉有可爲百乘之宰,公西 其所以及天下,從可知焉。 也,狂者進取,志於大道,故治國之事, 范曰: 如夫子所言也。 此,而夫子亦以稱之。 「夫子教人修身之事,皆所以 至如曾皙,夫子所謂 是以三子之對, 夫子謂子路

不足 哉?」 亦若『老者安之,朋友信之,少者懷之』 言焉。 天下之物,皆得 浴 乎 沂, 其所,國 風 乎 舞 零, 其有 詠 不 mi 治 而 歸 者 已

能, 有志樂道,不希近用,故孔子取之。」 而冉有、公西華言稍 吕曰: 「三子皆有諸 加 讓 侯之志, 至於曾皙 願 試 其

之意。 得 爲言 明道 在乎? 可 體 忘勿助長,則知此。 飛戾天,魚 樂其不願仕,推 以 然常懷此 ,未免於意必者也。 謝曰: 體無不在,非指鳶魚 優 ,則上面更有天,下 季 爲,特 道以 ,路、冉 躍 於淵 意 其 無 「子路、冉有、公西華未 所倚 在 志 曾點之學,雖 求 胸 言志 ,無些私 不存焉。」 知此,則 中,在曾點 爲至,夫子與之,非止 乃若曾點之意,果 之事, 面更有 而言也,若指鳶 意。上下察, 知夫 禹稷之事, 又曰: 非 地 看著,正 大才 子 在 與 「鳶 做 識 曾 知勿 點 魚 以 何 不 可 固 道

> 笑 不 詠曾點事,曰: 曰: 不至諸侯。 事近之,然易做 便不得 休。」 爾 0 「吕晉伯兄弟中皆有見處,一人 其 學者 Œ 不 可憐曾點惟鳴瑟,獨對 미 且 , 只 著 「函丈從容問 道 曾 是 事 點 無 在 心 有 胸 」, 近 甚事 中 且酬,展 於忘。」 列 才 著 春風 子 作 才無 御 詠 詩 又 風

之言、未必能踐之、亦志於進取 點之志,則顏子之事也,故夫子與之。 撰,概可見矣,此記者所以詳著之也。 爾、舍瑟 所以爲狂與?」 初若不聞者。 楊曰: 而 作,則點之自適,異 「三子言志,而點之鼓瑟自如 孔子問之,而 後鼓瑟希,鏗 乎三子者之 而已,此 然點 夫 充

己 可爲百乘之宰,公西華 知之矣。今使之言志者,豈徒欲較 尹曰: 「子路 可使治千乘之賦, 口 與 賓客言,孔子 其 冉 固 有 事

0 國 四 庫本作「夫」。

哉? 業? 美而與之也。如點之志,雖聖人何以 有所得於中者,其能志於是乎? 上,風涼於舞雩之下,吟詠情性以歸。 鼓瑟希,鏗爾,舍瑟而作,對以浴乎沂水之 之。至若曾皙,則異乎三子者之撰。 薄故也。三子者,競言其所能,故夫 不掩焉。」 然點狂者也,言之則是矣,行之則 亦以觀其自得之深淺,可推於人者 故夫子 子 非深 方且 不 歎 與 厚 有 異

國朝諸老先生論語精義卷第六上終

國朝諸老先生論語精義卷第六下

顔淵第十二

已,而由人乎哉?」顏 不敏,請事斯語矣。」 禮勿言,非 目。」子曰: 顔 淵 日克已復禮,天下歸仁焉。 問 仁。 禮勿動。」 子日 「非禮勿視,非禮 顔 「克已復禮爲仁。 淵 淵 日 日 爲仁 「請問其 旦 由 非

其前 言,只是說道也。 公之所謂道也 也,更無别處。克己復禮之爲道,亦 上 更有甚克? 莫錯否?」曰: 一物曰: 明道嘗論克己復禮。 ? 「此道也,它本無 如公所言,則是 克己復禮,乃 韓持 或 所 可 日 如如 克 以 何 八自指 爲道 公 傷 所 平 道

> 處?._ 道 ? 禮 禮勿言,非禮勿動,一於禮之謂仁。 言 也。 知道 非禮勿言, 後復禮。」 禮,以謂克却不是道。 道,大小大分明。」 人,則無事可克, 克之道。」持國又言: 無真假。」曰: 言,克己不是道,亦是道也,實未嘗離得,故 而入者也。克己復禮,非道 可離非道,理甚分明。」持國 到底須是是者爲真,不是者爲假,便是 道在己,不是與己各爲一物, 與己未嘗相 「道則不消克,却不是持國事。 又曰: 異 非禮勿動,積習儘有功,禮在 又曰: 也。 「旣無真 「非禮勿視,非 離 今日持國 又曰: 「非禮勿視,非禮勿聽 又韓持國嘗論克 則若不 「道則不須克。」先生 先生言: 無假,却是都無 m 克己 「克己則私 須克得己,然 何? 又曰: 禮勿聽,非 「克便是 仁之與 至如 可 何 己復 在聖 跳 以 何 道 物 公

●「與」,四庫本作「於」。

是禮

不

便

即

便

敬

不

又

也。

了;

之視

己

復

又曰

「多驚、多怒、多憂,

只

去

事

所

偏

克得

一件,其餘自

止

又

日

己,

也。

自能

復禮

雖不學文,

而

禮

意

已

得

禮。 曰: 乎?」先生作《 字,但云: 私 爲之則。 者,宜服膺而 顔 由 聽,非禮勿言,非禮 己復禮之目,夫子曰: 己私,只有禮時,方始是仁處。」先生親筆改 私意,既是私意,如何得仁? 則天下 克己復禮,天下歸仁者,言 「克己復禮爲仁,言克盡己私,皆歸於禮,是乃仁也。」 克己復禮 淵 乎中而 欲 無 事 3 「心兮本虚,應物無 「難勝莫如己 稱其仁,非一日之間 斯 「雖爲善事,亦是私意。」 欲, 蔽交於前,其 語 應乎外, 如如 於 ",所以 即 勿失也。 私 何是仁?」曰: 四 皆天 欲 箴》, 其 進 制 私,學者能克之,非大 勿 雖 理。」尹 於聖人。 於外,所以 動。」四 因箴以自警。」《視箴》 有 中 『非禮 八字曰 意 則遷。 迹。 本無 於爲善, 旦能克己復禮 : 者,身之用 也 凡人須是 又曰: 勿 操之有要,視 非禮 後之學聖人 「雖有意」下十六 養其 「顔淵 視,非 制之於外 處 或 亦 中 日日 問 間 克 是 便 E. 也 勇 盡 是 克 又

克

敬

思。 宣。 惟 欽 出 煩 非 同 危。 哉 則 好 禮 其 安 歸 志士勵 訓 支。 發禁躁 勿 其 正 人 幹。 造次 聽。」《言箴》曰 吉 内 有 己肆 N N 卓 。』《動 克 榮 彼 秉 行,守之於 妄,内斯 克 (念, 戰: 物 辱, 先 彝 己 箴》曰 本 忤 覺 復 惟 禮 兢 知 乎 其 靜 出 爲。 自 專。 天 悖 所 「人心之動 止 久 召。 持 來 有 性 哲人知 而 順 違。 矧 定。 誠 理 是 習 傷 知 矣。 與 閑 誘 則 易 樞 幾 非 法 機 性 邪 物 裕,從欲 ,誠之於 則 ,因言以 ^ 誕,傷 興 化 聽 成, 不 存 · 道, 箴 誠 戎 聖

無

非

禮

而

已

是 己 禮 也 私 矣。 非 出 也 則 克 禮者 於 ; 范 至於理。 深理,不 己 日 有不善未嘗 不遷怒, 了, 正 復禮 Ē 心 克己, 時 禮 不 丽 不貳 是則 已矣。 者 天下之善皆在 不 「, 理 知 自 八過,復 非 世 勝 爲 知之未嘗 理 至 其 也 禮 私 於 由 也。 也 理 視 己 於此 ,在内故 復行 , 則 聽言動 夫正 勝 能 己 - ?,克 之 與 復

> 及。 歸 天 焉 下 之善 而 堯 夫 在 不 舜 矣。」 己 修 勉 身以 而 則 中, 行 治 不 之 天 思 下 日 而 得 亦 可 惟 則 使 視 非 天 聽 顔 下 子 所 動

爲卒 畦。 克己 吾體; 德。」 帝 胡 吾仁 秩 叙 自物,不 仁者與? 克己復禮 則 天 莫不具 徒 不 叙, 勝 復禮,昔之所喪,今復得之,非 術 吕 又曰: 心 仁,我 曰 之中。 初 忘己 以 則 横 無 奉 費》曰 安仁者,以天下爲一人而 爲 存。 物 浴轎 生,擾擾 辭 則反得吾仁,天下爲一人。 「仁者以 同 我 則 於天 體 人之所以不仁,己自 兼 有 : 有己則喪其爲 作 日 體,雖天下之大,皆 己。 「凡 不 勝一己之私 我 有是 孰 天 齊。 蟊 厥 立 敢 下 賊 Ľ, 有生,均 侮 己 爲 大人 子·? 與 則一 志 物, 體 存 以 爲 誠 氣 且 私 己。 天下 日 天 反 天 Ξ 同 戰 爲 有 乎 秩 體 見 町 故 歸 非 是 於 天

切吾 國。 亦 未 徠 勝 既克之,皇皇四 克, 窘我 身。 孰曰天下,不歸吾仁? 私 室慾。 室 日至之,莫非 盧。 昔焉寇讐, 達。 婦 姑 勃蹊 洞然 今則臣 語事。 , 八荒,皆 痒 安取 疴 僕。 顔 厥 在 何 餘 方其 舉 我 ?

哉?

希之則是。」

言, 禮 天, 斯視 視 循 人。」視聽不 而 「四者皆不可易,易則多非禮 視聽言動合理 後 理 以 則 獲。 言動 便是復禮。」曾本云: 動 我 可 言動猶可以 日: 斯聽,自然合理, 作 以 動 所謂 無 正,視 以 也。 「禮者 非 默 難者, 我 而 我矣。」 無 也 仰 聽 非 1,播 禮 與禮文不相合,如何?」 ,胥失之矣。」 面 以 天 一視聽 如 心之 貪 我 也 何 視,以 或 3 問 看 得 合理便合禮 規矩。 有甚禮 問 鳥, 合禮 ,故仁者 内 「合視聽言動處 我 外 П ? 如 文? 言 頭 循 或 動 問 錯 以 先 日 理 我 雖 : 非 應 則 m

> 禮文? 視聽 文來合? 又曰: 曰 上做 辭氣者,猶 仁如何下工 己之私 日克己復禮,天下歸仁焉,只就性上看。 大祭底心在,便長 大賓,使民如承 而 仁,死漢不識痛癢了。 ,理之不可易者也,只是 喏,若不從心中出,便 不知其味。」不見、不聞、不 言動 亦 以斯 「心不在焉,視 只 得 循理便是復禮。 「克己,須從性偏 則心虚見理矣。 是 聽,自然合理 理 佛 如曾 夫?」曰: 一,何 所 故 大祭,但存 謂 子 得 從 顔 識 合 一箇敬字。」 言動 1禮?] m 此 色 痛 又如仲 癢。」 不見,聽 容貌 心 合這 是 猶可 「如顔子視聽言 難克處克將去,克 日 中 不 如 箇 以有禮文,視聽 流 F 識 見大 理 知 弓,出門 怎生外 又曰: 出 做 字,便 痛 或 味 而 問 癢。 亦 便 不 今人 得 合 面 聞 討 古人 是 如承 如 有甚 得 見 唱 動 求 出

怒哀樂之未發者是也。惟其徇己之私,則仁之爲言,得其本心而已。心之本體,則喜游曰:「孟子曰:「仁,人心也。」則

動 淵 所 然,三月不違者,其心 其 焉。]天下歸仁,取足於身而已,非 也。 也。 也, 民, 以 心安仁, 也,故曰: ൬ 汩 聽, 地,而何克己復禮、三月不違之足言哉? 請 還 誠不息,而 矣,故曰: 於 心之本 故曰: 自 物物而愛之,又非積日累月 事斯 道 忿 且心之本體,一 L此而 更 m 日 慾 心 遂 無 則 反本復常, 而 語,至於非 體見矣。 之公,則將 通天 縱目之所 姦 愛物,皆其本 「爲仁 「克己復禮 可久矣,故能三月不違仁。 人 聲 了一日克己復禮, 天下歸 (道熄) 下之故 無 由己,而 自此 思也 則萬物 矣。 視, 禮 而 視 猶 爲 人如 勿 有 更 已矣,非 則 而 誠能 仁。」禮者,性 心 ,動,則 所 無 親親親 (無亂 由 發 隨 己, 操 育 爲 體,無 人乎哉?」顏 勝 物 也。 也 色,縱 自 萬 視物 不 人 有藉 而 而 事 寂 離於 物, 心之私 後 事 見者 此 至於 滴 如 然 耳 於外 彌 m 可 而 之 愐 中, 不 之 中 非 至 爲 中 伙 仁 雖

> 矣。 罕言 艱 以 於縱 旋 遠,庶乎仁者也,故告之如 與 放 人心也,操之則爲賢,縱之則爲 濟 此 衆也。 中禮 吾 心 ,復禮所以 勝私欲 聖人之能 楊子曰 楊曰 也。 而已,放 心,則於博施 則 體耳,孰非吾仁乎? 仁至於此 然 而 無 事 則 收放心也。 閑之也。 事乎復矣。」 加 「仁,人心也。 『勝己之私之謂克。』克己 不知求 愐 | 與 濟衆,未能 對 聖 則 時 烏 仲 能常操 育 則 雖收 ...萬 乎 尼 此。 人欲肆而 辨 物 所 無數數然 放心, 閑之爲 問之道,求其 ? 不 者 而存者,天 顔淵 若夫 聖。 敢居 所 日 苟 其 動 天 以 也。 復 未 容周 理 博 一所 至 施

也。 禮 爲 又問克己之目,語以視聽言動者,夫然則爲 盡 者,理也,去私欲則復天理,復天 禮不 尹 問 日 可 何 以 以 徒 弟子問仁者 至於仁,日: 復,唯 能克己,所 多 矣, 復 禮 唯 以 則 理者,仁 對 復 顔 也。

是之 聽言 由 乎 在 謂 動 中 内 復 必 而 何 以 應 天 事 理。 禮 平 於 而 外 外 顔 其 制 乎 子 其 ? 心不正者,未之有 事斯言而 外 蓋 所 難 以 勝 養 進 莫 其 乎聖 如 中。 己 也, 私 視

使民 仲 在 雖 弓 邦 不 敏 問 無 如承大祭。 仁。 怨,在家 子日 斯語矣。 已所不欲,勿施於人。 無怨。」仲号曰: : 一出 門 如 見 大 賓

它弟

子

所

不

能及

也。」

相屬。 見大賓 於仁。」 廣 只 之法。」 此 、是不 體 儼 胖 伊 若 此一 動容周 私之說 ĬΙΙ ,使民如 或問 方 思 又曰: 日 段下文與《憲問篇》「修 其 時 未 也 也。 旋 承 「大賓、大祭,只是敬 出 出 中禮。 大祭。看其氣象,便須 「孔子言仁,只說 門、使 當 才不敬,便私欲萬 門 其 如 出 民 見 唯慎 門、 時 大 己安百姓 使 如 賓,使民 獨,便是守 民 何 時 章」内 出 端端 也 日 門 其 如 之 承 1 如 害 敬 段

> 邪。」 故曰 子能 使民 多 爲仁,曰 是仁之目也。 乎 日 家 心 接物方有此 以 是 外 如 言 ? . 亦 無 誠 者 因事上方有 此 如是用心,能如是存 如承大祭。己所不欲, 怨,周公狼跋 ,人皆日 怨,孔子發明仲弓使知仁字。 而躁 「孔子告仲弓曰: 而 出 「雍也 其本, : 又曰: 乎中 未 出 故但告以『其言 誠 「雖之夷狄 者也。 誠者,蓋是人素來誠 也。」 此 可 然樊遲失於粗 可 敬 以一言而蔽之日 「仲弓之仁,安己 使 使南 亦怨。」又引《文中子》。 、 蓋素 出 又曰: 不不 面。」對樊遲之問, 門 敬 『出門如見大賓 敬也; 心,則惡有 使 可棄 可 「在邦家 勿施於人。」君 民 也初 知 俗 心。」司 者 也 ,聖人勉使 猶之接 一而敬 巾 事 「思無 然舜 不仁者 且 也 馬 而 非 見 物物 在 因 平 亦 又 或

可使無 不同。 有 下只有一箇憂字,一箇怨字,有此二字, 作《易》者其有憂患,須 通 何以 問 人?」曰: 不得. 所 安得無之? 憾。」 怨?」曰: 舜自是怨,不怨却 怨,然於事亦難,天地之大也,人亦 在 如此 邦無怨,在 「在己。」曰: 執泥。 「怨只 在邦無怨,在家無怨,在 家 如言仁者不憂,又却 是 無 知 「旣在己,舜 怨,在知 一箇怨,但 用處各别也。 不是也。 , 0 其 在 須 在 用 己 理 聖 天 是 覤 在

己以 施 不 欲 横渠曰: 人也。 於人,然人施於己能無 在邦 「己所不欲,勿施 無 怨 在 家 怨也。 無 於 怨 入,能 己 雖 不 恕

在 成 以 而 矣。 不可 恕。 邦爲諸侯亦無怨,在家爲卿大夫亦無 范 離 敬所 日 二帝三王,皆以二者。 也。 以直内,恕所以 「爲仁之道,以敬 修己以敬,待人以 待 信能 人 爲 (),可 恕 主, 行 以 圃 而 此 修身 仁道 行 怨。 則 之

> 仲弓 行簡之道 可 使 也 南 面 故 所 告者 臨 民 之事 , 居 敬 丽

則 祭,則以閑 動,亦庶幾焉。」 而 無時 不敬也。 游曰: 吕 日 而不敬也; 邪 仲弓能請事斯語,則 存其 出 以敬、恕行仁,則 門 誠 如 使民 而 見大賓,使 己。 如承大祭 出門· 人 如 於非 民 無 了; 則 見大賓。 所 如 承大 慊 無 事

之,可以爲仁而已。此告二子之異也。」南面,故告之以見大賓、使民之事,由是守而克復之名亡,則聖人之事也。仲弓可使其中矣。顏淵克己復禮,克之,已與禮一,其中矣。顏淵克己復禮,克之,則仁在楊曰:「敬以守之,恕以行之,則仁在

故寡欲則至於仁矣。蓋言無時不敬也。出者,敬之及物也。敬則不私,不敬則多欲,尹曰:「敬以直内,爲仁之要也。恕

^{● 「}在知」,於意不通。按《二程遺書》卷十八作「不知怨

又曰 謂接於 門、使民 事 方敬 接於事者 在 邦無 也。 怨,在家無怨。」仁者能 也,見 夫子懼仲弓之未喻,故 乎外者 由 平中, 非

乎? 司馬 乎?」子 日 牛問仁。 日 : 其言也 「爲之難,言之得 子曰: 訒 仁 斯 謂 者 之 其 仁 言 矣 訒 也

言也訒。」
三,故及此。然聖人之言,亦止此爲是。」
言,故及此。然聖人之言,亦止此爲是。」
一世川曰:「仁者其言也訒,司馬牛多明道曰:「其言也訒,難其出也。」

近仁也。」
忍而難言之。知仁之難而無易言,則庶乎忍而難言之。知仁之難而無易言,則庶乎
范曰:「訒之言堅忍也,爲之難,故堅

大,不離乎人倫,雖曰庸行,不察則不至。」 吕曰:「言之輕則爲之不篤。 仁術雖

非知覺 事 者,與四體不仁無異 感而隨之以喜怒哀樂,應之以酬酢盡變者, 仁,取名於不知覺也,不知覺則死矣。 也,生則 於求仁也。克己復禮,出門如見大賓,使 祭,敬也, 克己復禮,勝己之欲以循天之理,則天下之 於斯,乃欲以言求仁,譬如不食,終不知味。 從事於斯,則仁可以忘言識也, 民如承大祭」,其言訒,皆求仁之術也。 而弗聞,食而不知其味,此善學者所以急急 雖有四 生,無以異於死 仁皆歸焉; 爲 一。草 謝 不能 體,亦弗爲吾用也。 日 有所覺矣; 木五 其言也訒,先難 也。 一心 出門如見大賓,使民 身與事接,而心漠然不省 有 穀之實謂之仁,取名 所覺謂之仁, 雖 也。然則不仁者,雖 有心,亦鄰於無心; 四肢之偏痺謂之不 也 故視而弗見,聽 不能從 則 如 於生 承大 事有 心 能 與 事

游曰:「仁之難成久矣,豈惟行之爲

司馬 子答樊遲之問仁,曰: 得無難乎? 難 故 ? 牛曰: 也。」 知之固 故曰 未易 『仁者其言也訒。』皆未可與言 其言也訒,訒之難也。 也。 今欲言出 「先難 而後獲。」答 而當於仁, 夫

宜訒也,推是而反之,則仁其不遠矣。」易於言可知矣。仁不可易爲之,則言之固期謂之君子已乎?」●則非切問近思者,其君子,告以不憂不懼,則曰:『不憂不懼,則曰:『其言也訒,斯謂之仁已乎?」●問則曰:『其言也訒,斯謂之仁已乎?」●問

難而不敢易,則庶乎近仁矣。」仁也,謂言之猶難,況爲之乎? 知爲仁之一,明言之猶難,況爲之乎? 知爲仁之善尹曰:「仁者難言之也,非以難言爲

乎?」子曰"「内省不疚,夫何憂何懼。」曰"「不憂不懼斯謂之君子矣間馬牛問君子。子曰"「君子不憂不

牛 通于上下,與樊遲問仁智之類一也。」 牛憂懼桓 子之教人,先正其心,而後與之人德。 至於樂天知命,獨立不懼,聖人之事也。 内省不疾,則不愧于天,不畏于人,由此 未及 謝曰: 范曰: 此 魋之惡,故以是告之。然是言也, 也,疑君子之道不止 「以其憂也,故告以不憂不懼。 「仁者不憂,勇者不懼。」 「仁者不憂,勇者 不懼 如是 而已。 司馬 司 以 馬 夫

也,其爲君子何有?」不是以與此。充是言不憂不懼,非仁且勇,不足以與此。充是言楊曰:「以其憂也,故告以不憂不懼。

疚,而後可安。」 尹曰:「夫子教人人德也,能内省不

命,富貴在天。君子敬而無失,與人恭亡。」子夏曰:「商闆之矣" 死生有司馬牛憂曰:「人皆有兄弟,我獨

已」,傳經堂本作「矣」。

[「]已」,傳經堂本作「矣」。

而有禮。四海之內,皆兄弟也。君子

何患乎無兄弟也?」

未 即即 發調 明 所以 之中 道 曰 中也 也 敬 敬 不 而 無 可謂之中,但 失,便是 喜怒 敬 哀 而 樂

類

也。

六日: 主角 如 持己,恭是接人。 敬,君臣朋友皆當以 也。』此語如何?」伊川 人,接人當 君子淡以 甘而不壞者?」 此也。近世淺薄,以相驩 、所終。 或問 ,無所終也。」既 爲相親愛,如此 『比之無首,凶。』《象》曰: 日 也; 成,小人甘 比之道 「横 恭而 與 須當 渠 人恭 禮爲主也。 者 無首,安得有終? 有禮, 以 日 1,安能 日 有首也。」 壞。」曰: 而 : 1 狎爲 有禮,言接 不爲 「敬 「不然 久? 相 《比》之上 而 非 與, 須 無 或曰: 禮 然, 比 是 之 失 以 X 敬 當 之 恭 是 恭 豈 無 與 故

横渠又曰:「論死生則曰有命,以言

兄弟 恭 其 在 而 天,則當樂天。敬 氣 也 有禮 范曰 也 ; 君子不患無兄弟,天下之善,皆 ,故能附 語 富貴則日 死 生有 遠。 而 命,則當知 知此 在 無失,故能 天,以言其 四者,則 介命; 理 親 兀 也 海 善 富貴 皆 同

患焉? 無 之兄弟 自其所禀言,天自其所遇言。] 助 而 謝 也哉? 愛人而人常愛之故也。 른 日 四海之内皆兄弟, 豈信以爲真若己 然操恭敬之心 「司馬牛憂無 以 兄 弟, 遊 世 意 也, 在 又何 急 命 難

焉。 歸 天告之,以釋 家,則貧賤 地之間,各以其 者,恭而有 |矣,四 楊曰: 吾之所以直内者,敬 海之内非兄弟 死亡無日矣。故子夏 禮。 司馬 「桓魋之凶,足以滅其身, 類從,而人之與 有能一 牛之憂也。 日用· 而 而 無失, 何 力乎此,天 夫 人 萬 以 類 然則 物 有 也 所 害 莫 命 盈 以 或 下 與 親 天 於 在

以無兄弟爲憂者,皆自私之過也。」

操恭敬之心以行乎世,則人皆如兄弟矣。」也, 富貴在天,則當樂天。知命樂天,而夏以天命解其憂。」夫死生有命,則當知命其兄之惡,死亡無日,憂其無兄弟也。故子其曰:「先儒云:『牛即魋之弟,以尹曰:「先儒云:『牛即魋之弟,以

皆欲 是以 其微 可 重言而深歎之,不可不防其細 謂 絶之未至也。」 也。 堯畏巧言令色孔壬,舜堲讒說殄行,● 明遠矣,然未若譖愬不至之爲難也。 范曰: 譖人者必以 「浸潤以言其漸也,膚受以 漸 想 人者 也。 必自微,故 不行焉,

私。浸潤者,漸進而已,内有所未入,膚日曰:「譖者毀人之行,愬者愬己之

則心然。」 然,則始雖 遠者慮終,必拒其始,然後譖愬不得行。不 受者,面 從 漸 而 進,久則言人, 已,心有 所 未 然。 始雖 明 者知 面從,

信。 譖,漸而 於未然,此之謂遠。」 忠信見疑, 膚受之愬行,則小人以誕謾 非明者無以止之。」浸潤之譖行,則君子以 謝曰: 則其出人不遠矣。」 一不暴,● 膚受之愬,淺而不 「辨所 難辨,此之謂 元澤曰: ●「浸 明 迫。 潤 已 見 故 亂 之

遠。 身者,不行焉,有不待明者能之也。故浸 受,謂切於身者。 之譖,膚受之愬,不行焉,然後謂 遠,明之至也,《書》曰: 楊曰: 「浸潤,謂漸 驟而語之,與利害不切 面 入之者; 之明,謂之 視 遠 於 潤 唯

暴」,四庫本作「驟」。

[「]讒」,原作「纔」,今據紫陽叢書本改。

[「]元澤」,四庫本作「又」。

明し

知之? 何待乎明遠也?」者不能也。若驟而語之,切於肌骨者,孰不愬,人皆忽之而易入, 不行焉,非明與遠 侯曰:「浸漬漸潤之譖,皮膚淺近之

美,可 也。 易信從 讒說,皆欲絶譖愬故也。」 善譖愬者,必以微漸,此其所以 尹曰: 丽 '謂明識遠到矣。堯之畏巧言,舜之堲 也。 不行者,可謂明矣。 受譖愬者必偏暗而隘 「浸潤言其漸 也,膚受言 明察不足 迫, 難 盡 能 其 辨 其 察 mi 微

信不立。」信不宜。日本世有死,民無失。」一時,「去食。日本皆有死,民無好,一者何先。」一時,「去兵。」子貢斯三者何先?」日,「去兵。」子貢斯三者何先?」日,「是食,足兵,民信子貢問政。子曰,「足食,足兵,民信

伊川曰:「有人然後有死,無信則無

先」,自非聖人不能答,便云『去食。 『去兵』,便問『必不得已而去,於斯二者何 之何如」; 好之何如」,曰『未可也』,便又問『鄉人皆惡 雖得天下不爲者,充此 不可去也。 人矣,何死 如此問; 有死,民無信不立1。不是孔子弟子,不能 便問『必不得已而去,於斯三者何先』,才說 '孔門弟子善問'直窮到 不是聖人,不能如此答。」 之有? 古之人,行一不義,殺 如說 『足食,足兵,民信之矣』, 此食之所以 底。 道 也。」 如問『鄉人皆 可 去, 一不辜, 又曰: 自古皆 而

謂也。」
謂也。『不誠無物。』信之信不立焉。《中庸》曰:『不誠無物。』信之又重於食,又重於死。無民則已,有民則無明之,叩而竭之,使天下萬世知信重於兵,

立則死。均死爾,故不若守信。」 七曰:「去食必死, 失信則不立,不

兵,吾得而 謝 衛 諸? 雖 有 故信當以 粟 吾 得 而 死守之。」 諸 ? 雖 有

亡無日矣。 其孰能疑而問之?」 去,信不可去。 楊曰: 雖有粟 「民不 夫寧死 馬 立 得而 則傾危之俗成, 以 存信,非善學者 食諸? 故食可 而亂

不

子之答,不能盡斯理也。」 無信不立,信 有粟,安得而食? 也,信也,而三者以信爲主。 E: 「爲政之務有三: 有 重 於死也。 雖有兵,安得 非子貢之問,孔 荷 無 T 食 用? 信 也 世 -, 兵 一,雖 民

也。 也! 棘子成曰: 爲?」子貢曰: 虎豹之鞟,猶犬羊之鞟。」 駟不及舌。文猶質也,質猶文 「君子質而已矣,何 「惜乎,夫子之說君 以 子 文

犬

羊,

君子

無

以

異

於

野

人,何可

以

不

文

何

以

別諸

?

故曰:

「文猶質也,質猶

文

以

慎

言。

夫 質

而

不

文,

則虎豹

無

以

異

於

范

日

「子貢

因

棘子成之失言,

而

戒

者也。 若獨質而無文,則虎豹之鞟猶犬羊之鞟也, 文,以察時變; 立 威儀皆文也,專以文爲事,則不可。 文質猶天地陰陽血氣日月往來,未有獨立 文質彬彬,然後君子。 ,無文不行,《實》之《彖》曰: 侯曰: 文不可無,亦 「質勝文則野,文勝 觀乎人文,以化成天下。」 不 蓋 口 勝 一文質不可偏 ,起居坐作進退 「觀 質 無本 則 勝也 乎天 史

也 ?

雖欲 可謂 而 木潤 無君子之文,其可得 謝 知言。」 日 ,淵生珠 「倬彼雲漢、爲章于天。 而崖不 乎? 枯。 有君子之質, 是以棘子成 玉

Ш

也。」 可以 可 以 無 楊 日 無 文。 「見草而 虎豹之鞟,猶犬羊之鞟,則質 故曰: 說,見豹 「文猶質 面 也,質猶 戰 則 文 不

不

鞟猶犬羊之鞟,喻文之不可去也。」駟不及舌』者,惜棘子成失言故也。 虎豹之能去也。子貢曰『惜乎,夫子之說君子也!尹曰:「有質於内,則文見乎外,文不

足,君孰與足?」 三,吾猶不足,如之何其徹也?」對 之何?」有若對曰。「盍徹乎?」曰。 哀公問於有若曰。「年飢,用不足,如

以爲君,以有民也。故君猶心,百姓猶體,謝曰:「得乎丘民而爲天子,君之所

豈有體癯而心安者?」

故 出 世不 一猶 地 則 而 天下之中制,多則桀,寡則貊,不可改。後 無 井 均 不爲迂乎?」 一徹而百度舉矣,上下寧憂不足 地均; 究 不足,而教之徹,則疑若迂矣。然什 則穀 經,而上下困矣。又鳥知盍徹之當務 楊 (其本,而惟末之圖,故征斂無 日 : 《禄平, 井地均, 「仁政必自經界始。 而軍國之需皆量是出焉。 而 後 徹可爲 也。 經界正 乎? , 裁, 費 以

足,則非足也。」 君必與焉,孰與爲不足哉? 若困民以自而有若對以徹,則足民之道也。百姓苟足,百姓足,則君足矣。故哀公問年飢用不足,

不足之本,曰: 百姓足,則是君足矣, 百若以正對也。哀公意在厚斂,故有若深言尹曰:「周法什一而稅,謂之徹。有

姓凍餒,則君將安取而足哉?」

死。既欲其生,又欲其死,是惑也。徙義,崇德也。愛之欲其生,惡之欲其子張問崇德辨惑。子曰:「主忠信,

誠不以富,亦祗以異。」」

錯簡 矣。 以 謹其所愛惡,所 祗以異」、《我行其野》之詩也。 義,所以修身也。 富 愛惡無常,惑之所 ·其下當言齊景公有馬千駟,蓋後之傳 亦祗以 范曰: 行 「主忠信,所以立 以以正 異 誠立而身修,則德日益 人於野 心矣。 人而已。 由生也,辨之於此, 『誠不以富,亦 人之成德不 誠 程 也; 頣 疑 此 徙

不容欲也。知此,則胸中豈不判然?」從,道得於我者,豈不日積? 死生有命,蓋謝曰:「忠信則有物,徙義則惟正是

因

齊景公問政而

誤

也。」

崇德與? 不蔽於愛惡之私,非辨惑與?楊曰:「忠信以誠善,徙義以補過,非

之下。」 祗以異』,伊川云: 不 堂 蔽 堂 於 乎 私 張 者 也 ,故告之如此。 難 與 並 『當在齊景公有馬千駟 爲仁。 則 一誠 非 不 誠 以 善 補 過、 亦

爾。 憎之志, 非崇德者乎? 侯曰: 非惑與? 學者以忠信爲主,聞義 愛惡汩 若其誠 於中,而 不富 以 I, 祗以 妃 生爲 而徙, 取 異

編之差也,疑在齊景公有馬千駟之下。」」臣師程頤曰:『「誠不以富,亦祗以異」,簡崇德矣。不使愛惡汩於心,則其惑判然矣。尹曰:「學以忠信爲主,而徙於義,則

不子,雖有粟,吾得而食諸?」哉! 信如君不君,臣不臣,父不父,子君,以公曰: 「善君,臣臣,父父,子子。」公曰: 「善齊景公問政於孔子。孔子對曰: 「君

禮,故以是而告之。爲君盡君道,爲臣盡臣范曰:「景公之時,齊無君臣父子之

道 也。 而 m 不改,景公知齊之將亂 堯舜 不 能 亦 用,惡惡而不能去,郭公所以亡 如 此 而 己 矣。 加 夫禍 坐以待之,此 莫大 於 知 善 调

而 尊尊, 不然,人類幾何其不相噬嚙也 謝 日 所謂民 : 「君君,臣臣,父父,子子,親 彝 也。 爲政之道,保民 親 愐

之所以父,子之所以子,是必有道也。景公 繹者,齊之所以卒於亂也。」 知善其言,而 楊曰: 「君之所以君,臣之所以 不知反求 其所以然,蓋說 臣,父 而 不

達道 不 然,幾何而不爲禽獸也。」 侯曰: 也。先王之政,達此道以保天下而已。 君君,臣 臣,父父,子子 ,所謂

之。惜乎景公善之而不能用也。」 尹 E: 「齊無君臣父子之禮,故 以 是

與?」子路無宿諾 子 日 「片言可 以 折 徽 者, 其 由 也

> 也。 也。 小邾 日 人 獄 尚 射 伊 「信也,非果也。」 或問: 盟 取 ĴЦ 又曰: 又曰: 目 信,其它可知。」 ,而射止 「子路無宿諾,是果决乎? 「子路之言信,故 「宿 「言由之見信如 願得季路一言, 謂 豫也,非一宿之宿 又曰: 以片言 此 此 其 魯 刑 可 證 與 以 法

或

折

折獄。 皆非爻之盛德,適能是而已焉。 之道 ,以其重然諾,言爲衆信,故片言 横渠曰: 如《易》所謂『利用 「子路禮樂文章未 獄」、「利用刑 足 盡 可以 爲 政

諾。」 子所 言可以折獄 之君,而信子路之言,此信在言前也,故 ·使季路要我,吾無盟矣。」小邾射不信千 恥 范 E 也。 ,唯由能之。 唯子路無不行之言,故無 小 邾 射 以 可言而不可行, 句繹 奔 日 君 乘

謝 子路志在力行,有諾 不 能 踐

三三七

言 可 以折 楊 非 獄。 E 吾 本心 而記者又著其無宿諾,以見其 「由之果毅,人所信服,故片言 豈不 流 而 人於自 恕 ?

行

如此。

又曰:「子路不預諾,●所以全其信也。」而折獄者,●信在言前,人自信之故也。」子路之言,子路之見信於人也可知矣。言要我,吾無盟矣。』小邾不信千乘之君,而信要我,母曰:「小邾繹奔魯,曰:『使季路

訟乎!」子曰。「聽訟,吾猶人也。必也使無

悌。」此 民 正 ,則有常心。」此無訟之政也。」 親 其本,清其源,則無訟矣。 范曰: 愛,莫善於孝; 無訟之道 聽訟者,治其末,塞其 也。 孟子 教民 · 曰 : 《經》曰 理 順, 一民 莫 流 善於 有常 也, 『教

可也。」

爲貴。」 有? 國,則未能使民無訟者也。 以好惡,而民 民 陳之以德義, 言以見聖人不以聽訟爲能,而 不 争; 楊曰 子路片言可以折獄,而 道之以禮樂,而 而民興行; 「先之以博愛,民莫遺其 知禁。 有是五者,民何訟 民 先之以敬 故又著 不 和 以 知 睦 使民 以 孔 禮 讓, 示之 無 子 讓 之 之 爲 而

是,訟何自 立,道之斯行,綏之斯來,動之斯 文王之民耕讓畔、行讓路,皆其徵也。 信之,少者懷之。 侯曰: 圃 「夫子之志,則老者安之,朋 興哉? 夫子之在邦家,則立之斯 堯之黎民 於變 和。 一時雍, 此孔 夫如 友

决;

明教服義,不待聽

而

决

者

謂

之

無訟

堂本、和刻

本删

「人情

誕

慢,

則

必

待

而

後

^{□ 「}否」下,原衍一「不」字,今據四庫本、傳經堂本、公善「言」上有「一」字。□ 上有「一」字。□ 上有「一」字。□ 上有「一」字。□ 上有「一」字。□ 上有、公善堂本有「片」字、《論語集註》引尹氏《解》。

能聽之哉?」 子所以言『必也使無訟乎』。有訟,則孰不

尹曰:「聽訟得其當,治之末也, 使

之無訟,則教化存焉。」

子張問政。子曰:「居之無倦,行之

以忠。」

必倦而不盡心也,故孔子因問而告之。」伊川曰:「子張少仁,無誠心愛民,則

忠。若居之有倦,行不以忠,而能正人者, 於内。 未之有也。」 可爲也。 誠意之未篤也,故以誠意爲本,誠立 范曰: 爲政之道,固知之矣, 誠意 「子張之學,有餘於外而不足 不至,則有時而倦,行不以 其所 而 患 後 在 政 於

之經也。子張之行難能也,難能則難繼,不楊曰:「身以先之,不倦以終之,爲政

能無倦,故以是先之。與告子路異矣。」

別句告と。 一尹曰:「子張之學,誠不篤,故夫子因

子曰: 「博學於文,約之以禮,亦可其問而告之。」

以

弗畔矣夫。」

所从放入,未拿下正比包。一此。顏淵曰:『博我以文,約我以禮。』其此。顏淵曰:『博我以文,約我以禮。』其善范曰:「此亦夫子所常言,故又見於

所以教人,未嘗不在此也。」

恶, 小人反是。」子曰: 「君子成人之美,不成人之

引以翼,使人樂於善,皆成人之美也。」謝曰:「尊之以禮義,養之以名譽,以

三九

傷善,故反是。」故成人之美,不成人之惡, 小人則濟惡而故成人之美,不成人之惡, 小人則濟惡而楊曰:「君子之於人也,長善而救失,

者,正也。子帥以正,孰敢不正?」季康子問政於孔子。孔子對曰:「政

正則影無不正也。《書》曰:『表正萬邦。』曰:『君仁莫不仁,君義莫不義。』猶之表曰:『政之本,身也,身立則政立矣。」孟子曰:『政之本,身也,身立則政立矣。」孟子人也,未有不正己而能正物者也。楊雄太曰:「天下之政本於身。政所以正

謝曰:「其身正,不令而行。」

君相者,天下之表也。」

以不政,●則有禮以齊之,孰敢不正?」楊曰:「子帥以正,教之以德爲政也。

0

尹曰:「未有不正己而能正人者也,哉?」

上之風,必偃。君子苟帥之以正,孰敢不正

侯曰:

君子之德風、小人之德草、草

故曰: 『其身正,不令而行。』」

「苟子之不欲,雖賞之不竊。」季康子患盗,問於孔子。孔子對曰

百姓家給人足,自不爲盗,何用重法乎?』由饑寒也。朕今將去奢省費,輕徭薄賦,使重法以禁之,帝哂之曰:『民之所以貧者,重法以禁之,帝哂之曰:『民之所以貧者,

校云:「不政」之「政」當作「正」。「政」、「正」古通。「政」、四庫本、傳經堂本、公善堂本並作「正」、和刻本

行之四年,外户不閉,行旅夜宿於道焉。」

君子無爲也,反身以善俗而已。」 所不能止,俗之所恥,賞之所不能誘。故謝曰:「介甫曰:『俗之所榮,罰之

先之而 哉? 不爲盗,在 可 ·竊。」 欲之物,譬之飫膏粱 楊 使之竊藜藿,雖賞不爲也。 己。 日 不欲而已, 欲民之不欲,以 故曰: 「人人知有貴於己,則天 『荷子之不欲、雖賞之 而視藜藿,奚欲 然則 下 欲 之 有 身 民 無

深 不 則 取 知 不 欲矣。 爲 也 尹曰 政者 9 故爲政本乎足民,以 也。 今有子不欲之物, 「欲 生於不足,不 在 雖 足 我 賞 故 使盗 者化民 爲 盗 足

政,焉用殺? 季康子問政於孔 就 德風,小人之德草。 有道 ~,何 如 子欲 ?! 孔子對 子 善 日 而 民善矣。 草上之風,必 一如 殺 「子爲 君子 無 道

偃。」

則司 於令。」」 日 下多德讓。 先之以信,則下不相許, 紀,謹其教化。 不 君人者,唯志於仁,則天下之民 殺也,況於天下之主,其可以刑 可 '獄在。」季康子之執政,猶 謝曰: 不學律令。 范 「教之化民也深於命,民之效上也捷 日 此君子所當學也。 「大經正,則庶民 楊 日: 道之以仁,則下不相 雄《法言》曰 君子爲 臨之以禮義, : 興矣。元澤 無不善矣。」 殺而 不可以言刑 國, 三或 如有犯 張 治 日 其 乎? 賊 人 君 則

以 之,盗奚足患 則化之矣,有不待帥 之不欲,雖賞之不竊。」夫己不欲而民不竊, 不正?』言孰敢,則畏而從之也。 治,風動 楊曰: Mi 從 乎? 問 己,又焉 政 少, 曰: 故患盗 也。 用 夫如是,民 子帥 殺 則曰: 以 故欲 民畏 Œ 『苟子 將從欲 加 孰 從 敢

四二

皆 道 問 非 康 申 以 而三告之如此。」 子所及,大匠不爲拙工改其繩墨,故三 前 就 說 有 以 消 篤 則 之也 是道 「子欲善 也,大人之事,宜 而 民 善矣。」

爲? 罰 上之風,必偃。]政得其道,則民之從之也輕 道之以德,齊之以 用 而民善矣。 妻子,暇日修其孝悌忠信,爲政之大方也。 薄 殺以齊民,非政也,則 侯 稅斂 日 日 ()使民 君子之德風,小人之德草。 「政者正 「子爲政,焉用殺? 仰足以事 禮,有恥 也,當以 賊道 父母,俯足 且格,奚用 正帥民,若專 也。 若 子欲 省 以 草 刑 善 殺 畜

哉? 以身教者從,以言教者訟,而況於殺哉? 以身教者從,以言教者訟,而況於殺尹曰。「殺之爲言,豈爲人上者之語

子曰:「何哉,爾所謂達者?」子張對子張問:「士何如斯可謂之達矣?」

利;

學者志於名而足矣,其心惟恐人不

心一 事? 抵爲名,爲名與爲利,清濁 名方是; 何? 達也 行違,居之不疑也。 子痛抑之。」又曰: 此更不須理會。子張之意,專在人知,故孔 以 下人,只爲不達也。 下人,何以爲達?」 也。 或問: 達,居之不疑,在邦必聞,在家必聞。」 達,在家必達。 好義,察言而觀色,慮以下人。 日 爲名而學,則是僞 一是 子張以人知爲達,才達則人自知矣, 只好義下人,已是達了。 9 聞 今市井間 有意 也,非 「在邦必 「質直而好義,察言而觀色,慮 近 達 名,則大本已失,更學何 間, 也。 學者 巷人,却不 察言而觀色,非明達 夫聞也者,色取仁而行 「夫聞也者,色取 在家必聞。」 伊川曰: 也。 夫達也者,質 須是務實,不要近 雖 不同,然其 今之學者, 爲名, 人所 一此 在邦 子 以 正是 直 日 利 大 mi 必 m 而 :

使 言君子惟患無善之可稱,當汲汲爲善,非是 世 不 沛 知 户 人 而 然 、求名 名 有 韓 餘 不稱,此 退 内足者,自不急於人知。 也 厥 之 日 聞 . 四 一句人多錯 馳 内 。」大率 不 足 理會 爲名者只 急 君子 於 此 只是 疾没 是内 知

者也 事 内,而不蘄乎人之知也。故在邦必達,足以 則 觀 直 亦 由 君 色,則審於 不 爲善不足,求益 而 足,故以是語之。」 此 好 ,故色取 范 7義,則 日 而止也。子張之學徇外, 在 富家 聞 進 必達,足以 不爲諂,●下不爲利, 而 退,遠於恥辱; 者,求聞於外,而内 行違,足以致名。 無已: 正 人。 三者,皆自修於 雖 慮 外有 通 以下人, 若夫質 察言 無 乎 餘 其 聖, 而 而 實

必 聞 吕 E. 德 孚於人者必達,矯行 求名

如

謝 曰 子 張 以 聞 爲達,止於名而

己。

0

悻。 聖 名 人 聞 以 慮 四 以 達 質 故 直 下人,則不欲多 好 也 質直 而 觀 上人。 不好 色 爲 達 則 蓋 近 有 於悻 實 Щ

當是 義,則 篤 人,則 謂 以 面 爲達,故夫子問之而後告。 莊 家必達之道也。 不失口於人,觀色故不失色於人。 此 實之事充乎 審於去就 達者 聞 色取 爲 者 時 尹 楊 無池 不知時措之宜,直 日 E 也 ,立志質直,務歸 達,務名者也。 ,況後世哉?」 仁而已, 1,門人親受聖人之教,而其差失有 訑 「子張之學,病在乎不務實,故 聲音,可與 内而 聞 慮以 其言皆所以救子張之失。」 非 與 依 發於外,斯可 達 下人,而不自矜高。 於仁者 孔子明告之曰: 相 乎義 並 |必至於絞。 爲 圃 仁矣。 然質直 也。 不同。 謂之達矣。 察言觀 疑 此 察言 慮 而 其 在 以 不 師 所 邦 之 下 故 好

則 T, 傳 經 堂本有「上」字、公善堂本於此 字。

以 及其 惡,非修 遲 從 得,非崇 親, 游 、辨惑。」子曰 於 非慈與?」 慝與? 舞 德與? 零 之 F : 朝之然,忘其身, 攻其惡,無 日 善哉 問 敢 攻 間 先 崇

之甚 如 唯 大惑矣,故懲忿所以辨惑 而 忿。 有 知 者必起於細微,能辨之於早,則不 人 利 范 忘其 之過,故慝不修。 欲之心,故德不崇。 唯不 E 身以及其親,惑之甚者也。 「先事後得,上義而下利也,人 也。 感物而易 自省己 動者,莫 至 於 惑 過

與忘 荷 懲忿者 己之惡者 於攻人之惡者,不能自攻其惡 得 身以 莫大之惡,生於須 ,故德以是崇,與『先難後 謝 E 及其親 ,無暇攻 惑耳。」 「先事後 ,其爲得失甚易 人之惡 得,其心在 臾,不忍 者 也 獲 者也, 知也,不能 一朝之忿, 事 故慝以 同 而 不 是 在 攻 有

> 之下, 作 之、然後知聖賢之異。」 遊焉息焉者 此獨著其從遊於舞雩之下者,以見其 問於孔子者多有,未有記其 朝之忿,忘其身以及其親 忿言不反於身,懼辱其身羞其 耳,非崇德也 慝耳,非 楊 與點之詠歸之意 修 一, 無 ; 慝 不 非學也。 也; 不 先 攻 事 其惡,而 君子惡言 而 異矣,學者 惟 乎? 孔子悠然 問 得 攻人 之 之之所也, 親 是惑也。 求 也 不出於口 一、況以 之惡,是 宜 於 深 舞 所 賊 味 零 謂 然 德 而

責於人 惑 其身以 事 後得 ,學者所先 侯曰: 與? 危其 ,則遠怨,非修慝與? 務也 親,非惑 所以爲崇德 「克己之私, ,故曰善哉問 與 ? 而期 也 崇德 進於道, 好 躬自 勇鬭 修 厚 狠 而 非 志 薄 先

忘身及 有 過 能 尹 親 自 日 而 慝斯 不能懲之者 臨 事 修 圃 矣; 不 計 是惑 知 利 德 也 朝之忿 斯 惑 미

也

厚矣。

故並

答仁知以舉直錯諸

枉

横渠

E

「能使不仁者仁,則仁

之施

莫甚於此,辨之於微,則善矣。」

矣。」 直錯 樊遲 日 夏 日 湯有天下, 謂也?」子夏日 天下,選於衆,舉皐 日 問仁。 : 諸 「知人。」樊遲未達。 「舉直錯 枉,能使枉者直。」樊遲 鄉 選於衆,舉伊尹,不仁者遠 子曰: 也吾見於夫子而 諸 : 枉,能使枉者直。」何 「愛人。」 陶,不仁者遠 富哉言乎 子曰: 問 問 退, 知。 知,子 見子 矣。 有 子

有 知 示 門 渗 近 盡 問 近 最 伊 ĬII ? 知 處 是 日: 即即 日 學之淺者,及其 惟聖人之言, 它人之語,語 . 却無 『知人。』且 聖人之語 包容不盡處 ,則遠近皆盡 近則遺遠,語 因 問問 看 人 此 而變化 語 日 如 樊遲 有 遠 甚 愛 則 包 於 雖

> 其 推 以事君者也, 者之愛人,知者之知 雖 而 堯舜能之。 知人而已矣。事親盡子道,事君 者,費也 至也 聖人有所不知焉。 隱 面 上之,舜舉皋陶 范 夫婦 ,則堯舜猶病: 日 聖人之言,下則樊遲 聖 之 雖匹夫匹 愚 人有所 庸 可 W 以 人,猶之孝以事親, 不知者,隱也。」夫仁 夫婦之愚,可 日 湯舉伊尹 一婦, 與 此 所以 知 可以知,可 焉,及其 『君子之道, 爲 ,是亦愛人 [盡臣道 可 富也。」 行, ,以與 以行。 至 及 知

舜 亦 者 之舉 日 急務。 謝 獨 日 「舜 . 稱 舜 皐 以 以 陶。」 天 不 愛人,仁者之事; · 得 下 禹、 與禹, 臯 陶 禹 爲 讓 上憂。」 泉 陶。 知 人, 孟 子 知

錯 乎 反之,則知之事思過半矣。 諸 ? 枉,能使 楊 孟 日 子曰: 問 枉 者直一, 知 知 者無 日 : 則其言豈不富 不 知也 又告之以「舉直 知 人。」以 ,當務之爲 三隅

三四五

舜 有 夏富其言 直錯諸枉告之,則仁知之務兼舉矣。 於衆,舉皋陶、伊尹 務之爲急,莫如親賢, 4從欲 陶 臣 而 五 른 人 以 .者 治 而天下治, 無 不仁者遠,其在兹乎?」 四四 不愛也, 又以 方風 舜湯之事 爲先務。 而獨 動,不犯于有司,亦 急親賢之爲務。」 舜湯之有天下 日 舉臯陶者,蓋使 明之也。 然則問知 然舜 蓋 故 以 唯 子 螁 選

者之事 諸 子夏告以舜 猶 諸 其事 未有不盡 又 爲之矣。 未知所以爲之者何也,故退 杆 必 能使 欲知其方, 尹曰 又辨諸友,當是時,學者之務實 也 如樊遲之問仁問知也。 者也,樊遲未達,故又以「舉直錯 : 枉者直」告之。樊遲聞其說,而 使其 舉臯陶、湯舉伊尹,然後知其 「學者之問也,不獨 知人,知者之事也。 未喻,必 不獨欲知其方,又必欲爲 將復問 而 夫愛人,仁 欲聞 問 也 孔子告人 諸子夏。 其 也 旣 說 如 問 所

是

伊 不 子 Щ ·貢 可 E 則 問 止,無自辱焉。 友。 「責善之道,要使誠 子 日 : 忠 告 而 有 餘

而 之友 名; 言不 則服從,不可則去者,凡爲臣之義也。 不去者,無絶之臣也。」 也。 子貢問友,凡友之道 足,則於人有益 范 友至於争,則不止 日 君臣朋友,皆以義合。 「士有 争友,則身不離 ,而在我者無 也。 於忠告善道 争友者, 事君,道 自辱 無 矣。 之 於 守 而 絶 而

泉

友之義盡。」 吕曰: 以忠言告論,以 善術 誘 掖 則

道, 謝 異於君 曰 親 友 故 所 不可則 以 輔 德, 止 故 必 忠 告 善

見 疏 則自辱矣。

「責善雖朋

友之道,然以

數

而

尹日 「友所以輔 德,故 必忠告 而 善

曾子曰: 「君子以文會友,以友之,以其義合也,故不可則止。」

輔

仁。」

朝諸老先生論語精義卷第六下

終

國

忠告而善道之,所以輔仁。」 楊曰:「博學而詳說之,所以會友,

友輔之,欲相成德也。」相附,互相滋益,故曰輔仁。仁,性之故有,二則文矣,會友所以以文也。友如麗澤之二則文矣,會友所以以文也。友如麗澤之一候曰:「物相雜,故曰文。一不獨立,

三四七

或

朝諸老先生論語精義卷第七上

子路第十三

子路問政。子曰:「先之勞之。」請

益。曰:「無倦。」

及請益,則曰『無倦』而已,未嘗復有所告。明道曰:「子路問政,孔子旣告之矣。

姑使之深思也。」

勉也,又勞勉之。」曰: 『以左右民。』師保左右,先之也。勞,曰: 『以左右民。』師保左右,先之也。勞,

横渠曰:「爲政必身爲之倡,且不愛

其勞,又益之以不倦。」

既庶而後富之,既富而後教之,此其序也。范曰:「治民者必有以先之而勞之,

而怠終,故請益曰無倦。」 民悅而不廢事矣。然以身先民者,常勤始民悅而不廢事矣。然以身先民者,常勤始

尹曰:「以身先之而後勞之,季路疑

● 「正」,四庫本作「匡」。按原本作「正」者,蓋避宋太祖

● 「身以」,四庫本互乙。

其 未 盡 而 司,赦小過,舉賢才。」曰: 仲弓爲 舉之?」曰: 爲政之道而請焉,故益之以 宰 問政。 爾所知。 子 日 無倦 爾所 知 賢才 先 有 不

知,人其舍諸?

耳。 仲 闕 可以 仲弓與聖人用心之大小。 「舉爾所 有 也。 弓 司 日 明道曰: 鄉官疑讀 邦, 人各親其親,然後能不獨親其親。 知。 一心可以喪邦,只在公私之間 焉 爾所不知,人其舍諸?』便見 知 法、平價 「爲政須要有綱紀文章,先 賢 才 m 、謹權量,●皆不可 舉之?」子曰: 推此義,則一心

才,而後舉之。」
 横渠曰:「有司,必先正之, 求得賢政者,未暇論其賢否,必先正之, 求得賢善 横渠曰:「有司,政之紀綱也。始爲伊川曰:「先有司,付與有司也。」

范曰:「凡爲人上者,當用人而不自

者也。 簡,御下以寬。 才,則百 則 用 之宰也。」 人。」赦小過也。 兼于庶言庶獄庶慎。」先有司也。舜 宰,況於爲天下乎?《書》曰: 之道當先有司。 才者,治之所急也。 無 功。 用 不赦小過,則下無全人矣, 此三者,治天下國家之道,不止季氏 人 職廢 則 元首叢脞,舜皋陶 逸, 矣 自 小過者,人之所不免; 至於舉賢才,未有 周公曰: 用 不先有司,則 此三者,●不可爲 則 勞 以 「無 逸則· 爲戒 文王 求 君行 有成, 備於 不 臨 爲政 由 季 駆 罔 臣 F Æ 賢 職 此 攸

乎 可 善人 遽革乎舊政,先正其綱 吕曰: (,去其太甚而 有 司政之綱。 己。 丽 然後徐舉賢 已 始爲政者 不可遽易 才而 不

註》引范氏註,「此」上有「失」字。 「此」上,和刻本校云:「此」上脫「失」字。按《論語集》「鄉官」,原本存疑,檢《二程遺書》卷十一並作「鄉官」。

者故矣疑。● 不知人將告之矣,焉有爲善而不 才不可不舉也。賢才不求則已,求則爾 豆之事 小過,過也,故赦之。赦小過,則 謝 日 則 有司 「宰有君道,當治大不治小, 將以與之成庶務,置風聲, 存。 先有司,則所事者 聞者乎? 所 所 賢 刑 大

而達之天下一也。」
楊曰:「職業不分,則分守不一,而政縣矣,故先有司,有司各任其責。而小過必縣矣,故先有司,有司各任其責。而小過必屬矣,故先有司,有司各任其責。而小過必屬矣,故先有司,有司各任其責。而小過必

此? 賢者 進 雖 赦 而不 (小過,則不求備於人, 治 天 「先有 肖者退。 下亦可矣, 豈特爲季氏 司 爲政之道,孰 則 可 以 責 賢才, 成 要於 宰 事 而 則 於

> 不興; 子曰: 知,蓋 罰 子路 其言,無所苟而已矣。」 之必可言也,言之必可行也。君子於 言不順 日 先?」子曰: 不中, 日 「有是哉,子之迂也。奚其正?」 闕 「野哉,由也! 則 禮樂不興,則刑罰不中, 則事不成, 如也。 民 「衛君待子 無 「必也正名乎?」子路 所措手足。 名不正,則言不 事不成, 而 君子於其所不 爲 政,子將 故君子名 則 順 樂 奚 刑

伊川曰: 「凡物有形則有名,有名則

者故矣」蓋即「故爲者刑矣」之意。 其賢才。」與此句相似,然文爲詳明。則原本「則所刑卷七"「赦小過,則故爲者刑矣, 故爲者刑,然後舉卷七"「赦小過,則故爲者刑矣, 故爲者刑,然後舉

須」,四庫本作「需」。

父則

非父,子不子則非

子。

爲

君

盡

道,

帛 地。 從 監 至 便做它官不得。 如 便 合行申狀 或 它 有 至禮 子監 謂門 此,人不知,一 之交錯、鐘鼓之鏗鏘 前 底不得, 吏人押申 於 理。 須 X 民 樂不 看聖人欲 一自係臺省,臺省係朝廷官,外司 只 如 無 人日 贵 以 計 所 興,自然住 小 措 有臺 爲 利 手 「今日供 正名處 大, 似好做作。 若久做它時,須一一與 害, 足 省 倒 也 轉 以 不計 哉 申 不 運 高 見得 、職,只 ? 得 外 先 司 爲 較 司 生 狀,某不 下 今日第一件便 事體,直 只這些子,某 道 之 夫禮樂,豈 判 第 理? 名 則 西 言 不 京 件便做 一曾簽 ĪĒ 不 得 有 或 只爲 時 順 恁 理 玉 事 子

從 八易從。 而 Ļ 范曰 横 渠 日 9 君 聖人不患爲 不君則 凡 「言從作乂,名正 有 非 實 政 君 則 難 臣 有名,名不 患 不 民 臣 難 則 則言易 喻 非 Œ 臣,父 則 知 實

> 其 事 興 不 得 用,害及於人之大者也。 成則 道, 務,名皆不正,故夫子先之。 ,則暴慢鄙詐之心人之,施於政 其序謂之有禮 道 臣 盡 則 故 無序 口 刑 道 謂之人 罰不 ,亦無和,故禮樂不興。 則 可 中。 禮得 矣。 以 謂 刑罰者, 其 名 之 衛國自 何 和 君 謂之有 可 臣 人君 以 矣 不 X 事, 樂; 倫 禮樂 所 爲 至 當 皆失 人 於 慎 不 事

成者 和 禮樂興民。❷ 孔子以爲 者 政之道當如此。 睦之風衰,而 猶不能無枉 謝 ,禮樂之實也 日 野。 介甫 「正名不特爲衛君 有名 也。」 争狠 子路不達,以 日 則有分守,故 詐 因 實實 僞 之 俗 「禮樂 而 節 成 不 文和樂之, 爲 m 高 興 · 雖 言 遠 言也 順而 則 有 也 廉 善 聽 則 事 故 爲 恥

楊曰:「名不當其實,則言不順, 言

-) 「與」下,四庫本有「其」字。
- 「民」,傳經堂本爲墨釘,和刻本校云: 「民」字疑。

五.

手足。 中, 之道也。 百 不 不足,而不能闕其所不知,孔子以爲野。」 度 順 一廢, 刑罰不 無 則 教 無 而 政而 政之當務,孰先於此乎? 以 禮 中,則 考實,而 樂 至於 無 無 教 所錯,故 ௱ 民 易 刑之,是罔民 事 犯 無 不成 所 而 措手足, 難避,故 不 興 事 也,故 不 禮 則 無 子路學 成 樂 大 所 亂 不 不 則

於刑罰 可謂 Ē 至於事 則事失其 臣臣,父父,子子, 各能盡其道,斯謂之名 尹曰: 名正則分守立,故言順 知 物,名皆不正,孔子極其本而言之, 其 中, 序 要矣。 7,物失其和 「名不正,則實將從之。 民 無 子路反以爲迂,故曰 所 措手足。 ,是以 而 禮樂不興,至 事 衛君自人倫 可成; 君君,

出 樊遲 子曰: 請 學稼。 圃 日 小人哉,樊須也 子 日 吾 不如 「吾不如老農。」 老 圃 樊 上好 漽

> 焉用稼?」 夫如是,則 敢 不 則 服 民 莫敢 四方之民 上好信 不 敬 則 襁 民莫 上 負 好 其子而 敢 義 不 則 用情。 至矣 民 莫

末, 人,治於人者食人。1君子治其本,則不治 心者治人,勞力者治於人, 小人之事。]又曰: 子所務,農 范曰: 謀其大,則 圃之事,非所當學也。 孟 不謀其 子 日 「或勞心,或勞力, 小。 「有 故禮義信, 大人之事 人者食 其 於

服,安分以服 稱 行之學,其近之乎? 以 愛其情。」 小人。 爲民,非役志於自殖貨財 謝曰: 如 脅弱暴寡之事 事其上,易使故也。 「樊遲問 以其 學稼 不知 與圃 子,皆生於不欽。 也。 大體 於夫子, 若後世許 用情,不 也,故

「子」字。今據四庫本、公善堂本、紫陽叢書本補。二「子」字,原闕一「子」字,和刻本校云:「子」下疑脫

農、老圃 疑不 出 事,有小人之事。] 稼圃,小民 故不復。 耳,故以禮義信發之。 而 謂農圃之不如 問 而後言其非, 非有 及此 ,誤而爲此乎? 『小人哉,樊須也 圃 利 而學焉,則其失遠矣,故言之,使知 及其旣 一志則 \L 而不能問,舉一隅不以三隅反 也,豈聞 樊 陋矣, 何 遲 出 ,則拒之者至矣。 心也? ,則懼其終弗喻 學 孟子 稼 先 !!此特對大人 然樊須遊 圃 事 蓋於其問 而闢之可也,待 Ė 後 蓋 得、 之事 欲 『有大人之 聖人之門 先難 爲 也, 須之學, 也,夫子 神農 彻 、爲言 求老 後 其 故 獲 之

不治 不信也 政 哉? 侯 及其出 日 故 樊遲 孔子 也, 上荷 「爲 問 日: 好 國家者,患禮義之不 學稼、學圃,其心欲 吾 禮 不如老農、老圃 義,而民信之矣, 「小人哉, 樊須 也 V 以 以 何 而 抑 此 患

所

謂

不如老農老圃者,意有在也。

君子 並 耕 先 圃 馬 食、饔飱而治者,其近之乎?」 立 用稼?」推樊遲之學,則後世 其 大 者 何 患小者之不 與 故

學農圃,故謂之小人。」
其小體爲小人。」樊遲舍禮義而不爲,而請小人之事。」又曰:『養其大體爲大人,養尹曰:「孟子曰:『有大人之事,有

奚以爲?」 達, 使於四方,不能專對: 雖多,亦子曰。「誦《詩》三百,授之以政,不

牆面 授以 對: 牆 三百,授之以政,不達, 《詩》。 詩 政,不達,使四方 而立。』須未讀《周南 後,便達 伊川曰: 到 『人而不爲《周 雖多,亦奚以爲?」須是未 了後, 「今人不會讀書,如『誦《詩 於政,能 便 不 南》、《召 面 不能 專對 牆 》、《召 使於四方,不 方 四 專 南》, 是 南》,其 對 讀 有 《詩》時 始 驗 ·能專 是 旣 猶 面 讀 讀 正

乎? 也。 抵 大 便是不曾讀也。」 讀,是這 患也 讀 書只 世之號爲知經者,果能達于 所謂窮 0 箇人; 此 便 經者, 是法。 及讀 又曰: 章句之末耳 了後, 如 讀 「窮 又只是這 論 經將 語 此學 政 \approx 事 以 舊 箇 者 專 致 時 之 對 用 未

旣 也; 貴也。」 事 不能 言 范曰: 語 使於四方,不能專對者,不能言之也。 行之,又不能言之, 也 0 授之以政,不達者, 學《詩》者,爲其 雖多聞,不足 可 不能 以 施 行 之 之 政

肆? 用 者,失其義 丽 謝 不足 故 日 日 8 以 : 加 陳 致用, 「雖 誦 其數 詩 名 則 也 亦 徒 面 奚 能 不 窮 以 自 誦 理,故授 之, 爲 得 ? 亦 不 如 之以 足 學禮 異 以 政 致

以 政 達 ,必達矣, 楊 可 以言 知 ,故使於四方能專對。」 得 王 政之 其 所 以 所 言 由 廢 則 興,則 斯 授 專

> 亦奚以 矣。 不 (爲? 如 是, 皆 口 耳 誦 數 之 學 也 雖 多

之以 羣,可 以爲?二 學《詩》者之用心哉? 能專對? 政,豈有 侯曰: 以怨。 若或不能, 四 \sim 不達哉? 者,學《詩》者 詩 可 則 故曰 以 誦 使 興, 其 於 . 可 荷 章 四 「雖多,亦 以 句 方 能 觀, 知之, 圃 可 以

以 通 則學《詩》者,有志乎言也。 詩》者,政之所繫 爲? 達,又不能 尹曰: 大抵爲學貴乎有用 善其言, 「季札聞 也 3 然 ^ 不 詩 則 ·學《詩 授之以 誦 **>** 而 而 己。 之雖 知 國 多 政 無 政, 以 能 何 則

子曰: 正,雖令不從。 「其身正,不 * 而 行 其身不

在 從 其 身,身立 (所令, 范曰: 從其 則 《記》日 政立 所 行。 矣。」爲政之道,正身 : 楊 下 雄 曰: 一之事 L 政 也 之本

其身不正,未有能 正人者也

也? 己不能行,則人且不信,如之何其使之從己 曰 「人信則易從,故不令而 行;

從; 楊曰: 其身不正,雖强之使從,終必違 「正己而物正矣,故不待令而 而

尹曰 侯曰 子帥以 正己而物正者也。」 正,孰敢不正是也。」

子曰: 魯衛之政,兄弟也。」

伊川曰: 「言兄弟者,以其相似也。」

見出 本兄弟之親,及其衰也,政亦相類,故譏之 公,曰: 范曰: 「《孔子世家》曰: 「子適衛, 「魯衛之政、兄弟也。」」二國

[之政,猶存兄弟之道。 吕曰: 「魯衛、兄弟之國也。當時二

也。」

「魯衛之土地、人民、政事,其

齊 醜,則兄弟。

弟也,言魯衛之政無大相過 楊曰: 「兄弟猶所謂年兄弟 而 己。 也,貌兄

甚相遠,故曰兄弟也。」 侯曰: 「魯衛之土地、人民、 政事,無

尹曰: 子謂衛公子荆,「善居室。始有,曰: 「言其政之相若也。」

有,日: 「苟美矣。」」

「苟合矣。」少有,曰:

「荷完矣。」富

下,其欲易足,則其求易給,約其一身,以裕 善者,不能如是,足以爲法矣。 易足,不求多餘,内重而外物輕,非 求無厭,犯禮悖義,以入於亂。 萬民,其德豈不厚哉?」 范曰: 「富人之所欲也,其患在 人君富 公子荆其 誠 於 有天 心 爲

己。 謝曰: 「非君子之宅心,則亦苟

而

楊曰: 務爲完美,則累物 而 驕吝之

三五

心 物,故孔子善之。」 生 侯 E : 公子荆皆苟 「公子荆之居室也,不役志於 而 己 故 夫子善之。

爲心, 也。」 尹曰:「衞公子荆,君子也,不 其欲易足,故曰苟 而已,所以善之 以 外外 物

冉有曰: 子適衛,冉有僕。子曰: 「庶矣哉!」 富之。」「既富矣,又何加焉?」曰: 「既庶矣,又何 加 焉?」曰:

之也; 此 之以其序。 治之,故曰: 教,所以教之也。衛之人民旣庶矣,而 有不由之者也。 也 也。」 , 冉有亦能行, 而聖人之治亦未有 范曰: 稷播 求之爲政,則未及此 「此治民之序,自堯舜 「庶矣哉 百穀,所以富之也 禹平水土以居 !!冉有善問,故 民,所 也。 以 契 來,未 敷 以 以 無 是 告 以 庶 五

> 奚暇 然後可驅而之善,此不易之道也。」 楊 治禮義 謝 日 \Box 哉 既庶矣,當使之養生送 ? 庶 而 富而不教,則近 不 富 則 救 死 於 而 《禽獸。」 恐 不 死 贍 無

憾

近於禽獸。」 侯曰: 旣庶旣富矣,逸居而無教,則

教之; 子曰: 尹曰: 富而不教 「苟有用我者, 「衣食足而後知榮辱,故富 ,則近於禽獸矣。」 期月而已 可也, 而

後

三年有成

道理。 矣 舊。」 尚 人不可及。某嘗言,後世之論治者,皆不中 堯舜之時,夫是之謂 成。」仲尼言有成者,蓋欲立 竊遲之。」唐李石謂十年責治太蚤,皆 伊 「苟有用 或問 漢公孫丞相 Ш 日 爲 政 我者,期月而已可也,三年 「仲尼 遲速。 言 有成。此聖人之事,它 三年 日 = 致治之功業 「仲尼嘗言之 有 年而 成,因 化,臣 周 弘 如 有 之

事對。 成,則在三年也。 之事對,若以三年之事問臣,臣便以三年之 之治,惟聖人能之,三王以 也。聖人之事,後世雖不敢望如 爾之言。 月、三年之事。」 又不同,須從頭整理可也。 因言陛下若以 爲也。」 而 「三年而化,臣竊遲之。」李石對唐文宗以 陛下責治太急」,皆率爾之言, 已可也,綱紀布也 期月而 又曰:「昔在經筵時,嘗說及此。 聖人之言, 期月之事 已者,整頓大綱 然期月、三年之說,今世 ; 自 有 三年 問臣,臣 次 下事業,大賢 序。 漢公孫弘言: 有 也,若 成, 此,然二帝 本不 所 便 以 治 謂 知 夫 期 功 期 謂 有 可 期 月 成 月

也。 道 之政,舉 行,未有能用之期月者也。 之成 雖聖人,亦必三年乃有成 范曰: 也 而 措之天下無難,故 故唐虞三載 「夫子視天下之亂 考績 堯舜之道、三王 周 期月 功 禮 而 ,三年,天 道 而 年 已 不 則 得 口

大比,皆可以計成功之時也。」

之成。近效則歲月亦可。」 謝曰:「必欲拔本塞源,略法先王,謂

月 序,固已前定。 天下,蓋若數一二矣,夫豈 而 楊曰: 可,三年有成,宜未占而孚,其施 「聖人 ノ損 益三代之成 患 其 難 憲,措 哉? 設之 之 期

年 日 可 : 以成功 尹曰:「孔子 誠有用我者, 也。」 期 歎 月可 當 時 以行 莫 能 其 用 政 教,二 己 也

去殺矣。誠哉是言也!」子曰:「善人爲邦百年,亦可以勝殘

也。」 也。 爲 悪。 不 伊 川 踐 善人者,不踐 曰 : 已前 爲惡之迹, 勝殘 迹,亦不入 去殺,只 然 亦 是 未 於室 能 入於 使 之 人 人 道 不

爲邦百年,馴致治平,亦可以勝殘去殺矣。 范曰: 「善人不踐迹,亦不入於室,故

若聖人爲 天 下,則 不 待 百年 矣。 」

省刑 謝 日 好 ൬ 無忮害之心,則可以

可繼之道,故積百年之久,亦足以勝 楊曰: 「善人則無惡矣,其爲邦 殘 必 去 有

年,其化民亦不止於不爲惡而已。」 之功如是, 尹曰: 若夫聖人爲天下,則不待於百 勝殘去殺,人不爲惡已,善人

子曰: 「如有王者,必世而後仁。」

曰: 易,民歸於仁,天下變化之時,●此 用 後仁」,何也?」曰: 我者,三年有成, 而 能致? 其曰「必世」,理之然也。 後仁,化浹也。」 伊川曰: 「三十年爲一世,三十壯有室也。 世。王者之效,則速矣。」 「三十曰壯,有室之時,父子 「所謂仁者,謂 言王者則曰 或問: 「孔子日 非 二必 風 積 世 有成 移俗 : 何 而 必 又

> 仁,非必世安可?」 謂 法 度 紀 綱 有 成 而 化 行 也 ; 如 欲 民

成。 之世,天下歸之久矣,是亦世也。 文帝,唐至於太宗,亦必世之効也。」 則成康之時,仁道乃成。後之王者,漢至於 禹之功在堯舜之時,而湯之仁亦著於夏桀 子創業垂統,爲可繼也,故必世 范曰: 然而湯有天下,身致太平,豈 「如有 王 一者,必 世 而 而 必 後 至於周, 後仁道 世 仁。 乎 ? 君

時。」 作,亦必世 謝曰: 「爲當時言,於斯時也,有王者 而後仁。仁如成周《行葦》

者作, 然矣。 王之時爲然,豈一日之積乎?」 楊曰: 亦必世而後可也。 當是時,欲仁如《行葦》之詩,雖 期月而可,三年 蓋自文武 有成,宜若易 至 一於成 有

「甚矣,仁政之大也! 父子相

化」,四庫本作「仁」。

時; 繼 必 康,仁政乃成也。」 世 爲 加 一世,先儒亦以三十年爲世。雖王者, 湯之仁著於夏桀之世, 後仁政乃 成。 禹之功 建於 周至於成 堯 舜之

有?不能正其身,如正人何?」子曰:「苟正其身矣,於從政乎何

焉,不本諸身,而正其在外者也。」之事也。後世之治所以不及三王者,無他之事也, 不能正其身,而以力假仁,霸者范曰:「先正其身,而以德行仁,王者

楊曰:「有規矩而後方圓不欺、未有謝曰:「其身正、不令而行。」

侯曰:「身者,人之標準也,苟能正其無規矩而能正其方圓者也。」

齊,家齊而後國治。」」• 『身修而後家立則政立矣。』《大學》曰:『身修而後家尹曰:『楊雄曰:『政之本,身也,身身矣,於從政乎何有?」

君

,此言何足怪。」

孔子抑之曰: 時陪臣 冉有稍明聖人之道,何不知此?」曰: 時季氏專政,孔子因以明之。]曰: 君,冉求爲季氏家臣,家事安得 知此道; 與聞。」 行爲政,僭也。 猶當與聞之也。」 已,謂之政者,僭也。 「閔子騫不肯爲大夫,曾皙不肯爲陪臣,皆 日 冉子 伊川日: 政,雖不吾以,吾其與聞之。」 執國命,見聞習俗爲常,皆不知有 退 或問: 「有政。」子曰: 季路、冉求未能然。 朝。 『其事也。』言季氏之家事而 「冉子謂季氏之所行爲政、 如國有政,吾雖不用,猶當 又曰: 子曰: 「政與事何異?」曰: 如國有政,吾雖不用, 「冉有謂季氏所 何 其事也。 晏也?」對 謂政? 夫政出於 「季路、 ・「是 如有

●「齊」,原脫,今據四庫本、傳經堂本、公善堂本、本、紫陽叢書本補。

刻

三六〇

出於君 其家事 之家 冉有之非也。」 事 范 ,是以知非政也。此所以正君臣,明 而 爲 日 己。 政、故曰「有政」。 冉 如有政,夫子必聞之。令不 有 仕於季氏之朝,以 夫子正之曰: 季 Æ

吕曰:「大夫雖不治事,猶得與聞國

政。」

曰:『如有政,雖不吾以,吾其與聞之。」冉楊曰:「夫子之至是邦,必聞其政,故事而不及政,則當時爲國者可知矣。」

言可

以

喪邦,私也。」

子以

事爲政,名實紊矣,故夫子正之。」

也 定 尹 孔子對 冉子以事爲政,故孔子辨之。」 知 之言 公問 日 爲君之難也,不幾乎一言而與邦 日: 日 「政者,教也,化也, 「一言而可以與邦,有諸?」 言 爲 君 不可以若是其幾 難,爲 臣不易。」如 事, 也。 事

之,

唯其言而莫予違,則讒諂

面

諛之人至

謝曰:

知

爲君之難

一則必

敬

慎

以持

伊川 言而 善乎? 子對 莫予違 之言日 乎?」曰: E 喪邦乎?」 日 也。」如其善而莫之違也,不亦 如不善而莫之違也,不幾乎 「一言可以興邦,公也 「言不可以若是其幾也。 「予無樂乎爲君,唯其言 言而 喪邦,有諸?」 而 孔

也。」 克艱 能納忠矣。古之興邦者,未有不由此 爲君之難,則能聽 患,在於自滿, 人臣之患,在於求容。 上,臣悅佞於下,古之喪邦者,未有不由此 言而莫予違,則忠言不至於耳,君 厥臣。」此舜禹所以 范 日 「《書》曰: 言矣"知爲臣 相戒也。 **『**后克艱厥后, 之難,則 人君之 驕逸於 也。 臣 知

然此非識微之君子,何足以知之?」矣。邦未必遽興喪也,而興喪之源分於此。

無面從。」亦爲是而已。」 楊曰:「知爲君之難,必思所以圖其處所之人至。邦之興喪不其幾乎? 皋陶面諛之人至。邦之興喪不其幾乎? 皋陶之告其君曰:『后克艱厥后,臣克艱厥臣,之告其君曰:『后克艱厥后,臣克艱厥臣,

於一言而興喪存焉,故曰幾。」之人至矣。邦之興喪,未有不由此。二者,守之道,唯其言而莫予違也,則讒諂面諛守之道,唯其言而莫予違也,則讒諂面諛

來。」 葉公問政。子曰:「近者說,遠者

『親親而仁民,仁民而愛物。』此遠近之序敬惟長,始於家邦,終於四海。』孟子曰:者說,必自親始。《書》曰:『立愛惟親,立范曰:「欲遠者來,必自近始; 欲近

中國,以綏四方。」近說遠來之道也。」子治天下,其爲政一也。《詩》曰:『惠此也。葉公之治,止於一縣,諸侯治一國,天

楊曰:「近說遠來、邇可遠在茲之謝曰:「被其澤則說、聞其風則來。」

意。」

侯曰:「爲政而能使近者說,則遠者

尹曰:「近者說之,遠者來之,是謂來矣。」

政。」

速,無見小利。欲速則不達, 見小利子夏爲莒父宰,問政。子曰: 「無欲

則大事不成。」

之病,常在近小。故孔子各以切己之事答定,無見小利。」子張常過高而未仁, 子夏速,無見小利。」子張常過高而未仁, 子夏明政,子曰: 『無欲無倦,行之以忠。』子夏問政,子曰: 『居之

三六

矣。 以高大。」進德修業,未嘗有止,亦不可 息。』《升》之《象》曰: 道 則 者哉?」 如天地之利萬物,無有不利,大事豈有不成 而成 小利。《乾》之《象》曰: 『君子以自 ,故不欲速成 求易 也,如日月東西 見小利以爲足,終不可 范 成, H 見 小利 子夏之學,患在於不及,欲 則圖 致天下之大利,故 [相從 「君子以順 近功。 而 以入堯舜之道。 不已,則無 聖人久 德,積 於其 强 一日 不 不 · 達 小 . 見 速

必無見大之理。」朝暮者,必不能歲計之而有餘。見小利,則朝暮者,必不能歲計之而有餘。見小利,則以無則曰:「與四時俱者無近功,祈功於

必至於違義。」
楊曰:「欲速則必至於行險,見利則

以是答之也。」

尹曰:「子夏之病常在近者小者,故

葉公語孔子曰:「吾黨有直躬者,其

楊曰:

「父子相隱,人之情也,

若其

順也。 孝。 直 爭與順 不直,至於父子天性,則以隱爲直也, 有似乎不順,至於君父有過,則臣子以 爲信, 父慈子孝,天下之直也。 范曰: 隱。 之直 父攘 隱與直反,然而父子必隱乃 反,然而臣子必以爭 而不知父子之道 直在其中矣」。 者異於是: 羊,而子證之。」孔子曰: 「父爲子隱則慈,子爲父 父爲子隱, 猶 爲 妾 夫隱 順。 婦 子爲 爲 以 直 有 一吾 隱 順 躬 爭爲 直 似 爲 以 乎 則

宜。」 吕曰:「屈小信而申大恩,乃所以爲

正,而不知君臣之義也。」

其 圃 不爲父隱,於 逃,遵 於直不直 謝 日 海 : 濱 何暇計 理 而 順 處 順 理 邪 爲 哉?」 當是 ? 直。 時,愛親之心勝, 瞍 父不 殺 爲子隱, 人,舜竊負

情,乃 哉 「父子 情 則 所謂 ·之真 逆 直 丽 在 直, 情,豈欲 其 爲 之, 中 · 矣。 反情 Ш 相暴其惡哉? 孰 子 以 甚 證 爲直,則 焉? 其 父, 豈 失 其 又 行 情 其 日 所 真 以 也

父隱,直在其中矣。」」 《八八四年》 一八八四年,一八八四年,一八八四年,一八四年,一八四年,一八八四年,一八八四年,一八八四年,一八八四年,一八八四年,一八八四十二十二十二十二十二十二十二十二

直矣。

乞醯之不得爲直

,亦猶是也

父隱,所以直在其中矣。」 尹曰:「順理爲直。父爲子隱,子爲

與人忠。雖之夷狄,不可棄也。」樊遲問仁。子曰: 「居處恭,執事敬,

太 得 此 E 面 過 盎 是 徹 明 又 道 F 有諸 日 處 日 一徹 恭 下 中 小、執事 語。 必 執 居處恭,執 形諸 事 事敬,與 聖人元 須是敬,然不 外,觀 人忠, 無 事敬, 其 語 氣 充 與 口 象 此 人 矜 便 便 忠, 持 見 睟 又

> 矣。」 問 以 敬 雖之夷狄,不可棄也。」然則執事敬者,固 仁之端也 爲奇, 而 已 伊 子曰: Ш 非敬 一,推是心而誠之,則篤恭而 簡 日 細 也。 _ 故 居處恭,執事 以 君子之遇 要之, 自崇,非 無敢 事 敬 慢而 敬,與 也 無 百 己。 細 天 飾 下 私 爲 遲 知 於

爲道 爲容 離 道,無有内外,況夷狄乎? 民 乎其所不聞 日三省吾身』,此 如齊』, 也。 如承大祭』,執事無 0 正 范 此居 日 夷狄之國 而 . 已,非惰也。『出 ,故居處 處之容也。 君子 雖 與 無禮 戒 不 慎 不敬 無 可 乎 夫子居 示 不忠 其 也。 ·恭 正心誠意,所 而 如 所 道不 也。 不 曾子曰「 見 坐 不容者,不 大賓, 覩 如 君 可 尸 子之 吾 使 懼 立

見大賓,使民如承大祭」之意同。方是時,謝曰:「『居處恭,執事敬』與『出門如

此 如 屏 而棄之哉? 者,性與之俱立,身與之俱動,豈爲 氣 似 不息者。 非不可棄也,不能棄也。」 與人 忠,有惻 隱之意 夷

皆爲仁之方,君子不可以須臾離者也,豈以 仁,則豈以夷狄之殊 忠,爲己 尹曰: 楊曰: 而已,非有因乎人也。 「居處恭,執事敬, 「居處之恭,執事之敬,與人之 而更其所操。」 安土敦乎 與人忠, 固

狄而棄之乎?」

子曰: 明道曰: 日 必果, 硜硜然小人哉! 日 日 子貢問 可 「宗族 謂士矣。」曰: 日 敢 「行已有恥,使於四方,不辱君 問其次。」曰: 「言不必信,行不必果,唯義 ●「今之從政者何如?」子 稱 斗筲之人,何足算也?」 「何 孝焉, 如斯 可 抑亦可以爲次 謂之士矣?」 敢 「言必信,行 間 其 弟 次。」

> 小人之事。小人對大人爲小,非爲惡之小 所 人也,故亦可以爲士。」 在,大人之事 ; 言必信,行必 果, 硜 硜 然

數也?」志苟急於斗筲,唯恐不能暴見也, 信,行必果,硜硜然 政者何如?」子曰: 次矣』。子貢方悟而推 事。子貢未喻 之行聞於人者,而 盡謂今之從政爲斗筲之人也。」 伊川《解》曰: 而 復問 夫子所告,乃篤實 小人哉! 「子貢之意,欲爲 『志求斗筲之人,何足 其 曰: ● 『然則今之從 次、故答 抑 亦可 以 自 「言必 以 得 皎 之

次 辱命者,有能 有行,其次有節。」 吕 日 也。 「行己有恥者,有知也, 有知有能,足以爲士。

非

事 ; 謝 使於四 「行己有 方,不辱君 恥, 命, 則 則 必 以其材 不 爲 可 可 以 賤 任

⁰ 「推」下,四庫本有「之」字。 曰」,原無,今據公善堂本及《論語集註

大人惟義所在,然亦不害其爲自守。」弟,亦可謂行修矣,言必信,行必果,雖未若事,能不爲而能爲者也。宗族稱孝,鄉黨稱

子曰: 「不得中行而與之,必也狂狷於人者, 夫子告之,皆篤實自得之事。」尹曰: 「子貢之問,皆欲皎皎之行聞

善,若不受謝於嗟來,●其狷者不及,皆不知善,若不受謝於嗟來,●其狷者之所爲乎?」常過所得,如曾皙是也, 狷者過於不爲不謝曰:「狂者有躐等進取之心,所見乎? 狂者進取,狷者有所不爲也。」

所以裁之者。與而裁之,則於中行其幾矣。」

恒,不可以作巫醫。」善夫! 不爲也。」子曰: 與之,必也狂狷乎? 狂者進取,狷者有 不待占。」 承之羞。]子曰: 尹曰: 子曰: 伊川曰: 「有吉凶便占,無恒之人,更 不可以作巫醫。」善夫!」「不恒其德, 或承之羞。]子曰: 「不占而已矣。」 又曰:「子曰: 『不得中行 「南人有言曰: 『中行,得行中道者也。』 『南人有言曰: 『不占而已矣。』當通爲一 『不恒其德,或 『人而無恒, 「人而 所 無 m

▶ 「謝」。和刻本校云。「謝」疑「食」字誤

二六丘

故曰: 有常; 《論 段。 其 間 『不占而已矣。』 若無常,則 雖 者多。 有 子 中行 日」字, 不 미 測 固 度,鄉愿是其一, 然 然,然狂 文 勢 隔 狷 不 亦 斷 是

不占而可知。」 占,所以考禍福死生也。 謝 日 巫巫 醫正賴誠 意於禍福死生之 觀誠一 不 誠,則

苟玩 矣。 其德,或承之羞。』夫君子之於《易》也 疾者所賴、尤不可爲也。 其 楊曰: 其爲不恒也,蓋亦不占而已矣。」 象 其占,則不 而 玩其辭,動則觀其變而玩其占。 「人無常心,無不 恒 其德,知 《易》曰: 其或承之羞 爲已,巫醫 示不 居 必 圓 怕 慎

恒者 之羞」,蓋謂羞辱承之,可不占而 雖 侯曰: 巫 醫不可爲也。 「《易》日 不不 『振恒凶。』則是 恒 知 其 也。 德 或 承 無

日 『不恒其德,或承之羞。』言德行 日: 夫 南 人之言 也! !無恒 易

尹

日

君子尚義,故

有

茅

小人

據 則 也。」 或爲 羞 辱 承 之。 不 恒之人,占决 亦 無 所

子日 : 君 子和 而 不 同, 小 同 而 不

和

然不害其爲 否。 調羹者 吕曰 謝 日 : : 和。 五 「君子出 味相合爲和,以水濟 和 小人事 則 可 處 否 同 語 相 而理不 默 濟 安安 同 和 口 水 則 爲 同 隨 同。 也 彼 ? 口

猶之五 和也。 鹹 同 濟 也 鹹 3 楊曰: 耳 味 君子有可否以相濟,故其發必中節 如 相 ,尚何和之有?」 以 得 五五 鹹 也" 小人以 濟鹹, 一味調 之 則 同 而 後 而 同爲說,猶之以 和,而 已,非 五 所 味 以 爲 非

同。 之異 能 和 哉 同 侯曰: 濟 非 其 和 故 「和 美 也, 日 而 同惡相 已,故曰 非 「小人同 一同也, 濟, 和 如 而 則 以 不 君 雖 和。」 同, 水濟水, 子 有 和 可 不 安 不 可

尚利,安得而和?」

善者好之,其不善者惡之。」如?」子曰: 「未可也。不如鄉人之曰: 「未可也。不如鄉人之子貢問曰: 「鄉人皆惡之,何如?」子

原 有 好之,不善人惡之,其善善惡惡豈不明 人之善惡者,審其 則善者好之,惡不善則不善者惡之。 一鄉之人,必有善人焉,有不善人焉。 也, (君以此察臣下,則忠邪可知也。) 亦好之也。 善人而不善人亦好之,未有不善人而 范曰: 皆惡之未可也,爲其近於獨立也。 「子貢所問,取人之法 皆好之未可也,爲 、所好惡者而已矣。 其 近 也。 哉? 善人 好善 於 知 鄉 善 未

也。 可 未 也 口 也, ,以善人好善人; 謝曰 善不善,各從其類。 i 鄉人不容皆小人,故皆惡之未 「鄉人不容皆君子,故皆好之 其不善者惡之,知 故善者好之,知 其 可

> 作感之所系? 也,則皆好之何害? 鄉人皆不善人也,則其可也,以不善人惡善人。若鄉人皆善人

皆惡之何害?」

用之殺之同意。」 楊曰:「此與孟子論見賢見可殺而

後

八之善惡可知矣。」 尹曰:「善者好之,不善者惡之,則其

也,及其使人也,求備焉。」人難事而易說也。說之雖不以道,說以道,不說也,及其使人也,器之。小子曰:「君子易事而難說也。說之不子曰:「君子易事而難說也。說之不

遠佞人。 悅矣,然 喜人正己,故不可悅以非道, 自知也。 己,故可悅以非道。 人好己從,賢人好己正,聖人好己師。」君子 范曰: 而堯畏巧言令色,舜難任人,夫子 使人也器之,堯舜之事也。 不畏、不難、不遠,則恐其悅 楊曰: 君子之性,雖不可 「天下有三好" 小人喜人從 稷 而 以 不

稷之賢 以 伊 百 尹稱湯與 易事也。 穀 契 ,皆專治 敷 五. 人不求備,聖人重於責人,此所 教 事 伯 夷 則才之小者可 典 禮 后 夔 典 樂。 知也。 禹

能之意,故使人也求備焉。」等有與人爭為一、故說之雖不以道,說也。當有與人爭為一、故說之不以道,不說也。才全德備,說已,故說之不以道,不說也。才全德備,說已,故說之不以道,不說也。才全德備,

故難說。小人以同己爲是,而忌人之勝己,故難說。小人以同己爲是,而忌人之勝己,也器之,故易事, 遜志之言,必求諸非道,也器之,故易事, 遜志之言,必求諸非道,

也

子曰: 「君子泰而不驕,小人驕而不

所 我者也,皆古之制也,所以安, 驕; 人,故不泰。」 憂,故不泰。 足,故不驕; 以不驕。 范曰: 謝曰: 驕則宜其泰,而卒歸於不泰。 小人懷慢人之心,故驕, 君子與小人,未嘗不相 君子爲善,故常泰,爲善 小人易滿,故常驕 泰 則 宜其 、驕,而 不侮鰥寡, 易 卒 歸 反 君子在 滿 心也。」 於 必多 日不 不 畏

楊曰:「心廣體胖,故不驕; 虛驕而

氣盛,故不泰。」

尹曰: 「泰則不驕,驕則不泰,」侯曰: 「泰則不驕,驕則不泰。」

理

固然

子曰:「剛、毅、木、訥近仁。」

枉道咈理,諂曲邪佞,無所不至。彼剛伊川曰:「人之私其己也,由私其己,

故

又曰: 故以 質朴,訥者遲鈍: 何求而日 質之近乎仁者也。」 毅者有所 於仁也。」 强、果毅、木質、訥 、近於仁,亦猶不得中行而與狂狷也。」 此爲近仁。 「剛者堅之體,發而有勇曰毅,木者 近仁? 發,木者質朴,訥者遲鈍: 《語録 此正與巧言令色相反。」 只爲輕浮巧利於仁甚遠, ₩ E 鈍 此四者,比之巧言令色 者, 又曰: 則 剛 不 能 者 强 馬,故 剛毅木訥, 而 不 四 少近

也。 爲 毅者致果,致果則 而能仁,未有辨而能仁者也。」 范曰: 未有柔而能仁,未有怯而能仁,未有巧 訥則 無辨給: 「剛者無欲,無 勇於爲善, 此 四者,皆近仁 欲則無利 木則 一之道 無 心 巧

之,故近於有所知覺。」 謝 「要之,四事皆心不縱恣者能

不至於外馳,故近仁。」 楊曰: 剛毅則不屈於物欲,木訥 則

> 强、 果毅、木質、訥鈍者爲近 尹曰: 三巧 言令色,鮮矣仁」,故 焉。」

子曰: 矣。 子路問 朋友切切偲偲,兄弟怡怡。」 日 「切切偲偲,恰恰如也,可謂 「何如 斯 可謂之士矣?」

以意。 如也。二 明道日 "此言告子路,故曰: : 「切切如體 之相磨,偲偲 「切 則

怡

路剛勇,所不足者,中和也,故告之以此。」 者,進於德也。兄弟主於愛,故曰怡怡。 范曰: 「内善於兄弟、外信於朋友、非 「切切者,責以 善 也; 偲 子 偲

不修身者能之。」●

義 兄弟無責善,怡怡而已: 「朋友之交,親而 後有 皆救子路 切 偲之

「非不修身者」,和刻本校云: 「不」字疑當在「者」字

偲偲,切磋之義。」 怡和樂,兄弟之義也。 知之者可以爲士矣。 侯曰: 「切切偲偲,朋友之道也, 怡

矣。」子曰:「善人教民七年,亦可以即戎

事,皆當思其作爲如何,乃有益。」即戎也。凡看文字,如七年、一世、百年之年云。」 又曰:「教民戰,至七年,則可以戎。聖人度其時可矣,如大國五年,小國七戎。聖人度其時可矣,如大國五年,亦可以即

而服從,雖即戎可也。」楊曰:「善人教民七年之久,則民信

范曰:「晉文公始人二年,教其民,將子曰:「以不教民戰,是謂棄之。」

上之罪也。」上之罪也。」『民未知禮,未生其共。』又曰:『民未知禮,未生其共。』又曰:『民用之,子犯曰:『民未知禮,未生其共。』又曰:『民日、『民未知禮,未生其共。』又曰:『民日、『民未知義,未安其居。』又

也必矣,非棄之而何?」 楊曰:「申令不明,失伍離次,則敗亡戰也,其克必矣, 反此,則棄之之道也。」 如子弟之衛父兄,如手足之捍心腹。以此如子弟之衛父兄,如手足之捍心腹。以此

戰陣也,然戰陣在其中矣。」 侯曰:「教民,教其孝悌忠信爾,非特

之殃民。』與此義同。」是棄之也。孟子曰:『不教民而用之,謂是棄之也。孟子曰:『不教民而用之,謂尹曰:「戰,危事也,民不教而使之,

國朝諸老先生論語精義卷第七上於

國朝諸老先生論語精義卷第七下

憲問第十四

原憲不受非義之禄,能事斯語,故以告之。」 不聽,則膏澤不下於民,富其 民,富其禄者,榮也; 其 禄 范曰: 也。邦有道、則諫行言聽、膏澤 日 「君子之仕,所 「邦無道,非君子志行之時,而 邦無 道 以行 ,則諫不 禄者, 恥也 其義,非 下於 ·行言 利

尹曰:「邦無道而禄,未免枉其道,是非枉道從之,其可得乎? 是足恥也。」楊曰:「當儉德避難之時,而榮以禄,

得穀,其爲小人也可知矣,故恥

「克、伐、怨、欲不行焉,可以爲仁矣可恥也。 原憲甘貧守道,可以語此。」

子曰。「可以爲難矣,仁則吾不知「克、伐、怨、欲不行焉,可以爲仁矣?」

也。一

能 孔 克、伐、怨、欲四者,便是仁也。 無,故止告之以『爲難』。」 又曰:「人無 者,無然後可以爲仁, 爲仁者能之; 日 有所啟發。 『可以爲難矣。』此孔子著意告原憲處,欲它 孔子高弟,問有所未盡。 人開示之深也。」 子答以知其爲難,而不知其爲仁也。 一箇不行,不免有此心,但不行耳。子曰: 門 也,謂之仁,則未可也。 如子 伊川《解》曰: 「女以予爲多學 貢者, 他承當不得,不能 有而 便能 又《語録》曰: 能 「人而無克、伐、怨、欲 曉 制其情不 而 蓋克、伐、怨、欲四 有而不行,未至於 得聖人 識之者與?」對 此原憲之問,夫 只爲原憲著 再發問 行焉,亦難 、意耳。 原 此 也。 聖

之日 也。」 日 : 然。二 『非也。 便 復問 予一以貫之。」原憲則不能 日 : 非 與 ? 孔 子 告

以爲難 而 顔子而上乃能之; 爲仁矣?』若無克、伐、怨、欲,固爲仁已,唯 再問之,而憲未之能問也。」 又曰: ,而未足以爲仁也。孔子蓋 「『克、伐、怨、欲不行焉,可 如有而不行焉,則亦 欲憲疑 以 口

矣。 則多忮,欲則多求: 於四者。」 此易之者實多故也。仁之於道,不止 范曰: 「克者好勝也,伐者自矜也,怨 此四者,不行 可謂 難

不仁,而未可以爲仁。」 吕曰: 「克、伐、怨、欲之不行,可以去

知」,非直以 於仁,然未足以見仁之本體。其 謝曰: 爲不仁也。」 「克、伐、怨、欲 不行,未必 日 吾 不 不 出

楊曰: 「克、伐、怨、欲,常人之情易發

> 仁,則又奚克、伐、怨、欲之有哉 而 難 制 有 而 不行, 미 以 爲 ? 難 矣。 若

夫

謂之仁矣; 為難 憲 尹曰: 不能再問也。」 能則 可矣。此聖人開示之切,惜乎 「克、伐、怨、欲、咸 徒能不行焉,是有而 無馬 制之也, 口

以

原

重遷,無爲而輕遷,皆懷居也。」 子曰: 横渠曰: 「士而懷居,不足以爲士矣。」 「安土,不懷居也。 有爲而

士也。 求安。 禹卑宫室: 居者乎? 范 夫士猶 恥惡衣惡食與懷居者,皆不足以爲 日 堯不以位爲樂,而以天下爲 「士志於道,故食不求飽,居 天子之不懷居也 不可以懷居,況居天下之廣 不

可 以適道矣。」 謝 曰 「懷居與恥惡衣惡食同, 决不

± ? 楊 E. 懷 居 則 不能 徙義,安足爲

子曰:「邦有道,危言危行, 邦無尹曰:「士志於道,何懷居之有哉?」

道,危行言孫。」

謂。 乃孔子之事也。 穀,恥也。」此泛舉也。 君子哉蘧伯玉。」然則危言危行,危行言孫 邦無道,行雖危,而言不可不孫也。」 道 日 『邦有 危猶獨 直 也,與衆異,不安之 道,穀, 哉史魚! 邦 無道, 不若

無 言行 而 危,有時 補 范曰: ,君子不貴,故言當遜以出之。」 E. 而孙焉。 使士而言遜,其國豈不殆哉?」 「行不可以少貶也,言則有 「危行,以 知國之治亂,觀 身徇 道 也。 殺身而 其 士之 時

侯曰: 「邦有道,則諫行言聽,以身徇楊曰: 「危行以潔身,孫言以遠害。」

聽,獨善其身可也,故危行言孫,遠禍趙也,故危言危行, 邦無道,諫不行言

而不

使士言遜,不亦殆哉?」言,則有時而不敢盡,以避禍也。爲國者,,則有時而不敢盡,以避禍也。爲國者,尹曰:「君子之持身不可變也,至於

外也,故言則成文,動則成章。」
伊川曰:「和順積於中,而英華發於有德。仁者必有勇,勇者不必有仁。」子曰:「有德者必有言,有言者不必

本固 哉 勇 則 之能勝也,●故勇 四 īfii 而枝葉不茂者也。 體也,未有心 范曰:「德者本也,言者枝葉也,未 有 義,乃可以不 生焉。 壯 而 爲 四 仁之爲力,天下 仁譬則 體不能 亂,豈 心 者也。❷ 必能兼仁 也,勇譬 莫 夫 有

- 「也」,四庫本無。
- ② 「者」,四庫本作「强」。

一七二

三七四

尚 至 解 者 吕 尚勇者愛有所不行。 德 日 . 有 所不察。 「有 德者然後 仁者推愛,不勇則不 知 德,故 能

能不懼而已,故不必有仁。」必有德。仁者由義而行,故必有勇, 勇者中,故必有言, 有言者行或不掩焉,故不中。 楊曰:「有得於中,則其發於外也必

哉?」匹夫之勇是也。」
 《安曰:「有德者必有言,有德之言,如寒聚、曾皙之言是也。仁者必有勇,之,如琴張、曾皙之言是也。仁者必有勇,至、如琴張、曾皙之言是也。仁者必有勇,至、如琴張、曾皙之言是也。仁者必有勇,

明道曰: 下。」夫子不答。 舟,俱不得其 南宫适問於孔子曰: 君子哉若人! 「南宫适以禹稷比孔子,故 死然。 尚德哉若人! 南 官 禹 稷 适 「羿善射, 躬稼 出, 子 而 有天 奡 日 盪

可 不敢答,弗敢當也。 孔子不答。 尚 范曰: ,則勉進於德矣。 「南宫适 既 禹 賤 出 力 ."稷 而 而 有 稱之者,志其言 貴德, 天 下,故夫子 知德之

當 直 謂之君子。 時 不答也。 ",發問 謝曰: 間 知言之要,非尚 「南宫 必有目擊而道存首肯之意,非 适 知 以 躬 德者不能。 行 爲事,是以 在

之善也

楊曰:「禹稷之有天下,不止於躬稼

也。 然」、『夫人不言,言必有中』之類則異矣。」 止之者,不責備於其言,以沮其尚 m (一]蓋與其尚德而已。與所謂『雍之言 故曰: 孔子 未 『君子哉若人! 盡 然 其言,故 不 尚 德 德之志 然 哉若 而 不

曰『有天下』,不敢當也。」
力取,尚德之君子也。夫子之不答者,以其力取,尚德之君子也。夫子之不答者,以其

小人而仁者也。」

哉?」
也。夫用君子猶有不仁,況小人豈有仁也。夫用君子猶有不仁,況小人豈有仁仁。至於小人,則與君子反,故未有仁者矣。君子之行,未必皆能仁也,故有時而不矣。君子之行,未必皆能仁也,故有時而不

其公。」
則流入於私, 小人志於私一己,則不得盡則流入於私, 小人志於私一己,則不得盡

也,然未害爲君子。」意,立語不同。毫忽之間,心不在焉,不仁謝曰:「與《易》所謂小人不恥不仁之

子而不仁,蓋有矣夫。」楊曰:「顏淵三月不違仁而已,則君

哉?」 仁矣, 小人未始進君子之心,何取於仁仁矣, 小人未始進君子之心,何取於仁 侯曰:「君子與天地少不相似,則不

有仁哉? 甚言小人之不仁也。」仁,或未能盡之,則有矣。至於小人,豈復一,曰:「盡人道者聖人之事,君子行

勿誨乎?」 一愛之,能勿勞乎? 忠焉,能

「以」、《論語集註》作「矣」。

三七五

謝曰:「愛則不倦,忠則盡誠。」也, 忠之,則父之教者也。」

労, 忠焉必善道之,則不能勿誨。」楊曰:「愛之不以姑息,則不能勿

勞? 忠焉則唯恐其不聽,安能勿誨?」侯曰: 「愛之則唯恐其不至,安能勿

之,行人子羽修飾之,東里子産潤色之,行人子羽修飾之,東里子産潤色子曰:「爲命,裨諶草創之,世叔討論事業, 忠其人而欲曉之,必反覆其辭說。」尹曰:「愛其人而欲成之,必勉之以

矣。 此 衆多,其若無人,則是小國之不知也。」● 四 范曰: 以天下之大,命令不可不慎,賢人 賢然後成,故鮮 「鄭,小國也,其爲命令,必 有敗 事,此可 以 爲 不 口 法 重

也,謀之可不慎乎?」善,足以解忿紓難,息暴國之患。況鄭小國善,足以解忿紓難,息暴國之患。況鄭小國謝曰:「當春秋時,諸侯之使,辭令之

交鄰 足爲後世法,亦其討論潤色之詳也。」 说好, 論 楊 民 志,無失辭 討 論 潤 色, 焉。 以 衆賢爲之, 古之辭命,皆 故 其

智者潤色之: 其周如是,故可觀也。」者,能者草創之,明者討論之,文者修飾之,侯曰: 「鄭,小國也,其辭命若可觀

用之故也,況有天下者乎?」 區區小國而能自立大國之間者,得人而善尹曰:「命,政令也。當春秋時,鄭以

食,没齒無怨言。」曰:「人也。奪伯氏駢邑三百,飯疏西。曰:「彼哉! 彼哉!」問管仲。或問子産。子曰:「惠人也。」問子

不足者可知矣。子西無所取,故曰: 『彼也。語其德行,惠爲多焉,故曰惠人,則其 范曰: 「子産有君子之道四,惠其一

本作「如」。

0

丽

無怨。

後世如武

侯之於李平、廖立

也

近

服

侯曰:「管仲以人道治人,故人誠

人也。」

《四十二年》

之,故夫子取之也。」

世時,天下駢亂甚矣疑,微管仲,幾不足以克食,没齒無怨言,非怒以過奪,故人服。當食,没齒無怨言,非怒以過奪,故人服。當意其爲愛人。子西之事無足道,故曰:害其爲愛人。子西之事無足道,故曰:謝曰:「猶衆人之母,斯惠人也,然不

之心,非人也, 有而當其實,斯爲人矣。」 怨言,奪之以義而當理故也。人無是非羞惡也。管仲奪伯氏駢邑三百,飯疏食,没齒無也。管仲奪伯氏駢邑三百,飯疏食,沒齒無

之。」

罪而被誅者不怨,其政可知也。」『古之遺愛也。』彼哉彼哉,無所取也。誅尹曰:「子産卒,仲尼聞之出涕,曰

蓋守不固而有所爲也。」 伊川曰:「貧不怨則諂,諂尤甚於怨,

子曰:

貧而無怨難,富而無驕易。

易,處貧難,天下之情一也。」安於貧,自非君子,其不怨者鮮矣。處富安於貧,自非君子,其不怨者鮮矣。處富善范曰:「此爲伯氏而言也。唯君子能

而無怨,非安於義分不能也。」 楊曰:「富而無驕,自好者能之,貧難,富如與仁同功者,無驕所以爲易。」謝曰:「貧如與仁同過者,無怨所以

敢以富驕人,故富而無驕易。」

(資而無怨難, 富者怨之府,稍自愛者,不貧而無怨難, 富者怨之府,稍自愛者,不

尹曰:「處富易,處貧難,人之情也。」

三七七

以爲滕薛大夫。」子曰:「孟公綽爲趙魏老則優,不可

明,而趙魏綱目舉故也。」夫,滕薛小國,政繁事紊,綱紀不立,法度不仁可知矣。 優爲趙魏老而不可爲滕薛大仁可知矣。 優爲趙魏老而不可爲滕薛大善明道曰:「孔子言公綽之不欲,則其

之,則天下無廢才矣。」故優於趙魏而不宜滕薛。君子使人也器故優於趙魏而不宜滕薛。君子使人也器

則孔子之用人可知矣。」爲棄人矣,此君子所以患不知人也。言此,爲棄人矣,此君子所以患不知人也。言此,楊曰:「知之弗豫,枉其材而用之,則

可於滕薛。善爲國者,使人各欲當其才而才治事之任。公綽不欲,故優於趙魏而不尹曰:「老者,有德之稱; 大夫,以

可以爲成人矣。」 可以爲成人矣。」 要,文之以禮樂,亦可以爲成人矣。」 要,文之以禮樂,亦可以爲成人矣。」 要,見危授命,久要不忘平生之言,亦 要,見危授命,久要不忘平生之言,亦

武仲智也,公綽仁也,卞莊子勇也。」 又知、仁、勇,若孔子以謂成人,不出此三者:伊川曰:「知之明,信之篤,行之果。

實也; 此。 日 聖人孰能之? 口 「語今之成人者,只是語忠信 踐 以 : 若今之成人,則又其次也。」 爲 形。」如此 「合此四人之偏,文之以禮樂方成, 成 須是合此 禮樂者,文也。 矣。 方可 孟子曰 四人之能,文之以禮樂,亦 然而 以 論其大成, 稱成人之名。」 : 語成人之名,自非 『唯聖人然後可 也。 則 忠信 又曰 不 止 聖 於 又

以

則

盡之矣。」

寡欲 足爲學也,故不得 子 仲 今之成人者,臨 文之以禮樂,此古之成 不欲,而未能 以 ·勇 知 成 而 而 而 范 已 ,學至此,然後可以 르 E : 已,其餘不足稱也; 無欲,無欲則能剛,如公綽者, 「好知不好學,其蔽也蕩,臧 如 好勇不好學, 冉 財 爲成 無苟 求者,多才 人。 也 兼 其蔽 爲 臨 公綽能自克於 成 難 四 而 禮 人矣。● 所 르 也亂 無苟免 子之能,而 以 V 皆未 卞 與 文

> 朋 成 亦 可 友 所以 以 交,言而 爲 勉 成 子路進 有信,有 矣。 於禮樂 此子路 此 三者,雖 也 所 能 不 至於古,

命 潤色之以禮樂,則於酬酢應變蓋 聖人,特尚可 今之成人, 見利 公綽之不欲,卞莊子之勇,冉求之藝,而 則不爲威惕,亦豈苟然者。」 事名矣,蓋其 謝曰 以體質論故也。 「成人 思義, 具 雖 人道者也。 未至於聖人,然 則不爲利 若武仲之智 有餘地矣。 回,見危授 未可謂 不 之 口 又

義,則不欲者斯能 斯能之; 之成人何必然? 禮樂,則亦可爲成人而 人,其具體者 楊曰: 久要不忘平生之言,則忠信者 也。 得其 故有四子之才, 之, 則所 體,不可爲成 已,尚非其至也。 與 見危授命, 又下矣。 而文之以 見利 則 人, 勇 者 思 成

然」,今據補,明抄本作「樂而」。 此 原爲墨 釘, 和 刻 本、四庫 紫陽

三八〇

意。」 於成人 以 亦 知 圃 之爲文,「敏 之。 知 不足爲成 有欲,雖知如 則 蓋世 無自 何也?」曰: 之列,非 雖 或問: 道 未 而 而 人。 衰 能 人德矣。」 微 [好學,不恥下問」亦謂之文同 文 武仲,勇如卞莊,藝如冉求, 所以與 一之以 前 「不欲者成人之質也。 而仲尼之言 責 禮樂, 雖 人 人爲善也 有其質,不先於致 以 備 亦 不欲,必先之 則 可 以 人 與 將 爲 文 自 成 Ŧ

以爲 孟公綽 踐 M 形 心。」能 信義 子問 成 兼此 尹 人矣。 _日 守之篤 公叔文子於 四人之長,而文之以禮樂,則亦可 : 盡 夫成人者也。 此三者,又可以爲其次矣。」 孟子曰: 臨利無苟得,臨 , 卞莊子行之勇, 冉求藝之 公 明 『唯聖人然後 臧 賈 日 武 難無荷免,言 仲知之明, 「信乎, 미 以

> 笑, 人不 其然? 義然後取,人 其言 豈其然乎?」 不 然 厭 後 其 笑, 取。」子 不 日 厭 其

其 充溢於中,時措之宜者不能,故夫子謂 人之事有 能 中理,此君子之成法也。 和, 和者天下之達道也。 然乎?」 知之, 敬曰: 范曰: 謝曰:「公叔文子當時賢者,恐於聖 未足耳。 喜怒哀樂 「豈其然乎?」疑之也。 如公明賈之對,非 發 公叔文子未必皆 公明賈之言 III 後中節 禮 無 謂 不 之

辭 其非,故曰: 公叔 以 語之。 楊曰: 文子所及也。 「公明賈之言,其義 『其然? 君子與 豈 其然乎?」爲疑 人爲善,不 則是,疑 E 非

● 「謂」下,四庫本無「之」字。

■「後」,四庫本、公善堂本作「皆」。

❸ 「知」,四庫本作「如」,和刻本校云:「知」疑「如」字。

日

以告者過也。

夫子時然後言

乎?」公明賈對

夫子不言,不笑,不取

侯曰:「公明賈之言,恐有溢美,故夫

子曰: 『其然? 豈其然乎?』

事也。公叔文子未必能至於此,故曰:尹曰:「如公明賈之言,則是成德之

子曰:「臧武仲以防求爲後於魯,「豈其然乎?」未許之也。」

雖

曰不要君,吾不信也。」

正之。」 也。 武 君,非己所得專也。而據邑以請,見利 義,是以陷於大罪。 (仲之邑,受之於君,得罪出 時人或以武仲存其先祀爲賢,故夫子 范 日 「要君者無上,罪之大者 此 由 其好知 奔,則立 不 一後在 好學 而 也。

立爲後,蓋亦不得不然。知則知矣,而非臣立爲後,蓋亦不得不然。知則知矣,而非臣奔齊,則其居防以請,必有恃而敢然。魯之奔齊,則其居防以請,必有恃而敢然。魯之以則王動之之謂要。武仲迄

楊曰:「臧武仲如防,卑辭以請後,其

亦《春秋》誅意之義也。」迹非要君者,而意實要君焉。故夫子言之,

求後於君,非要而何?」 侯曰:「人臣之事君也,君命之而已。

也,故夫子正之。」 一句。不知義者將以武仲之存先祀爲賢於是魯立臧爲焉。夫據邑而請立,非要君於是魯立臧爲焉。夫據邑而請立,非要君於是魯立臧爲焉。夫據邑而請立,非要君於是魯立臧爲焉。

而不譎。」

其所執之事正。故人但稱其伐之正,而不至於楚而伐之,責其職貢,其行非正也,然本心,是以譎而揜其正也。齊桓本侵蔡,遂本心,是以譎而揜其正也。齊桓本侵蔡,遂本心,是以譎而揜其正也。齊桓本侵蔡,遂不正也, 懼其不能,故譎而行之,召王就子,正也, 懼其不能,故譎而行之,召王就子,正也, 懼其不能,故譎而行之,召王就子,正也,以誤戶》云

王,而 世之 爲 Œ, 勤王 日 見 戒。 人 其 一發其 慎 行 「此爲作《春秋》而言也。 其事則 齊桓公伐 正者,正行其 所 事 心迹, 舉 之本 而不知召王之爲不 而 正,故正 不 使 譎 一楚責 失 晉 也, 立文勤 事耳,非大正 其 包茅,雖 揜其譎。 是 E 以 也。」 王之志 E 順,故 而 其 晉文公實有 孔子言之以 心顯,且 揜 心 又《語 也 其 未 譎 譎 使後 必 揜 録 也 猶 尊 其

一种之仁,止以事功而言也。」

所行 桓公 桓 心 夫苟有善心,必 心 桓文之事,人君可不慎其所行也?」 公心非不 ,聖人貴之,故周公稱祖甲列於三宗。 善,未之 ĪĒ. 范曰: 不正,是以 心 而 譎 行 譎,召王是也,故終之以 而 · 譎也, 聞也。 行正,伐楚 「此爲《春秋》而言也。 爲譎。 行正 圃 晉文公心非不 事; 所 初 行復 是也,故終之以 雖不善, 行不正,而 Œ ,是以爲 其後能 · 善 譎 晉 也 文公 一,而 一我 Æ Œ 改 齊

直,小白直而不婉。」」 謝曰:「張先生謂:『重耳婉而不

此特假 仲 齊桓 召也。 之誠心,而 而 朝于王 春秋》書曰: 稱 不 知 如 楊 公責楚以包茅不入,故其 紅其仁同 又書曰 以臣召君不可以訓,故曰 ,蓋不與其以也。 日 之,彼善於此 其事則正矣,故曰正而 「晉文公召王, 義。」 : 『天王狩于河陽。』蓋 「公朝于王 mi 已,非至 文公有勤王之心, 所。」言諸 以 有夾輔 諸 E 譎而不正 不譎。 也,與 侯 不 見, \pm 與 室 其 而

也 心 蔡 以 人 諸 見其 本 譎 侯 懼 譎,而 聖人發其心迹,顯晉文勤王之志,且 以 尹 而 其不 召王之罪,而不 日 掩 朝 其 E 義也,因伐楚而責其 其 也,懼: 「臣師 正 所 也。 執 其 者 程 齊 不 Æ, 頤 ·明其 桓 能 日 是 公本怒蔡 0 圃 欲 以 召王就見之。 朝之本心,是 「晉文公欲 īE へ職 面 貢 姬 掩 而 其 其 使 用 率

慎其所行也。」」後世之君知所行之不正則無以明其心,堂

一年不死。」曰:「未仁乎?」子曰: 管仲不死。」曰:「未仁乎?」子曰: 管仲不死。」曰:「未仁乎?」子曰: 一年公九合諸侯,不以兵車,管仲之力也。如其仁,如其仁。」子貢曰:「管仲相桓公,霸死,又相之。」子曰:「管仲相桓公,霸臣,一里天下,民到於今受其賜。微管仲,吾其被髮左衽矣。豈若匹夫匹管仲,吾其被髮左衽矣。豈若匹夫匹

者也。 口 故 也。 相對 仁也。 伊川《解》曰: 仲之於子糾,所謂 而言,謂不死之不仁,未如以九合之 「齊桓殺其弟以反國。」 桓公兄也,子糾弟也 九合,仁之功也,謂管仲爲仁人則 「子路以 可 時 以死; 相 ·薄昭《與淮南厲王 去 不 一尚 死爲不仁, 可以 近,當知之。

也?

書曰: 之雖 仲私 以 瀆 日 自 之甚,敢萬世反覆不忠之亂乎? 計其後功而與其 之,則管仲與 非以不正而舍之也,直反覆而背之耳。若 者,蓋非齊人已盟立之,而又殺之也,齊人 書曰: 『公伐齊納糾。』《左氏》誤多「子」字、《公》、 已,所謂莫之知也者,不復能知權其重 與之同死,可 桓弟而糾兄,管仲所輔者正,桓 《穀》之言是也。 免而期後功,亦可也。 無死之義也。考之《春秋》,桓公之人也, 而莫之知也?」匹夫匹婦執信,知其 過,而糾之死 其 『豈若匹夫匹婦之爲諒 介所事 『齊小白人于齊。』魯之納子糾也,● ,輔之以争國,非 後書齊人取子糾殺之。言子 也, 桓公乃不可同 (事桓,聖人之言,無乃害義 實當。 知輔之以爭爲不義,將 故聖人稱其功,而 仲始與之同謀,遂 世之讐也。 義 也,自經於溝 也。 奪其國 m 殺 而

「也」,四庫本無。

糾弟。 伐 小白 糾 以 白 糾 也 死 見 而 亦 仴 桓公、子糾,襄公之二弟 子 门,以 死 之也 【齊納糾』,去『子』,明不 于齊」,以國 義言之,則未可死。 小白 義 言 奔 無矣。」 觀 魯。 糾 長而當立 之所當 而 無 正 無此, 少犯長,又所不當立,義已 其 從 殺之,此復稱子者,罪齊大夫既盟 襄公死,則桓公當立,此以《春 殺子糾 死 否 九 小白 之,殺兄之人,固 爲 合諸 又曰 也。」 或問: 則 可 貪生 ,管仲以所事言之, 一,子糾 耳。 繋者, 人齊,既立 . 侯, 子 又《語 一惜死, 後 「齊侯 貢 「桓 不以 明當立 少亦欲 人 所 故《春秋》書『齊小白 一公殺 能 知 也。 ,仲納子 録》 當立 雖 死 兵 可從 也 也; 立。 車, ()諸公子皆出。 匹夫匹婦 日 公子 其 桓 也。 故 本末, 公兄,而 乎?」曰 管仲奉子 乃 不 糾 夫子 則 糾 又書『 「管仲 知其 以 至 順 可 秋》 之諒 管仲 齊 抗 死 然 答 人 後 而 公 既

死。 糾, 事子 管仲 《公》、《穀》並 以 之 之不 非 事之,失於初也,及其敗也,可 亦 又殺之,故書 者,齊大夫嘗 獨言「子糾」, 日 不正也,終從於正,義也。 有 太宗,可 義 不 也 而 齊 死,權其 與 糾 也。 國 改之,義 如其仁,蓋言其有仁之功。 而不稱『子』,不當立者也。 當 人同 如 也 有 謂 所事 春 其仁。」 如 齊 秋 害於義 事 魏徵、王珪 於子糾 也,不言子 宜 也 子,是二罪也。 與 誤 注 非 而 書 魯盟 也。 口 死 正 四 謂 桓 矣。」 以 召忽之死, 之,理 處皆書『納糾』,《左傳》 然書齊 公 其 , 則 《春秋》書 一于蔇 無 則 有 不 死 止 也; 日 仁之功 也。 又曰: 死建成 既 召 非 日 人取子糾殺之 『糾』,不言 齊 君 管仲 正也 納 以死,可 忽 故 知始 之嗣 小 『公伐 不 糾 仲 之 也 不 管仲 白 3 負 始 以 當 仲 難 尼 爲 子 所 事 稱 之 以 齊 其 尼 而 立 糾 也。 事 爲 又 無 納 初 面

害義 之功 其死不死之是非,而 此聖人言語抑揚處,要當自會得。」 大功,聖人豈復稱之耶 仁,此甚小却管仲,故孔子言其有仁之功。 幽之道。只爲子路以子糾死 仁,稱管仲以仁,何也 理 也 孔子 也。」 使管仲事 稱 或問 管 仲 子糾 . 止 如 ?! 日 稱 ? 其 「孔子未嘗許 正 其後來之功, 仁 若以爲聖人 加 : 管仲不死 不死, 「此聖人 但 稱 後 其 爲未 人 不 則 雖 有 闡 以 甚 觀 有

大而 管仲之不死,而 之義,豈 不足爲,非管仲 侯,一正天下,●此仁之大也。 路、子貢責之以義,而夫子稱其仁。 公不爲 范曰: 不責其細, 可以易此 利 「管仲不 一所以 責 取其多而 所 其 哉? 難 爲仁 不 位,故 死子糾而 知 聖人之於人,責 不 也。 禮 不 死 取 不爲苟生,而 死於子糾,有 其少,故不 彼死於子 相桓公,子 九合諸 責 其 糾

謝 日 「不死 未足 以見 管仲之仁,

> 合諸侯 待。 Ė 死 故與 非 不以 不 知 匹 桓 也。 夫 兵車,民無左衽之患,則仁 一公可 兀 當是時,於子 婦 以 感慨自殺者異。 有爲 也,而 愛其 君 自 死 臣 可見 其 以 之 九 有

未

不

也。 也。 其 《公》、《穀》皆曰: 糾」,『齊小白人於齊』。《左氏》曰 相之,又射桓公中鈎焉,則濟惡以 不稱子,又不繫之齊者,外之不宜有 以齊繫小白者,明小白之宜 出奔,故《春秋》不書子, 罪 取子糾而 及其敗亡也,又烏得而讐桓公哉? 不宜有齊而人之,是爲 楊曰 而請囚焉,聽 . 殺之,則已甚矣,故卒書曰「齊 糾 「納糾。」其義當以《公》、《穀》爲 與 小白 命 於 齊 未嘗 而 書曰『公伐 有齊者也, Œ 亂 爲世子 也。 而 : 「納子 成成其 己。 桓 , 齊 亂 管仲 齊 而 Œ 者 納 者 糾 俱

⁰ 正,四 本 按原本作「正」者, 蓋避 宋 太

仲,何 素問: 遇 子路必不肯恁地 下,子路等未必能 故孔子不斥言其 而 射桓公、出於其私焉、則義之所必誅、尚得 遇之又不得以爲罪,義固然也。 主而已。 以無死矣。 分言之,蓋 管召之於糾 敢貳哉? 子在外,先入者得之。 取 得禽,雖若丘陵弗爲也。」又問: 傷 相之乎? 而 子 勇,管仲不死爲徙義。 與其不死也。 也?」曰: 糾 「孔門弟子皆不許之以仁,獨許管 故管仲處之不自以爲嫌,②而 殺 其射桓公也,非 可 可以 之。 ,既嘗相之,委質爲臣 若召忽之死,是亦志仁而 以死,可 死 做,學之爲王者事 非, 0 爲之。 也,然 方齊之未有君也,諸公 管仲九合諸 書子 謂其 人臣各爲其主用,烏 以無死,故召忽 然路 而 無惡故也。」 所 爭非 有私焉,忠於 孔子所以 以 徑自 惡 侯, 其 使管仲之 齊 別,若 一矣,以 久 也 那 匡 桓 稱 死 則 仲 詭 使 天 其 其 之 可 其

> 功,而 臣 子貢之所知,故夫子之答,獨言其可以不死 權輕重者哉?」《春秋》書威公之人也,曰: 義,將自 之,仲與之同 也,不當争。 也。」九合者,仁之功也,非以 仁,故子曰: 見 奢,皆是詭 公伐齊納糾。」威公、子糾之正 齊小白人于齊。」書魯之納子糾 它 師 尹曰: 程頤曰: 詭 遇 勉 處 遇。 以 「豈若匹夫匹婦之執信,不 ? 期 管仲輔弟以 「子路以管仲不死子糾之難 死 『不死之不仁、未若九合之仁 且賺得 後功亦可 亦 「威公兄,當 日 可 也 人手 ; 君 也。 淫 争國,而 ,做將去不問。 知 文 亦 仲爲仁人也。 輔 故孔 淫 否,❸子路 之 也, 爭 子 威 子糾弟 君 公殺 曰 爲 復 稱 奢 知 其 亦

0

[「]取」下,四庫本有「公」字

[「]故」,四庫本無。

原本作「威」者,蓋避宋欽宗趙桓諱。「威公」至「正否」,四「威」字,四庫本皆作「桓」。按:

反覆不忠之士,雖有後功,何足道哉?』」焉。使管仲所輔者正,而不死其難,則可謂

公。子聞之,曰"「可以爲文矣。」公叔文子之臣大夫僎與文子同升諸

可謂仁矣。文者,仁之著見于外者也。」仁,文子無心於貴賤彼己,而唯賢是與,范曰:「臧文仲下展禽,夫子以爲不

·以上賢,此所以爲文。」至也。物相雜故曰文,不專於貴貴,而雜之日曰:「與家臣同升而無嫌,上賢之

才,謂之文,《謚法》有如此者。」謝曰: 「無媢嫉上人之心,故能舉賢

楊曰:「尚賢而有禮,斯可爲文矣。」

肖,所以文之也,故可以爲文。」 侯曰:「物相雜故曰文,能進賢退不

與之並列,孔子許其文。孟子曰: 『不祥之,孔子謂之竊位, 公叔文子舉其家臣,尹曰: 「臧文仲知展禽之賢,而不舉

之實,蔽賢者當之。」亦猶是也。_

治賓客,祝鮀治宗廟,王孫賈治軍旅。如是,奚而不喪?」孔子曰:「仲叔圉子言衛靈公之無道也,康子曰:「夫

夫如是,奚其喪?」

雖未可以致治,然事亦無廢滯矣。」未必優,而其才可使也。靈公能用其所長,謝曰:「仲叔圉、祝鮀、王孫賈,其德

焉,故雖無道而不喪。」 楊曰:「官得其職,則紀綱法度猶存

道,紀綱存焉,奚其喪?」 侯曰:「官得其人則政事舉,君雖

「使能」,四庫本互乙。

三八七

競 君,能用天下之賢才者乎? 用 維人,四方其訓之。」 此三人焉,猶足以保其 尹 日 「衛 靈公之無道 國。 \sim 一,宜 詩》曰: 而 喪 況有道之 也, 「無 侕 能

子曰: 「其言之不怍,則爲之也難。」

伊川曰: 明道日 「所爲言之不愧。」 「能言不作者難。」

.

言之必可行也,行之必可言也。 之不慚,則爲之必難矣。君子之言行相顧 無愧,言不過實,可履而行,此所以爲難也。」 范 日 「内有其實,則言之不慚, 有諸己則言

作而 與爲道。」 不作, 謝曰: 則寡廉鮮恥,何所不至? 故難 「爲不善者,言之亦怍,言之可

不慚者,必未能爲之也。」 則 爲之也難矣。此古者所以言不出 楊 尹 日 日 能 「其言之不怍,而行欲必揜焉, 爲者不 敢輕言 也。 其言之

> 明道曰: 公日: 從大夫之後,不敢不告也。」 者。」之三子告,不可。孔子曰: 後,不敢不告也。 陳成子弑簡 告夫三子。」孔子曰: 「陳恒弑其君,請討之。」公曰: 「陳恒弑君,夫子請討。 孔子沐浴 君曰: 「以吾從大夫之 而 「告夫三子」 朝,告於哀 以吾

弑 一事正 可爲處便爲。 且,及其末世,並其法壞之,亂甚於魯,故其 之法。齊旣壞大公之法,後來立法已是 何 於臣,父聽於子,動即弒君父,是不可 居也,必變而 亦先於魯。 以孔子雖小官必仕於魯? 伊川曰: 一,則 百事自已不得。 後可。 孔子之仕於魯,欲以爲兆,得 如陳 「孔子之時,大倫亂矣,君聽 恒 魯有三桓,無以 |弑其 君,孔子請討之。 \wedge 傳》言以魯之 只是修周公 朝朝

當時得行,便有舉義爲周之義。」

時夫子已去位矣。」

又曰:

「孔子請

半。 恒 子,下有方伯,須謀而後行。」 天下大計可立而遂。孔子臨老,有此一件 聖人以力角勝,都不問 孔子只待去較力。 孔子必有處置。 齊,以弑君之事討之,當時哀公能從其 |弑其君,孔子沐浴 伐 好做,奈何哀公不從其請 孔子之言,謂「陳恒弒其君,民之不與者 齊之半,此非孔子請討之計,如 以魯之衆、加齊之半,可克也」,恁地 須是顏回使周,子路使晉, 借使言行 而 朝,請討之。 義理也。孔子請伐 可惜。」 又曰 則 亦上 ^②左 是, 「陳 有 氏》 是 天 則

得 焉,從大夫之後故 世 其 其 臣 丽 强 義 范曰: 皆以爲齊不 誅之,而齊强魯弱 故告于君,又告于三子,不可 則 而 强 E 矣。言而不行, 「孔子老矣,國有大事,必告 其義則弱。 可伐。 也。 臣弑其 常困 孔子所言者,義也, 使魯能用 則 於齊,故魯之 君者,天下皆 明其義以示 孔子, 則 止

事

也哉? 蓋欲仗大義以

ト天意。」

名,戰必克矣。夫子沐浴而

朝、豈止盡

告在 死十年,陳氏三弑其 政 子子。』景公之時,已無君臣父子矣,故景公 於孔 夕之故哉?」 子,孔子對曰: 加 行之者 在 君 君,遂滅齊國,豈一朝 『君 與 相 君 也 臣 齊 臣,父父, 景公問

弑簡 征 其憂不足以 加兵,畏非敵故 葛伯之舉也,何患天下之無 公,雖人心所不甚與,而魯之君臣不敢 吕 謝 E 日 霸諸侯,一 「使魯從孔子 當是時,齊 也 能 順人心,行天討, 天下乎? 强 而 一魯弱。 助 討 乎? 陳 恒 師 陳 出 吾職 成 則 有 子 湯

曰: 諸 沐 國之政,故 侯 浴 楊曰: 也 而 『天子討而不伐,諸侯伐而不討。』魯 後朝 而請討之; 隣 者,國 「孔子從大夫之後,則 有賊,義當討之,不敢 有大事,敬之也。 蓋當是時 周 雖衰微 與謀其 孟子

業之興其基於此矣。 之命討之,則周之威令將復 從之,則孔子其使於周 天下猶以爲君也,征 也,庸非天乎?」 伐宜 魯之君臣皆莫之從 而 自天子出 請 行於天下,而 命乎? 以 使 天子 魯 君 E

將正 《左氏》謂孔子欲以魯國之衆加齊之半,誠 復興乎? 行其志,則天下將知畏而有所不敢,東周其 天下之亂極矣,因是足以正之。 周,率與國而討之。至於所以勝齊者,孔子 如此說,是以力不以義也。若孔子之志,必 也,故有大事,義必告焉。 事也,豈計魯人之衆寡哉? 當是時, 名其罪,上告天子,下告方伯,請命於 尹曰:「孔子雖去位,以其嘗爲大夫 魯之君臣終不從之,可深惜哉。」 臣 師 使孔子得 程 頣 日

范曰:

「古之事君者,勿欺也,而犯

不欺爲難,故夫子教以先勿欺而犯也。」欺,是以有過必犯。犯非子路所難也,●而之, 後之事君,勿犯也,而欺之。 夫惟不

謝曰:「事君有犯而無隱。」

之,謂非誠不可也。」 侯曰:「事君以欺,非臣道也, 犯佞,故其問事君,則告之以勿欺而犯之。」 楊曰:「孔子嘗以由爲行詐,又以爲

人爲不善,只有下達。」 伊川曰:「君子爲善,只有上達;子曰:「君子爲善,只有上達;

小

者與?」 「上達反天理,下達徇人欲

范曰:「君子喻於義,小人喻於利。

● 「子路」下,四庫本有「之」字。

學問之道,所以爲上達也。」智,下達入於下愚。君子愈上,小人愈下。可鄙,下賤之事,小人所達也。上達入於上道德仁義,高明之事,君子所達也, 勢利

乎汙下。」 日曰:「君子日進乎高明,小人日究

去遠矣。蓋事盡然。」畫與孔子去魯之事,攻衆人之論髮,●其相畫與孔子去魯之事,攻衆人之論髮,●其相謝曰:「大受小知之別也。以孟子出

至於爲跖,非下達歟?」 孜孜爲善則爲舜,非上達歟? 孜孜爲利, 楊曰: 「君子小人之分,善利而已。

人。」 子曰: 「古之學者爲己,今之學者爲尹曰: 「達者,達盡事理之謂。」

曰:「古之學者爲己,今之學者爲人, 古也, 爲人,欲見知於人也。」 又《語録》伊川《解》曰:「爲己,欲得之於己

或問: 却。」 者將以 能及人。 之仕 成物, 今之學者爲人,其終至於喪己。」 者先須要仁,仁所以愛人。」正是顛倒 要爲己,是要爲人?」曰: 者爲人,今之仕者爲己, 又曰:「古之學者爲己,其終至 行禮,今之强有力者將以 「古之學者爲己,不知初設 初學只是爲己。鄭宏中云: 『學 「須先爲己,方 古之强有力 爲 心時,是 亂。 於 說

之學,所以行堯之道,非徒言而已。」爲己者履而行之,爲人者徒能言之。人君也,後之學者,病人不知,所以爲人也。范曰:「古之學者,正心誠意以爲己

知則不修。」 爲人者,人不用則不學,人不知而不悔, 爲人者,人不用則不學,人不見可。 「爲己者自信而已,遯世不見

特非爲人而學故也, 若止於愛己,則楊氏謝曰: 「爲己非不爲人而專於愛己,

❶ 此句原本存疑。按明抄本「攻」作「攷」。

之爲 我耳

之於天下國家乎何 下,若固有之。爲人之學反是。」 與木石居,鹿豕遊,若將終身焉,及其有天 楊 日 爲己之學,格物致 7有? 故 舜 在 知 深 圃 Ш 之中, 已,推

後可 之學也。」 以推 尹 曰: 而 及人也。爲人而學者,非務本 「學者本於爲己,修己旣至,然

玉

焉,曰: 子欲寡其過而未能也。」使者出。 蘧伯玉使人於孔子。 「夫子何爲?」 孔子與之坐 對 日 日 而 「夫 問

使乎! 使乎!

能 君 矣。」 寡其過,益莫大焉。 范曰: 「君子之患,在於未能 爲人使如 此 寡 可 以 過; 事

化 有欲言人之賢,而未知所 稱, 謝 必習矣 日 : 「蘧伯玉以『行年 而 察、 欲寡 以 其 言者 過 六十 者 彻 使者 丽 六 世 以 煮 +

> 乎? 此 故夫子善之。」 稱 伯 楊 使者對 玉 一,亦可 「欲寡 之無 謂知言矣,故夫子與之。 、溢辭, 其 過,非克己能如是 而 伯玉之賢益彰

則其 也。子曰: 者以此言之,則知言矣,故夫子稱之。」 也。」 ! 尹 曰: 侯曰: 爲人也,欲寡其過 邦有道則仕,邦無道 「夫子 「語謙卑而事美,善稱其主 使乎 嘗 E : 使乎! 而 未能 則 君君 可卷而懷之。」 一稱其 可 子 知矣。 哉 專對之 遽 者 伯 使

善 子曰: 「不在其 位 一,不謀 其 政。」 曾 子

日 「君子思不出其位。」

臣 天 不出其位」,此《艮》之象也,物各止 子所常言也,弟子各以所聞記之。 上下大小皆得其職也。」 下 之理 范曰 : 得 矣。 「『不在其位,不謀其政』,亦夫 故君子思不出其位,而 『君子思 其所, 而

謝曰: ·止其所也。」

分守,而侵官亂政將無所不至矣。」 楊曰: 「思其出位而謀其政,●則失其

之同也。」 尹曰: 「曾子之於孔子,可見其志意

子曰: 「君子恥其言而過其行。」

欺,是以可恥。」 謝曰: 「行不掩言,非直欺人,亦以自

此。」 楊曰: 「故君子欲訥於言而敏於行以

所 以恥其言之過其行也。」 侯曰: 「言之不怍,則爲之也難,君子

子曰: 尹曰: 「君子貴實行而恥虚言也。」

不憂,知者不惑,勇者不懼。」子貢

「君子道者三、我無能焉。

日 「夫子自道也。」

伊川日: 「仁者不憂,樂天者也。」

范 E : 「聖人責己所以勉人也。仁者

> 德之序也, 力行近乎仁,知恥近乎勇。」知、仁、勇者,入 獨立,故不懼。《中庸》曰: 樂天,故不憂, 仁、知、勇,成德之序也。」 知者窮理,故不惑; 「好學近乎知, 勇者

天下之達德,故夫子不居。」 謝曰: 「君子之道不出此三者,所謂

之名亦泯矣。」 子自道也。』蓋言其所自者道,則仁、知、勇 不居,故曰: 楊曰: " 『我無能焉。』子貢曰:『夫 「三者備,蓋聖之事, ●孔子所

侯曰:「智、仁、勇三者,唯聖能盡之,

故孔子不居。」

子貢曰: 此乃夫子之事也。● 尹曰: 「我無能焉,自責以勉人也,故 成德者以仁

當作「出其」。 「其出」,明抄本作「出其」。和刻本校云。 「其出」疑

聖」下,四庫本有「人」字。

之」下,原衍一「之」字,今據四庫本删

爲先,故先之以仁者不 則 以 知爲先。夫子之言,其序有不同。」 · 憂; 若 夫進 學者

子貢方人。子曰: 「賜 也賢乎哉?

夫我則不暇。」

以 不暇。 抑 其 伊 (方人。) 川 而 又問 日 「子貢常方人,故孔子答以 日 「女與 回 也孰愈?」所

賢 暇,然則子貢爲不可也。」 人之所難,而聖人之所不爲也。夫我則 范 日 「人不 可以 利同,●故方人者,

方 人者,故知所先 吕曰: 「方人非不謂之學,然有急於 後,則近道矣。」

但 意 已獨 爲己者非 謝 至。 目 所先也,故曰 方人非智者不能,謂 「聖人責人,雍容辭不 我則不暇。」 之賢 迫 亦可 切 而

於方人乎奚暇?」 楊曰: 「孔子於三人行則得我師 焉

侯曰: 「方人則近于作聰 明矣,非篤

0

我則 不可謂之惡,然非賢者所急也 實 爲 不暇。」 尹 日 者所先,故 「方人者,比方人之優劣也 日 夫 我則 一,故曰: 不 暇 可固

子曰: 也。」 「不患人之不己 知,患 其 不 能

其外 不强 堯舜之譽,何患人不知哉?」 其所不能。故莫若反 范曰: ,則充實而 「學者莫不患人之不己知, 有光輝矣。 諸 能 己,而不願 爲 堯舜 則 平 而

己。」

謝曰

「求爲可知也。」

楊日 患其不能, 則亦求 爲可 知

而

所 侯

患 也。」 日 反 君子修己 求諸己,不 而 已,人知不知, 願 乎外也。」 非

利」,賀云。 子 「利」疑「科」字之誤。 逆詐,不億不信 ,抑亦先覺

者,是賢乎?」

伊川曰:「人以料事爲明,便駸駸人

逆詐、億不信去也。」

詐 故 信者,心之僞,故君子不爲也。」 未然也。 先覺者 范 待人以誠,故不億不 邪正是非、安危治亂,未嘗不覩 日 先覺者,知者之事; 「君子 是爲賢乎? 可欺 以 信, 君 其 子 逆詐 方, 見 雖 幾 故 不 m 而作, 逆不 不 之於 億不 逆

與不信加乎己。」
 母事幾之先,不容詐不知其不信,不億度人之不信也。雖然,君不知其不信,不億度人之不信也。雖然,君

先覺 欲 先 逆詐 覺 也。」 如如 謝 億 日 履 不信,則過矣,蓋未知先覺之所爲 霜 可 「賢者於事能見之於微、 以 知 堅 冰 也 不知者 遂妄 謂 之

楊曰:「君子一於誠而已,惟至誠可

抑 以 人所欺焉 前 亦 以 知 此是賢乎? 不逆詐, ,斯亦不足觀也已。」 不億不信,而 若夫不逆不 億 常 先覺 圃 卒 也 爲

寧能爲賢乎? 或時反怒人。』此理是。」 侯曰:「孔注云:『先覺人情者,是

其 不 明。 億 度 尹 日 而 惟能先覺之,是賢也。」 . 不 信之也,然而情僞 「賢者之於事,不逆詐 幾 微 無 以 測 所 逃

與? 無乃爲佞乎?」孔子曰:「非敢微生畝謂孔子曰:「丘何爲是栖栖者

爲佞也,疾固也。」

横渠曰: 「栖栖,依於君也。 固,猶不

口

也。

反之於堯舜三代,此豈微生畝所得知哉?」范曰: 「夫子疾世之衰,欲行其道而

謝曰:「猶言吾豈匏瓜也哉?」

·非敢爲佞也。」卑辭以對,則微生必鄉黨之楊曰:「微生名孔子而語之,子曰:

三九五

固,其 有 德者。 、晨門、荷簣之 以 栖 栖 徒 爲 敷 佞 ? ൬ 故以「疾 不 知 執 一之爲 して

之固 也 知聖人者也。 [陋也 尹曰: 固,陋 也。 微生畝之流,皆與聖人異趨,不 栖 君子之所爲,衆人固不 孔子所以 栖,猶皇皇也, 栖 栖 者,以 佞, 疾 П 識 #

子曰:「驥不稱其力,稱其德也。」

才

而

無德,則

亦奚足尚哉?」

也; 之用 用 者所 爲德矣。 無德之人乎? 才而 受於天,德者所習於人。 范曰: 人而不學,則其所受於天者,不足 人雖 乘驥 敗 有才而無其德,則不可用。古人 者,取 而不以德,必有奔車之敗,況 其力 有 力 脯 m 不 無 取 其 學所 其 德 德 以 則 也 不 成 以 德 可 力

向學之功,不以受於天者爲貴。」 日曰:「才受於天,德繫乎學,故君子

稱 有 才, ? 謝 E 惟其 不 免 無德,是以必爲 爲 有 小人。 德 然 後 自古姦 可 以 天下 語 雄 才 禍。」 何當 不 無 以 德

尚 德 侯 楊 乎? 日 日 . 所謂君子者,德 驥不以力稱,況君子 也,力 而 奚 可 以 與

不

才

丽

尹曰:「驥雖有力,其稱在德, 人有?」

焉

「何以報德? 以直報怨,以德報德。」或曰: 「以德報怨,何如?」子曰:

爲也,以直報怨者,天之理也。」無私於物,物亦無怨焉。以德報德者,人之無私於物,物亦無怨焉。以德報德者,人之

以避怨惡之名者。蓋其心不在怨惡,誅之無以怨報怨之理,惟不若世之要譽强仁,苟德報怨,亦不直矣。君子於人,無怨也,故謝曰:「以怨報德,固刑戮之民,然以

不直乎?」亦可,所謂直也。求不報之名而不誅者,其

惡,而 德,非 是,則以 者,公天下之好惡,而不爲私耳。」曰: 也。 子,不亦可乎?]日 欲,能不少有委曲,如庾公之斯之於子濯 我,不幸 若姑息, 怨報怨,以德 楊 姑 不 有私 日 則 息之謂也、●亦盡其道而不爲私耳。 德 爲 而 報德 不 滴 私焉,夫是之謂直。」 焉,曲 能 遇 以 無 所 報 德 何以辨之?」曰: 在 私矣。」曰:「人有德 : 當 怨、皆非 報怨,以怨報德, 其 施之者,非吾意之 中矣。公天下 直也。 「所謂 所謂 又 皆 之 如如 日 孺 所 於 私 直

彼, ②我 怨報怨,非 ,以直報怨,理之順 侯曰: 何與焉? 君子之心也。君子以謂 以德 犯 報 也。 而 怨,非所以 不 校可 也 報 也; 得 以 德 失 在 報 以

尹曰:「君子之用心,公而已,或怨或

德,非有矯飾,盡其情而已。

天,不尤人,下學而上達。 何爲其莫 日 莫 知子也?」子曰: 我 知 也 夫?」子 知我 者 貢 其 不恕 日 天

乎?

心約 也。 學 日 元不 於是,顛 上達,無 而 之,使反復入身來,自能尋向上去,下 上 相連屬,但有間 明道 曰: 達也。」 又曰: 聖賢千言萬 下學,然則 沛必於是。」 自自 「下學 語 其 下 斷,則 , 只是欲 上達處,豈 加 而 又曰: 上達者,唯 上達, 非 道 人將已放 意 也。」 有 釋 氏 造 在 是 唯 次 也 必 表 ? 務 又

或曰:「古之教人,必先於灑埽應對進退,乃學之要。下學人事,便是上達天理。」伊川曰:「學者須守下學上達之語,

「也」,四庫本無。

] 「謂」,四庫本作「爲」。「爲」通「謂」。

「王通 因緣 夫惟 人。」王通豈 貢宜 不飲 於衆 賢之所以爲聖賢者,亦豈外是哉? 今夫 以 何 不尤人,下學而上達。 我知也夫」,夫子以此發子貢 與知 也 報 食 終身由之而 人者,以衆人習不致察,不 居 ? 可 「不怨天,不尤人,在理當如此。」 曰: 日 處 應之說 也,鮮能知味也。」 者,及其 與言也,故以 恭,執 知所 「知命者不怨天,自知者 下 ,要皆不知命者 至 事敬,雖衆 謂命者哉? 不知其道,故曰: ·學而 也, 雖聖人有 是發之。」 知我者其天乎?」子 上 達, 人能之,然彼 又曰: 也。『不怨天, 雖夫婦之愚 至 能 所不知 也。 如 上達耳。 又曰: 然卒異 釋 不尤 氏 也 有 聖 又 口

於不尤人,學之至 責己者當知 横渠 下學而治己,治己則無尤。」 無天下國家皆非之理,故學至 「上達 也。」 則樂 又曰: 天,樂 天則 又 困 丽 日 不

> 常也。 謂人 聖,而下學於困,則其蒙難正 於内無如舜, 知 『莫我知也夫?』『知我者其天乎?』』 必有人所不及知而天獨知之者矣。 變, 范曰: 有德慧術知常存乎疢疾 民斯爲下 困之進人也,爲德辨,爲感速。 「不怨天者,樂天也, 困於外無如孔 矣; 不 待 困 子。 志,聖德日 以 而 此。 喻,賢 以孔 故 自古 不尤 日 者 孟 困 子

則其所獨知,非聖人有所不與。」矣。下學而上達,則天人一矣。德至於是,呂曰:「不怨天,不尤人,則道在我

天也。」

性。

者,

知命也。下學所以窮理,上達所

窮理盡性,則可以知天矣,故知我者惟

一矣。 與 不 人爲 怨天 謝 無無 日 如此,則 ,則與天爲一, 「天人、物我、上下,本無 미 人雖 尤, 不我知,我其 無可 下學而 怨 上達,則 不尤人,則 自知

以

然見 斯達矣。下學而 自信,必待人證 天乎?」以天爲我也。 我 須先從理上學,盡 知我 與 道 天 者其天乎?こ 日: 與天爲一,故孔子曰: 爲一,謂之天 吾儒下學上 明 上達,其意 而 人之理,斯 知 後信。」 又曰: 佛氏不從理來,故不 亦 可。 一達,窮理之至, 如 盡天之理,學 『知我者 此,故曰: 或 問 「學 儒 其 自 佛

能 知也,故知我者其天乎?」 楊曰: 「天德之公,非以人欲之私 所

尤乎? 問 盡 事 也。」 性, ,而上達天命。 尹曰: 本無二 而 曰『莫我知也夫」,所以 一道也,下學而已,聖 「天人事理本無二也,下學人 自灑埽 應對 了,以至 人 發子貢之 何 乎 窮 所 恕 理

告,日 力猶 公伯寮愬子路 能 : 肆 「夫子 諸 市 朝。」子曰: 固 於季孫。子服景伯 有惑志於公伯寮,吾 道之將行 以

> 也 與, 也, 道 之將 廢 也

公伯寮其如命何?」

此 廢, 曰 : 則不怨天,不尤人也。」 有命,則公伯寮之愬不足恤 范曰:「不知命無以爲 『臧氏之子,焉能使予不遇哉?』如 君子。 也。 道之將 孟 子

其 實公伯寮無如之何。」 謝 日 「雖公伯寮之愬,行亦命也。

孔 子答以廢 楊曰: 興之命。 「子服景伯之言,蓋尤人 蓋聖人不怨天,不尤 八者,故

也如是。」

可 也。 侯曰: 公伯寮其如 「命,天理也,道之興廢, 命何?」

順天

而 已矣。」 尹曰: 「君子於利害之際,安之以命

子曰: 色,其次辟言。」 賢者辟世,其次辟地,其次辟

「辟世、辟地、辟色、辟言,非

有 劣 7,只說 大 小次第

事 3 伊 其次 ĴΠ 日 地 不居亂 賢者能遠照,故能 邦。 辟 世

形; 而 樂於中,與賢者其次者爲異。 速之殊也。辟世、辟地、雖聖人 地者,不懷居以害仁, 辟世者, 爲 聖。 心之所至者不同。」 横渠 辟言者,免害於禍辱。 聖與賢, 依乎中庸,没世不 日 「克己行法爲賢,樂己守 迹相近, 丽 辟色者,遠恥於將 遇 心之所至有差。 此爲士清濁 故曰迹 而 亦同,然憂 無 嫌 法 淹

不 又其 也; 有 世 或 可 敏 不見知 次也 與 有 之不可爲,不知一世之不可爲,其次 謝 不知 聖人 不 日 敏 而 君 「聖人 故 去就同 至言 不 也。 可 賢者 而後去,則亦晚矣。 以 不 然其 論。 有爲,禮貌 必 隱 居,則 遯 流 聖人 世,遯世 同出 人有禮 辟 於辟 衰 世 然後去, 也 者 貌 世,故 其識 衰 特舉 而 知

> 去, 謂 吾 不 能 用 而 行 者 其 道 異 此

隱也, 也,所遇不同 遠恥於將形也。」 辟言,雖 日 辟地者,不居亂邦也; 以 爾。」辟世者,舉世不見知, 大小次第言之,然非 臣 師 日 : 世、辟 辟色、辟 有優 則 劣

言 辟者,言逸民有此四者耳。」 逸之趣者七人矣,不須分此 也。」作者蓋 者也。仲尼曰: 面 謂之作者可乎? 而云作此道者七人矣。 子曰: 伊川《解》曰: 作於世 「作者七人矣。」 『雖有作者,虞帝 「七人,後章所 者, 蓋上承辟 謂王者 大概言作 四 目 也。 世、 也 辟 此 不 謂 地 逸 此 此 可 逸 民 民 四

於 帝、堯、舜、禹、湯,制法興王者之道,非有 人者也。 范曰: 横渠 曰: 伯 作者七人,伏羲、 夷、叔齊, 辟世者也, 神農、 述 虞 黄

是10° 朱張,辟言者也。 故曰『作者七人者也。 朱張,辟言者也。 故曰『作者七人仲、夷逸、辟地者也。 柳下惠、少連,辟色

是也 此, 是也 豈 辟言則僅 前謂 楊曰: ,故爲次, ,非遯世無悶 辟地,若陳文子有馬十乘,棄 逸者是歟?」 免禍辱 「辟世者,若伯 而已,斯爲下。 辟色謂 確乎其不可拔,不足 禮 貌 夷 衰則 待天 作者七人, 去之, 下之清 丽 違之 以 與

可而爲之者與?」子路曰: 「自孔氏。」曰: 「是知其不子路曰: 「自孔氏。」曰: 「是知其不子路宿於石門。晨門曰: 「奚自?」

異 也; 於逸民也。 范 知 日: 其不 可而爲之者,孔子 夫可 知其不可 不可在天, 而不爲 而 也。 爲 者, 不 晨 爲 所 在 以

> 不可,得不爲哉?」 未嘗遺天下。聖人亦不敢忘天下,雖知其己。聖人畏天命,故修其在己者以聽之天,

歟 孔子所謂 ? 楊曰: 無不可 「晨門知 也 其 抱關 不 可 擊柝,爲禄 而 己, 而 隱 不 知

恝然 必 以 有 斯文爲己任也。 哉! 以任 忘天下哉? 明 日: 侯 子擊磬於衛,有荷蕢而過 鄙哉, 徑徑乎! 日 之也 日: 深 「有心哉,擊磬乎?」旣 末之難矣。」 則 「天之生聖人也,豈 厲, 孔 聖人受天之付 必知天之所以畀付之意, 如晨門者,豈知此哉?」 淺 子 則揭。」子曰: 莫己知也,斯己 擊磬,何嘗 孔氏之門者, 與 偶然哉 也 無 而 日 心 豈敢 而已 於 果 ?

、更有難事,他所未曉,輕議聖人。」侯本云:「? 荷蕡知之。 果哉者,果敢之果也。不明道曰: 「孔子擊磬,何嘗無心於

世

知

「聖人何嘗無心? 荷蕡於此知之。」

不可與人堯舜之道,故曰 爲矣。夫爲一己易,爲天下難,自以 子爲硜硜。 恤其它,近於楊氏之爲我,故曰: 范 E 深則厲,淺則揭 「荷 費 ,獨善其身者也,故 果。 知其不 斯己而已,不 「末之難 爲 미 是 則 以 而 夫 不

微

謂

末之難矣,猶云終之難矣。」 區果於去就,不知聖人之仁無絶物之道也。 呂曰:「晨門、荷蕡,皆德之固也。區

矣。」彼其果於自信者,吾言未易入也,故 足詰難。」 辟世之士 門、荷蕢、雖不知孔子,其語 不知聖人樂天知命,有憂之大者。 日 與? 子曰: 「古之賢者多隱於抱關,如 「果哉! 末之難 亦 有 深 其 直 無 石

可而已。荷蕢以其有心譏之而不疑,蓋莫楊曰:「聖人之時,何容心哉? 當其

矣。」晨 之知 與?」與,疑辭也,則異乎荷蕢之果矣。」 而易其言 門 曰 : 也 一是 故 知 日 其 不 『果哉 可 뻾 爲之者 末 之 難

,亦豈難哉? 生畝之流歟? 故孔子曰: 尹曰: 子張曰: 宗,古之人皆然。君薨,百官總已以聽 年不言。」何謂也?」子曰: 於冢宰三年。」 「晨門、荷蕢,皆隱者也,其 「《書》云: 聖人之時中,蓋不爲耳。 「高宗諒陰, 果如爾所 「何必 高 Ξ 亦

之所言者,禮也。」故見於《書》。《書》之所記者,事也,故孔子禮皆然也。高宗免喪猶不言,言而得傅說,禮皆然也。高宗免喪猶不言,天子諸侯之

周公之於周,用是道也,又何疑焉? 後世冢宰,自古已然,君臣一體。伊尹之於殷,一也。人君當不言之時,百官總己以聽於任。 「三年之喪,自天子達於庶人

君不君,臣不臣,故高宗之事,雖學者亦以

爲疑。」

何嫌之有?」海爲職。則諒陰三年,使百官總己而聽焉,天子達。方其無事,而冢宰以統百官、均四天子達。方其無事,而冢宰以統百官、均四人。

,則民易使,其理然也。」 范曰: 「君者,天下之表也。君好之, 至曰: 「君者,天下之表也。君好之,

則

事上,故易使。」 楊曰:「上好禮,則民志定,而知所以謝曰:「進建而分定,則易使。」

也。民志定,則上下之分正,而易使也。」 侯曰:「禮者,所以辨上下、定民志者

子路問君子。子曰:「修己以敬。」下效之,皆在上之化而已。」 尹曰:「君好之則民從之,上行之則

其猶病諸?」「修己以安百姓,堯舜「修己以安百姓。修己以安百姓,堯舜安人。」曰:「如斯而已乎?」曰:曰:「如斯而已乎?」曰:「修己以

盛, 出。 則自 則天 施 夫」。」此一段前更有數語,在《顏淵篇》「仲弓」章。 有不至? 安百姓,篤恭而天下平。唯上下一於恭敬 爲 而終之以『微之顯,誠之不可掩 以此事天享帝,故《中庸》言鬼神之 地自位,萬物自育,氣無不和 有堯舜之事。」 又曰: 「君子修己以 乃能安人,此則自我所生。學至堯舜 伊川曰:「修己以安百姓,莫須有所 體信達順之道,聰明睿智皆由 ,四靈何 如此 德 此

越盡 子自謂 修己以安人。 病 諸 其 横渠 是 未能。 才以 知人能 日 勉馬 修己而不安人,不行乎妻子, 博施 「可欲可願,雖聖人之智,不 有 而 願 濟衆,修己安 己。 有欲,不能 故君子之道 窮 百姓,堯舜 其 四,孔 願

況可愾於天下乎?」

己以 故修己 也; 則 己則能 楊 思天下 萬物也 八難矣。 必 雄 安百 其自愛也 日 范 自敬,禮之至也。」君子之道本諸身, 安人。 一以敬。 有飢者,由己飢之。 日 無一物不得其養,一民不 禹思天下有溺者,由 : 人 姓,堯舜 必 聖人之治天下,猶天地之養 ,然後人愛之。 君子 大器先自治 其 自敬 無 以 爲 不 也,然 敬 病 故 則 也,敬 能治人,先修 自愛,仁之至 博 己溺之, 人 後 施 君 人敬之; 身爲大。 得其所, 미 濟衆,修 不 勉 稷

遷

能

家

百 則 . 與? 姓 安人,人者,以人對己。 以 者 吕曰 安百 則 盡 姓 乎人 修己不 ,所謂「不言而信,不 矣,此 敬,則道 堯 舜 進之則安 猶 不 病 y 怒而 諸 (百姓, 者 進之 也。 威

謝曰:「修己,舍敬以直内,則不能。

安 舜之道不越如 諸 道 人 則 安 豈 白 三二如 姓 此 則 斯 擴 圃 而 大之也 已乎」? 故 使 夫子謂 由 巾 知 求

無 有苗,畏巧言令色孔壬。」 齊、國治、天下平,然後 害民者、雖堯舜其 楊曰 * 「修己以 直内 猶 病 爲至。 爲 諸, 主, 然天 推之至於 下不

子 無 物,至於百 以 可至於天 路每以 修己爲本。 不得其所者。 尹 日 爲未足故也。」 下 姓皆被其澤, 平。 「施於人者必本 修己之要,欽以 其本 日 堯 舜 皆 在 猶 猶 以爲 于身修,故 天 地 於 直 之養萬 内,推 己, 病者,蓋以 故君 馴 而及 物, 致 子

其脛。而無述焉,老而不死,是爲賊。」以杖叩原壤夷俟。子曰: 「幼而不孫弟,長

人,及母死 伊 Ш 日 而 : 歌 或 疑 謂 似 原 莊 壤之 周 爲 非 人, 也 乃 敢 鄉 慢 里 聖

有答。」 辭 謂之賊,便可見其爲 麤鄙之人,不 亦不敢叩責之,適足啟其不遜爾,彼亦 ,幼不孫弟, 識 長 義 而 理 無述焉,直至老 人也。 者耳 若是莊周,夫子 觀 夫子責 而 之之 必須 不死

安死。 三者,皆賊生之道也。」 横渠曰:「幼不率幼,長無稱述,老不

其非可

叩之,教誨之道不一端也。」原壤之無禮,非可以言喻也,故深責而以杖夷俟,猶不絶之。聖人教人,各因其才,若夷俟,猶不絶之。聖人教人,各因其才,若

語之。」無補也,亦賊夫天理而已,故以杖數其罪而無補也,亦賊夫天理而已,故以杖數其罪而謝曰:「幼而不遜弟,長而無述,於世

其 莊 謂 子所 之賊 亂 俗 楊 謂 日 也 而 : ,而彼皆受之而不辭,非自索於形 遊方之外者也,故孔子切責之,畏 吅 其 一禮 脛 人不答,盍 ,不已甚乎? 亦 自反 若原 而 壤,蓋 已,

> 蓋 骸 之内, |惟原 壤,然後待之可以 而 不 以 毀譽經其 如 心 此 者 能 如 是 乎

?

人可見矣。」
一端也。觀原壤之母死而爲孔子歌,則以言諭也,故叩其脛而深責之,教諭之道以言諭也,故叩其脛而深責之,教諭之道不死,皆賊天理者也。若原壤之放曠,非尹曰:「幼而不遜弟,長而無所述,老尹曰:「幼而不遜弟,長而無所述,老

而

者也。」與先生並行也。非求益者也,欲速成與?」子曰: 「吾見其居於位也,見其與黨童子將命。或問之曰: 「益者

豈不夭其天性哉? 成,如拱把之桐梓,不能養,而 成人,是學未至而 爲 幼之事,長者有爲長之道。 范曰: 目 「童子 「先王之教,學不躐等,幼 坐 謂之至,行未 則在 隅,行則在後 亟用之於大, 童 成 子 而 而 謂之 欲爲 者 有

「盍」,和刻本校云:「盍」當作「蓋」。

四〇元

者。· 而弗問,無與先生並行之理,故曰非求益

歟?」與之並行,是欲以成人自居,豈求益者與之並行,是欲以成人自居,豈求益者以之。「童子侍坐於先生,居其位而

國朝諸老先生論語精義卷第七下然

或 朝 說者先生論語精義卷第八上

衛 公第十五

間

司

其

之學 豆 立之事, 靈 一公問 也。」明日遂行。 則 陳 當聞之矣; 於孔 子。 孔 子對 軍旅之事,未 日 俎

也。 明 道 : 明日遂行,言語 不 · 相 投

對之,明日遂行。 公者乎? 而 去,此聖人之行也。」 人其國,如靈公猶足用爲善也,況不爲靈 范曰: 知其 靈公問陳,則其志 不可 夫子豈不知靈 爲而爲之,亦不爲苟 可知 公之無道, 也,故

若致天討 謝 無 「善戦者 敵於天下,蓋 不陳。 將 陳,兵之末 有 征 而 無 也 戰

> 何 陳 之有 ?

器數而 說, 之省,則知其不足與有爲 與孟子對齊宣王問齊威、晉文之事同意。」● 用,而天下之至賾存焉,使靈公聞是 也,宜非君子所有事者。然禮藏於器 陳以 國 存。」蓋儀章器數,祝史之事,有司 則循而達之,斯知所 尹曰: 楊曰 則爲國 是對。曾子曰: 已,禮之末也; 「衛靈公無道之君 以禮,軍 秦不用 周禮,詩 旅非 『籩豆之事,則 以爲禮矣。 陳亦軍旅之末。 也,故 所問 人知 明 也,復有 也 日 聞 無 而 遂 俎豆, 之 以 而 究 有 志 莫 其 職 固

於戰伐之事,故答以未之學而去之。」 在陳 日 君子固窮,小人窮斯濫矣。 絶糧,從者病,莫能興。 「君子亦有窮乎?」 子路 子 愠見 日

威 避 四 宋欽 庫本、公善堂本 宗 趙桓諱 作 恒桓 按 原 本

0

則 而 必 不 范 伊 失 日 Ш 屈 其 其 \Box 所亨; 志 君 ,窮則不安其命,故窮 子 君子固窮,固 身 小人貧 有窮 而 斯約 道 守其 不 富 口 窮 窮,故 斯 也 斯 濫

困

木

乎? 斯濫 交也 有 ,是以愠 謝曰: 也。 所以異於人者,特固窮 知此,則窮達不在我矣,何窮之 見。 「子路尊聖人,惡夫上 夫子謂汝以修 而 不若小 德 ៣ 下之無 人之 名

則僥倖之心生,故窮則濫。」楊曰:「疑君子之不窮則無命,無命

不受命,窮斯濫矣。」 侯曰:「子路之愠見,不受命者也,苟

變, 小人則無所不至矣。」 尹曰:「君子之窮也,則守道而不

者與?」對曰。「然,非與?」曰。子曰。「賜也,女以予爲多學而識之

非也,予一以貫之。」

子,則 然其知足以 守約也,故 則先攻其失, 直告之曰: 夫子知其可 夫子之道必 以貫之。」曾子守約,有受道之質,故夫子 范曰: 誠以爲多學而識之矣,故曰: 夫子問以教之。 以語上也,故又曰: 有其上者,故又曰: 知聖人多學而識之,未足以 『吾道一以貫之。』至於子貢, 「子貢之學,病在於 而後語以 至要也。」 子 貢 「非也,予 博 以 『非與?』 而 不 盡

載 於衆形,匪 謂 而 以貫之。」「德輔 識之也。 之知,人不能编觀 無聲無臭。』至矣。」 謝曰: 物 然孔子豈務博者哉 物 「仁者見之謂之仁,知者見之 而彫刻之也,故曰: 如 毛,毛猶有倫 而 盡 識,宜其 以 如 爲 吾 天之 多

欲約之,故告之以此,然亦當其可也。」 楊曰: 「子貢蓋嘗博之以文矣,至是

終喻,故夫子告之曰: 侯曰 加 已,何 聖人之學,窮理 用 多學哉? 「予一以貫之。」 盡 子 貢 性 以 初 至 疑 於 而

此。 也。 多學而識之者與?!果不能知之,以 以知之矣。故先發其問,曰: 告,曾子復深喻之曰唯。至於子貢,則 也,又復疑其不然而請焉,方告之曰: 以貫之。」雖聞其言,而不能如曾子之唯 尹曰: 孔子語曾子一以貫之,蓋不待其 「子貢之於學,不及曾子 「女以 爲然 問 予爲 也 子 不 足 加 面

之,厥光大矣, 必欲我知 矣。」子路以君子有窮,至於愠見,是修 知 世 而 進之也。」 子曰: 范 楊雄 日 也,故曰: 曰: 由,知德者鮮矣。」 德者,自得於内,而 必我 「我知爲之,不我 『知德者鮮矣。」所以 知而爲之,光 不 知 願 亦小 身 亦 乎 而 爲

知德者鮮故也。」
朝曰:「人莫不飲食也,鮮能知味也,

侯曰:「君子而知德,猶飲食而知味則怨,窮則濫,言此以救子路愠見之失。」楊曰:「人不知德,則無以入德,故貧

尹曰:「知德者鮮,所謂終身由之而"由,知德者鮮矣。」知德則知道矣。」也。飲食而知味,唯易牙能之,故曰:

不知其道者衆也。」 所言為是日本

南 之,如天運於上而寒暑各司其序,故恭己 中心實無爲 面而已矣。」 子曰: 范曰: 何爲 哉? 也。 「無爲而治者,其舜也與? 聖人酬酢天下萬事之變, 恭己正南面 舜得 禹、咎繇、稷、契而 而已矣。 Œ 相 其 夫

能。夫何爲哉? 君猶心也,天下四體也。以治,則四方風動, 與人爲善,則人效其吕曰:「體信達順,德孚於人。從欲

盎於背,施於四體,四體不言而喻,其是之仁義禮智根於心,其生色也睟然,見於面,

謂與?」

阜也無爲也。」」之道,法度彰,禮樂著,●垂拱而視,天民之之道,法度彰,禮樂著,●垂拱而視,天民之謝曰:「楊子曰:「襲堯之爵,行堯

可。一五刑,皆天也,舜何爲哉? 恭己奉天而五刑,皆天也,舜何爲哉? 恭己奉天而楊曰:「惇五典,庸五禮,章五服,用

也。」

行。」子張書諸紳。 等敬,雖州里,行乎哉? 立則見其參於前也,在與則見其倚於衡也,夫然後於前也,在與則見其倚於衡也,夫然後於前也,在與則是其倚於衡也,夫然後

0

道。 則 内不足,故必敷陳以告之,使之自外 離,則所見無非道也。子張之學,外有餘 里,坐立登車,莫不見之,造次顛 有一段在《子張篇》「博學而篤志」章 日 : 見 范曰: 道無往 其 伊 「立則見其參於前,所 ĴΠ 倚於衡 日 「言忠信,行篤敬, 而不可,故遠則蠻 也,然 立 則見其參於前也, 後 可 見者 以 祈 貊, 沛 益。」 則 何事?」更 近 不 無 離 而 則 在 須 臾 州 輿 而 於 又

敬,行斯有常。雖之夷狄,不 無物,與焄蒿 貊之邦行矣。言不忠信,行不篤 謝曰: 「言忠信,言斯有物, 悽愴無異, 倀倀然 미 棄 無 敬,則同於 也, 地 미 故 行 矕 篤

作「著」,今據明抄本、公善堂本、紫陽叢書本及《法言》作「著」,今據明抄本、公善堂本、紫陽叢書本作「著」。按:《法言》卷四亦「著」,原空一字,四庫本、傳經堂本並作「備」,明抄本、

意,必有事焉,而 道 故 得之,當職疑在前在衡時,豈有物參倚也?」 則見其倚於衡,此教以忠信篤敬之道也。 雖 也者,忘之不可,不忘不 州 里,行乎哉? 勿正心,不下帶 立則見其參於前,在 可。惟正 加 道 存 心 誠

物也? 焉之意。其者,指物之辭。所謂其者,果何 學者見此而後行,則無人而不得 「見其參於前,倚於衡,必有事

膺之意。子張於忠信篤敬有未 ,則欲事斯語也。」 尹 曰 · 「見其參於前、倚於衡,拳拳服 盡

子曰: 邦無道,如矢。君子哉蘧伯 則 「直哉史魚! 邦無道, 則 可卷而懷之。」 邦 有 玉! 道, 如矢,

蘧伯玉,衆可繼之行也,故曰君子。 有賢之德業者也。」 范 日 「史魚,一人之行也,故曰直, 君子,

> 以 所 爲不如是。」 止則 謝 止 \Box 史魚愛君之意則 蘧伯 玉近 於 可 以 多,然明哲之 仕則 仕 可

故於蘧伯玉 而懷之,有不可得也。」 後可 楊曰: 免於亂世, 曰: 「史魚之直未盡君子之道 「君子哉!」蓋如蘧伯 若史魚之如矢,雖欲卷 玉

丽

間 也; 爲君子,則知行藏用舍矣。」 侯曰:「史魚之直,知直而不知 知權,則直在其中矣。蘧伯 玉 進退之 權 者

未 若蘧伯玉之爲君子。」 尹 曰: 「史魚之所處,謂之直可也,然

子曰: 人,亦不失言。」 不可與言而與之言,失言。 「可與言而 不與之言,失人, 知者不失

非 所 范曰: 以爲知 失言,則在己者不得 「失人,則在人者不得 孟 子曰 知, 其所當矣: 譬則巧 其 也。 所處

夫欲 聖人 其 知 所 不 處 周 失人與不 乎 一言不得 ,萬物 ",而 失言,皆 道 其所當者乎?」 濟 天 可 勉 下, 豈有一人不 而 能 也 而 況

不 賴 於先 知者則必有一於此矣。」 謝 知 日 3 不可與之言, 可 與言而不與言,則後 則强 聒而 不受。 知 何

孰能之?」言,非達材也。灼知人才之上下,非知者其言,非達材也。灼知人才之上下,非知者其人,非成德也, 中人以下,與之語上,則失人,非成德也, 「中人以上,不與之語上,則失

知人,則不失人,亦不失言矣。」 侯曰:「樊遲問知,子曰:『知人。』

(者也。)
一尹曰:「知者之於人於言,蓋兩不失

殺身以成仁。」 子曰: 「志士仁人,無求生以害仁,有

得是,實見得非。古人有捐軀殞命者,若不伊川曰:「實理得之於心自别,實見

成就 仁,無求生以害仁,竊謂 實 只睹一箇是。」 足惜也?」先生曰: 義,生不安於死也,故 生,至捨之以死,道必大勝於生也。」曰 夫子曰: 既死矣,敢問大勝處如何?」曰: 見得,烏 范曰:「志士者志於道,仁人 一箇是而 『朝 能 如 己。」 聞道,夕死 此 ? 「但 有 或 須 是 日 殺身成仁者。 所 可矣。」人莫重 實 看 利 見得 「有殺身以 生與仁孰重。 者大,一身何 害仁,則 生不 者 主 只 重 : 於 成 於

者」,曰 也。」 者能 雄: 也。 哉 ? 仁。身之所重者,生也。苟有 以成仁。 權 二者不可 孟子曰: 輕 : 「義。」「聖人」,曰: 或問「衆人」,曰: 況 重而取舍之。仁人者,聖人之次 輕 得兼,舍生而 於 『生亦我所欲,義 生者,其肯 「富貴生。」「 取 違仁以 義者也。」 「神。」 亦 我 唯 求 所 楊 欲

吕曰:「不私至德,以私至德。」

足以間之,故所成者仁。」於死生,取義也。 方其舍生取義,外物亦不於死生,取義也。 方其舍生取義,外物亦不謝曰:「仁人之死生,無擇也, 志士

心未能不違仁,其欲成仁,則與仁人一也。」守也, 非義,無行也。 夫是之謂志士,雖其守也, 了孟子曰: 『士尚志。』非仁,無

於一道上别出。」
於一道上别出。」
在,皆義也,非仁也。仁義本無二,學者當生,則害仁矣。故曰仁人求生害仁,殺身成以害仁,有殺身以成仁。義之當爲,計較一以害仁,有殺身以成仁。義之當爲,計較一以害仁,有殺身以成仁

际,唯知有仁而已,故殺身以成其德。」 尹曰:「志士仁人,雖於死生利害之

賢者,友其士之仁者。」必先利其器。居是邦也,事其大夫之子貢問爲仁。子曰。「工欲善其事,

伊川曰: 「子貢問爲仁。孔子告以爲

仁之資,非極力言仁也。」

器也。」 哉? 稼陶 推 聖,亦必由此,猶工欲善其事,無不先利其 由 問爲仁,則告以事大夫、友士,是由人也。 誠者也。 己者,自誠 而 漁 范曰: 至於天下之善 顔淵問仁,子曰: 以 自明 至爲帝 「事大夫之賢者,友士之仁者, 而明 而誠者、聖人兼之、故舜 無 者也, ,無所不取其仁,豈不大 非 取 『爲仁由己。』子貢 由人者,自 於人者。 舜 之 明 白 而

吕曰:「仁者兼容遍體,不與物共

則

不達。事賢友仁,達仁之先務與?」

者,斯 存焉, 在 淫樂,視慝禮,皦然不惑於先王之道,難 介甫曰: 所禮,而況仁者。事之友之,則必有敬心 謝曰: 焉 如 取 之何 『事衰世之大夫,友薄 斯? 謂 「大夫在所尊,而況賢者; 仁不自此 其 有 所 生也? 魯無君子 事 有所友故也。 俗之士, 矣 士

哉。」

仁者,輔仁之器,孰利於此?」楊曰:「事其大夫之賢者,友其士之

之,猶工之先利器也。」 尹曰:「欲爲仁者,當先擇仁賢而從

聲,遠佞人。鄭聲淫,佞人殆。」殿之輅,服周之冕,樂則《韶舞》。放鄭願淵問爲邦。子曰: 「行夏之時,乘

識 故三 周之冕,樂則《韶舞》。] 此是於四代中舉 者。」 危 益之,此成法也。 法,使後人就上修之。二千年來,亦 箇法式,其詳細雖不可見,而孔子但 於告顏子云: 通 殆,故放遠之,然後能 百世不易之法。孔子於他處亦不見, 代損益,隨時之宜。若孔子所立之法, 伊川曰: 又曰: 「三王之法,各是一王之法, 「行夏之時,乘殷之輅,服 舉前代之善者,準此 鄭聲使人淫溺,佞 守成 法。」 人使 無 示 以 其 又

> 不悖; 無弊。 質也; 禮,立萬世常行之道,發此乃爲之兆 各有當也。」 輅,服周之冕,樂則《韶舞》,與「從周」之文 發明此意。」 是求之,則餘皆可考也。《中庸》言三重,蓋 此。蓋三代之制,皆因時損益,其久 善盡美 日 「從先進」,則爲時之敝言之: 也。 周衰,聖人不作,故孔子斟酌先王之 行夏之時,得其 服周之冕,文也, 問政多矣,唯 又曰: 「行夏之時,乘殷之 IE. 頭淵 也 樂則《韶舞》,盡 3 然 後 殷 他不 爾。 告之以 之 由 能

爲邦者喪其所守,故放遠之。」能守,則德可久,業可大。鄭聲、佞人,能使教之,惟損益三代,蓋所以告之也。法立而横渠曰:「顏回爲邦,禮樂制度不必

平之事也。顔子之才足以任此,故以告之,者,蓋將如此,此堯舜三王之治天下、致太善范曰:「夫子之得邦家,其舉而措之

納言。 壬人 遠佞人也?」 自閔子以 堲讒說殄行,故 然則顔子爲邦,何可以不放鄭聲、不 下不 及 也 命九官,終之以 堯 畏 巧言令色, 龍 作 難

顔 蓋 淫 帝王之 子致戒於斯。」 亂 聲 謝曰: 德 慢 迹 淫 聲 志 而 損 ,不可以作心膂、 「爲天下以禮樂爲本,當 遠佞人,如遷驩兜,放有苗。 益 之。 放 《鄭聲, 和民情,非使 如大 司 樂 因 禁 襲

之意也。」 後之繼 蓋舉其端使知 楊 日 周 者, 「三代之相因,有所損益 雖百世 所 損 可 知也,故告顔淵以 益而已,亦「從周」 而 E,

行之於時,然其爲治之道,可得而見矣。」孔子之作《春秋》,蓋此意也。孔、顏雖不得冕,樂則《韶舞》,此可謂百王不易之大法。尹曰:「行夏之時,乘殷之輅,服周之

子曰:「人無遠慮,必有近憂。」

伊川曰: 「思慮當在事外。」

安而 《易》曰 邦於 其存者也; 以身安 未 不 范 日 而國家可保也。」」 忘危,存而不忘亡,治而 危。 『危者,安其位 亂必生於 亂者,有其治者也。是故君子 ~ 書》曰: 治,危必生於安。」 者也, 制治於未亂,保 不忘亂,是 亡者,保

醴者,似近之矣。」故。慮遠者可以無近憂,古人有見幾於罷故。慮遠者可以無近憂,古人有見幾於罷謝曰:「莫大之禍,亦非一朝一夕之

孫之憂,其在蕭牆之内必矣。」 楊曰:「邦分崩離析而莫之慮,則季

子曰: 「已矣乎,吾未見好德如好色

者也。」

賢 歎 其 如 好佞 終不得見也。」 范 日 八則可 好 謂能 德 如 自克矣。若此 好色,好 義 如 者,夫子 好 利,好

楊曰:「世之好德無誠心,則孔子知

四五

其已矣。」

子曰: 下惠之賢而不與立也。」 「臧文仲其竊位者與? 知 柳

是不明也, 爲竊位。 罪小,蔽賢之罪大,故孔子以爲不仁,又以 范 日 孟子曰: 「臧文仲爲政於魯,若不知賢, 知而不舉,是蔽賢也。 不明之 「不祥之實,蔽賢者當

欲以擅之也,是以謂之竊 謝曰: 「所以蔽賢者無 位 他, 知保禄而

任 其職,非竊位而 日 「任國事以旁招俊乂爲職,不 何?__

之道,竊據之也。」 侯曰: 「事君以人而蔽賢,不得居位

子曰: 矣。」 「躬自厚而 薄 責於人,則 遠 怨

范曰: 舜人也,我亦人也,舜爲法於天下, 孟 子曰: 君 子 有終 月之 口

> 也。 也。 日 是。」孔子曰: 人君躬自厚薄責於人也。」 於 何 (望人,則賢者可知矣。] 此責於人者薄 「湯降不齊,聖敬日躋,昭假遲遲。」此 後 成湯與人不求備,檢身若不及、《商頌》 憂之如何, 人也? 卌 我 猶 「君子以義度人,則難爲人, 予何人也? 有爲者 未 如 免 舜 爲 而 鄉 已矣。」 人焉 一 顔 是 淵 則 亦 可 日 若

於躬自薄, 謝曰: 則厚責於人也必矣。 「惟反己者,知無責人之理,至 然則不能

怨也孰近焉 遠怨者,蓋 楊曰: 亦未知自愛故也。」 ? 「躬不自厚而責人無已,

其

取

取 怨也。」 侯曰: 「不能責躬而責人無已, 知 其

尹 曰: 小人反是,所以多怨。

不日「如之何,如之何」者,吾

如之何也已矣。」●

成,雖聖人亦末如之何也。」 亂。」有國家者,當防微杜 防之。』老子曰:『爲之於未有,治之 范曰: 「《易》曰:『君子以思 漸; 若禍 患 於未 難 而 己 豫

滯吝者能之。此其意已極高明。」 謝曰: 「不留情於無所奈何, 惟 心 無

欲圖之,亦末如之何也已。」 楊曰: 「不於可爲之時爲之,則後 雖

矣。 然之前。故不曰如之何,若至於已然,横 極熾,無可奈何之後,雖聖人亦無如之何 故曰: 侯曰: 「天下之事,當防微杜 如之何者,吾末如之何也已 漸於未 流

也。」 如之何矣,故君子思患而豫防之,蓋 尹 曰: 事 至 於無如之何,雖 聖 工人亦 謂此

子曰: 「羣居終日,言不及義,好行小

言不及義,則不可與人德, 知,則不足與知道: 范曰: 謝曰:「言不及義,則必放 朋友講習,爲日不足。 亦難以爲君子矣。」 行小慧 解邪侈, 羣居 以爲

好行小慧,則不可以爲大知,其爲小人 小慧與知雖相似,其實不同。」 也必

爲明,非居易之道也。」 楊曰: 「羣居言不及義,而欲以察慧

而已; 小慧非知也,察慧而已。」 侯曰: 又以小慧矜人,則不及於禍亂者 「羣居終日,言不及義,則 爲惡 難

及之,反以才知爲能,難矣哉。」 尹 曰: 「君子義以爲質,羣居而言不

子曰:「君子義以爲質,禮以行之,孫

末」,原作「未」,今據四庫本、傳經堂本、公善堂本及 以出之,信以成之。君子哉!」

和刻本改。

0

爲本。」 義以 孫,順也,不止於言。」 爲 明 道 質 又曰 日 則 禮 「敬以直 以行之,孫 此 四 句 只 内,則 是 以 出 之,信以 事 義 . 以 方外。 以 成 義

禮以行之,孫以出之。孫,不必言也。」伊川曰:「君子義以爲體,全於義也。

不行。 者,可 之以 之,則天下 以義爲體; 以信。居之以義,行之以禮,出之以孫,成 而出 義 爲體,則莫不有法度。 一者,亦孫 范曰: 信,則可以爲君子矣。 以爲國矣。」 民之所聽於君者,以其有義 言出於己,悖而出者,亦悖而人,孫 亦歸之,國無信 「義以方外也,故君子集義,以 治人莫急於禮, 而入,故出之必以 文之以禮,故非禮 不立。 人君之道 人君孫以 孫,行之必 也,故當 有此 出 亦 四

事,故如質幹然,禮行此,孫出此,信成此。」謝曰: 「日可見之行,皆義以方外之

故曰: 之道,亦不可行也。 之,則其爲容節也浮文 而 宜,儀章品物,爲之容節,所以行之 不以孫出之,則禮 日 「君子哉 君 子 所 四者具,則文質彬彬, 不 主 而 和。 者義 已。 孫 而 無 面 己 不 誠 以 也。 義 信成 有

已知也。」 子曰:「君子病無能焉,不病人之不

知,故每言此以誨人也。」 范曰:「人之病在於不修己而好求人

子曰: 「君子疾没世而名不稱焉。」

没世而名不稱,謂無善可稱耳,非徇名也。」也。若夫好名,則徇名爲虚矣。如君子疾汲汲爲善,非求名也。有實則有名,名實一明道曰:「君子惟患無善之可稱,當

曰: 「名譽以崇之。」《詩》曰: 「鼓鐘于没世而名不稱,則無爲善之實矣。楊雄范曰: 「君子學以爲己,不求人知,然

聲聞于外。」名者,實之賓也

悔。」 不稱 吕曰: 語信道之至,則遯世不見知而 「論爲善之效,則疾没世 而 不 名

疾。後世禮義衰微,●始有潛德韜光,四十 多,無行修而譽不聞者,是以名不稱爲可 稱 年人無識者。」 務實兩得之。● 外者,兩失之, ,無實故也。先王之世,鄉黨間里爲善者 謝曰: 「病人之不己知者則務外,務 有實必有名,没世而名不 不病人之不己知則 務實,

者也。」 尹日: 「名謂無善之可稱,非求名譽

益。」 者自棄也。 欺己,故求諸人。 子曰: 范日: 故君子之過日損,小人之過日 「君子忠人,故求諸 "君子求諸己,小人求諸人。」 求諸己者自修也,求諸人

> 反是。: 謝 此君子小人之所以分也。」 「君子無不 反求諸己者,小人

稱,而所求者,亦反諸己而已。小人求諸 蒙而義實相足,此亦記言者之意。」 人,故違道干譽,無所不至。三者,文不 亦疾没世而名不 楊曰: 「君子雖不病人之不己知, 稱 也。 雖疾没世 而名不 相

尹曰: 「君子無不求諸己,小人反

是。

君子以矜莊自持,不與人爭。」 子曰: 伊川曰: 「君子矜而不爭,羣而 「此矜尚之矜也。」 不黨。」 又曰:

必至於黨。」 而無隨,故好惡無黨。 范曰: 「矜以自厲,故與人不爭, 小人矜必至於爭,羣

- 0 實 兩」,和刻本校云: 據上下文,「實兩」問疑脫「者
- 四 庫本作「讓」。

九

期於黨。」 不期於爭, 羣居則與人有和樂之理,然不不期於爭, 羣居則與人有别樂之瑣,然

能。」君子可矜乎?」曰: 爭 矜,非謂伐也。 而 該也。」 以 和,故 楊曰: 書》曰: 不 黨。 矜而 「汝惟 古人用字各有所當,難 不爲崖異,故不爭; 或問: 不矜,天下莫與 「矜者, 矜 「君子矜 莊之 汝 而 以 爭 不

則必至於黨。」即必至於爭,相與

以人廢言也。」
聖人擇焉, 陽虎之言,孟子取之。故不可聖人擇焉, 陽虎之言,孟子取之。故不可者必觀其行,故不可以言舉人。狂夫之言,者必觀其行,故不可以言舉人。狂夫之言,

謝曰:「有言者不必有德。」

舉人; 舉; 言豈可廢也?」 不以人廢言。 侯曰: 楊曰 言在 言或 可底績而 「有言者不 中理,不可 陽貨曰: 聽 言必 已,故不以人而 觀 - 必有 以非人 其 『爲仁不富矣。』此 行, 德,故不以 故 而廢言,故 不 廢。 以 言 而

欲,勿施於人。」者乎?」子曰。「其恕乎? 已所不子貢問曰。「有一言而可以終身行之

安人; 惟 爲人之身,以己之心爲人之心。 『强恕而行,求仁莫近焉。』恕者,以己之身 遠,施諸己而不願,亦勿施於人。」孟子曰 恕而已矣。」 范曰: 己欲利,故利人。三王之治天下, |《中庸 **>** 日 「忠 己欲安,故 恕違 道 不

謝曰:「言恕則忠在其間,無忠,何所

孰可終身行之乎?」楊曰:「君子之學,求仁而已,舍恕其

是而已,豈不終身行之乎?」恕,忠之用也。忠且恕也,雖聖人亦不越如恕,忠之用也。 「己所不欲,勿施於人,恕也。

宜乎?」 雖聖人無我,不出乎此也。終身行之,不亦知要矣。孔子告之求仁之方也,推而極之,知要矣。 孔子告之求仁之方也,推而極之,知要矣。 「學貴乎知要,子貢之問,可謂

之所以直道而行也。」有所譽者,其有所試矣。斯民也,三代子曰: 「吾之於人也,誰毀誰譽? 如

明道曰:「直道行,毀譽公也。」

心未嘗有毀譽,如有所譽,必有所試,如之。毀譽生乎人,非生於我之私也。故吾范曰:「彼善而我譽之,彼惡而我毀

毁譽,則非直道也。」善不善在人,而禍福降之,天無私焉。有心故天之於人,作善降之福,作不善降之禍。而我罰之,此三王之治民所以直道而行。而我罰之,此三王之治民所以直道而行。

好之; 也。 出 惡,還以治之,非故矯揉其性而爲不可順從 謂是者,非惟聖人之所是,天下亦以爲是 之事也。三代之君所以治者 下亦以爲非而惡之。聖人因民心之是非好 乎大公至正之道而已。」 合乎此則爲是,外乎此則爲 游曰: 「大公至正之道,古今所共由 其所謂非者,非惟聖人之所非 如此,孔子亦 非。 其所 ", 天 而

楊曰:「有所譽必有試焉,則雖違道

其間哉?」也。斯民也,三代所以直道而行,豈容私於也。斯民也,三代所以直道而行,豈容私於之哉? 其所以譽之者,蓋試而知其美故之哉? 其所以譽之於人,豈有意於毀譽

借人乘之,令亡矣夫。」子曰:「吾猶及史之闕文也。有馬者

借人乘之也。」當史之職,而能闕疑以待後人,是猶有馬者當史之職,而能闕疑以待後人,是猶有馬者明道曰:「言吾力猶能補史之闕文。

已,舉近者而言約也。」曰「史之闕文」者,祝史所任,儀章器數而之,如有馬不借人以乘習。不曰「禮文」,而之,如有馬不借人以乘習。不曰「禮文」,而

范曰:「史之闕文,夫子所以聞見足

射曰:「言以專言,是以專悉。」之也。今亡矣夫,歎學者不然也。」

所以與天下共,使人皆得通之,不必以

與人共,則借人乘之,不必專之也。

故闕疑

以及之,然而必闕者,示信也。

臂

如

有

馬

미

人乘之,孔子猶及見也。今亡矣夫,蓋悼時楊曰:「事無徵則史闕文。有馬者借謝曰:「信以傳信,疑以傳疑。」

之益偷也。」

孔子謂吾猶及見之,今則無矣。」能者,如有馬不能調良,則借人乘習之也。尹曰:「古之良史,有疑則闕之以待

子曰。「巧言亂德。小不忍則亂大

忍則亂大謀,君子所以貴果斷也。」無實則亂德。小仁者大仁之賊也,故小不無實則亂德。小仁者大仁之賊也,故華言范曰:「德者本也,言者末也,故華言

小不忍,婦人女子之愛也,是豈足以成大謝曰: 「巧言則心馳於外,故亂德。

謀?

小不忍則義不勇,故亂大謀。」楊曰:「巧言必能成理,故可以亂德

小不忍則無含弘之度,所以亂大謀。」 侯曰:「巧言似是而非,所以亂德。

《成事。」 「慎言則可以成德,忍性則可

以成事。」

子曰:「衆惡之,必察焉, 衆好之,

必察焉。」

於鄉原也。「衆好之,必察焉」者,爲其近於獨立也,「衆好之,必察焉」者,爲其近

不察焉,則或蔽於私矣。」楊曰:「惟仁者能好惡人,衆好惡而

也。然而如陳仲子之廉,匡章之不孝,君子侯曰:「衆人之好惡,固已知其多當

亦當察也。

尹曰:「孟子之於於陵仲子、章子是

3°_

子日

「人能弘道、非道弘人。」

也

横渠曰:「心能盡性,人能弘道也,

性不知檢其心,非道弘人也。」

道本無體,廣狹在人,非由道也。」

求道,道豈求人哉?」 謝曰:「人能徇道,道不遠人, 人不

弘之也, 不爲堯存,不爲桀亡,道固自爾,楊曰:「推而行之,放乎四海而準,人

子曰:「過而不改,是謂過矣。」

非弘人也。」

范曰: 「舜戒羣臣,不曰無過,而曰:

「改過不吝。」聖人猶不敢自謂無過,而況其「予違汝弼。」仲虺稱湯,不曰無過,而曰:

之

下 能改,則不爲過 者 乎? 惟 渦 也 而 不 改, 則 是 爲 過 3 若 其

焉。」 謝曰:「改非過也,所謂如日月之食

過之有?」 過一改之,則復於無過矣,何

侯曰:「改過不吝,所以稱湯也。」

子曰: 「吾嘗終日不食,終夜不寢,以美也。成湯之聖,改過不吝,況其下乎?」尹曰: 「君子不曰無過,而以改過爲

無 下者乎? 益,不如學之益也。」 范 日 : 思而不 「聖人求道,其勤 學則殆,故 厥寢 如 此 食以 而 況其 思,

思,

無益,不如學也。」

殆,故濟以學。」 謝曰:「非特以爲無益也,止於思則

殆 則學固不可以不思 楊 日 學而 不 思 也 則 罔 然 圃 思 未嘗學也, 而 不 學 則

楊

日

一耕也

而有豊凶之不常

則

餒

務,則其無益也明矣。」而徒思焉,譬之耕也,未嘗種藝而惟耘耔

故曰: 子日 尹 日 思思 而 「廢寢食以思,不 不學則殆。」 君子謀道不謀 食。 如 學之益 耕 也, 也 餒

憂道不憂貧。」 學也,禄在其中矣。 君子在其中矣, 學也,禄在其中矣。 君子

得禄 必 治 得禄。農夫不爲有餒 得食; 其本,不恤其末也。」 而 范 日 不學,故謀道不謀食,憂道不憂貧。 學所以爲道也,而 「耕所以爲食也,而 而 不耕,君子不 禄存焉,未必 餒 存焉,未 ·爲不

不至?」 「使人易憂貧以憂道,則何所

重輕緩急者,止於憂道。」有道者能處,能處則何貧之有? 是以能知有道者能處,能處則何貧之有? 是以能知謝曰:「貧賤困辱,其來既不可却,而

其 在 中 其 八中矣; 矣。爲 大人之事 修其天爵 而 , 則 人 八爵 何 謀 從之,則 食憂貧之 禄 在

之。」禄在其中矣。」 非所憂也。孟子曰: 也,而禄在 餒 志 也,而 於食,則害道矣。猶耕也 侯曰: 餒 其 在其中矣; 中。 「君子 學者唯道之不進爲憂,貧 志於道,食 「修其天爵而人爵從 學本進道 本爲謀 非 所 一非求 食,非 謀 也 求 禄

學所以 憂道不 在 尹曰:「耕所以爲食也,而 外者 爲道 憂貧,蓋所以治其本而 也,而 而爲憂樂哉?」 禄 存 焉 故謀道不謀食 不恤其末,曾 餒 存馬 ;

明道曰:「知及之,仁能守之,莊以涖之,則民不敬。知及之,仁能守之,不莊守以治之,則民不敬。知及之,仁能守之,不莊之,必失之。知及之,仁能守之,來莊子曰:「知及之,仁不能守之,雖得

到也; 諸 體 如 也; 仁能 所謂仁能守之者,孳孳於 禮,觀時應用皆欲中節也。 涖之者,外設 告學者,亦是人道之序。 者,先後之序也。」 以自立也。 中人以 己,故能守之; 仁,且宜致思,仁則安矣,所以云守也。」 何?」先生曰: 又曰:「知及之,仁不能守之,無得 范曰: 守之,有 伊川 動之以禮,在彼而 下 仁能守之者,孳孳於此 Ħ 也。 士之於學,人君之於治,必由 「知周於物,故能及之, 藩 諸 若夫真知,未 「知及之,仁不能守之,此言 垣以 己也, 「臨 莊 周孚先 遠暴 所以 政 故知及之者, 應也。 處 莊 此 慢也 或者謂此事君, 自敬 以 有不 問:「此 也。此言未能 己,莫不皆然。 涖之,行己 也, 也 有始 能行 動 見得 之以 莊以 語 禮所 有 也; 是 卒 有

四者,所以能久而成也。」

輕,則民不敬, 文則不足,則未善。」 吕曰: 「德不據,則雖得必失, 德

不遠矣,故止曰未善也。」亦所以養仁。然苟有所守,其於禮,雖不中不能莊不以禮者? 莊以涖之,動之以禮,●盡,豈有不能守之之理, 若仁之盡,豈有盡,豈有不能守之之理, 若仁之盡,豈有盡,, 」 此非仁知之盡也。若知之

事之而心不服,故動之以禮,然後爲善。」不敬,色莊而已, 動之不以禮,則民將貌人矣,然而不莊以涖之,則無方以外,●而民或勝之,雖得必失矣, 仁能守之,足以長或勝之,雖得必失矣, 仁能守之,則人欲楊曰:「知及之,仁不能守之,則人欲

此四者,至於動之必以禮,而後成也。」尹曰:「士之於學,人君之於治,當盡

明道曰。「君子道宏,故可大受而不小人不可大受而可小知也。」

子曰:

「君子不可小知

而可大受也,

小人反是。」 可小了。知此,則孟子所以四十不動心。

當大事也。」
「不可以小知,君子而可

以

也。 用小人。夫子於君子小人每分别言之,欲 大受,小人則反是。 析,不以爲少,禄之以天下,不以爲多,故 爲小人。居仁由 人君以此辨之也。」 君子之道大,故人不可以 范曰: 「知其大則 義 故治國必用 大也, 爲 君子,知 小 利於一己,小 君子,不 知,抱關 其 小 可 則 可

之重,小人反是。」 大事自受也,故不以能自名,而自任以天下 吕曰: 「君子不可以小事取知,可以

大受則决不可以小知,小知則决不可以大謝曰: 「大受所得者大,如受道之受。

「動」,四庫本作「風」。

▶ 「方以」"和刻本校云" 「方以」疑「以方」。

物色牝牡,或不察也,亦何疑於學者。」受。蓋昔之善相馬者,猶得其精而遺其粗,

知而可大受,小人反是。」 楊曰: 「君子養其大體而已,不可小

知哉? 小人器識卑下,反此者也。」受道也。君子之所爲,衆人固不識也,可小侯曰: 「君子不器,故可大受。大受,

知, 小人局於小,故不可以大受。」 尹曰: 「君子務其大,故不可以小

火,吾見蹈而死者矣,未見蹈仁而死者子曰:「民之於仁也,甚於水火。水

「青爲二,如留水火。」明道曰:「民之於仁也,甚於水火,言

而死?」曰:「赴水火而死者有矣,殺身成趙景平問:「未見蹈仁而死者,何謂蹈仁水火猶有蹈而死者,言民之不爲仁也。」伊川曰:「民於爲仁,甚於畏水火。不肯爲仁,如蹈水火。」

仁者未之有也。」

教民爲仁也。」 「水火所以養人,亦所以害教民爲仁也。」 「水火所以養人,亦所以則人於聖人,去之則近於禽獸。君子不以則人於聖人,去之則近於禽獸者幾希,庶民去之,君子存之。」存之於禽獸者幾希,庶民去之,君子存之。」存之於禽獸者幾希,庶民去之,君子存之。」存之后爲難,故無終食之間違仁, 足有蹈水火而仁爲難,故無終食之間違仁, 足有蹈水火而人, 仁道甚易,而不傷人。民有蹈水火而人, 仁道甚易,而不傷人。民有蹈水火而人, 仁道甚易,而不傷人。民有蹈水火而

人,而仁未嘗殺人,此所以甚於水火。」死也,是以異於水火。水火能養人,亦能殺死也,是以異於水火。水火能養人,亦能殺謝曰:「仁者非不死,特非蹈仁而致

而死者,則世之人喻利而不知害故也。」矣。冒利而蹈水火而死者有之,未見蹈仁也,其欲有甚於生者,則仁固有甚於水火也,其欲有甚於生者,則仁固有甚於水火

「人非水火不生活,是人於水

蹈而 水火有 火不 豈 死 然之氣,仁也。」 言仁必言義,義所以成仁也。 究其體用而默識之。孔子只言仁,而 也,仁無殺人之理故也。人爲仁而死之耳, 有殺身以成仁。」若如此,仁亦可以 也。」「子曰: 『志士仁人,無求生以害仁, 有盡人道而殺人者乎? 也。」曰: 可 死 殺人之理也,故子曰: 『水火,吾見 日日 者矣。至於仁,則未 無 「死於仁、是義也、非仁殺之 也 然赴水 火 仁與義,學者宜 而 見 集義 焚溺 蹈 而 而生浩 人蹈而 也, 死 孟 子 者

火,故孔子之言深切如此。」 尹曰:「愚民之憚於爲仁也,甚於水

子曰:「當仁,不讓於師。」

必

爲也。」

又曰:「善名在外,則可讓矣。」明道曰:「爲仁在己,無所與讓也。」

於人,●則博施濟衆,惟力行而已,雖師長無范曰:「仁道在己,則克己復禮,推之

0

所讓。爲仁由己,非由人也。」

物,則不可以不教人,故不以師道自讓。」
日曰: 「人之患在好爲人師,當其成

歸仁,則雖欲讓,將安所讓乎?」楊曰:「講學宜有讓於師,至於天下之,己亦爲之,非不讓也,如聞斯行之者。」謝曰:「爲仁由己,師何與焉? 人爲

欲讓於師,得乎?」 侯曰:「爲仁由己,克己復禮爲仁,雖

聖人勉人爲仁由己者也。」 尹曰:「師長猶無所遜,況它人乎?

子曰: 「君子貞而不諒。」

明道曰:「諒與信異,貞大體是信,諒

通用。孟子曰:『君子不亮,烏乎執?』」伊川曰:「諒,固執也,與亮同,古字

誤。今據四庫本、傳經堂本、紫陽叢書本改。「推」。原作「惟」。和刻本校云。 上「惟」疑「推」字之

行 其 以 可 死,非不信也,其可以爲正乎?」 爲 去信 不必果,惟義所在。」直躬證父,尾生守 中矣。《孟子》曰: 君子也。 范 不可去,不能正固 日 君子之道,不失其正,則信在 孔 子之 『大人者,言不必信, 教 人, m 守信,●亦 未 嘗 不 以 未 兵 足

豈 以 Œ 謝 行者也 日 哉?」 諒 有 硜 一硜之意。 貞 加 不諒,

故可 或 不 問 楊 諒 日 : 君子可不 所謂貞者,惟義所在 君 子正 諒 而已,不諒 乎?」曰: 也。」 而 爲固。」 惟貞

若匹 不諒。」諒,信之固而小者也。 君子堅貞 夫匹婦之爲諒也。」」 侯 日 而義以 「貞非 行之,故 固 也, 日 而 有固之象焉。 子曰: 「君子貞而 『豈

尾 生 子 尹 ,非不諒也,其可以 日: 日: 事君 正則諒矣,諒 ,敬其事 爲 而後其食。」 正乎? 則 未 必正 也

> 之義 受禄 也。 也。 而 有官守 范 不 曰 愧矣。 者修其職,有言責者 君 先事後得,先勞後 子之仕,以 行 其 盡 義 以禄,事 等非 其 (忠,則 謀

謝 日 人浮於食,食其焉往 ?

徇利耳。 不 敬乎? 楊曰: 其得罪也,將安所禱 不敬其 庶官所 事 以代天工也 前 先 食 乎? 則是矯 一代天 誣 其 以

可

事 役之志也,不敬孰甚焉? 也 ,然亦有時 而後其食」者此也。」 侯曰: 「事 而爲 君者以行道爲 貧,若專以 故曰『事君,敬 食爲 志,非 事 爲 則 其 厮 禄

欽其 故不以先後言。」 君子之仕,禄食在所後,事則始終皆當敬 尹曰: 而 後 「君子之仕也,所以行 非 爲餔 啜 也。 其義,故 又曰:

宗趙禎諱 正」,四庫本作「貞」。 原本作「正」者、蓋避宋仁

0

子 日 : 有 教 無 類

惡 者,中才之人可使有聖賢之行也。」 者,後世之民可使爲堯舜之民, 人君之治民,學者之教人,一 無 類。 類 也,教之以善則爲 范 《詩》曰: 日 「凡人之性,惟在所教。 「螟蛉之子,果鸁 善類,教之以 也。 善 負 善治民 惡 教人 之。 善惡 則 爲

子, 捨之則爲小人, 豈有類哉?」 謝曰: 「善不善何常? 蹈之則 爲 君

類, 則非修道也,僞也。」 侯曰: 「修道之謂教,豈有類 哉? 有

不以難與言而不與進。」 楊 日 「苟以是心至, 雖 互郷 童子見,

成 善類,教之以惡則爲惡類也。」 尹曰: 「人性無不善也,教之以 (善則

子曰: 「道不同,不相爲謀。」

横渠 曰: 爲道既異,雖黨類難相爲謀。」 「有受教 之 心, 貊 可

> 所趣 不同故也。」

謝曰:

「不同術也。」

謀

行忠信者,不可與

(爲

欺

僞

者

同

謀。

范

日

道

同

則

心

同

心

同

乃

可

相

爲

學聖人之道者,不可

與

學

異

端

者同

謀矣。」 則難 道不同,其趣 同歸,故道有不同者。 一而已,不同者何說?」曰: 相 楊曰 爲謀矣。」 : 或問曰:「道不同不相爲謀,道 則 「若伯夷、伊尹之去就,難相 也。 塗雖殊,其歸則同; 若伯夷、伊尹去就 「天下殊途 而 爲

爲謀。」 侯曰: 「伯夷之清,下惠之和,不 可 相

所 趨異,所趨異則豈 尹 曰: 道 不 同則心不同,心不 口 與謀哉?」

同

則

也。 子曰: 渠日 . 「解 達 而已矣。」 取意達則

止,多

或

反害

實,辭足以達意而已; 下 -無道 范 目 一,則 天 有 枝 下有道 文葉。 ,則行有枝葉; 君子之行,務於敦 辨給華藻,文過其 天

謝曰: 「不辭費也。」 實者,妄人也。」

楊 日 辭尚體要,貴達而已,不以文

尹曰: 「辭所以達意 而已矣。」

子曰: 師冕見,及階,子曰: 某在斯,某在斯。」師冕出。 「席也。」皆坐,子告之曰: 「階也。」及席。 子張

日 「與師言之道與?」子曰:

間

固相師之道也。」

得 鰥寡、不虐無告也,推之天下,則無 見瞽必有敬焉,事事而相之,所以教人不侮 其所。 謝 范曰: 「聖人之於人,無所不盡其誠。 日 故弟子詳記之,以爲後世法也。」 朝 聖人誠意 如 此,必無欺 一物不 暗

室之理。」

師之道也。」 「某在斯,某 楊曰: 「聖人之於人,無非道者。 在斯」之類,使其知之,是乃相

日

聖人御物之道,其仁如此。」 及席皆告之,而又曰『某在斯,某在斯』,蓋 相其所不知不見,而不使師 侯曰: 「瞽者有所不知不見,故及階、 至有過之地也。

不盡 斯可見矣。」 尹 曰: 誠故也。 「聖人處己爲人,其心一致,無 有志於學者,求聖人之心,於

國 朝 諸老先生論語精義卷第八上終

國朝諸老先生論語精義卷第八下

季氏第十六

有日: 不 柙,龜玉毀於櫝中,是誰之過與?」冉 焉用彼相矣? 不能者止。」危而不持,顛而不扶,則將 日 稷之 季氏 王以爲東蒙主,且在邦域之中矣,是社 「夫子欲之、吾二臣者皆不欲也。」孔子 「求,無乃爾是過與? 取,後世必爲子孫憂。」孔子曰: 「季氏將有事於顓臾。」孔子曰 將伐顓臾。 「求,周任有言曰: 臣也。 「今夫顓臾,固 何以伐爲?」冉有曰: 且爾言過矣,虎兕出於 冉有、季路見於孔子 夫顓臾,昔者先 而近於費。 「陳力就列,

> 也 安無 丘也 顓臾,而在蕭牆之内也。」 求也,相夫子,遠人不服,而不 德以 不患 動干戈於邦内。吾恐季孫之憂,不在 來之。既來之,則安之。今由與 貧而 傾。 聞 君 邦分崩離析,而不能守也,而謀 子疾 有國有家者,不患寡而患 患不安。蓋均無貧,和無寡, 夫如是,故遠人不服,則修文 夫 舍日 欲之 而 必 爲 不均, 之 能 來

凶。」故其言如蓍 心,是以言而必中也。」 不信。《易》曰: 氏,不爲逆詐; 之言,公而無私,一而不二。 范曰: 「至誠之道,可 知季 『大人者,與鬼神合其 孫憂在蕭 唯出於至公至一之 故 以前 疑 牆 八冉求 知 不 爲 教 聖 人 億 季

助 ,故無寡 吕 日 : ; 均 安則: 則 貧 人懷,故無 富 1等,故 無 傾。 貧 和 則

家。」 患不 矣。」 是時 豈以 附益之,夫子所以深罪之,謂 則 無傾 而 玉毁於櫝中,喻公室。三家强則公室必弱 無 Ŧ 也。 均, ,三家强,公室弱。 ,莫之能禦也 顓 謝 相爭不足之患,故和無 又曰: 又曰: **奥固而近於費** 均 均則不積於有餘 無貧 社 「諸侯有道 「虎兕出於柙,謂季氏" 也),何止保 臣 不患 爲 冉求 在社 憂哉? 气守在 四封 故均 貧而患不安,安 又欲 稷之内 寡 其 而 瘠 無貧, 四鄰可也, 不患 已。 以此 魯以 伐 顓 者。 寡而 保民 肥 臾 而 和 龜 當

貧 取 廣 介和 後 必 土 楊曰: 利 一衆民,利 世必 無 其有 寡 ,安無傾」告之。 一爲子 「季氏之伐顓 其 知 孫 有 和 憂 而 無寡, 也。 已 則不必 故孔子以『均 臾,其大欲 蓋知均 其 次以) 廣土 無 爲今不 mi 不 順 無 调

> 具臣 民 臣 論 也,故獨責之。」 也 0 與? 知安 而二臣者不 然冉求 無 傾 則 爲 能 後 季 救 世 氏 ,此孔子所 必 聚歛矣,蓋 爲子孫 憂 用 以 事 謂 皆 之 之 调

之内也。」 能 曰 : 以 『吾恐季孫之憂,不在顓臾,而 道事 侯曰: 君 「孔子反覆 而居其位也, 語二臣者, 器 識 窄 狹。 責 在蕭牆 其 故 不

也。 也 而 當是時,季氏 ,則是已在邦域之中矣,是吾社 不能救之,又爲之辭,孔子所以 尹 曰 : 虎兕喻季氏,龜玉喻公室也。 「顓 已强,公室益弱。 臾主祀東蒙。 冉求爲相 東蒙,魯 稷 罪 臣 也 地

侯出。 天子出 孔子曰: 自大夫出 命,三世希不失矣。天下有道, 3 自諸侯出、蓋十世希 ,五世希不失 「天下有道,則禮 天下無 道 則 矣 禮 樂 樂 不 陪 征 失 征 伐 臣 則 矣 自諸 伐 執 自 不 或

議 傳民 賢,是以君弱臣强,政出於下也。《詩》曰: 大 諸侯 惟民言得達於上,則下無所議也。」 公卿大夫皆賢也,則政出於君矣, 政未嘗不在公卿,諸侯之政未嘗不在大夫。 世 天子 「先民有 之,其大略不過此矣。」 制於家臣,四世矣。 魯自宣公,三家始强,季氏自武子至桓子, 故,其世短,道 三世大夫希不失其家者矣。 也 諸 小, 語,庶人謗於道,商旅 希不失其 有 侯希不失其 范 在 德有 子曰 國 曰 大 言,詢於芻蕘。」古者上誦 夫 ,大夫有家,必久而後失之,力有 厚薄,其理然也。 禮樂 微 天下 「上酌民言,則下天上施。」 天下者矣, 國者矣; 缺,至幽王而亡,十世矣。 征 有 希不失者,不必皆如 伐自諸侯 道 則 又曰: 議於市、未嘗不 庶 陪臣 自大夫出者,五 天子有天下 蓋 出,十世矣。 不 執 周 「天子之 議 箴 威 惟其非 自 深課,士 命者 昭王

> 於陪臣 討 姓謂我自然,莫知爲之者,何議之有?」 近,理勢然也。」 德又下衰,而禮樂征伐出於大夫, 之刑不 矣。」 孔子曰: 於大夫四 楊 曰 則 能 極矣。 加 然 世矣,故夫三桓之子孫微 「禄之去公室五世矣,政 禮 又曰: 故其衰愈甚,則其 後禮樂 易 樂 : 「庶人不議者, 革 征 制 伐 度 自諸 衣 服 或 侯 失益 命 出 侕 逮 執 白 流

者也; 陪臣 亦 五 世矣。 微 矣。 執國命,而大夫又失之,故三桓之子孫 范曰 : 禄之初去公室,大夫猶 逮於大夫無不專者,四 魯自宣公,禄去公室,至定公 有 世矣; 未 專政

小而爲等。庶人不議,直謂民自無非議,●出不順,物理之所不容,其久近之效,隨大出不順,物理之所不容,其久近之效,隨大

^{● 「}非」,四庫本作「可」。

非不使之議。」

待 ? 於諸 於大夫,至如今四世矣,三桓子孫不微 何可常也? 故愈逆理,則其失愈近。 天子專之,自諸侯出,自大夫出, 侯,如天無二日,所謂 謝 冉有、季路不知也,而猶欲强之。」 日 一諸 侯聽命於天子,大夫 理也。 蓋如災異 故禮樂 政逮 聽 惟 何

楊曰:「所以徵前說也。」

(能久乎?」
侯曰:「世道交喪,君不君,臣不臣,

其

者。 世 下,而衆庶 世,陪臣不過三世。唯天子有道,則政 侯專之,逆天理也,未有能過十世而不 矣,其子孫安得不微乎?」 尹曰: 愈逆於理,則其亡愈近,故大夫不過 無 「禮樂征伐出於天子者也,諸 得 而 議。 當時三家竊 或 不 四 在 Ŧi.

直,友諒,友多聞,益矣, 友便辟,友孔子曰:「益者三友,損者三友。友

善柔,友便佞,損矣。」

色,便佞,巧言。」 横渠曰:「便辟,足恭,善]

不慎哉?」
 「白天子至於庶人,友之損益不慎哉。」「白天子至於庶人,友之損益,如。「白言令色,便辟側媚」,損友也。皆同。《書》曰:『侍御僕從,罔非正人』,皆同。《書》曰:『自天子至於庶人,友之損益

善柔則志不立,友便佞則過不聞。」卑屈,便佞習於口才。 友便辟則德不修,友友多聞則進於明。 便辟習於容,善柔能爲友多聞則進於明。 便辟習於容,善柔能爲日: 「友直則知過,友諒則進於誠,

畜德,故可資以爲益, 便辟則不正,善柔楊曰:「直則不回,諒則不欺,多聞則

四三五

順 無 責 而 善道之者也,故 義 便 佞 則 損 禦 人 以 給 皆 非 能

也; 印 有 不慎擇哉?」 不須友以成者,而其爲損益有如是者, 尹 便佞,巧言也。 日 便辟,足恭 自天子以至于庶人, 也 善柔,令色

安。」 反 孔子 以 横渠曰: 節禮 又曰: 爲文 日 樂,樂道 樂騎樂、樂佚遊、樂宴樂、損矣。」 也。 益 節禮樂,不 樂驕樂、佚遊、宴樂,則 驕樂,侈 者三樂,損者三樂。 人之善,樂多賢友,益 使流 靡; 離相 宴樂, 勝、能 宴 不

益 皆 内,主於和 者之樂也。 和 同 樂,則鄙 范曰: 禮 所 以 詐 外貌莊敬, 「自天子至於庶人 樂道人之善,則 修外, 不 生。 主 動 於 則 必 敬 作 以 爲 禮 事 善者勸 樂 미 樂 樂之損 法 爲 所 以 爲 此 修 益 中

能

徙

義。」

進

則當 荒,宴樂則惰。」 作,驕樂也。 寧,此樂多賢友也。丹朱慢遊 惡 道弘,多賢友則德有輔。驕樂則淫,佚遊 桀紂幽厲以 不 身之安危,天下之存亡,可 善 而 吕曰: 者沮 揚善,所 友天下之善 酒亡國,宴樂也。 故 太康遊畋,十旬 以 「節禮樂則義精通 舜 順 隱 士,故濟濟 天 惡 休 而 命也。 揚 善 不慎哉 不反,佚遊也。 人君所樂,繫 多士,文王 人君有天下, 是好,傲虐是 大 ,●道人善則 有 之世

和。 宴樂,皆所謂 友,則志在成德而不在聖誤人。驕樂、佚遊 謝曰: 能樂道 人之善,則 耽毒,不可懷也。」 「節禮以樂,節樂以禮 必不伐善。 ,則常 樂多賢

樂多賢 放之弊; 楊曰: 友, 樂道人之善,則與人爲善者也 則樂 「節禮樂,以 取 人以爲善者 進反 爲文, 則 無 益

通 和刻本校云。 通」字恐行。

驕樂則傲,佚遊則荒,宴樂則怠。宴,安也。

故損。」

其可不慎乎?」也,三者其爲損益也如此。君子之於好樂,以成己之德。驕樂,侈靡也,佚遊也,宴安以成己之德。驕樂,侈靡也,佚遊也,宴安流。樂道人之善,是與人爲善。樂多賢友,尹曰:「禮有節則不離,樂有節則不

及之而言謂之躁,言及之而不言謂之孔子曰。「侍於君子有三愆。 言未

隱,未見顏色而言謂之瞽。」

理。欲無此三愆者,在修其内而已矣。」 范曰:「君子養其内心,故言無不中

吕曰: 「躁則不重,隱則不忠,瞽則不

謝曰:「時然後言。所謂時,當其

口

也。」

强

者以言餂之,隱者以不言餂之,皆穿窬之類楊曰:「君子,有德位之通稱也。躁

侯曰:「愆,過不及也。言得其時,也。瞽者則人言皆失矣,愆孰甚焉。」

則

無過不及矣。」

衰,戒之在得。」 及其老也,血氣既有剛,戒之在屬, 及其老也,血氣既氣未定,戒之在色, 及其壯也,血氣

於人者,志氣也。 亦倦于勤; 范 日 「聖人同於人者,血 志 氣 血氣 無 時 有時 而 衰 加 ,故曾子將死, 衰,故舜耄期 氣 也;

其壯 故不爲血 色、在鬭、在得者、志氣也。 ,孔子年彌 方剛、其老既衰者,血 吾得正 氣之所 高 圃 而 斃焉 德彌 動。是以 ,斯已矣。」其 邵 也 氣也; 孟 君子養其志氣, 子養浩然之 戒之在 少未定

斂,皆氣使然,唯君子以德勝氣。」 吕曰:「少則動,壯則好勝,老則收

知所以 有 遠矣,有不 非 與之,有所不受,蹴 其 命焉,君子不謂 義心勝,血 志無暴其氣以養之。 謝曰 (戒,則 辨禮 不隨 氣 勝德者不爲血 義 勝故也。 性 m 而 爾而 也。 受之者,血 氣 盛 與之,有所不屑 簞食豆羹,呼 衰。 萬鐘與 氣 血 所使,故 氣衰故 氣,性 不得則死 爾 也, 也。 此 持 而

弱。 欲 ,故戒在 則塞于天地之間矣,尚何盛衰之有?」 强則尚勝,●故戒在 楊 日 得。 血氣之剛,故 若夫至大至剛 鬭, 盛 以以 弱 則 則 直 强, 養 屈 於 衰 而 物 則 無

故有爲此三戒。」也。學者則當恐懼修省,無終食之間違仁,日兢兢,尚何血氣盛衰之可戒哉? 此成德民院, 「君子以義制事,以禮制心,終

不畏也,狎大人,侮聖人之言。」大人,畏聖人之言。小人不知天命而大子曰。「君子有三畏。 畏天命,畏

聖人之言,則可以進德。」之重, 畏大人,如此尊嚴,亦自可畏, 畏之重, 畏大人,如此尊嚴,亦自可畏, 畏

人行險以徼倖,故不知天命而不畏也, 不大人。聖人之言,天也,故畏聖人之言。小位者也,孔子見冕衣裳者,雖少必趨,故畏天者,故畏天命。大人者,王公卿大夫之在天者,故畏天命。大人者,王公卿大夫之在

□ 「勝」,四庫本作「氣」。

明於 可以測深,小不可以知大,故侮聖人之言。」 人倫,不嚴 於君 臣,故狎大人, 淺

而

之所由出, 人,乃王公大人之稱。」 人言者,吾德之所以人。無大於三者。大 吕曰: 大人者,吾身之所以制, 「心服曰畏。畏天命者,吾命

也, 聖言,談天者也。畏之,故事之。 人所以不畏,特不知此故也。」 謝曰: 「天命不僭; 大人,若天者 小

人,所以貴德; 楊曰: 尹曰:「三畏者,修己之誠當然也。 「畏天命,所以事天, 畏聖人之言,所以尊道。」 畏大

小人不務修身誠己,則何畏之有?」 之者次也, 孔子曰: 「生而知之者上也,學而知 困 而學之,又其次也,

困 而不學,民斯爲下矣。」

川 日 「生而知之,學而知之,才

也。」

知之,或學而知之,或困 善,是以言各有當也。」 人之於人,或戒之,或勉之,皆所以導人爲 也。」此所以勉困而能學者之爲上也。 不學者之爲下也。《中庸》曰: 范曰: 此 言聖賢之性分,所 而知之,及其知之 『或生而 以 戒 聖

爾。 初,及其知之一也。」 不待困。人皆有聖質,特念不念、敏不敏異 困而學者,知困然後能勉强以求復其 謝曰:「生而知,不待學,學而知,

下。 學而知者,思而後得也; 也。故君子惟學之爲貴,困而不學,然後爲 於强勉而已。雖其資不同,及其知之則 楊曰: 「生而知之者,不思而得 困而學之,則出 也

侯曰: 「生而知之者,上也,然聖人未

嘗不學焉,學之能闕。」●

行義以達其道,伯夷、伊尹是也。」
夫子之門人蓋不爲少矣。隱居以求其志,
范曰:「見善如不及,見不善如探湯,

能,故曰: 『未見其人也。』」志,行義以達其道,非伊尹、傅說之徒則不孔子之門人爲不少矣。至於隱居以求其,尹曰: 「見善如不及,見不善如探湯,

于今稱之。其斯之謂與? 焉, 伯夷、叔齊餓于首陽之下,民到 齊景公有馬千駟,死之日,民無得而稱

其斯之謂與?」 伯夷、叔齊餓于首陽之下,民到于今稱之。 景公有馬千駟,死之日,民無得而稱焉, 伊川曰:「誠不以富,亦祗以異。齊

之「誠不以富,亦祗以異」。」則可謂志士仁人矣。程頤疑此錯簡,當屬則可謂志士仁人矣。程頤疑此錯簡,當屬

紫陽叢書本、和刻本並闕。兹録明抄本「侯曰」條以下「闕」下,原本闕十六行,四庫本、傳經堂本、公善堂本、

類也,在學與不學,勉與不勉之間而已。」通,困而不學,可謂下愚不移者矣。聖人與常人之性通,困而不學,可謂下愚不移者矣。聖人與常人之性

伊川曰。「九思,各專其一。」

日: 無不得其理矣。」 光大也,君子養其源,正其心。 之,則亦不給矣。 日 明 范 『天下何思何慮。』故『憧憧往來,朋友爾思』。 聽曰聽,貌曰恭,言曰從,皆主於思。 日: 『王中心無爲也,以守至正。』如是,則 「視聽言貌思爲五事,而思無不在焉。 九思養之於內,非求於外也。 《詩》曰: 『思無邪。』 事事 而思

雖有不存焉者,寡矣。此之謂思誠。」(轉下頁)雖有不存焉者,寡矣。此之謂思誠。」(轉下頁)

道,不累於窮達者也。隱居以求其志,非 質美者也; 身以自佚; 謝 行義以達其道、非志於功名。」 「見善 隱 居 以 如 求其志,行義 不及,見不善如 以 探 達 湯 其

其語,而未見也。」 楊曰: 「湯之不可採,人之所知也,世書,其惟伯夷、叔齊乎? 是故當時孔子聞了,非達可行於天下者不能及也。 充此道道,非達可行於天下者不能及也。 故聞其語,又見其人焉。隱居以求其志,行義以達其又見其人焉。隱居以求其志,行義以達其以,其惟伯夷、叔齊乎? 是故當時孔子聞其語,而未見也。」

有千駟,何足道哉?」 侯曰:「民不稱其德也,富而無德,雖

富不足道 誠不以富,亦祗以異」之下。」」 尹曰: 矣。 「知伯夷之餓 臣 師 日 : 疑 可稱,則景 此 錯簡, 當 公之 在

乎?」對曰: 「未也。曹獨立,鯉趨而陳亢問於伯魚曰: 「子亦有異聞

日 學禮,無以立。」鯉退 過 者。」陳亢退而喜曰 學《詩》。 『未也。』『不學《詩 庭。 『學禮乎?』對 日 他日,又獨立, 學 》,無以言。」鯉 詩》 日 而 問 學 乎? 鯉趨 一得三: 禮。 「未也。」「不 而過庭。 聞斯二 對 退 日 而

者以此。」 而敗,而九思始於視聽貌言,而終於忿思 修也,所當損者,惟忿欲而已,故德以思而成,以 也。」而《損》之《象》曰: 接上 則 頁)楊 德 以思而 日 後 Ŧī 成 事 也。 以思爲主。故「思日 『君子以懲忿室欲。』則 《易》曰: 難、見 「損,德 忿欲 之修

吾聞其語矣"未見其人也。」人矣"吾聞其語矣。隱居以求其志"行義以達其道。孔子曰:「見善如不及"見不善如採湯。吾見其

曰:『吾聞其語矣,而未見其人也。』」 横渠曰:「顏子之德,隱而未見,行而未成,故

四四四

學《詩》學禮,止可告之如此,學必待其自學《詩》,聞禮,又聞君子之遠其子也。」

則

學。」 之遠 待 與鯉常相親,則 今 ,則其 因 楊曰: 其 又曰: 子也 其 未嘗私親之也。 過 庭 陳 引而 ,乃曰「學《詩》乎」、「學禮 必知其學《詩》學禮之詳,不 「君子之遠其子,若使孔 亢 聞伯魚 伸之如此, 之言, 故陳亢以是 然後 而 知 爲 君 知 子 善 子

> 遠也。 也。 陳亢 心也。 之? 已,故曰: 子,才不才亦各言其子也,未嘗邇 子貢曰: 不得 心 退而喜,以常人 問伯魚,而 萬物生於其中,未嘗物物而彫刻之。 以學聖人,日見其離道 尹 孔子,聖人也,聖人之心如天地, 侯曰: 異聞,是陳亢 退 聖人之心,皆外馳 吾於陳亢問伯魚及退 E: 陳亢以 親親之道,亦人倫之理,盡 ൬ 喜日: 「四時行焉,百物生焉。」聖人 伯 「聖人,人倫之至。」若充陳 「夫子之教其子,亦何以 魚曰「未也」,聞《詩》聞禮 學者當以 私己之心期孔 自 私之心喜也。 以常人愛子之心問 『問一得三。』是亦 矣。」 聖人爲標 私 意 而喜之心 子,故以 也。 聖人之於 也,未嘗 準 其 何 其 異 道 也 私 異 見 以 亢 四 耳。 之 意 答 於

本、和刻本改。
本、和刻本改。
本、和刻本改。

邦君之妻,君稱之曰夫人,夫人自稱口門人哉? 故陳亢以爲遠其子也。」

日寨小君,異邦人稱之亦曰君夫人。」小童, 邦人稱之曰君夫人,稱諸異邦邦君之妻,君稱之曰夫人,夫人自稱曰

謝曰:「欲以正名分也。」

正名爲先,故嘗言之。」楊曰:「當是時,稱謂不正,而孔子以

尹曰:「此亦正名分之意也。」妾母爲夫人、小君者多矣,故如此言之。」侯曰:「名正則分定,孔子之時,或以

國朝諸老先生論語精義卷第八下終

國朝諸老先生論語精義卷第九上

陽貨第十七

孔子 陽貨欲見孔子, 乎?」曰: 我與。」孔子曰: 懷其 不可。」「好從 孔子 時 寶 日 其亡也,而往拜之。 而迷 「不可。」「日月逝 其邦,可謂仁乎?」曰: 「來,予與 事 孔子不見,歸 「諾,吾將仕矣。」 而 亟失時, 爾 亩。」日: 矣,歲 遇 孔子豚。 甲 諸 謂 不 知

> 緩也 之。 意不 意。」 子之心也,其言諾,此與孟子言燕可 ,故孔子曰: 可饋 日月逝矣,歲不 豚 也 o 故 「吾將 我 孔 與 子 亦 仕矣。」 欲仕 ,君子之仕 時 其 亡 而 不 固 往 孔 미 拜 同

也。 之。」然則時其亡者,答其 畔,召之,皆欲往,南子當見則見之,孔子之 遇 往 孔子苟不欲見貨,必終避之,不至於 也 日 孟子取之,及其竊寶玉大弓,則《春秋》書之 欲其生,此聖人之德 於惡人,未當絕也。 盗 而 而 而 饋孔 臣以爲公山弗擾以費畔,佛肸 欲 不 范 遇者,聖人之所能必 日 與之言,孔子之于陽貨, 0 子 烝 「孟子曰 豚 孔子 也。 如天地之於萬物,無 亦闞 故爲仁不富之言, 禮 陽 也,然 其 也。 貨 上 闞 亦 程 也 而 孔 以 不 遇。 頤 而 不 子 中牟 能 ·必於 之亡 以 往 拜 絶 夫 爲

「可」,賀云:「可」疑「在」字之誤。

也。

又

日

「陽貨欲

見孔子,饋孔子豚

貨之時

則

不

可

曰『吾將仕矣』,亦未

爲非信

也。

然而

孔子未嘗不欲仕,但仕于陽

免禍

言不必信,行不必果,惟

義所在

片,此

伊川曰:

「孔子與惡人言,故以

遜

詞

970

四

Ŧ.

與 好從 乎 夫子 夫子豈 人言當 ? 則 事 謝 不仁 不欲 而 非 如 好 呕 也 此。 失 仕者? 從 八時,可 然夫子 懷 事 而 其 亟 寶 蓋 謂 則 失時者。 非 而 知乎? 非 苛然。 迷 懷 其 寶 邦, 諾以 吾將 不 而 知 迷 미 也,然 邦者。 避 仕 謂 温禍, 矣,

身絀 拜之。 求稱 也。 也 此 矣,歲不我 其邦,不可 諾,吾將 一、敬 與 知。 矣而 孟子對伐 也,而歸之豚。 而 遇諸塗者,無意避之,使知所以閩亡 楊 所不敬,爲絀 故 己, 日 當是時,陽貨先,不得 可 仕矣。」皆隨 孔子皆 與,則 調 亦取瑟 以 「陽貨 伸道 燕同 不 日 而歌之意。 身以 義。 欲見孔子,而 ,未之信也 可 好從事 孔子亦時 所 以 伸道,非知孔子者。 示不 楊 問 不仕,故孔子 雄 而 而 可 謂 應,無所絀 不見者 其亡 亟失時, 也。」日 懷 孔子於陽貨 惡 其 也 無 實 禮 爲禮 月 不 Ė 面 而 也, 浙 口 洣 者 往 闙

> 將 諾 仕」,則仕 吾 侯 |將仕 \Box : 在我也。」 。』是未嘗許之以仕也,但曰『吾 陽 貨 無 禮 於 孔 子 孔 子 日

陽貨 道 往 ,危行言孫,其待惡人,亦猶是也。」 也 疑 一、蓋陽貨先之,豈得 尹 其不見己,故關亡 日 「孔子之於惡 不 而 · 見 ? 饋 焉。 未 然於邦無 嘗 孔子之 絶 也

子曰:

「性相近也,習相

遠也。」

孟 氣 是 不 不是言性之本。 · 善 理,理 子所言,便正言性之本。 禀其清者爲賢,禀其濁者爲愚 伊川日 明道曰 無 言所禀之性,則有善 不 : . 善善。 若言其本,豈 性相 性相近也,生質之性。」 所禀之性,才也。 近也,此言所禀之性 言性之本,則 有 不善。 미 謂 才禀 相近? 性 於 即 無

也。服堯之服,誦堯之言,行堯之行,是堯曰: 『人之性善,皆可以爲堯舜。]言相近若曰: 「人生而靜,天之性也。孟子

m 而 成 m 己 已 3 性 不能 日 則 服 : 善惡殊 桀之服 相 無淺 「人性 遠 也。 深厚 途。 均善,其以 誦桀之言, 人君可不慎所習哉?」 薄,此 所 同 行 謂 然 桀 相 ";理 之行 近 義 是 習 而

移。」 皆善。 言, 近 雖聖人復出,不易此 也 相 ,習相遠也。」「唯上知與下愚 子 性 伊 近猶 又曰 ĴΠ 自暴自棄,然後不可移,不然 日 也,不 日 相 : 「唯上知與下愚不移。」 似也。 能 「少 「【性相近」,對『習相遠』 盡其 ル成若 上知 語。 才者 天 孔子 人性 下愚,才也 也。」 一習慣 日 不 成 又 移。」下 自然 則 一, 性 性 相 則 愐 可

聖,下之爲狂,在人一身念不念爲

准

退

耳。

又曰:

唯上知與下愚不

移

非

謂

不

미

革

面

者,

何也?」曰:

「心雖絶於善道

唯上

一知與下愚不

移

,移則不可知。

上之爲

愚 也 者 漸 移 善自治,則無不可移者,雖昏愚之至,皆 所謂下愚有二焉,自暴也,自棄也。 其性則皆善也,語其 象,其來格 兩 「人性本善,有不可革者,何也?」曰: 餘年,天下被化,可謂 人性本善,皆 自 摩 ,然考其 ,仲尼之所 絶之以不爲,雖聖 不能移者。 般 也 商辛是也。 前 爲 必皆昏愚也,往往强 而 進也。 自棄, 白暴 有 歸 不 烝乂,蓋 則 謂 自 可移之理。 又 以 惟 可以 聖人以其自絶於善,謂 下愚也。 安有 棄,不肯學 誠愚 堯舜爲君,以 自暴者 變化。 亦革面 人與居,不能 也。」「既 才則有下愚之不 不可 深且久矣,而 拒之以不信,自 然天下 所 戾而 移?」 然有下愚, 也。 以 而已。」或 聖繼 日 不 オカ 下愚 使其肯學, 移 自 人荷 化 有 有苗 又曰 其 過人 自 只有 之 而 日 百 雖 「語 棄 棄 以 有 可 有

生

之謂

性

也

一。」又問:

上

知

下

愚不

移,

性

緩

性

急之類,性安

有緩急?

此言性

相

近?」曰:

「此只是言氣質之性,如俗言

「性一也,孔子何

以

言

可移之理。」或問:

,不肯去學,故移不得,

使肯學時,亦

有

得

性只一般, 豈不可

移?

却被他自暴自

乎?」曰:

固

是也,

然却

道他

不

可

移

不

移

也。」曰:

下

愚

所以

自暴自

棄者,

才

移

,然亦有

可

'移之理,惟自暴自

棄

者

「, 則

不

變否?」曰:

可。

孔子謂

上知與下

清者爲賢,禀其

濁

者

爲

愚。」

一又問

於途人,一也。才禀於

氣,氣有清

濁

而

有

不善者,才也。

性

所

以

獨出諸儒者,以能明性

也。

即理,理則自堯舜至 性無不善 「人性[·] 人同 愚 愚 禀其 孟 可 子 本 不 孟 日 以 爾 移,則上達矣。」 上達不移而下,下達不移而上。若下愚者 話 然此只是大綱說中人以上可以與之說近 分 性否?」曰: 下 處 ,性則同,豈有不可學者? 中人以下不可與說 。」又問 不 「上知,上達者也 口 以 : 語 上,是才否?」 「中人以 此 是才, 又曰: 須 上可 近上話 「上知 下愚,下達者也 理 會性 以 曰 語 下愚,論 也。」 與 上,中 才 固 所 E 以 又

明

(),因

何

有

? 日:

一此

須是

理

會也。

子言人住善,是也,雖荀楊亦

不

知性。

所

以

知

其

非

性之罪

也。

或問

畏

威

而

寡

霏

則

與

人同

也

唯

其

有

與

0

既甚,而不可變者也。」 横 (渠日 「上知下愚,習與 性 成, 相 遠

知矣。 下 已。」下愚非性也,放心而 孟 不 子 ,學其可不勉哉?」 可復爲下愚矣; 范 Е 故堯不可以爲桀,桀 曰:「人之性本同,及其爲上知 . 學 問 之 爲下愚,亦不可復爲 道 無 不知求,故其習愈 他,求 不可 其 以爲 放 4 E 而 則

日日: 所謂 雖柔必强 雖 愚 必 明

四 四 七

惡 愚 不 移。」 中 則 人 下 可 而 愚,雖學,亦不能進於 以 下。 習 若上 而 智, 善 則 雖 不學,不 可 、上知: 以 上 流 爲 此 謂 下 而

之初, 知,下愚可移 故 人自不移也。」 一<u>,</u> 而 雨 日 相近。 謝 自其不 相遠矣。 露之所養,人事之不 目 克念作聖,罔念爲狂 移 「人之性不 非下愚,然性無不可移之理 上知下愚,二者非 而 名之也。 同如 齊,然 上知可移非上 麰麥,地 其 得 丁,其 初 於 皆善 流 有 有 牛 雖 肥

子將 以 則 孟 者,若「繼之者善,成之者性」是 人所見言之者,若『性相近,習相遠』 是也 當 可 子亦然,其道 時 以 游曰: 井 學者不 爲 皆 善矣,姑 「孔子之言性,有以其本言之 有 能無 性善,深探 怵 據 惕 疑。 惻 人 所見而語之也。 隱之心,乃若其 夫道未始有名,感 其 本 也。 也; 其日 有以 情, 是 孺

噫氣 者性 妄也。 則播 三品 風 託 則 無惡 者吸者,叫 後有上知、下愚、中人之不同也。 猶之大塊 曰 於 言性惡,楊雄言人之性善惡混 全有偏,有邪有正,有粹有駁,有 萬物之理得,而道自我成矣,故曰: 「物得以生謂之德。」性者善之資也,故莊子 則性之名立矣。 可 出 : 者 物 物,物 也。」惟其同出於一氣,而氣之所值,有 也 ,蓋皆蔽於末流而 作 ,其名爲風,風之所出 五 而 乎? 『形體保神謂之性。」蓋 ,故曰 苟得其性之本然,反身 行於四 而人息,渴飲 出 殊形 者號者,其聲若是不 則 孟 0 善 子謂 時,百物生焉,無非善者也 耳。 之名、 「繼之者善也。」道 善者性之德,故莊 性善,正 其聲之不 立矣, 而 不 飢 知 食,無非性者, 無 其 類 道之在天 韓 異 而 託 同 本 此 同, 氣 厚有薄, 誠 於 也 愈言性 而 也 也,而 之在 物 謂 以 ,則天地 子 「成 而 有 其 荀 地 生 有 卿 畢 叫 所 然

瞽瞍爲 禀可 其 而聞 者 也。 爲 徒者固多矣。 相 方之民,剛 近 不 不足以與此,宜乎夫子之言性 贊聖人者及此。 」 也 『成性存存,道義之門。』蓋非盡 可。 者 以 父而 類 以習而相遠,則天下之性,或相 惟其 子貢知道者也,得其所以言矣,故 推之也 柔、 有舜,又何足 由是觀之,則謂性有三品,未 止 輕 重、 以 是爲性,則三子者之失 以堯爲 遲速、 疑 異 君 乎? 齊, 而 門 有丹朱, 孔子言性 則 心知性 人莫得 氣 之所 倍

犬牛、人之性 子云『性相近,習相遠也』,『 渠言氣質之性,孔子初無 近 不移』,便是言氣質之性。」又問 此 ,有上知,有下愚,資 亦 則反之亦一而已矣。」 言氣質之性。」光 日 「性者,萬物之一 不等,則 是性 禀 祖 異 又 此 有二 唯 說。 日 光祖 也。 Ė 源 矣。」 一知與 曰: 德足 也。 問 「孟 說 日 子以 下 以 氣 有 愚 孔 横 勝 相

> 者却得 質之性,後來先生言他此說,亦不妨, 質之性如何?」曰: 量 可 有 爲貴,則 固是。」光祖退,又問之默 一不可 反,何 偏 IE. 力。」 輕 用更言氣質之性?」曰 自 氣質之性,蓋已在其中矣。」 議 是 他。」從彦問 容 有 不 同 「從彦當時 , 既 云: 說 其 天 : 論 體 地 横渠言 此, 「當 之 , 曰: 更思 于 無 自 氣 氣 是

初然也。」 下愚之不移,自暴自棄故也,非得于有生之下愚之不移,自暴自棄故也,非得于有生之

之耳。」 日: 日 笑, 曰: 子之武 學道則愛 「二三子,偃之言是也。 「昔者偃也聞 城,聞絃歌之聲。 人,小人學道則易使也。」」子 割 雞 焉 用 諸夫子曰: 牛刀?」 夫子 莞 子 前言戲 「君子 游 爾 對 而

「却」,四庫本作「甚」。

四四九

不

教也。 之道 之言是,則使二三子志之,以武城之治達之 天下可也。」 事上之道,故易使也。聖人一話一言,無 ,故愛人也, 范曰: 前言戲之耳,以觀誤子游之所對。 「君子學禮樂, 小人學禮樂,則 則 知 爲 E 知 爲 治 偃 非 下

有愛人、易使之異。」

有害,故自受以爲戲。」

百言,故自受以爲戲。子游未喻是意,故以武城小邑,其效也微。子游未喻是意,故以其所施之未當也。使人學道,固爲善教,然其所施之未當也。使人學道,固爲善教,然

也。君子學道則愛人,小人學道則易使,因忽小,故從而釋之,以爲政之道當如偃之言其可哂固然。恐二三子疑之,因以務大而治之,真如牛刀割雞也。聖人好惡與人同,謝曰:「小國寡民,而以治天下之道謝曰:「小國寡民,而以治天下之道

方。 子游以弦歌爲學,知 弦 歌 惟賢者得其大者,不賢者得其小者,故 游 而 日 言 君子以 「子夏以 好善 此,然後知古人爲學之 小小 灑 埽 人 應對 以 聽 進 過 退 也 ~教人,

爾 餘地矣,故戲之曰: 而笑者,喜聞弦歌之聲 楊曰: 「以子游子才爲 「割 也。」 雞 焉 武 用 城 牛刀?1莞 宰, 則 有

者哉?」 言是也」,以武城之治達之天下,其有 牛刀?」笑子游治小以大也,而 之弦歌,意在 尹 曰: 在人下而好禮樂, 是也。 「在人上而 夫子曰: 則 好禮樂,則 知 和 順 「割雞 復日『偃之 矣。 知 不 焉 子 愛 游 用

如有用我者,吾其爲東周乎?」也?」子曰。「夫召我者,而豈徒哉?說,曰。「末之也已,何必公山氏之之說,曰。「末之也已,何必公山氏之之

道 爲 以 者。 教之 孔 又 日 往之理。 東周 也 日 後 子 遷 ,諸侯大夫强 意 東 佛肸召,亦然。 明 也。」 周 ·如有用我者,吾其爲東周乎?』 善 道 他 「東周之亂, 衰 圃 雖 使 亂,所 孔子亦 畔 不 又曰: , 「公山 叛 而 則 不肯爲也。 僭,聖人豈 召 有 吾其爲 己, 我, 召 無君臣上下,故 實知其 「若用 此 其 日 則 心 東 不能改 圃 不 孔子,必 爲 于 周 亦非 豈徒 義 徒 是乎?」 乎? 直 然, 哉 丽 行 孔子 命 言 東 不 有 往 Ŧ 遷 不 往 可 而

知 畔 也 其 何足以爲孔子?」 逆 伊 /黨,而 Ш 故 也。 日 必召孔子 使孔子而 「公山 弗 則 擾 其 往, 以 志欲 費 是沮 畔 遷 善 不 爲 以 而 善 未 召

日 而 Ŧ 法 壞 横 則 渠曰 損 益 寐 미 不 「仲尼 知矣。 忘爲東 生于 吾其爲 周 之意 周,從 東周乎? 周 使 禮 其 故故 繼 周 興

周 公之治也

行

猶欲 之好音。』如有用我者,必 之思 東 矣。 往 周乎? 范 三三: 西西 ,而況不爲畔者乎? 君子 方美人。」又曰 無 言不爲也。」 「言忠信,行 而 不自得 興 : 篤 西 敬 二誰 周 詩》云: 山 雖 之道,吾其 將 弗擾 蠻 西 貊 之 云 邦 懷

誰

有所 謂 吕 日 ,此所以欲往 弗擾以費畔,召 也。」 扎 子, 其 意 必 爲

知 志 也 不 在 謝 日 克亂以權邪? 其爲東周,亦 「公山 弗擾執 未 其能 可 知 季 强公室,殆 也。 氏 以 畔, 安 知

爲 周 徒 是 知 哉哉 之衰 必 夫子之不爲也。 東周之事乎? 有 楊 日 悔禍之心,故曰 君臣、 如 有 之分不明久 用我者,吾 爲臣 言不爲也。」 公山 而畔 其 弗擾 其 矣。 (君,雖 夫 爲 以 東 召 孔 費 周 我 兀 子 畔, 乎? 用 者 夫 召子, 匹 而豈 東

74 \overline{T}

哉 ? 焉。 不 東周 知 往之理也 知其不欲遷善乎? 將教之使遷善,是有 召則欲往,乃處亂世、待惡人之道,安知其 以是爲避咎歟? 也 乎,言不爲 弗 使孔子得用,則將興文武之治,吾其 尹 子于南子、陽貨則見之,弗擾、佛肸之 日 擾 畔 然 「孔子之不 而召孔子,則豈 加 也。 亦 固 東周 知其 助 且不爲,況其 畔 不能,故 人,天 徒 然哉? 終 下 所 不 下 往 也 爲 共 可

功,惠以使人。行五者于天下,其仁 盡 矣。 明道曰: 又寬以 得衆,爲人之所 「恭 則 不 侮, 蓋一 任, 恭 敏 則 可 仁 而 知 有 道

> 皆仁之發也。」 功; 聖人未有不以恭爲德者也。子張之學未能 也,至于不侮、得衆、人任、有功、足以使人, 守約,故告之以能行五者于天下,爲仁矣。」 允恭,舜之德曰温恭,夫子之德曰 疑,故人任其事; 謝曰: 范 寬者能容人,故人亦歸之, 惠則民懷之,故足以使人。 日 「恭、寬、信、敏、惠,所以爲仁 恭者 不 敏者不滯,故 侮人,故人 堯之 事 亦 信者 恭 則 不 德 儉 有

爲仁。」 仁其可幾乎? 故曰能行五者于天下,而後仁其可幾乎? 故曰能行五者于失,而推之不廣,則

小遠近而已。」
行之天下,聖人之仁也。其餘則所至有大行之天下,聖人之仁也。其餘則所至有大侯曰:「雖聖人之仁,不過此五者。

之,能行五者,亦可以至于仁矣。」 尹曰: 「恭、寬、信、敏、惠,惟仁者盡

也。 也 佛 乎,涅而不緇。 往也,如之何?」子曰: 者,君子不入也。」佛肸以中牟畔,子之 肸 聞 不日堅乎,磨而不磷, 召 諸 夫子曰: 子 、欲往。 吾豈匏瓜也哉? 子路 親於 日 其 「然,有是 : 身爲 不 昔 不 日 者 焉 白 言 能 由

繁而不食?」

足 不徒 九 者 瓜 不能 往 而 可 不善者,君子不人」爲問,故孔子以堅白 不往 、爲對。 夷浮海之類。」 者 與 ,不用之義也。」 又曰: 改過之人,故欲往,然終不往者, 然 有 改故也。 ,聖人以天下無不可有爲之人,亦 明道曰: 爲也。」 ,何也? ·其往,義也,然終不往者,度其終不 匏瓜者,繫而不爲用之物。 佛肸召,子路引『親於其身爲 「公山 聖人示人以迹,子路不諭 又曰: 弗擾、佛肸召 「佛肸召子,必 「佛肸召、欲往 子 知 其 無 皆欲 不 食 執 N. 不

> 君子事 田 得 之,是誠係滯如匏瓜不食之物也。」 而 其政,雖欲仕,貧,無從而得之。今召我者, 一,得而食之矣。 豈 而 食 横 徒哉? 渠 事 諸 則 日 得 仲尼少也,國 庶 食; 「仁者先 幾得 及德備道尊,至是邦必聞 不 以事事矣; 事 事 事 後 人不 則 (得,先 知,委吏乘 雖 有粟,吾 難 而又絶 後 獲。

往者,毋必也,聖人歸潔其身而已矣。」有可往之道,故欲往,以明其義,然而卒不公山弗擾、佛肸之召,安知其不能爲善也? 范曰:「君子所過者化,所存者神。

可,非子路之所及。」
可。有可有不可,子路之所及, 無可無不可。有可有不可,子路之所及, 無可無不

之白。 淵; 而不磷,始 謝 使不善没水者效之, 豈不 蓋不 曰 可 如是,不足爲聖人。」 謂 「聖人涉世、於善游、 之堅; 涅 而 不 緇 殆 乎? 分始 不 避 可 磨 深

四五二

之不苟耳。」 召 不 不 可 則 緇 可 無 磷 不 楊 陳孔子之語 而 可。 也 日 能 幾 尊其 希。 磨 所聞。 不足, 而 子路之學,末 而 不 問 磷 而 焉。 故於公山、佛肸之 欲 涅 其不說也,亦知 自試 而 不 至乎 於 緇 磨 無 而 可 後 無 其 無

也,聞欲 者,亦知其必 者,聖人不 「吾豈繁 涅 之 君子不人」之言而欲止之,故 日 浮海 而 而 絶人以 不食如匏瓜 不 不能 則願從,聞 「弗擾、佛肸之召,子 緇, 始可 也。 不 可遷善也 子路以 以 也哉」, 欲 語 見 此。 弗 二親 然 蓋磨之 擾、佛肸 子路 於 而 ,皆欲 又 其 終 勇 而 日 身 不 者 則 不 爲 往 往

子曰: 對日 孔子意之所在,非由 其 好信 蔽 「由也 「未也。」「居,吾語女。 也 不好 愚 」,女聞 學,其蔽 好 六言 知 不好 能 六蔽 也 知 也。」 學,其 賊 矣乎? 好仁不 蔽 好

善,不誠其身矣,蓋

惟學可

以明善。」

則勞]與 一好仁 好 而 明道 其 直 加 不 不 夫「寬 不 日 也 知學乃愚。」 好 好學,乃所以 <u>.</u> 而栗」、「剛而 「六言六蔽,正 其 好剛 蔽 也 不好學 絞 愚,非能仁 無虐」之義 ,其蔽也狂。」 如「恭而 好 勇 不 而 好 無 同 學 禮

徒

蓋

絞 蔽,而不能 而 若顏子之殆庶幾者,何哉? 知、信、直、非不美也、然而 能 生於不學, 勇,能剛, 勇,又告之以 非 非 好學 乎? 直 謝 范 日 也 日 也, : 則 ,徒好 愚非 亂 故 成 其有過也不免於蔽者,其似是 「子路勇於爲善,其 非 剛,所 德。 於 能仁,能 之一而 勇 夫子之言每 也 也 子路之性果,故告之以 一,蕩 以攻其邪、救其失也。 狂 不明乎善 知,能 非 非 知 剛 唯能好學也。」 不學則皆 也,賊 也。 有 信 也。 所悅。 能直 失之也未 凡此, 非信 不 有所 明 能 也

其蔽蕩 蔽亂; 其 其蔽絞; 蔽 賊 蔽 3 愚 楊 日 直 剛 : 丽 信 知 勇 加 而不學,不知自反 不 而 M 不 學,徑情 不學,不 不學,過 學, 后而不 則果於進爲, 學,不 知 而 而 義之 不 不 知 知 知 時 シ所 而 以 所 措之宜 在 縮 爲 以 故 故故 其 故 蔽 其 其 故

思

於惡矣。」 信、直、剛,君子之美行。不好學則蔽, 侯 日 : 「知、仁、 勇,天下之 達 德 而

也

미 但

狂。

者 也。 子日 尹曰: 可以 之名。」 之事父,遠之事君, 惟學者乃可以明善,而 興 「小子何莫學夫《詩》? 可以觀,可以羣,可以 好之而 不學,則 多識於鳥獸草木 無此 不能 明 怨。 分詩 平 滙 善

以歸 明道曰: 有「吾與點也」之意。」 自 見周茂叔 後 吟 風 弄 月

> 識 於鳥 JII 日 : |《詩 一可以 怨,譏 理 也。 刺 皆是 也

多

又曰 也。 於禮義 獸草木之名。《詩》中君臣、父子、兄弟、 情所不免,若不怨,則恩疏。 予者]是也 失,則事君事父無不 婦、朋友,莫不皆有。 無 其 ,蓋不爲邪,所以可羣居。 以興,是起人之善意也, 言君父,舉其重者 미 邪 以博物。」 重 然則發乎情有禮義,●止乎禮義也。」 横渠曰: ,怨而止禮義,人可事親 者言也。 ,所怨者當理、《小弁》、《擊鼓》皆怨 「邇之事父,遠之事君, 可以觀人之得失。 「興己之善,觀人之志,羣而 多識於 盡 也。」 人但學《詩》中所行 鳥獸草木之名,言 止言事父事君, 猶孔子所謂 記 又曰: 所以怨者, 雖則怨,然正 出 可以 多識於 可事君。 | 基居 最 得 夫 鳥

下, 四 庫本 亦

五

也。 情發於 詩》所以爲忠孝,故可以事父, 相勉以 范 日 中 面 TE. 形於言, 也 學 ,者興 미 以 故 、於《詩》,故 怨者,相責 可以 觀 可 可 以恩也。 以 可 以 事 以 興 君 羣

緒餘又足以資多識。」 激,功而能反,●所以事父與君盡之矣; 於人以《詩 吕曰: 羣居相 》,則意 語以《詩》,則情易達, 「興者起志意, 不 迫。 其爲言也婉 觀 者 察 而 有 恕 有 事 其

氣

以 觀, 情性 優 使人易直子諒之心易以生,故可 無不可者。 怨。 游 可以得其君。 之正 謝 不迫,雖怨 心平 E 邇之事父,可 ,無所底滯,則 氣 「《詩》,吟詠情性,善感發 蓋興於《詩》,成於樂,其終始 和,於物 而不怒也,無 能盡 以得 無競 臣子之道 閱理自明,故 其 故故 **、 鄙倍** 親 一則天 以 미 Ľ, 興 遠 以 之 下之 故 羣 可 口 得

道 也。

推之於國家,可以盡臣子之道, 興; 心 興,可以觀。 和 庶物,察人倫,盡於此矣,其可不學乎?」 而 多識。 故 尹曰: 楊曰: 思無 比物象 可 以羣 邪 故不可 得温 類, 圃 「吟詠情性,足以感發,故 吟 ; 閱 有以 詠 理明,故 柔敦厚之風,故可以怨。 以不學也。」 怨而不怒,故 情性, 極天 可 下之蹟,故 足 以 以 觀; 感 可 又足以博 人之 以 可以 怨; 心 可以 平. 善

明

矣乎 猶 子謂伯 正 ? 魚田 面 而立也與?」 而不爲《周 「女爲《周南》、《召 南》、《召南》,其 南》

物

明 道 : 「二《南》,人倫之本,王 化之

⁰ 切。 功。和 刻 本 校云。 功 恐 「切」字。 按明抄 本 並作

經堂本、紫陽叢書本改。 於」,四庫本作「與」。「競」,原作「兢」,據四 庫本、傳

與於《詩》,不學《詩》,無以言,故猶正牆面基, 苟不爲之,則無所自人。 古之學者必

m

文。

然,則是猶正牆面而立也。」 人欲治天下國家,先須從身修家齊來, 不此乃爲伯魚而言,蓋恐其未盡治家之道耳。 伊川曰:「人而不爲《周南》、《召南》,

也。 近,莫甚於此,故須從 從此行,甚隔著事,向前推不去。 其猶正牆面而立」,常深思 次第,今試力推行之。」 《周南》、《召南》之事,告之教之,則是爲 道須是從此起。 横渠曰: 「「人不爲《周南》、《召南 心此始。 自世學不講, 此言,誠是。 近試使 蓋 殊不成 至親 人 家 爲 之 至 不

之始,王化之基,故不爲《周南》、《召南》,其後有父子,有父子然後有君臣。夫婦,人倫然後有男女,有男女然後有夫婦,有夫婦然而已:「有天地然後有萬物,有萬物

猶正牆面而立也歟?」

其末,則猶正牆面之無識。」自身及家,主於内,行之至。 不先爲此而事自身及家,主於内,行之至。 不先爲此而事日曰: 「《周南》、《召南》,正始之道,

義,人道之極,皆盡性至命之事。」謝曰:「二《南》之詩,發乎情,止乎禮

其門而入也,故猶正牆面而立。」 楊曰:「學道而不爲二《南》,皆不

得

修身而 也。 《召南》之道于其家 猶牆 夫治國治天下者,必先修身而 面 雖文王之聖,亦 尹曰: 而立。 家齊者,苟不爲《周南》、《召 「問 謂之爲者、蓋欲其以《周 伯魚者、恐未盡 而推之,則無往 刑于寡妻, 齊家也; 治家之道 以 南 至 而 于兄 不 南 \approx 治 則 欲

弟,以御于家邦,況衆人乎?」

云樂云,鐘鼓云乎哉?」

子曰:

「禮云禮

云,玉帛云

乎哉?

5川日:「禮云禮云,玉帛云乎哉?

四五七

息 然如 言 甚相 箇和 也。 相 有 便不 日: 事。」日 隻倚子,纔不正,便是 玉帛 一、二之間,便是三,已往 般 續 陽便有陰,有 ,移風易俗莫善於樂,此固是禮樂 云 莫是天地之序,樂莫是 安排, 《中庸》言 此。『維天之命,於穆不已』,自是理 背 不已,非是 ●「三生萬物。」此是生生之謂易,理 和。」又問: 然推本而言,禮只是一箇序,樂只是 鐘 樂云,鐘鼓云乎哉? 只此 ,然必相 : 鼓。 固是。天下無 也 「不然。 兩字, 先儒 須 人爲之。 須 有息時。 解者多用 便有二,纔有一 「不見而章,不 含畜多少義理。」或問 山 「如此, 如天 爲用 一無序。 一物無禮樂。 如使可爲,雖 地陰陽,其勢高 也。 只爲 則禮 更無窮。 安上治 此 天地之和?」 固 無 無爲 有陰便有陽, 樂却 有 動而變,無 序便乖, 、二,便有 民 禮 故 只是 且置 老子亦 之大 莫 樂 使 善 不 下 不 自 自 用 乖 兩 於 在

> 許 得要,故包含無盡。 千 爲 多。」 章 而 萬 成 句,亦 天 地之 不 能 道 逃 可 釋氏空周 一言 此 句 而 盡 遮說 只爲 也。」 爾,只是 聖人 使 釋 說 氏

中心 君子禮樂不 外 和 貌 斯須不莊不敬,雖有玉帛,非禮 斯 言 范曰: 而 須 履 不 可斯須去身,唯在於敬 和 之, 「禮之本在於敬,樂之本在於 不樂,雖 禮也; 有鐘鼓,非樂也 行 ım, 樂之,樂也。 與 也。 和 故 而

鼓, 然則所寓豈其本也 謝 日 : 「寓 其 節 ? 於 玉 帛, 寓 其 和 於鐘

日 玉 楊 侯 帛鐘 日 日 . 鼓云乎哉? 「玉帛, 「玉帛鐘鼓,禮樂 禮之文, 言不止而已。」 情 鐘鼓,樂之 文之所 寓

故

四庫本作「惟」。

⁰ 人人, 亦 原 作「一」,今據傳經堂本及《二程遺書》卷十八

道矣。」 器: 皆非所謂禮樂者。知禮樂之本則知

知其本,豈所謂禮樂也哉?」和。寓禮於玉帛,寓樂於鐘鼓,事其末而不和。寓禮於玉帛,寓樂於鐘鼓,事其末而不尹曰:「禮之本在於敬,樂之本在於

穿窬之盗也與?」子曰:「色属而内在,譬諸小人,其猶

蘭曰:「似剛而非剛,無實而盜名者譬之穿窬之盜,與夫殺越人于貨者異也。」 范曰:「色厲而内荏者,欲人不知,故

之所不知,是猶穿窬之盜也。」楊曰:「色厲而内荏,則爲不善於人

也,故與非其有而取之者同。」●

是非不能罔矣。」

曰: 『其猶穿窬之盗也與?』」 侯曰: 「色厲而内荏,賊害之道也,故

知也,推其心,何異穿窬之盗哉?」 尹曰:「色剛厲而内柔,其欲人之不

子曰:「鄉原,德之賊也。」

之道。 廉潔。 色厲 也。」又曰: 者,似德而 若夫邪正是非若别白黑者,聖人不 同乎流俗,合乎汙世。 也,●善斯可矣。閹然媚于世也者,是鄉原 日 : 而 范 『古之人,行 故曰德之賊也。」聖人惡似 日 衆皆悅之,自以 非 内 非 『非之無 德也。 在 二孟 者, 子 何 ,似正而非正 人君于此辨之,則邪正 爲 謂 舉 爲是,不可與 居之似忠信,行之似 踽 鄉 也 踽 原 凉凉 ,刺之無刺 其 志 也; ? 嘐嘐 而 八克堯舜 生斯世 辨也。 非者, 鄉 也。 原

宗。 所宗; 能 辨,故謂之德賊。」 吕曰: 以其與有德者似 有德者,人所 鄉 原者, 是而非,非 矜式,亦 同汙合俗,爲一鄉之 爲 鄉 知德者不 之所

^{● 「}謝日」至「而取」,原本重印一行,今刪。

斯世也」。

四六〇

同,自賊其德也。」 謝曰:「『德之賊」,與『恐其亂德」不

之無 不 而 忠信,行之似廉潔。 顧言,閹然媚于世 不可以人堯舜之道。故曰德之賊也。」 刺 尹 日 : 也。 同 「孟子謂 乎流俗,合乎汙 衆皆悅之,自以爲是, 者也。 鄉原者言 非之無 世。 不 顧 舉 居之似 行,行 也 訓刺

子曰:「道聽而塗說,德之棄也。」

省其傳不習者,恐爲德之棄也。」之于先王,朋友講習而後傳之。故曾子自之于先王,朋友講習而後傳之。故曾子自滿曰:「君子之學,必稽之於古昔,聞

用也。」

乎耳同。」 蓄德。道聽而塗說,是棄之也,與出乎口人蓄德。道聽而塗說,是棄之也,與出乎口人謝曰: 「君子敏於事而慎于言,欲以

故爲德之棄。」 故爲德之賊, 道聽而塗說,口耳之學也,故爲德之賊, 道聽而塗說,口耳之學也,

侯曰:「不能有諸己,非德之棄與?」

侯曰:

「苟以患得患失爲心,則何

所

終弑父與君。 古之佞人,其始也諛悅順旨而已,未必有犯 上作亂之志也,及其患失,無所不至矣,則 聽塗說,以資口耳,爲德之棄,不亦宜乎?」 子曰: 范曰: 苟患失之,無所不至矣。」 尹 未得之也,患得之; 日 「鄙夫可與事君也與哉? 「有患得之心,必有患失之心。 故好利之士,爲國者最不可 學無自得,君子所不 既得之,患失之。 取。 其 道

吕曰:「惲于任事,故未得而患得;

好利無厭,故既得而患失。」

又不若具臣矣,蓋有時而從之也。」 謝曰:「操患失之心,何所不至? 則

有也。」
其位者無不爲矣。如是而能盡忠者,未之其位者無不爲矣。如是而能盡忠者,未之

写新·丁下系成?! 不至哉? 雖弑父與君無不爲已。有天下

國家者,可不察哉?」

哉? 君子之所鄙者也。」 尹曰:「事君而患失,則何所不至

直,今之愚也詐而已矣。」之矜也廉,今之矜也忿戾。 古之愚也亡也。古之狂也肆,今之狂也蕩。 古子曰:「古者民有三疾,今也或是之

世賢者不如古哉? 民之性蔽,亦與古異持,故廉, 愚者率其性,故直。末世滋僞,持,故康, 「狂者進取,故肆, 矜者自

故直情徑行, 詐則有賣直之意存焉。」有廉隅, 忿戾則有爭氣矣。愚者無所知,之,故肆, 蕩則自恣矣。矜者莊以立我,故之,故肆, " [狂者過中之謂,利害不得而拘

愚,氣禀之偏也,故亦謂之疾。肆與蕩相近楊曰: 「氣失其平則爲厲疾。狂、矜、

詐,則終於不移而已矣。] 則争矣。 無惡於廉矣,未爲惡疾; 自持,則 而 不同,蕩則 不足 愚而直,則 放 以 而 通物,故 不反,非特 可强 廉。 矜 M 肆 爲 廉而 加 而 善 至於忿戾 己。 不 -劌,則 而

焉 王之道不行故也。」 有三疾,今也或是之亡也。』蓋世衰道微,先 而 並爲仁; 不隱, 詐則直之反也。 侯曰: 蕩則無所止矣。 忿戾 「肆則過而少邊 則 爭而害物 矜則 故曰: 廉隅 矣。 幅 尚 整峻,難 愚則 『古者民 有 直 所 實 與 止

詐則僞矣。」者自守,忿戾則爭矣, 直者直情而徑行,者自守,忿戾則爭矣, 直者直情而徑行, 兼曰:「肆者不拘,蕩則放恣矣, 廉

所聞記之,故又見於此。」 范曰:「此夫子所常言也,弟子各以子曰:「巧言令色,鮮矣仁。」

子曰:「惡紫之奪朱也,惡鄭聲之亂

雅樂也,惡利口之覆邦家者。」

常多。 非,以 勝佞,聖人所以惡之也。 君荷 不肖爲賢,則邦家之覆不難矣。」 范 非爲是,以 故朱 以 日 是 爲非,以 不能勝紫,雅不能 「天下之理,正勝常少 賢爲不 非爲 利口之人 肖, 是, 以賢 以不肖爲賢。 勝 鄭 /,不 ()以是爲 爲不肖 賢 正勝 不 能

知悟以自肆也。」知悟以自肆也。」

哉?

之可 雅 人惡之。 則非明者 ,利口未足以覆邦家者,皆人所易 也。 楊 日 示 至於幾微之間,足以 能見也,終必淪胥 「紫未 足奪朱,鄭 亂正 而 聲 已矣,故聖 未 ൬ 足以 搆 知 禍 遠 亂

非 佞 口 未必 也。 人 侯曰: 殆。」世俗之人,喜於淺 能覆 子曰 . |邦家,然聖人云者,惡其似是 「紫未 「放鄭聲,遠 必 亂 朱,鄭 佞 近 未 必 而 鄭 亂 不遠 聲淫 雅 深 M 利

> 厲 淡者人多不悅,淫哇者人必趨之; 遠 , 圃 加 子曰: 尹曰: 難 覆邦家矣。 不言,則 言哉? 如 知 ,利口者華 鄭 聲 小子何述焉?」子 「邪害於正,是可惡也。」 「予欲無言。」子貢曰: 四時行焉,百物生焉。 之 是以聖人深惡之。 淫 而易 則 不 聽。 可 亂 如此 日 雅 樂 則 矣。 天何言 正論 「天何 子如 亂 者 雅 正

道 行之,若小有污壞,即敬以治之,使復如 然完全自足之物。若無所污壞,即當 好底性著。 好 所以能使如舊者,蓋爲自家本質原是完足 一,便不是。 底性 明道謂 一,則請别尋一 道即性也,若道外尋性,性 聖賢論天德,蓋謂自家 韓持國 日 箇 好 底性來,換 「如說妄說 元 幻 1 直 是天 外 此 爲

明抄本作「達

上「遠」字,四庫本、公善堂本、紫陽叢書本並作「喜」,

消修治 之物。 焉。』●可謂 曰: 其 大 至于孔子,道如日星之明,猶患門人 便信是會禪 他 說,此理本無二故也。」 地之說,是他 加 易行。 未免疑問,故曰: 若合修治 而 不修 何 明白矣。若能于此言上看得破 「予欲無言。」如顔子則便默識 禪 也。 言 學 治 哉? Щ 而 非是未尋得,蓋實是無 者 亦是義也。故常 泂 修治之,是義 總 大地,又干你 是强 四 「小子何述?」又 時行焉, 生事, 也 至 百 簡 何 于 物 能 事 Ш 易 若 生 去 杰 河 ?

此。」 伊川曰:「以子貢多言,故告之以

至 而 天下 又曰 教 范 横 服 日 聖人之 渠 日 「不言而 誠於此、動於彼、神之道與?」 動 「天道 無非 四時行,聖人神道設 四 至德,夫何言哉?」 時 行,百 默 而成之,不言 物 生 無 教 非

已也。」
也,不言則無乎不在其中,故有不入于二者也,不言則無乎不在其中,故而信,存乎德行。」無言者德之至。夫言未

無言 謝 吕曰 巨 而 隱 也。 「天地有 「德孚于人,故不言 故 四 行 大美,四 百物 時 生 而 有 明法,不

以

吾無隱乎爾

也。

其斯之謂乎?」 『天道至教,聖人至德。』 德行。』《記》曰:『默而成之,不言而信,存乎之。《易》曰:『默而成之,不言而信,存乎有言之不能諭者,故子曰『予欲無言』以發

疑,若曾子、顔子,則深喻無疑。」 至之,故孔子每欲語之也,常先有 言」,所以發 尹曰 「聖 子貢之問也。 一人與 天 地 子貢識 同德。 高 子子 m 欲 未 能 無

) 「生」,原作「主」,今據四庫本及紫陽叢書本改

四六三

出户 孺 悲 ,取瑟而歌,使之聞之。 欲 孔子,孔子 辭 以 疾。 將命者

予不屑之教誨 孔子不見孺悲,所以深教之也。」 范曰: 明道 E 「孟子曰: 「孟子曰: 『教亦多術矣。 也者,是亦教誨之而已矣。」 「教亦多術矣。予

子不見孺悲,所以教誨之也。」 不屑之教誨也者,是亦教誨之而已矣。」孔 謝 日 「使之聞之,則非固爲不誠 此 知 所 以

疾辭也,必其禮際有不善者,使其由 自省,則是亦教誨之而已矣。」

亦 取瑟 教誨之也。」 然聖人之仁,不以其不足見而棄之,故 楊曰: 「孺悲之不足見,辭而 拒之 可

而 已矣。」 尹 曰: 不屑之教誨者,是亦教誨之

宰我問 「三年之喪,期已久矣。 君

而

哉? 聞樂 則人亦宜變矣,然而以期爲未足也,故又引 禮,上取象于天,下取法于地。 心不篤也,故夫子以爲不仁。 之喪不可以期而止也。 至于三年。 范曰: 不樂,居處不安,此三者,豈自外至 予也有三年之愛於其父母乎! 母之懷。夫三年之喪,天下之通喪也 甘,聞樂不樂,居處不安,故不爲也。 安,則爲之。夫君子之居喪,食旨不 燧改火,期可已矣。]子曰: 樂,樂必崩。 今女安,則爲之!.」宰我出。 衣夫錦,於女安乎?」曰: 子三年 「予之不仁也。子生三年,然後免於父 自中出生于心也。 「宰我學於聖人,豈不知三年 不 賢者之情,則無窮也。 爲 禮,禮 舊穀既没,新 其所見如此,則仁 必 聖人因人心 壞 夫食旨不甘, 四 榖既升,鑚 「食夫稻, 「安。」「女 三年不 時 子曰: 成歲, 爲

夫豈 後免於父母之懷,此爲中人而言,所以深責 我之無恩 以三 年足以 也。」 者 不 報其 得 過 親 不不 哉 ? 肖 者 子生三年,然 不 得 不 及

是,不知三年之愛於父母,故食稻衣錦自以是,不知三年之愛於父母,故食稻衣錦自以爲義當如

短 過 豈 樂,哀勝音也; 自 甚矣,是亦不知仁之道 之也。」 .也。」此乃問喪禮于夫子,非子自執 中 可致殺乎? 三年 謝曰: 而已。宰我乃欲 故食旨 「人子執 不甘,哀勝味 居處 前 喪,而 加損焉,其不 不 服 也,故曰: 安,哀勝 以 是斷,特 惻 也 怛 之心 佚 『予之不 能 恐 聞 巾 3發 樂 喪 察 賢 而 玾 者 此 于 不

則 1,莫不 楊曰: 易矣, 更 始 四 焉 時 則 年問日 以 已 是象之,而三年者,加 變 矣,其 至親以期 在 天地之 斷, 天 中 地

> 已乎? 處。」 不 到無疑處方已。三年之喪,在他人,於此不 所以爲宰我 於三年之喪猶有疑問, 詳言之、欲 之意, 豈以 予之問,而孔子曰: 『女安,則爲之。』則 而 夫三年之喪,天下之通 而 隆 三年之喪,非 雖被深責, 敢發之,宰 一殺馬 敢 已哉 耳 隱 耳。 於 聞 當是 孔 我疑 之 所 其 短喪之可不可,特在于安不安 而予之問,亦欲 爲是說者,皆失其旨也。 也。 而 不 不 聞 一時 不知 · 知 辭 以期斷,故必求質於聖人, 而 謂 凡學於孔子者,皆欲 其爲 也。」 只 知 此 所問,故其 耳。 親 何也?」曰: 喪也 薄也, 無 以 又曰: 隱 知 期 」, 期 、便是 或問: 其 只爲有疑,故 出也,孔 功緦 所知 聖人 「宰我問 獨 字字 一此 由 m 窮 宰予 究 我 子 宰 是 面

也。 夫子 侯曰 日 . 宰我欲 「食 夫稻,衣夫錦 短 喪, 蓋 誠 1 於 以 女 爲 可

逸也。 也,子曰: 『予之不仁也。子生三年,然後 樂不樂,不安於樂也, 乎?」曰 者薄,無所不薄矣,故曰不仁。」 也。予也有三年之愛於父母乎?」於所厚 免於父母之懷。 夫三年之喪,天下之通喪 君子之居喪,食旨不甘,不安於味也, 宰我曰「安」,則爲之可也。 「安。」「女安,則 居處不安,不安於 爲之。」非 及其 僞 也 出 聞

深矣。 期 吾母而不得吾情,惡乎用吾情?」示不以僞 子,其母死,五日而 聖人不與人爲僞也。 以其不安也。「今女安,則爲之」,其責之亦 其 疑於心 宰 可已矣,而曰「女安,則爲之」何哉? 我親學於聖人之門,而以是爲問者,有所 不仁可知 尹曰: 而 然則三年之喪,天下之通喪,宰我謂 不敢强焉。 「短喪之說,雖下愚且恥言之。 矣。」 不食,曰: 又曰:「君子不爲者, 食稻衣錦,期而安之, **昔樂正子春學于曾** 「吾悔之,自 蓋

間、燕游之好爾。」無所作爲,與下民一致,所事不踰衣食之無所作爲,與下民一致,所事不踰衣食之,

夫爲仁義有愈於博奕者,其賢可知也。」藝之至賤者也,爲之,猶賢乎無所用心,則而無教,則近於禽獸。」故聖人憂之。博奕,而無教,則近於禽獸。」故聖人憂之。博奕,

蓋放僻邪侈,皆生于無所用心,心有所用則謝曰:「博奕之害,則止于博奕而已。

❶ 「不以」,四庫本互乙。

止,止則不可謂之闕。」

乎?」
爲已,故以是而係其心,豈不猶賢於已飽食逸居,無所用心,則放僻邪侈,將無不飽食逸居,無所用心,則放僻邪侈,將無不

心。苟用心於仁義者,則爲賢可知矣。」人之矣,故博奕藝之賤者,猶愈於無所用人之矣,故博奕藝之賤者,猶愈於無所用

亂,小人有勇而無義爲盗。」 「君子義以爲上。君子有勇而無義爲子路曰。「君子尚勇乎?」子曰。

勇於氣。故孔子告子路義以爲上也。」於氣者,有勇于義者, 君子勇於義,小人於氣者,有勇于義者, 君子勇於義,小人伊川曰:「勇一也,而用不同。有勇

也。聖人之教人常如此,惟子路之勇、子貢范曰: 「子路之言疾也,夫子之言藥

吕曰: 「君子雖志於善,苟勇而無義,

之辨,較而易見者也。」

必有爲亂之迹,如鬻拳兵諫之類。

反而縮, 若專於勇而已,則亂人也。」以勇也。義以爲上,則其爲勇大矣,所謂自謝曰: 「非以勇爲不足尚,欲子路所

後其君,則終於爲亂而已矣。」子而有無義者,以位言之也。無義必至于卿大夫曰子,君子者,有德位之通稱也。君卿大夫曰子,君子者,有德位之通稱也。君守義,則所謂大勇,尚義而已。諸侯曰君,守義,則所謂大勇,尚義而已。諸侯曰君,

「可愿: 医再入乙聚药,聚异、充页子黄曰: 「君子亦有恶乎?」子曰:子路好勇者也,故孔子以義告之。」尹曰:「義以爲上,則爲勇也大矣。

爲知者,悪不孫以爲勇者,悪訐以爲直者。」曰。「賜也亦有惡乎?」「惡徼以乱上者,惡勇而無禮者,惡果敢而窒。」一有惡。 惡稱人之惡者,惡居下流而

汝諧《論語意原》卷四引謝氏註作「止則不可謂之放」。「之」下,原有闕文,明抄本「之」下有「放」字。按宋鄭

0

者。」

勇而 之惡 所惡也。 『惡徼以爲知』以下,子貢之所惡 小,抑其次也。」 也。聖人之所以惡者大,賢人之所以惡者 心;信 無禮則亂; 范曰: 而 一君 後諫,故惡 子樂道人之善,故 果敢 而 室則 居 下流 害 面 惡 訕 此 孔子 稱人 上

訕 則不可與羣。徼似知,不孫似勇,訐者幾於 上者; 一,皆足以欺世亂俗,故皆惡之。」 謝曰: 居是邑不非其大夫,●故惡 勇而無禮則必爲亂; 「樂道人之善,故惡 居 稱人之惡 果 敢 下 而 流 容 而

耳,子貢則又因夫子之問而言此,所謂惟仁下之通惡也。孔子特因子貢之問而發之一矣曰: 「七者非特聖賢之所惡也,天

者能好人、能惡人者也。」

人之意以爲己有也。」子貢之所惡,己所必不爲也。徼,抄也,抄子貢之所惡,己所必不爲也。徼,抄也,抄尹曰:「孔子之所惡,以戒學者也,

之則不孫,遠之則怨。」子曰:「唯女子與小人爲難養也,近

焉。」自古及今,不能易也,故君子以爲戒而不近自古及今,不能易也,故君子以爲戒而不近,故曰:「女子小人之情,惟聖人知之,

嚴。」夫如是,則不孫之與怨遠矣。」《遯》之《象》曰:『君子以遠小人,不惡而乎内,男正位乎外。」故男女有别而不相瀆。楊曰:「《易》之《家人》曰:『女正位謝曰:「此君子所以不惡而嚴也。」

不孫,遠之則怨。」 侯曰:「女子小人不安分,故近之則

尹曰:「是以君子遠之,不惡而嚴。」

● 「邑」,四庫本作「郊」。

子曰:「年四十而見惡焉,其終也

己。」

謝曰:「與無聞之意同。」

見惡乎? 其終也已可知矣。」楊曰:「四十而無聞,已不足畏,又況

也,終亦必亡而已矣。」 侯曰:「四十而見惡,則惡心不悛者

世,固不足畏,其見惡于人,則終身無善尹曰:「四十者,不惑之時也,無聞于

國朝諸老先生論語精義卷第九上終

國朝諸老先生論語精義卷第九下

微子第十八

孔子曰: 「殷有三仁焉。」 微子去之,箕子爲之奴,比干諫而死。

人皆聖人之行也,求仁而得仁,宜其一矣。」遠或近,或去或不去,歸潔其身而已矣。」三之曰仁。 孟子曰: 『聖人之行不同也,或之曰仁。 孟子曰: 『里人之行不同也,或

欲納君于善,故同謂之仁。」 吕曰:「去之,爲之奴,諫而死者,皆

不謀其利,明其道不計其功。」善乎其言,始游曰:「董子曰:『仁人者,正其義

可 在 求仁,亦曰循理而已矣。 其用心之誠,亦將從之也。是不然,君子之 死之地也,厥或告之曰: 志,惟求仁而已,功利非所計也。 以是求之,以是得之,既以遂其志矣,夫何 之,其利害固殊絶也,而彼獨以是求仁焉。 清,伊尹之任,柳下惠之和,皆仁也。伯夷 仁焉,其從之也。] 宰我之意,蓋曰仁者之 怨之有? 宰我曰: 辭爲孤竹之君,而餓於首陽之下,由衆 利 仁在于死,則就死 在 在 可 陷 其爲仁耶? 害禍福 在 于不去,則爲之奴而不辱,箕子是也, 而 與 己。 言 者,其理也。 于 去,則去之而不愧,微子是 仁之所在,則從之,不論所以 而易其求仁之志哉? 也已矣。 故 而不悔,比干是也。 以 可逝者,其 蓋 其用心之仁,故 「仁者,雖告之曰井有 仁人之用 夫理之所不載,安 「死地有仁。」彼 心 也; 心 故伯 井者,必 也; 可以 夷之 人觀 豈顧

言,則犯害之地皆是也。」欺,以其見理之明,故不可罔。以井爲

楊曰:「三人者,各得其本心,故同謂

知仁矣。學者致思焉。」曰:『殷有三仁焉。』知此五人之爲仁,則子去之,箕子爲之奴,比干諫而死。孔子子去之,箕子爲之奴,比干諫而死。孔子子,

獻于先王。』故孔子皆以爲仁也。」害無所擇,則一也。《書》曰:『自靖,人自惟仁者能之。君子之事不必同也,其于利惟二者能之。君子之事不必同也,其于利,,

之邦?」 在道而事人,何必去父母可以去乎?」曰: 「直道而事人,焉往柳下惠爲士師,三黜。人曰: 「子未

面 不 怨, 范曰: 阨 窮 「此孟子所謂 而 不憫 降 志 不屑去也。 而 不以 爲 遺佚 屈

惠則可,孔子不爲也。」身而不以爲恥,自知其直道而已。在

柳

下

尚 國 祀之禮,居喪之服,皆如其國之故。 邦,如大夫去國,向國而哭。 可,玩世不恭者之所爲也。 也,是以何必去父母之邦。」 可以處我,去此之彼何憚焉? 然莫能 謝曰: 「其官不移,用我亦可,舍我 蓋古人 雖在 他國,祭 使其 重 適 他 他 亦 相

逸民 子 故 曰 : 子 以 下 君子或去或不去,一於仁而已矣。 惠 亦 爲 明 惠於三仁之後,而下文又詳著孔子之行, 無 不 其 楊曰: 者,聖人之徒也。 能 去父母之邦,孔子則去 可無 士師三 趨 我則異於是, 已 |者,故其終歷叙 則一也。 不 黜 可,則近于和 「柳下惠不羞汙君,不卑小官, 而不去,聖人之和者也。 自楚狂 無可 孔子之異於是, ·無不可。」蓋 而 夷 至荷葆,皆譏 不同道。 (魯而 齊而下, 無不之。 故記 柳下 所 而 惟 柳 卒

焉 與 ? 而 已 矣。 孟 子 以 爲 集 大 成 其 有 見於 此

矣,豈 賢 身,孟子曰不恭,蓋欲絶其流 乎?]和 和,而夫子曰: 邦?』其出 而 及 疑 子 爲士師, 其和光同塵,不與 謂 不 三 黜 ? 侯 柳 非 以其 日 下惠 m 和 : 介,乃介之量 處 三黜, 曰: 而 道,遺佚而 「子謂 不羞汙君,不卑小 取 能 枉道而事人,何必 與之際,不合聖人蓋 介 『言中倫,行中慮,不亦宜 者 柳下 臧否,玩 乎? 『直道 不怨, 也。 惠 降 孟 然子曰 也。」 志 世 阨 而 子 辱身矣。 官,進不隱 事人,焉往 不 窮 謂 去父母 恭者也。 而 之聖之 降 不憫。 亦鮮 志 之 孟 戽

黜 也。 爲 和 而 遺佚而 與 不 尹曰 · 愠 , 自知其 若孔子則異是矣。」 不怨, 「柳下惠 (直道 阨 窮 ,孟子所謂 而 而 不 行 耳。 憫 仕而不喜, 此其所以 不 屑去者

景 公待孔子曰: 「若季氏, 則 吾不

> 矣,不能用也。」孔子行。 能 以 季 孟 之間待之。」 日 : 吾 老

也。 之出 子明 非所 爲至矣。 之間待之。季氏强 孔子不繫待之輕重,特以不用而去。 之。 處 范曰 以待孔 伊 孟子每言伯夷、伊尹、柳下惠,必 ĬΙ 而折中以聖人之行,所以明中庸 此篇自微子至於逸民,皆記 . 然復 日 子 「此聖人去就 日: 也。 「若季氏則吾 臣,君待之之禮極隆, 季孟之間,則待之之禮 『吾老矣,不 所以 不能 異於 ·能用 以以 賢 以 人 季 也。」 孔

此

之意則 謝 已勤 E 0 以季孟之間待夫子,在 景公

道

也

足 中 以 國 留 而 尹 孔 授 日 子也?」 孟 「景公之待孔 子室也。 不用則 子,猶 亦已矣,是何 齊宣 之 欲

齊人歸女樂,季桓子受之,三日不 朝,

孔子行。

止。 之受女樂而不朝,是以記者不及膰肉也。」 行也,唯未必如不至之速也。 雖至,可以無 爲肉也,其知者以 大夫,孔子遂行。二孟子曰: 今且郊, 季桓子卒受齊女樂,郊又不致膰 范 日 「《史記·世家》: 行乎? 是不然,膰肉雖至,亦 如致膰 爲爲無禮也。」然則 乎大夫,則 「不知者以 孔子之行,本 孔 吾猶 子曰 膰 俎 可 以 肉 爲 于

也,受齊女樂而 無處焉,故孔子行。於季桓子見行可之仕 矣,不能用也。」非言將行其言也。 之間待之。1非致敬以有禮也。曰: 待孔子曰: 致敬以有禮 言將行其言也則就之,行可之仕也, 貌未衰,猶將去之也,故孔子行。」 楊曰: 「孔子有行可之仕,際可之仕。 『若季氏 則就之,際可之仕也。 不朝 ,則不足與 ,則吾不能, 有行矣,雖 齊景公 二者皆 以季孟 「吾老 迎之

心可知矣。夫子所以行也。」受女樂而不朝,怠於政事如此,其無欽賢之尹曰:「君子見幾而作,不俟終日也。

不與之言。」
 楊曰:「接輿以鳳德況孔子而規其不明,未易以口舌爭也。故趨而避之,與之言。接輿其意若曰: 孔子之爲孔子,欲行,知尊孔子而趨不同者也,故孔子下,欲行,知尊孔子而趨不同者也,故孔子而規其

也。 與 斯人之徒 問 子憮然 士哉?」擾而不輟。子路行以告。 滔者,天下皆是也,而 丘之徒與?」對曰: 誰?」子路日 誰?」曰: 知津矣。」問於桀溺。 魯孔丘與?」曰: 長沮、桀 而與其從辟人之士也,豈若從辟世之 (易也 津 日 溺 與 長 耦 而誰與? 「爲仲由。」曰: 「鳥獸不可與同羣,吾非 : 沮 而 耕、孔 日 「爲孔丘。」日 : 「是也。」日 桀溺日 子過 「然。」曰: 誰以易之? 天下有道,丘不 夫 之,使 . 「是魯孔 奥 : 2 「子爲 「滔 「是 者 子 「是 夫 且 路

可 滔 以 者,天下皆是也,孔子雖 化而易之? 明道 日 桀 孔子曰: 冰湖 言天 下衰 欲 『如使天下有 行 其 亂 無 教 道 誰 滔

> 又曰: 之? 之心,知其 四 道 天下無道而不隱者,道不遠人。 如 一方,爲 何變易之? 天下有道,丘不與易也,知 我 横渠曰: 誰肯以夫子之道易己所爲?」 則 時 無 「滔滔者,天下皆是也, 不可而猶爲之,故其言如 無 所 道 治 「滔滔忘反者,天下莫不然 · 不 故 也。」聖人不敢有 與 易之也。 今所 且聖人之 丽 誰 忘 此 以 以 天 周 易 下 流

而不人危亂之邦,此聖人所欲引而至於道而不人危亂之邦,此聖人所欲引而至於道者也。故孔子下,欲與之言,又使子路問津若也。故孔子下,欲與之言,又使子路問津之道,非聖人絶之也。若夫子之行,則異於之道,非聖人絶之也。若夫子之行,則異於之道,非聖人絶之也。若夫子之行,則異於為民,故修身治天下國家,必由孔子之道。離孔子之道,則爲非道,不可以治天下國家

仁,不以無道必天下而棄之也。」

,舍此適彼, 所用易。 以 斯 吕 道易 . 桀 天 將 孔 溺 下 子皇皇,蓋 何 果 而 所易? 於進 己。 故孔子以爲 退,故謂 如使天下 正惟辟世而 以 天下 天下 有 皆 道 無 - 皆無 道 則

將

無

道

不與人爲徒者也。

不然。」

子爲辟人之士,則非 憮然曰: 矣,而不行,故去之,非有 楊曰: 人而已。 「鳥獸不可與 「孔子之仕,事道也,兆足 夫如是,何辟人之有?」 知孔 同 子者矣。 辟 羣。」則所當 也。 故夫子 溺 與 以 以 爲 行 孔

哉 ? 也。」 也,惡天下之滔 所以易之者,爲 滔者,天下皆是,誰肯 也,故以孔子之周行 尹曰: 同羣乎? 不知天下 長 其 有道,則聖人無事於變易, 滔,而欲辟之,則 聖人不以 八沮、桀 滔 滔 四方爲非,而 以夫子之道易己所爲 世 溺之徒、皆素 絶人逃世爲 且人之與人,類 又豈 日 隱者 口 潔 與 滔

> 也。 身, 其杖 路反見之。 問 子 子路行以告。 殺雞爲黍而 君臣之義,如之何其廢之? 不仕無義。 四 路從 日 們體 而亂大 道之不行,已知之矣。」 而芸。 不勤,五穀不分,孰爲夫子?」植 而 「子 後,遇 倫。 食之,見其二子焉。 子路拱 見 至,則 子曰: 長幼之節,不可廢 夫 丈人,以 君子之仕也,行其 子乎?」丈人 行矣。子 而立。止子路宿, 「隱者也。」使子 杖 荷 欲 路 明 日 也 潔 日 子路 日 其

者 也 富 不 君 孔子惜其未聞道也 垆 一,荷蓧 貴 爲 臣之道 高 范曰: 故往 此二者,皆惑也,是以 不與鳥 而 一、蓋孔一 不知其名,蓋名不 「周之衰世,賢人處隱 而 熠 不反, 子所遇未嘗無 同 ,故使子路反見之,告以 羣,則决 仕者爲 性 依 足以累之也。 乎中 命之情 誨 通、故 焉。 ,如丈人 庸 夫 溺 而

道 ,所以扶世立教 唯 聖 人 不 廢 君 臣 也。 之義 或 出 或 處 不 離

之徒 世 于利 不來之行。當是時,微聖人,無以 者 同 也 故士之不得志 異。」 墓,亦 忘世邪? 聖人樂則行之,憂則 者,然悻悻于自潔, 與 ,故士之隱者,至憤世疾邪 周之衰 而 E 誰 何嘗 與。 世 「夏 習治之後 知進 世之不忘我 蓋 商 知世 而 嘗 而 中衰 處者 不 一無道 知退,此 違 則 而 ? 邪? 之,則 不 猶 傷 面 而 得 隱 禮 未 聖 同 雖 多 有 賢 所 亦 知 義 爲 以 貴 非 爲 陵 避 之 不 雖 與 與 無 斯 長 遲 世 知 不 鳥 我 我 役 之 避 往 亦

子?」植其 遭先生于道 猶 楊 若 待 四 杖 命 正 正 而 體 「子路問 者、蓋 耘。 不 立拱手,先生問 勤,五 其言不讐, 敬之至 夫子于荷蓧丈人, 穀 也。 不分, 而子路拱 則 《記 對 孰 不不 爲 日 夫 問 丈 而

> 意。」 也。 路反 孔子以 又見其 蓋 爲 之 荷蓧謂之隱者,蓋知其隱居求志,非素 則 三人 間 黍 趨 下文記子路之言,蓋述孔子使反告之 見之、蓋將 而 而 者相 是 二子焉,斯可謂 食之,見其 退 敬 知 之若 禮 得 其 也 于語默之間,故其 可與言君臣之義也,故使子 語之以 斯 二子 豈 邪 ? 子 長幼之 此 焉,所以 路 故 有 也。然孔子獨 止 得 子路 節 丈 親 相 不 與 宿 厚之也 可 于 如 廢 隱 眉 此。 故 睫

爾 見從容于子路也,第不如夫子之從 切,足知其爲 穀不分,孰爲夫子?」植其杖 [子見夫子乎?] 丈人曰: 人也。」子路遇丈人,以 故夫子 侯曰:「孔 日 有德君子也; 子曰: 隱 杖荷 者也。」使子路 不 篠 「四體 丽 植 知 ,子路 耘。言不 言, 杖 不勤 而 容 問 無 反 中 日 以 見 迫 道 又 \overline{h} 知

❶ 「蓋」,四庫本作「哉」,屬上讀

辱其

身,伯夷、叔齊與?」謂「柳下惠

柳下惠、

少

連。

子

日

「不降其志,不

之,則 也。 廢 知 而告之,亦夫子之志也。」 則君臣之義如之何其廢之?』蓋就其所 故子路告其子曰: 欲約之以 雞 爲 黍 而 食之,則知賓主之序者 其 止子路 『長幼之節既 宿 也 見 不 其 可

之節 路問 乎? 而已。 其不以不仕爲高者,聖人或出或處 孔子所不 子謂之獨行隱居可也,然乃所謂素隱行怪 不欲引 之行 津 不 逸 尹曰:「道不行,孔子固 潔其身而亂大倫,君子不爲 于長沮 而 可廢 故子路譏丈人獨行之失曰: 而 爲 不可回,故亦終 至于道乎? 、者也。子之下車于接興,使子 也,君臣之義如之何其 伯夷、叔齊、虞仲、夷逸、朱張、 一、桀溺,反見乎荷蓧丈人,豈 而 于素隱而已矣。 四子者,方守其一 己已知 也。」是數 ,惟其義 『長幼 之矣。 一廢之

可無不可」。 言,身中清,廢中權。我則異於是,無斯而已矣」。謂「虞仲、夷逸,隱居放斯而已矣」。謂「虞仲、夷逸,隱居放少連,降志辱身矣,言中倫,行中慮,其

以 楊 無 偏,未若聖人之全盡 每言夷惠,必以孔子明之。」由 止 雄 可 無 三 則 止 范曰: 日 不可,此聖人所以一天下之不一也。 『觀乎聖人,則見賢人,是以孟 ,可以久則 「孟子曰: 也。」 久,可以 『可以仕則仕,可 速則速。』孔子 夷 惠皆得其 子

己。 夷逸,身隱而 法中,其素志之所在,不至于不揜。 言行之大,故愈于此。」 不拘,合乎道之權。惟是二者,中 吕曰: 柳下惠、少連,亦二者中乎道,而 「慮者志之所在,雖 不仕,合乎道之清, 不 于道 言放 可以爲 虞仲、 得 平 M m

造行則異。伯夷、叔齊,天子不得臣,諸侯謝曰:「七人隱遯不污則同,其立心

四七七

其 爲恥 之逸民。」 之士害義傷教 多矣,然清 仲、夷逸,隱居放言,則言不合先王之法 少連,雖 心 得 下 友 有不屑 聖 降 志 人 彼 而不污也,權 也,故能言中倫,行中 已 而 而亂大倫者殊科。 等,此 遯 不 世 枉己,雖 離 其最高 而適可也, 矣, 辱 與? 直 身而 以 是以 降 不求 與方外 慮 志 下 均 辱 合, 謂 者 身

之徒 救, 豈未嘗深考于此乎?」 惠、少連之所 同 夷惠而 也 楊曰: 降志辱 己。 而論者 身矣,而言中 同。 不不 七人者若是其 降志,不 謂三聖人 當是時 所 倫,行中慮 辱身,夷齊之 因 謂 班 時 清 制 則皆 和者 行 柳 以 聖 人 非 所 相 下

身 非 其道也 而 同,各盡 清 侯曰: 者 ,棄千乘之國 也,不降其志,不辱其身,隣于仁 其 (所至 「作逸民之道者七 而已。 mi 餓 夷齊,非其義也 ,非爲名也 人,而 」,●潔 制

> 虞仲、 清 ; 中倫 矣。 辱時,亦有不可降辱時,各因其 之中道,故曰: 可。』聖人之中道,志亦有可降 中庸》曰: ,行中慮。 下 放言以自 夷 惠 逸 少連,降 「溥博淵泉,而時出之。」」 隱 廢,所以 居 柳 放言。 下惠,三公不能易其介。 我 志 則 辱身,疑 中權。 異 隱 於是,無 居,所 時,身亦 其 然皆非 時 污 加 也 以 미 已, 有 聖 而 中 故 可 人 不

所以 日: 夷惠,必以孔子斷之。」 各守其一節者也。孔子 尹曰: 常 『觀乎聖人,則見賢人,是以孟子每 適 其 可,異 「先儒 謂 于逸 七人皆逸民之賢者 則 民 無 之徒 可 無 也 不 可, 楊 雄 此

伊川曰:「孔子自衛反魯、樂正、武入於漢、少師陽、擊磬襄入於海。蔡、四飯缺適秦、鼓方叔入於河、播鼗太師擊適齊、亞飯干適楚、三飯繚適

■ 「也」,四庫本無。

雅 小、《頌 由樂正魯 》各 得 不用而 其 所。 放棄之也。 至是,太 師 等人 洄 蹈

後 妄,自太師而下,皆知散之四方,逾 洋盈耳而已。 以去亂。 用 《伶人賤工識樂之正。及魯下衰,三桓 我者期月而已可也」,豈虚言哉?」 横渠曰: 聖人俄頃之助,功化已如此,其 夫子自衛反魯,一嘗治之,其 師摯之始,樂失其次,徒 泂 蹈 層 海 日 洋

時,禮樂廢壞,不聽規諫,故樂師失職,又不 重之。古者,樂師 侯受之于天子,以祀其先祖者也,故有國者 其言,而分散于四方,則其國可知矣。」 「記樂之所由廢也。 雖賤 m 有課 職 樂者,諸 哀公之

豈

而 無節,僭上無禁,守其官者或愧焉,是以 於伶官,蓋其 去之。 謝曰: 責輕 「周衰,賢者相招爲禄仕,多仕 而 無 愧。 至其 甚 也,淫聲 非

周衰,雖 禮 樂壞亡,而魯猶足

> 於河 其 爲 文述周公之語。」 職 也 海 , 故 ,雖樂工 者,故著之以見周公之澤也。 一變 之賤,猶負其器 而 可 至於道 0 而 至是,官 不苟,有入 不 得 下

魯益 魯,一 樂失其次,徒洋洋盈耳而已。 功化已如此,其曰「用我者期月而已可也」, 四方,逾河蹈海以 虚言哉?」 尹曰: 衰,三家僭妄,自太師以下,皆知散之 當治之,其後伶人賤工識樂之正。 「臣聞 去亂。 張 載 曰 夫聖人俄頃之助, 夫子自衛反 「師摯之始,

獨 私 不施其親,又當使大臣不怨,至公不可 明道 ,故又當全故舊。」 使大臣怨乎不 周公謂 也。 日 無求備於一人。」 魯公曰: 「周公謂魯公三句,反 以。 君子不施其親,不 故 無 大故, 復 則不 說

於」,四庫本無。

忘 不

四七九

也。」 伊川曰:「施,與也,言不私其親昵

道 求備於一人,則爲上易事: 其爲親也; 如 也。」 ,則不怨矣, 故舊不遺,則 ,此,其子孫忽忘之矣。 不施其親者,無失 范 大臣不獨用其身而 「記魯之所 由衰 也。 四者,治國之 民 不偷; 已,必行其 周 公之戒 無

按: 舊,寬衆,此其序 則去之,居其位而 陸氏《釋文》正作「弛」字,音詩紙反。 日日: 四四 [者正 也。 不用,此所以 一謂親 施 讀 爲 親、敬大臣、篤 弛, 不 取怨 大臣 相 維 也。」 非 其 故

使大 其爲 言 可 、是無 不聽 使 也。 臣 親 謝曰: 而 怨乎不以,大臣,民之表,使謀 而已,豈有施報來往之意 所不 齊家 息,則國 薄 對報之謂 治國、與人接下之道 矣。 可 求備于 知矣。 施 故舊 如親 非 黨特 也? 則 · 不 盡 故 不 無 行 失 M 而

是。」

臣 公之訓魯公以 才者至矣。 推之不 楊曰 求 : 備 爲國之道,孰先 自自 此。 于一人,则 親 親 推之于敬故, 所以 于是 厚 乎? 民 德、 自 用 敬 故 周

使人 也; 施 其 子至矣,國安有不治哉?」 也 (則必器之,不可以求備 尹曰: 故者無失其 大臣 所當任 親 者無 爲故,不可 '',不 失 其爲親 口 使 也 輕 有 是 棄 周 不 用 公之戒 遺 以 也 之 無 ; 恕 所

周有八士"伯達、伯适、仲突、仲二子当乡 國安有不治吉

横渠曰:「周有八士,記善人之富

叔夜、叔夏、季隨、季騙。

也。」

子記有八士,而閎夭、泰顛之屬不在焉。此自虢叔以下,而太公、畢公之屬不在焉。孔自虢叔:「周公作《君奭》,稱文王之臣,

● 「來往」,四庫本互乙。

莊周之《讓王》,蓋本乎此篇。」至於八士,●或顯或隱,皆聖賢之出處也。八人皆不顯者,周之多士可知矣。自三人

必其居仁由義者也。」
謝曰:「皆尚志者。雖其言行不傳,

八士。」
楊曰:「八人盡爲士之道者,故謂之

士則盡士之行者。」

尹曰:「周有八士,記善人之富也。

國朝諸老先生論語精義卷第九下終

「仁」。

四八一

或 朝諸 老先生論語精義卷第十上

子張 第 十九

思敬,喪思哀,其可已矣。」 子張曰: 「士見危致命,見得思義,祭

日: 不 子張所謂 恥,子路失之勇而 切偲偲,恰恰如 斯 危授命,亦可以爲今之成人,子張以爲士如 舉其大者,知其細 見得思義,不 爲義疾,見利思義則不爲利 已矣,在聖人則曰未也。子貢 『行己有恥。』子路問士,子曰: 范 日 士者,成人之次 ·爲利 「見危致命者,不爲義疚 也。」子貢失之辨而 也。 回 不足于和,故告之如此 也 孔子以見利思義、見 ş 也。 祭思敬,喪思哀 回,亦猶祭思 見危致命 問 不足于 士,子 一切 也 順

> 敬 可 此、强學而 已矣,在聖人則曰 喪 思 哀 力行之,可以進于成人,故曰其 而 己, 此 未也。」 土 一之常 也。 士 之 止 于

以 之乎?」 惡衣惡食乎? 哀,則其志意修矣,其肯懷居乎? 見得思義,舍利 動 謝曰: (其心,而又主之以誠慤,祭思敬,喪思 見見 其肯殺 一不辜,非其有 而 危致命,舍生而 取義也。 死 生 利 取 其 害 義 貨 而 不 也 取 恥 足 3

則未必 此 能勉 者,蓋致命則力爲之,不如授之安, 命」、曰「見利」,於士曰「致命」、曰「見得」 成 楊曰: 人與士之異也。」 而 得也 至, ,則可 見得 是 以 四者,人鮮 而後思義焉,則不豫矣。 爲 士矣。 有能自盡者,● 於 成 日「授 見利

義,祭主于敬,喪主于哀: 侯曰: 「見危致命,士之節 能思其所本, 也

于

四 八二

盡」,四庫本作「進」。

可以爲士矣。」

爲有? 焉能爲亡。」子張曰:「執德不弘,信道不篤,焉能

明道曰:「信之不篤,則執德無由

弘。

也, 志仁無惡,能爲亡也。」 横渠曰: 「有德者必有言,能爲有

> 人焉,不敢以爲有也,不敢以爲無也。」 意無必,能去之而不有也。蓋如一出焉, 德者,能有之而不去也; 信道篤,則雖死不變。 不篤,則志 謝曰: 必喪。 「執德不 執 弘,則 德弘,故 能爲有,如稱 能爲亡,如 心不廣; 物莫能 信道 稱無 道 勝; 有

爲亡?」言有亡不足爲損益也。」重致遠也難矣,故曰:『焉能爲有? 焉能容,信道不篤,則毅不足以致果。其于任容,信道不篤,則毅不足以致果。其于任容,信道不篤,則毅不弘,則大不足以有

而已。」 不篤,則無所得。如此,則若存若亡,罔人不篤,則無所容, 信道 侯曰:「執德不弘,則無所容, 信道

焉,則焉能爲有? 焉能爲亡?」不篤,則志不堅。其爲學也,一出焉,一入不篤,則志不堅。其爲學也,一出焉,一人,知曰。「執德不弘,則心不廣, 信道

「子夏云何?」對曰。「子夏曰:『可子夏之門人問交於子張。子張曰:

四八三

何其拒人也?」 不容? 我之不賢與,人將拒我,如之 者 善而矜不能。我之大賢與,於人何所 異乎吾所聞。 與 之, 其 不 可 者 君子尊賢而容衆, 拒之。」」 子 張 日

各有 嘗拒人也。」 日 : 「與人交際之道,子張爲廣,聖人亦未 所 明道日 以, 初學與 「子夏、子張 成 德 者 事 論交,二子告人 不 同。 又

言是成人之交,子夏所言是小子之交。」 伊川曰:「子夏、子張皆論交,子張所

故其 若子張之言,其道廣也。 不能 者三友。』則有所 絶原壤之夷俟,則與人交亦廣矣。」 (所聞 反 范曰: 諸 三,而 不同。孔子曰: 「子夏、子張皆有聖人之一體 以己與人,以己拒人, 與,亦有所拒 孔子見互鄉童子, 『益者三友、損 也。 然子夏

明道

日

「致遠恐泥,言不可行遠。」

.

謝

日

「交際之道,異乎求友,自非犬

也。 于和 之無不覆 馬 子張之說 與 氣 蓋于人何所不容,非大賢不能 我 何病?」 不 也,其間動植之不美者固多矣,而 同 ,尊賢 類 無 而容衆,嘉善而 不可者。 交際之理 矜不 能 如 天 口 如

故告之如是。言各有當也。」以告始學者, 至于子張,則又將擴之也,以告始學者, 可者與之,其不可者拒之,所

皆有當,未可以是非論之。」如子夏可也,汎交者當如子張可也。二者尹曰: 「交際之道不同: 擇交者當

致遠恐泥,是以君子不爲也。」子夏曰: 「雖小道,必有可觀者焉,

海 小道不通乎聖,故不可爲也。」 於 ,則由之, 泰 范曰 山,行潦之于河 . 「小道之于聖人也,猶丘 塗雖 曲, 海。 而通諸夏,則由之。 Ш 雖 曲 有 垤之

碍 非 何泥之有? 可 與 也 不 人 ? 口 謝 堯舜之道耳。 由,特不能致遠耳。 日 莊、老、釋氏之道,非 : 「旁蹊 學者見其可觀也,因以爲同, 曲 堯舜之道 徑 皆 若大 坦 無 塗 一萬世 八路 可 之支别 觀,特不 ,則豈有 一無弊, 故

矣,故君子不爲也。」 所 河,而 楊曰: 不能 「百家 相 通。 衆技,猶耳目鼻口,皆 非 無 可 觀 也,致遠 則 泥 有

亦誤矣。」

以 不可以人堯舜之道,非天下之通 致遠故也。」 侯曰: 「異端 曲學,非 無 可 道,必不 觀 也 可 特

當慎 爲 也 也。」 一然而 尹 日: 必有可觀,足以惑人,學者尤 「小道不可以行遠,故君 子不 所

能 子夏曰: 可謂 好學也已矣。」 日知其所亡, 月 無忘其所

范 日 日 知 其所亡者, 知 新 也; 月

> 爲 無忘 師 故 其 所 可謂好學也已矣。」 能 者,温 故 也 0 温 故 而 知 新 口

> > 以

常而 故而 能之。」 變。 不 知新,不息者也。 謝 曰 離 盡變則日用不窮,此其所亡也, 大體,此其所能 「此其論學,非 惟不息,故能 也。 讀 蓋 書之謂 非爲人 體 常 /者 體 而 温

盡

此? 則 日 楊曰: 益 矣,故爲 日 好 知 學。 其所 亡,月無 非 習而 察,何 忘 其 所 以 與

則 (日益矣,故曰可謂好學。) 侯曰: 「日知其所亡,月無忘其所 能

尹曰: 子夏日: 仁在其中矣。」 好學者日新 「博學 而篤 而不 志, 切問 失。」 而

近思,

此 何 ,便是徹上徹下之道。」 以 明道曰: 在 其 中矣? 「博學 而 學 篤 者 志,切問 要思得 又 日 圃 之。 學 近 。 了 思,

學。 在興 敬 敬 問 志 在 同體,其次惟莊敬持養,及其至則一也。」 3、雖州 切切 ,雖蠻貊之邦行矣; 又曰: 敬 m 質美者明得盡,渣滓便渾 則見其倚于衡也,夫然後行,只此是 近思, 也 問問 誠 里 而 也 行乎哉? 近 則仁在 學 思,仁 中 要鞭 間 便 其中矣。 在其 辟 有 立則見 近 中矣之意。」敬主事。 言不忠信,行不篤 裹著己 箇 九其參 言忠信,行 化,却與 而已,故 博 于前 學 天 而 也, 篤 地 切 篤

「以類而推。」中矣。」 或問:「如何是近思?」曰:中矣。」 或問:「如何是近思?」曰:篤,不能力行。切問近思在己者,則仁在其篤,不能守約, 志不伊川曰:「學不博,不能守約, 志不

之道 育德 審 志欲其篤,不篤則無 問以 也。」 范曰: 思欲 致意,思以致理: 其近,故能 「學欲其博,不博則 卓 得。 也。 學 問 以聚道 力此 欲 其 無約 四者,仁 切 一、志以 故能 也

> 豈求多聞多 博 切 則 學 間 漢博學 在其中矣。」 而 近思之理也,所以仁在其中矣。」 尹 楊 謝 日 日 亦豈 篤志,切問而近思,則仁在其中矣。」 曰 識而已哉? 求 「爲仁由己,非求之于遠也,故 「切問近思 篤 爲 志 多 近 聞 思,皆 多識 ,則心不外馳,博學 乃欲成吾之仁,故 哉? 心 示 外馳 乃欲成吾 之謂

學以致其道。」 子夏曰:「百工居肆以成其事,君子

其道,未有不由學也。」學,則道不至。● 聖人雖有生知之性,欲致不成, 君子不居學,則事不成符,君子不居工之于肆,朝夕無不在焉。工不居肆,則事工之于肆,朝夕無不在焉。工不居肆,則事

0

不成」九字衍。不成君子不居學則道不至」,則原本「君子不居學則事不成君子不居學則道不至」,則原本「君子不居學則事

工不信度同,其逸居而無所事則一也。蓋謝曰:「學必欲致道,學不能致道,與

惟無

所

事,斯不免于放僻邪侈。」

致道乎。」 楊曰:「君子之學,由百工之居肆也。 楊曰:「君子之學,由百工之居肆也。一心 以爲鴻鵠將至,雖小技無以善其事,不是以成其事,君子不學,不

所謂道者,中而已。」君子之學,亦琢磨其所未中,故能致其道。百工居肆,講求其所未至,故能成其事,百工居肆,講求其所未至,故能成其事,

所務者哉?」● 君子之於學,可不知其肆,必務成其事: 君子之於學,可不知其尹曰:「學所以致其道也。百工居

之。湯改過不吝,無文之至也, 紂詐足以范曰:「君子過則改之,小人過則文子夏曰:「小人之過也必文。」

孟子曰『又從而爲之辭』,皆文也。」飾非,文之至也。 傅說戒高宗無恥過作非,

則昔之所過,而今非也,何必文?」謝曰: 「吝于改過,故必文, 能改,

過,故必文。」 楊曰:「君子改過,故自訟, 小人耻

小人恥過作非,故必文。」 侯曰:「君子改過不吝,何文之有?

即之也温,聽其言也厲。」子夏曰:「君子有三變。 望之儼然。

三才備矣。」又曰:「口將言而囁嚅。若合正,定地道也,蓋非禮勿言也。君子之道,人道也, 聽其言也厲,則如東西南北四方人道也, 聊之也温,中心和易而接物也温,備 明道曰:「望之儼然,秉天陽高明氣

「者」,四庫本無、《論語集註》引尹氏《解》亦無「者」字。

是 開 聽其言也厲 口 時 要他 頭 也 須 開 如 荆 軻 於 樊於期 須

温 惟孔子全之。 伊 川 딛 他 人 温則 不 厲, 儼 然 則 不

立 故儼然; 温 一,人也; 加 德不 范曰: 孤、故温則仁也。」 義以方外,故其言也 聽其言也厲,地也 「望之儼 然, 天也 3 厲 敬以 即 直内 之也 敬義

說 留 信,況使人生鄙悖之心,却是自家不是。 說 厲。 相悖也 聖人以慎言語爲善學,君子之言, 在胸 世 與人。不說不是吝, 了又别。 毒。」 謝曰: 須存這氣味 中, 0 如 且看尋常有些自得在 只看箇不言不語底人,做 良 「此非 玉 在 温 胸 有意于變,蓋並 潤 中 而 ·朝夕玩 栗然。」 說 與 味,不 胸 人,人未 中, 行 聽 又 出 别 須 之也 曰 而 恶 才 必 鄿 不

楊 日 「望之儼然而可畏, 雖 可 畏

> 則 也 厲 即之温 是 調 然 三變。 m 미 親 其君子之成 雖 可 親 德與?」 也 聽 其 言

於心,其生色也睟然,見於面,盎於背, 不 ·能厲。 體。 信,則 尹 子夏日: 四體不言而喻,亦自然之理也。 君子非有意於外也,仁 以 爲厲己 世之人儼 「君子 也。 信而 然 信 後勞其 則 而 不温 後 一義禮 民 温 施 智 則 根 於 未 未

刀

伊 Ш 日 : 「信而後諫, 惟信 便 發 得 人

信,則以爲謗已也。」

志。」

後勞之矣; 信,而民未信 後 未信,則弗諫 使之信于己; 諫之矣。」 范 日 : 也。 ,則弗使也; 伊 君子信于己。信于民, 信于君,然後諫之。 尹、傅說之諫君,可謂信 如湯武之使民 在己者信, 可可 在 謂 信 己 然 而 者 後 君 而 而

謝 日 使知所以佚之,則信矣,故

康 度君,乃 共 而 爲 不 事 怨 量 猶 而 後 有 未 不從也 信 入也。古人所 則 雖 0 盤 信 庚之遷, 而 後 以以貴 諫 有 以 非 道 惟 所 而 以 喜

發志,不可爲也。 「所以事上,所以用下,非 信 以

上。

之不從者,皆己之信不足以取信故 尹 曰: 子夏日: 「事上使下,皆以信 「大德不踰閑,小德出入 爲主。 也 可

又曰 明道 . 日 出 人可也,出 一大 德 小 德,如 須是同 大 歸 節 小 節 0

之大義 何?」日 言不 如 或問: 可以 伊 必信,行不 ĬΙ 取、 小德, 「大德不踰閑,小德出 「大德是大處,小德是小處。 可以 「大德 如 必果,是出入之事否?」 無 援 取之類是也。」又問 溺 踰 之事,更推 閑,指 人可也,如 君 臣 廣之。 父子 出

> 乃 日 所 以 「亦 果。」 是 也 然 不信 乃 所以 八爲信, 不

果

爾。 義。 也, 子夏謂大德不踰閑,小德出入可也 禮器不泥于小者 蓋大者器, 横渠 曰: 大者器,則 「大德不踰閑,小 則出入 小 ,則無非禮之禮 者 不 小者,莫 器 矣。」 非 德 一,斯之謂 時中也。 非 又 出 人 日 山

而 而 成,故出 成法,故不踰閑 范曰 : 可 「大德 也 __ 其猶 小德其 規 矩 猶 器 準 繩 乎? 待法 乎? 動

學者貴 出 擇 亦 未 至 地 不 À 乎? 離 謝 于聖,則其所 而 E. 乎 知 蹈 禮 大體,大體正, 時 義之内矣。 「與「小德川 然後言,亦君 謂 Ш 流 若 則 流 子 不 小 ,大德敦化』 有 知 所 節 出 大體 不 雖 人也。 取 有 出 丽 則 同。 況 雖

楊 或遠或近, 或去或不 去,未

29 八九

也。」 不辜, 同, 得天 ·德出人可故 下不爲 也 也,是 至于行 則同 不義, 不 踰 閑 殺 故

尹日 子游曰: 後倦焉? 言游過矣。 無,如之何?」子夏聞之,曰: 若小德則有出 對、 : 進 退, 「不踰閑者,不 臂諸草木,區以别矣。 「子夏之門人小子,當 君子之道,孰先傳焉? 則 可矣,抑末也。 人矣。」 踰 矩, 故 本之則 [灑埽 噫! 也 君子 大

之道,焉可誣也?

有始有卒者,其惟

先傳 合。 獨。 而 傳 E 议 以 者 明 聖人 近 近 又曰 又曰 道 乎?」 小而後不教以遠大也。」 者 理 曰 . 無 小 者,而 大 先傳 灑 小 灑 婦、 埽 故 後教以 後倦、君子教人有序。 應對, 也。 應對、進 大者遠者 故 與 君 佛家默 退, 子 只 便 在 非 然 是 是 處 慎 形

> 味。」 後 以衆 以與知; 灑 見 物 埽 灑 以爲聖賢,亦豈外是? 處恭,執事敬,雖衆人能焉, 也?」曰: 古之教 知 人 埽 有 是其然, 應 埽 八誠處。 多以 只 應對 應對 其 本 對 人習不致察,不能上達爾,終身由之而 伊 是 又曰: 末 Ш 道 只 性 人,必先于灑埽、 上,便 \exists 必有 及其 與 故曰: 看 不可分本末 命 古人 統 下學而上達。 所 精義人神, 别 事 「盡性至命,●必本于孝悌, 至也, 雖聖人有所不知。 所以然。」 以 就就 可到 教 作 聖 然 人,莫非 人之道 「人莫不飲食,鮮能 孝弟中便 如 高 聖人事。」 何。」 爲 通貫 遠 然卒異于衆人者, 又 兩 事 , 雖夫婦之愚, 日 應對、進 段 使之誠 更 r,殊不 只 미 彼聖賢之所 事 無 又 以 日 理 精 知性 盡 或 舞 灑 粗 退 問 射便 埽 雖 知 居 何 自 應 凡 灑 可

) 「至」,四庫本作「致」。

乎」,蓋 近 統 無孝弟之人,而 處 事 故 灑 無 也。 謂 有 此 應 精 子夏言『有始有 也 對 粗 0 不能 聖 無 進 人能 盡性 退 有 本 與 竭 末, 至 盡 其 一命者, 卒者,其 孝 性 兩端爾 弟 至 是 命 由之而 惟 于 亦 今 聖 是 非 人 切 不

知

也。

此。 之 未 其 卒,所事 教 知 2難易 必能 之,人必 同 且 之美 横渠 而 灑 答異 繼,妄以大道教之, 知 無大 知 埽 日 德, 惡 德 倦 以 應 故能 小, 也 弊 此。 當 對 知 教 莫不處 乃幼 教 惟聖人于大德, 誰 和 人使人德。 者 可 其 而 (美惡, 先 必 極。 孫 是誣 傳 知 弟之 此 至 今始學之人, 也。 知 事 學之難 誰 仲 X 有 將 尼 也 知至學 始 後 所 長 易。 以 知 有 後 倦

後 由 范 倦 焉 日 則 . 中 而 況 道 道 灑 而 不 廢 埽 可 須 皆 應 臾 不 料 離 以 平 其 ? 也 先 造 傳 次 所 則 以 顛 不 躐 沛

> 豈 能 别 材 天 可 地 成 教人者豈 天 以 之 材 地 氣 灑 也 也 埽 小 應對 故 可以 以 皆 有 成 有 爲 聖人望之也 始 小 末 受 ,大以成大,區 有 道 而不學乎 卒 之質 而 無先 ? ? 後 以别矣。 小 草 聖人之 大之 木 受

起。一 學 爲 孰 酢 貌 大 處 展 卒,蓋本末無二道。」 E 天 当出 下 托 以 祐 小 看 曲 達 而上達始得,不見古 曰 直 爲 師 與 不 神之事 只如 辭 同 不 無 日 一也,所以聖人克勤 氣之事 7 可 與 其 將 如一金與 灑 而 何 馬。 實 下 凡 埽 後 以 金 倦 學 事 應 異? 必正 灑 也 與 ? 木 丽 對 埽 人 人,與 E 極其道,則 必 心誠 相 我 如草木區 人就 孰 應對、進退 又曰 學,却 須 若 似 以 要 意 將 有 小 灑 爲 高 天 物, 而 鄿 是 口 埽 我 下 達 後 物 以别矣, E 大 道 而先 若 應 而 乃乃 能 與 達 底 且 瑣 對 須 有 必 矣, 從 是 有 動 吝 屑 傳 與 1 雖 做 始 其 酬 容 然 將 小 不 下 ?

怎灑 穩 心 如曾子 亦只與行平地 千 須要就灑 埽 尺 我若 欲動 得 臺邊,心 金 與 去得恐懼 容貌 埽應對上養取誠意出 應對 一般。 如 便 、正顔色、 不 恐 將 底 ·著此 只如 天 懼 心 下 出辭氣 行 灑埽,不 心 與 雖 平. 人 履 怎應對 相 地 千仞 來。」 爲此 似 上 著此 之險 得 却 又 岩 古 ?

學; 應對、 若灑 倦者 然,聖人 傳者,至 由 惟聖人乎 之而 埽、應對、進 楊 進 其卒也,非離 日 所 退 于成人 不 之間 謂 草木、區以 知者也,故 人 性 而後使爲之,則或倦矣。 與天 哉 德之序,有宜先傳者,有 退 此 道者,豈嘗離 則門人小 别矣,其叙 故其 以爲 E : 道。 始也,此 『有 子之所宜 始有卒者, 後倦焉 不可誣 夫灑 即 埽 也。 爲 先 後

近 ,不可分而爲二也。 尹 曰: 學 有 本末 有 不 可 遠 分而 近 然 爲 有 二,則 本 末

> 哉? 過。 實無草木之别者 爲道 豈 精 之職 其 而 有 義 人矣,學者豈 無 教 以 且日 也。 人 亦 本,是不 若夫始卒皆舉,無先 譬諸草木,區以别矣,大小雖不同 爲後而 神 無 君子之教,豈有以爲 道 得 不 不 m 可 知本末 倦教 可 優 可 得 也。 須 劣 同 而 者? 臾 矣。 日 精 君 離 ൬ 粗 理也,故 子之道 , 則 語 夫 大小本末,皆所以 矣。 後 也? 灑 灑 小大之序, 埽 先而傳之者 子 埽 一,焉 應 子 游 應 對 夏 口 以 對 以 誣 爲 與 小 也 則 末 夫

仕。」子夏曰:「仕而優則學,學而優則

優,則可以學。優裕優閑一也。」 伊川曰:「學既優,則可以仕, 仕既

仕。 瓢 者遠矣。 漆雕 學所以爲己,仕所 范 日 開之未能 君子之仕 此 士之 信, 木 嘗 以 雖 常 爲 優 不 也 學 而 人也,必 *, 不仕,其 若 顔 未 子 己 嘗 有 之 所 不 欲 存 蠞

而 後 可 學優則仕,行其爲人者也 以 及 行人。 故 仕 優 則 學, 勉 其 在

于文, 學優而不 「仕優而不學, 仕 ,則志高而不中於義 則志卑 而 不 進

也。 謝 目 學優, 「何必讀書然後 則仕亦 優; 仕 爲學,學 優,則 ·與仕 亦

優。

仕。」 庶人,不可一日忘也。 楊曰: 「念終始典于學,自天子達 故仕優則學,學優 於 則

侯曰: 優謂 暇 時 也。」

禮

學未嘗不仕,念終始典于學之意。」 尹曰: 學與仕 中 君子仕未嘗不

子游曰: 「喪致乎哀 而 上。

乎用 五 哀 日 而 不食,日: 范曰: 吾情?」故三年之喪,賢者不過,所以 止,不敢過其情也。樂正子春之母死, 「君子之行,爲可 「自吾母 而不 得吾情,吾惡 繼 也。 致乎

> 爲天下之達 道 也

文,盡哀而已。 也,不若禮不足而 謝 喪 禮 哀有餘也,故不 與 其 哀不 足 圃 致 禮 飾 有 餘 于

不若哀有餘而禮不足也。」則喪致乎哀而止 戚。』《記》 楊曰: 日 一子曰 『喪與 : 其 禮 喪 有 與其 餘 而 易 哀不 也

耳。

侯曰: 喪止于哀。」

有餘也,不若禮不足而哀有餘也。」 尹曰: 喪致哀而止。 與其哀不 足 呵

子游曰: 「吾友張也爲難能也, 然而

未仁。」

以其過之,故未仁。」 楊曰: 師 也過,故其行有難

曾子曰: 「堂堂乎張也,難 與並

一爲仁

明道 日 : 「子張既 除 喪 而 見,夫子予

四 九三

「先王制 于薄 和 故 禮,不敢不至焉。」推 之 難與並爲仁矣。」 而 和 彈 之 而 成 聲, 此言之,子張 作 而 日 :

貌 並 仁。」唯外不足而内有餘,庶可 人皆不 爲 以 謝曰: 自滿 范曰: 而 與其爲仁。子曰 ,則人孰告善矣。」 言也。堂堂不害爲 「曾子之論異于子游,爲難 「子張内不足而 「剛 仁,謂盛 以爲仁矣。」 外有餘,故 毅 木 訥 其 容 與 近

並 爲 楊 日 堂堂乎,則莊 而 難 親 故 難 與

曾子 尹 致者也,必也親喪乎?」 日 日 「子張之學,病 一吾聞 諸 夫 子 在 乎 誠不至。」 人未有自

能 心 八之常 如 竭 此,又安得不能當 力 伊 盡 川 此 曰 此 相 事 對 ,則可以當天下之大事,養生 「送死天下之至重,人心苟 而 言。 若舜、 曾子養生,其

> 用 者,猶可以 其誠哉?」 范 未 盡 親 喪 親 固 喪 所 而 自 不自盡 盡 也 一, 則 凡 爲 何 所

不用誠,於何用其誠?」 謝 日 「自致,必誠必信之謂。 如 此

而

不以 天 楊曰 下儉其親,而所當自致者,惟 惟送死足以當 大 事 故 君 面

尹曰: 「親 ・ 喪固 所自盡也,於此不誠,

惡乎用其誠?」 曾子曰: 孝也,其他 「吾聞諸夫子:

父之政,是難能也。」

可能

也

其不改父之臣

孟

莊

子之

天子不改,而 小,不可改, 不善,子不可以不改: 范曰: 大夫不改,而失其家: 「父不義,子不可以不 失天下, 親之過大,不可不改也。 道之常也。 諸 侯 不 雖莊子之孝, 改,而失其 爭; 親之過

亦不可爲也。」

者 而 ,稱其善而不許其過之詞。」 吕 孟莊 日 : 子終身不 「人之孝,三年 改、故 無改於父之道 爲 難 能。 難 能

守 則 難 其政,政雖 改 是 能 而 而 成父之惡耳,又焉得爲孝乎?」 楊曰: 而 不改與? 不改者也。 可 稱也 有 不善者而 「臣之賢,政之善,子孫之所宜 與? 使臣 孔子謂之難能 若夫不改而 雖有不賢者 不能 害其事,兹 贵 害其政事, 而 不能 以 其 其 爲 亂 宜

能 然 臣 也。」 M mi 能 侯曰: 不 如 能亂 此者, 豈易爲哉? 政,政而不能害事,何必改? 「父之臣、父之政,非不改也 故曰: 『是難

改可也, 不善而不改,則國家豈不危哉?尹曰: 「父之臣與父之政皆善,則不

故以爲難能而已。」

曰:「上失其道,民散久矣,如得其孟氏使陽膚爲士師,問於曾子。曾子

則哀矜而

勿喜。」

況于失道之世,刑不教之民乎? 慎 司寇,有父子訟者,拘之而不决。」 也。 范曰: 雖舜 「得情而喜,爲 在 上,而咎繇 明 刑 土 師 亦哀矜之, 故孔子爲 者 所不 能

仍喜。 得已,即陷于不知也。故得其情,則哀矜而之無道,教之無素。」故其犯法也,非迫于不之無道,教之無素。」故其犯法也,非迫于不以善謝曰:「《禮》曰:「民之散也,以使

罪 詳 其情,可不哀矜而喜乎?」 又從 至矣。 楊曰: 而刑之,是罔 後世政 「先王之政,至于敬 散民 流 民 也 而 不 爲 相保,及陷 寡屬 士師者,得 婦, 其 乎

無道揆,下無法守,及陷于罪,然後從而刑侯曰: 「王者之迹息,而政散民流,上

四九五

之,是罔民也,可不哀矜乎?」

若曾子者,可謂知此理矣。」 臯陶明刑,猶且恤之,而況刑不教之民乎?于罪,則哀矜而已,不足喜也。舜之在上,能得獄情,可謂能矣。然而失道之世,陷民能,则曰。「士師,典獄之官也。士師而尹曰。「士師,典獄之官也。士師而

房。 是以君子恶居下流,天下之恶皆歸子貢曰:「紂之不善,不如是之甚也。

紂· 皆其所自取也。」
之善、舉歸于堯舜、 天下之惡、舉歸于桀後世言紂之惡、有溢于《泰誓》者焉。 天下後世言紂之惡、有溢于《泰誓》者焉。 天下

惡,故天下之惡皆歸焉。」 貴爲天子,至貴而自爲至賤之行,人情之所 吕曰:「君子貴者,下流賤者也。紂

是以君子貴强爲善,若能修身見乎世,則人謝曰:「不善皆歸焉,居下流故也。

雖欲以不善加之,亦不可得。」

流之謂也。」
之, 與爲惡者也,故天下之惡皆歸焉,下之, 與爲惡者也,故天下之惡皆歸焉,下之善歸

其明, 人之過至于改,則亦何傷于全德?謝曰: 「日月陰陽之精,不以食故損

故德性天也,過不足以牿亡之。」

湯,兹非其仰之者與?」不以過而蔽其善。《書》以「改過不吝」稱不以過而蔽其善。《書》以「改過不吝」稱一楊曰:「日月不以蝕而損其明,君子

可以是说,可见的人说道?! 之, 及其更也,人皆仰之。小人耻過作非改則無過矣。故如日月之食焉,人皆見改則無過矣。故如日月之食焉,人皆見

而不能改,何更仰之之有?」

子之門人,皆以改過爲美。」見之而無損于其明者,以其能更也。故孔見之而無損于其明者,以其能更也。故孔尹曰: 「君子之過如日月之食,人皆

學?」子貢曰:「文武之道焉。夫子焉不小者。莫不有文武之道焉。夫子焉不外者。莫不有文武之道焉。夫子焉不外者。莫不有文武之道,未墜於

子畏於匡,曰:『文王既没,文不在兹范曰:「文武之道,堯舜之所傳也。

師。」道之所在,聖人師之,故無常師也。」曰文武。伊尹曰:『德無常師,主善爲乎?」言傳文王之道也。子貢據周而言,故

之有?」
之。夫道無適而非也,惟所取而得,何常師孔子則聞而知之者,故子貢以文武之道言孔子則聞而知之者,故子貢以文武之道言

不賢者識其小者。」生之也,能明之爾,故曰: 賢者識其大者,生之也,能明之爾,故曰: 賢者識其大者,也,何常師之有? 而又焉不學? 子貢也,何常師之有? 而又焉不學? 子賈

常。」 尹曰:「德無常師,主善爲師,故曰無

之好。夫子之牆數仞,不得其門而入,「譬之宮牆,賜之牆也及肩,窺見室家仲尼。」子服景伯以告子貢。子貢曰:叔孫武叔語大夫於朝曰:「子貢賢於

四九七

5日:「肾、白己,宜丁易儿, 星、或寡矣。夫子之云,不亦宜乎?」不見宗廟之美,百官之富。得其門者

宫牆譬之。」
也,若知之,則安敢比子貢哉? 故子貢以也,若知之,則安敢比子貢哉? 故子貢以 侯曰:「叔孫武叔不能知孔子爲聖人叔孫武叔之不知也。」

乎? 騟 也,猶可踰也, 也,仲尼不可毁也。 叔孫武叔毀仲尼。子貢曰: 多見其不知量也。」 雖欲自絶,其何 仲尼,日月也,無 他人之賢者,丘 傷 「無以 於 日 得 月 陵 而 爲

范

日

「賢人易見,故多譽,

聖人

難

不欲見者,是自絶而已。」毀不加損,如日月之明,人無得而踰焉。其不用,又有不知其聖而毀之者。譽不加益,知,故多毀。故孔子之時,諸侯有知其聖而知,故多毀。故孔子之時,諸侯有知其聖而

傷?● 益見其不知量也。」 得 家之好? 自小視大故也。雖門户亦且不見,豈 對 亦然,唯日月之光塞宇宙 以見夫子之聖。高而可踰,何止丘陵,泰 以 而 踰焉。 博學無常師也。 謝曰: 安得而不毁也,惟其毁之, 人欲自絶而可 「公孫朝問夫子何學? 子 叔孫則直毀之矣。 而 疑,在 無 窮 也,然 日月 庸 乃 知 貢 室 何 無 所

侯曰:「妄生毁譽,而子貢告之以聖之者亦自絶而已。」 楊曰:「聖人明並日月,不可踰也,毀

則是自絶也,亦何損於日月乎?」與此句立語近似。「節謂丘陵可踰而及,日月之高不可得而踰也, 毀七「人欲」句,原本存疑。按宋蔡節《論語集說》卷十:

0

此,人縱欲自絕,於日月何傷哉?」人之道德如日月不可毀而不可踰也。如

毁之,夫何損于孔子: 其言之若是 尹曰: 也 叔 既不足以知其過疑,又從 孫 武 叔 不足以 益見其不知量而 知 孔 子 丽 宜

動

斯和:

自然皆從欲風動,神而化也。」

横渠曰:

「立斯立,道斯行

,緩斯來,

斯立 其 也。 以 **豈賢於子乎?」子** 而升也。 ? 爲 子 生也榮,其死也哀,如之何其可及 禽謂 ,道之斯行,綏之斯來,動之斯和。 知, 夫子之不可及 夫子之得邦家者,所謂 一言以爲不知,言不可 子貢 日 す 日: 也,猶天之不 「子爲恭也, 「君子 立之 仲尼 可 不 階 吉 慎

德 聰 行,綏之斯來,動之斯和: 性 明 而 而 伊川 声。」 言 . 綏之斯來,動 又曰: 「子貢言性與天道, 立 之斯 之斯立,道之斯 聖人之神化,上 和 以 夫子 夫子

神。 下 之斯和,固非小補,作者是小補而已。」 化,身之所 與天 如立之斯立,道之斯行,綏之斯 地 同 經 流 歷 者 處; 也 所存者神,存主 又曰: 所 過 便 者

爲 化,所存者神,上下與天地同 道之斯行,綏之斯來,動之斯和: 譬之宫牆,又譬之日月,又曰猶天之不可階 妣,夫子之教也。」 變時雍,舜之治四方風動,文王之化 至,邇無 自淺以至深,故記 而升也,則亦無以加矣。 爾德。 范曰: 不 其生也天下歌頌,其 服 「子貢知足以知聖人。其言初 也。 者次之如此。立之斯立, 孟子曰: 三章自小以至大, 流。」堯之治於 『君子所 死 也 遠無 如 百 過 姓

進 徳蓋 謝曰: 極于高遠也。 觀子貢 稱 億 聖 則 屢 人 語 中 乃 知 晚 年

四九九

굸: 貨 得 從法度上做起,變化風俗 誰?」使孟子得志, 立 而 是它文王始得。 變化在手,便做得恁 化風俗之事,惟聖人能之。 變化,而莫窺其 在。 又曰: ,道之斯行,綏之斯來,動之斯 殖 有不可知者存焉,此殆難以 焉, 八鼓 『如欲平治天下,當今之世,舍我 如二《南》、《 舞 其 「夫子之得邦家者,所 羣 向 動 之 所以變化也。 77,捷 所 爲 麟趾》、《翳虞》之應, 于桴 如 地 乎 何?」曰: 事。」●或問: ? 鼓 底 影響, 爲它與天合 事,恐也未能 夫 蓋不離于聖, 子 思 和 「是它 謂 人雖 之 勉及也。」 得 立之斯 孟 邦 見 此 須 須 其 其 子 變 7

以

同

來

尹 曰

:

「立之斯立,道之斯行,綏

之

之所 不可 也。 行 所及,可 立卓 楊曰: 孔子聖而 知 之 爾而 神, 以 「自可欲之善,充而至于大, 階 非 不 已,況餘人乎? 力 圃 可 升 知者,雖 行 者也 可至, 顔 不可 大而 淵之賢, 宜叔 階 化之,至 而 孫 見 升 武 叔 其 者

> 綏之斯 之徒 神矣夫。」 不 來 能 ,動之斯和,蓋 知 也 所 謂 立 之斯 誠 于 此, 文 動 道之斯 于彼,其

知聖人,其孰能形容如此哉?」流也。子禽何足以識之? 非子貢知,動之斯和。 此聖人之神,上下與天

足地

朝諸老先生論語精義卷第十上

國

■ 「地」,原作「他」,今據四庫本、傳經堂本改

國朝諸老先生論語精義卷第十下

堯曰第二十

舜亦以命禹。 野,允執其中。四海困窮,天禄永終。」 堯一 「咨,爾舜! 天之曆數在爾

不待人安排也, 安排著,則不中矣。」識得則事事物物上皆天然有箇中在那上,伊川曰: 「允執其中,中怎麽執得?

奉天 永終矣。 窮者 三聖 窮爲託。 相授 子, 也, 范 日 庶民 使 此堯舜傳天下之要法也。」 而 允執其中者,正 四 同一辭。天之曆數在 也。 舜之德如堯,禹之德如舜,故 海 困 堯授舜,舜授禹 窮有不獲其 一心也 所, 爾躬者, 則 皆 四 豆 天 海 禄 困 困

> 與? 物平 道,允執厥中,乃傳心之密旨也。」 權衡之應物,曾無心于輕重,抑揚高下,稱 云乎哉? 日 中 施, 而 游 堯、舜、禹三聖授受之際,所 己。 日 無銖 : 不偏不倚,適當其可而已。譬之 蓋中者,天下之大本也,豈執一 两之差,此其所以 有一 言而 足以 盡 至 爲 治之要, 守者 時 中也

范曰: 「湯之德莫如罪己。以一玄牡

£. ()

私也。 赦。」 告上 也。 蔽、己有罪不赦、以其簡在帝心、皆不敢自 賢人也。 己之罪 諸一身。 又曰 非天子所得 帝 也 者 一身之罪,不及萬方, 賢 請 ^ 此湯之至德也。 人不 『爾有善,朕弗敢蔽 桀之罪也。 敢蔽 專,故曰帝臣。 Ĕ: 『罪當朕躬,弗敢自 而用之者,所以事天 有罪 不 。人有善不 萬方之罪, 敢 。」帝臣者, 松赦者, 求

明道曰。「至親不如仁賢。」如仁人。百姓有過,在予一人。」相有大賽,善人是富。「雖有周親,不

下之至公也。百姓有過,在予一人,亦武王人,非富淫人也。雖有周親,不如仁人,天善范曰:「武王大賚于四海,所賞者善

言以蔽之曰: 公而已。堯舜禹湯,或傳或内聖之德,必有外王之業,其所以存心,一謝曰: 「帝王之功,聖人之餘事。有

之德也。」

輔 貴與?」 達之輩,真如穿窬矣。況于錙銖不義之富 帝王之道豈遠乎哉? 不義、殺一不辜而得天下所以不爲之心, 之語,以 繼 其 ,何嘗必天下戴己與? 考之天 見 其 則 用 不唇數 ۱Ļ, 有 然則學者苟 其視曹孟德、司馬仲 歸,稽 故夫子歷 之人 能 則 操 一叙聖人 惟 行 德 則

說。 則得 民歸 焉。 謹權量、審法度、修廢官、四方之政 衆, 心焉。 興滅 信則民任 國,繼絶世,舉逸民,天下之 所 重 焉、敏則 民、 食、喪、祭。 有功,公則 行

者,亦猶是也。」
所常言,故弟子序而記之。夫子之得邦家說」,二帝三王之道,後世無以加焉。孔子說」,明道曰:「自「堯曰咨爾舜」至「公則

教,惟食喪祭。」其餘不見于經,臣竊以爲皆范曰。「臣謹按《武成》曰:『重民五

傳之以爲萬世之法也。」 者,將舉而措之天下之民, 王法,故自《堯典》以下,又撮取其要語 其以天下襌也。二帝三王之道 誦之,●以此聖人之所學也。 之文也 孔子序《 《書》 斷 自 如其不用, 如 所 堯 有 用 以 典 孔子 爲 而 則 嘗 後 大

也; 王 獎善,任百姓之責,修政厚民,急所先務,武 也。」 吕曰: 禀天之命,任天下之責,湯也, 「天命在己 〕以相 授,堯、 好仁 禹

欲。 所出 之所公,其賢者不宜使之在野,故逸民 德于民矣,不可使之不 法度當審 謝曰: 滅 ,故不可不謹; 興滅國,繼絶 國絶 食以阜其生,喪祭以厚其往,爲天下 世、雖 無人不足與 法度皆生于權 其自取 世 ,舉逸民,皆人心 徒善 Í 八有 也,然其先 食也。 不足以爲政,故 行 量,禮樂政 也),故 爵 固 廢 禄天下 官當 之所 不 嘗 口 有 事

> 也。」 功 道當如此,非 之急務也 、公則說 ,皆所以結民心而維持之。 寬則 違道 得衆、信則民任焉、 以干天下之說而 敏 蓋 則 其 有

所以行法度也,則人 五器 孔子,或見而知之,或聞而知之,皆此意也。 以著明二十篇之大旨也。《孟子》於終篇 堯舜咨命之言,湯武誓師之意,與夫施諸 徒傳守之,以明斯道者也。 亦歷叙由堯舜至湯,由湯至文王,由文王至 事者,以明聖學之所傳者, 中而已。夫《論語》之書,皆聖人微言,而 相授,湯武之征伐,其事 行焉。 加 ·始于權,終於量,法度所從出也。 任官 楊曰: 民之不能忘也。 夫有國有家 「中者天下之大本也,三聖之 八存而 以 逸民亦民之望也。 傳其後,皆有 不同,其道則 政舉矣,故四方之 故於終篇 一于是而 已,所 具 趨 政 載 其

民

政

⁰ 諷 誦 四 庫 本作 引 述

生; 勵 措 天下 虞,非心說也,故公則說。 民 而 夫民 者,釋箕子之囚,表商 因 (傳》日 以 民 則 手足,故寬則得衆, 無 行仁則公,以 爲 憾,王道之始也。 歸 之不能忘 爲重,以食爲天。 雖 重喪祭,所以厚其死。 心焉。 厲己,故 盡 力 『公乃王。』此之謂也 而 武 而 力假 事 区信則 繼之,因 王克商,有未及下車而 不舉,故 仁 民任焉; 容之間 居上不寬,是下無所 則 重民食,所以 未 民之望而舉之, 公則 私 敏 信 使民養生 用用 而 則 而勞其民,則 已,民 王道成矣 有 大 功, 此道 循 雖 送 而 厚 也。 其 以 弗 死 故

以 有 類 表 見 而 之治,故嘗諷誦 尹曰: 于世,豈徒詠其言而已乎?」 記 之。 使夫子之得邦家,其 孔子當周之末,不 其言而思其 八人,弟 得見二帝 治 子所 道 當

矣?」子曰。「尊五美,屏四恶,斯可子張問於孔子曰。「何如斯可以從政

之賊; 司。」」 乎? 日: 子日 虐 之,斯不亦威而不猛乎?」子張 子正其衣冠,尊其瞻視,儼然人望 民之 以 大,無敢慢,斯不亦泰 而 而得仁,又焉 何謂四惡?」子曰: 從 不貪,泰 所利而 政 「何謂 擇可勞 不戒視成謂之暴; 矣。」子張 「君子惠 猶之與人也,出納之吝謂 而 惠而不費?」子 利之,斯 貪? 而 不驕,威而 勞之,又誰 而 日 不費,勞而不怨,欲 君子無衆寡, 不亦 而 「不教而 不 何 不猛。」 慢令致 怨? 驕乎? 惠 謂 日 五 而 殺 美 一子張 期 欲 不 之 謂 日 而 無 有 之 畏 小 因

陶漁,皆因其順利而道之。」 明道曰:「因民之所利而利之,如耕

稼

范曰: 「程頤曰: 「子張之問,孔子

四

惟 心 雖 由 以 敷 齊景公之問政,司 一人,而凡爲政者與君子者皆然 告 陳 子 而 張,人君爲 告之。」臣 以 馬牛之問君子,所告者 政,皆當以 爲 尊 五 美、 爲法 屏 也 四 也 惡 亦

之有 利 以 미 人,焉得人人而給之? 至于因民之所 于費者,其府庫之財 不累于一己,而存物之所爲乎? 미 有 之,因 以貴 共 可 政之方,必以 虐 以 財 勞 蒸 惠 賦 謝 阜物,以 有賞 民、 成 人 日 而勞之者,以 四 常厥邑可 勞而不免于怨者,其勞人自安乎 暴天物,然爲政之道不如是。 可 時之和, 可 以 以 厚生,使民 爲人上者,有土地,有 勞 尊五美、屏四惡爲至,要之, 取 ",皆所 子。 也 因原隰之利,因 佚 乎? 可 謂 其究安宅, 雖以無道行之,猶 道使之故 以從欲,可 有崇高之利 不飢 以 不寒者 府 百堵 庫 也。 惠 以 之 五 而 驕 皆 財 惟 何 方 利 不 也。 之 免 故 可 ? . 費 與

> 下, 人乎? 宅商 之如 爲 可觀 尊 以 之 無 可 五 雖 泰 百 可 則 歌心 物 以 存 驕 姓 欲 以 戒 不 也 猛也, 以 ,望之似人君,有以則象,畏 也 然 也 焉 民 求 而 日 責 如 其 從己之欲乎? 後 月 ,文王所以造周也。 ,則害人而可 土 成 愚 不信,不信 然爲 教 此 地 矣。 刑 『克寬克仁,彰信兆民』,成湯 在人上,故謂可以 不 尊之 司 而 加 何怨之有 識 誅 有 政之道,必 則斂以殖貨 以 所 未嘗 者 ,則過在 威存焉。 如 得 同 以 神 則 戒, 養人 警昏愚懲怠慢也,于 民 乎 故謂之虐。 明,故雖 ? 不侮 【弗從。 ? 則 上,是罔 使進退 教之不 者 財 欲 彼且 威人,其可 然爲政之道 鰥 猶 也 不 在人上,故謂 不驕也, 寡 目 免于貪 必欲使 烏 故得 愛可 不爲, 改 可度,容 民 古之 知 也 則 先 ,與 也 以 所 況 過 百 非 而 非 不不 得 仰 有 咈 故 可

■「斂」,傳經堂本作雙行小字「斂怨」

乎? 不吝。 司。」 取 此之謂謹出納 法 急之所 予 以 其 喻之。 可以自專,可以 不 是以謂之賊 猶之與人,疑也; 犯, 山 放聚 遽以 令下慢,而欲上之嚴,其可 則可,爲政則不可,故謂之有 衆 視 ,賊仁故也。爲上之道 成, 豈不 而誓之, 無予則不疑 出納之吝,吝也。 暴乎? 垂象以 ,可以予則 曉之,讀 令嚴 得

矣,而 者,賊人之謂 爲之以漸也,故謂之暴。 仁民也,故謂之虐。 蒞之而民敬,故雖威 道勞之,故 人不爲吝: 人在上,罔 楊曰 敬而 致期焉,不至則刑之,是罔民也,焉有 : 無敢慢,故雖泰 不怨; 「惠 民 也。 義在 而可爲也? 而 一可與,而惟出 非其義也 知爲政,故不 未嘗戒 圃 欲 不 仁則求諸己, 令以 猛 而 而責事之成,非 ,●一介不以 故謂之賊。 不騙; 不教 示 納之吝,在 期 費 也,令慢 而殺,非 故 與 賊 佚

> 惟當其 有司 則 可 爲 善 加 一,在 爲 上則 爲惡。 天下之事 亦亦

者也 知矣。」 尹曰 故記 以繼帝王之治,則夫子之從 「問政者多矣,未 有 如 此之 政

可

子曰: 也。」 知禮,無以立也, 「不知命, 無以爲君子也, 不知言,無以知人 不

君子? 難 命無 命 天命,則異乎此。」 于 上下而言之也。 必 義,則何庸斷之以命哉? 避 以上,於得喪之際不 以爲君子是已。 伊川曰: 言知命者,知有命而信之者爾,不 一,遇得 然聖人言命,蓋爲 喪必 《易》曰: 動,見利必趨 聖人樂天,則 又曰: 命者 能 中人以上者設。 所以輔義, 不 「樂天知 若夫聖人之知 「不知命,見患 惑,故有命之 ,則 不 何 須 命。 以 知 知 通

也」,四庫本無

安于 미 樂天之事 然後 以 知人 命。 能安。 , 孟子所 也 借使求則 又曰 上 若 知 謂 上知之人, 得之,然非 之人安于義,中知以 知 「知言之善惡是非, 言是 也。 更不 義 則 必有諸己, 言 不求, 乃 此 惟

修 此 以 身 所 修 以 也,知言所以治人也 范 身, 爲終 日 知 也 所以 知 命所 治人,則君子之事備矣, 以 事 天 知 也, 所 以事天,知 知禮 所 以

後

知言,

知言則

能

格

物

而

窮

理。」

不 死 得 可 異,猶言學君子者,不可 名,與『五十 業之大要,闕 生 而 淫 不不 綽 有 淫之? 謝 命 E 然有餘 知 命 則安 而 不 故 威 裕哉 知 知 得 武 也 命、 可 天 可 而 命 也。 屈,不 知禮 屈 使 禮者,二 以 立 知富 知 不 言 知 知 命,非君 理也。 知命 則 言, 其爲 貴 命 同 也 在 此 也。 君子, 天, 其 子 進 知之則 使 則 要 之 德 富 成 安 知 貴 則 修

因言 苟不 之? 所措 也。 行 此其 以 可? 爲 下 君 固 也,彼且不知人,烏知仁人 何 擇士 不知 同 與 年 미 汲汲于知人也? 知 遠也 急 人 四 以 知理之所在,則謂 ,蓋有妙理存焉。 聖人患不知人。 理可 知崇, 嬰所不知故也, 而 退一進,一俯一仰, 交盡 人 + 如 宣 ,然不可 不 ()不可 一, 故 晏嬰知矣,不足以知仲尼,蓋 ,彼且不知人,鳥知佞 而 JĖ 知 士不 如 天 不見知乃公者,使乃公事上 惟 也 孟子, 知 也 誰 以 知人,不 知言者 以 子也, 智巧 、擇臣 得 蓋孟子之言, 履 是不然。 而 知也。 或 一可以 豈不 理可 3 地蓋厚,將何所 之 可以 淳于髡得齊 行之? 謂學當自知 則 八何如 臣不 耳 行也 殆哉? 爲 知之。 取友。 蓋人之才識 目 仁人固 禮 人何如 知人, 此之謂立 所 也 ,誰得而 髠 加 禮 古人 所 知人如 此 Ŧ 手 m 與 不 眉 仲 也? 可 佞 無 有 可 親 睫 知

禮 繩 故 論 也 以 係 至 其 立 于 ,使人皆能 所 求 養如 知 言之道 何耳 有 立 則 一,天 不 又 日 下 可 有 以 治 規 不 矩 而 知 進 無

矣,尚 其 哉 所 不 V 歷 也 不 二、蓋 天道 窮, 一,何 成 猶 知 知其所陷,邪辭不 位 知 性 天 天,故崇; 而 孟子不與王驩言,禮 命, 楊 《易》曰: 能 以 聖賢之微言,爲學 則人之心 地設 備矣。 而 相與言,不踰 有 爲 則 道 : V. 君子? 治 位乎 義 乎? 學道 身行 命 出 術 ? 「知崇禮卑。」蓋 非 禮 其 隱 己,人 而 詖 盡 可 知 天尊 知 階 義 矣,其 不 禮 心 履 辭 其 而 ·
蘄於 之大 知 不 則不 地卑 而 也。 所 相 也 欲之私 行, 雜,遁 知其所 性 揖 能 ·疑其 方也 上達,不 不 而乾 ,則居之不 不知 夫《論 知 故 足 卑。 得 知 解 一蔽,淫 ,其 , 所行, 坤 朝 以 足 以 也 不 語》之 定, 廷 知 足 亂 以 難 知 性 知 鬼 故 知 矣 其 辭 安

> 焉 非 善 知聖賢, 聖,賢之所以 言之要,而 崇禮卑之意 己 有 學 也 道 則 而 無 于此書力求之,則聖之所 故 不 爲 爲賢, 以 言 知 此 爲學也, 知 禮 道 可考 命, 以 者 行 「, 其 則 而知 之, 亦 故《 本 維 是 在 論 也。 知 以 乎 語 禮 苟 學道 知 》以 疑。 知 而 是 以 丽 终 知 知

罪 無 知 違 喪 人也 言爲 意乎? 于 無 則 理 所 尹 君子之事備矣。 可用,不幾于侮 ,故能立; 日 知 動 可不念哉? 所以 其 : 今之學者, 心,故 事天 知命者, 可爲 了, 知 知言 少 聖言者 弟子記 所 君 知 則 加 以 子; 命 讀 得 修 而 之,老 其情 身,知 乎 此 安之,窮 以 禮 終篇, 實 而 所 间 不 以 故 通 動 知 得

國朝諸老先生論語精義卷第十下終

孟子精義綱領

子傳之子思,子思傳之孟子。 要識時。若不識時,不足以言學。顏子陋巷 道非亡也,幽、厲不由也。」 其學也。」 又曰:「傳經爲難。如聖人之後 之時之言,可以見矣。所傳者子思、孟子,皆 後,終得聖人之道者,曾子也。 之道益尊。」 又曰:「參也魯。然顏子没 自樂,以 軻,則幾乎熄矣。 才百年,傅之已差。聖人之學,非子思、孟 人,安可不以道自任?」 孔子没, 傳孔子之道者, 曾子而 伊川曰:「孔子之後,曾子之道日益 有孔子在焉。 道何嘗熄,只是人不由之。 若孟子之時,世 又曰:「孟子有功 又曰:「學者全 孟子死,聖人 觀其啟手足 己。 既 曾 光 無

人之事,造道之言也。」

道之言。孟子言己志者,有德之言也;言聖許多養氣出來。只此二字,其功甚多。」 又曰:「孟子有大功於世,以其言性善而已。」明道曰:「有有德之言,有造道之言,有明道曰:「有有德之言,有造道之言,有对真一, 正子有大功於世,以其言性善而已。」 又前, 所見如是。」 又曰:「有有德之言,有造道之言,有之言, 不可勝言。仲尼只說一箇仁, 孟子於聖門, 不可勝言。仲尼只說一箇仁, 孟子於聖門, 不可勝言。仲尼只說一箇仁, 孟子於聖門, 不可勝言。仲尼只說一箇仁, 孟子於聖門, 不可勝言。仲尼只說一箇仁, 孟子

征者上伐下也,敵國不相征也。」故知《春秋》秋》作。」『春秋無義戰,彼善於此則有之矣。孟子曰:『王者之迹熄而《詩》亡,然後《春孔子,聖之時者也。」故知《易》者,莫若孟子。止則止,可以久則久,可以速則速,孔子也。

五〇九

可。 更說 門人録時錯一 又問 《易》。」或問:「孟 惠爲聖之清、聖之和 君子毋不敬,如有心去藐他人,便不是也。 者,莫若孟子。」 曰:「未敢便道他是聖人。然學已到至 夷、惠處云皆古聖人,須錯字,若以夷、 看孟子意,必不以夷、惠爲聖人。」 「孟子書中有不是處否?」曰:「只是 兩字。 子還可 又曰:「由《孟子》可以 則 如「說大人則藐之」,夫 可,便以爲聖人則不 爲聖人否?」先 處。」 生 觀

事 曰:「人須學顔子。 學者當學顏子,入聖爲近,有用力處。」 功自立。 孟子合下大,只是未粹,索學以充之。」 明道 顔子合下完具,只是 曰:「孟 孟子者、禹、稷之事功也。」 子才高,學之無可依據。 有顔子之德, 小,要 漸漸 則孟 子之 恢 又 廓 又

粹,近聖人氣象。」同。只是顏子尤温淳淵懿,於道得之更淵

明道曰:「顏子不動聲氣,孟子則動聲

氣矣。」

後能盡其義而不疑。」横渠曰:「學者至于與孟子之心同,始

足運,見於作用者,心也。自孟子没,天下學謝氏曰:「性,本體也。目視耳聽,手舉

伊川曰:「顔、孟之于聖人,其知之淺深

楊

氏

又曰:「顔子

充擴

語言不說出來,所

以

衰道

於

事

亦亦

也

大

底

氣

象,未

能

消

磨

得

子

恁

地

手

脚

也

撐

住

此

事

以

身任

道

侯分庭抗

禮,壁立萬仞,誰

子之才甚高,顏子之才粹美。」 序曰:「道之不行久矣。 ,後車數十乘,從者數百 又曰:「人之氣禀不同,顔子 其學,孟子能爲 學士大夫, 見他未至聖人 依之。 盡。 但 幽之微。 藏,被他佛 不 底 敢 而 |未彰 使聖學 不然 去。 事 正覷 微。 圃 把 著耳 世 , 藐大 孟 着? 持 雖 人,所至 所謂 其大。 自周 地 人莫敢 然, 子 有傳,豈 在 氏窺 位 强 手 非 人等 衰 具 猶 微 勇, 孟 以 孟 王 似 體 有 如 與 見 敢 業,而 勝,非 來, 則 無 微,使儒墨之辯息,而姦言詖行 其勢然矣。 故 則 强挾衆,而驟以仁義之言誘之,動逆其所 由其 孔子之行不行於身,思 道學陵夷之後 之勢在此 不知存亡之理,恃强威弱,挾衆暴寡 王之令緒,其自任可謂 其 不 轍 君無父之教不行 處士横議, 道雖天下而亡,古今之常理也 爲功非 環於齊、魯、晉、宋之郊,而道終不 悟其理者,宜其以爲迂濶 世之賴其力,亦豈鮮 日 而 也。 小矣。 雖膏澤不下於民,其志不 已。夫由其道則七十里 儒墨異同之 非堯 孟 子 古人謂 於天下,而 舜 以 至矣。 以 之道 睿 道 知 孟 哉! 辯 援 剛 不 子之功不在禹 起,而 當是之時,人 陳 民 天下,紹 明 而 不得逞其志 之オ 不 免於禽獸 于王前 方世 足用 ,謂久安 而 是 施 彼方恃 興,不 出

至此

乎?」

之争,又從

而

信

向

歸

自

尊大

輕

視

中

國

弱

37,孟子

似

强

顔子

具

體

者,合下來

有

恁

地

氣

象

易》知微知彰、微

顯

闡

者

向

外

馳

求,不

識

自

「家寶

非

相

復

先

非

於

斑

兩

點,遂

將

擎

拳豎

拂

順

尺 之迹 下, 之惡,而爲孔氏徒者,率皆不顧於義,立黨尚 子皆稱譽以 不 而 之曰『鴃舌之人』。 有 以 所知,姑誦 矣。 理 捨 舌以傳後世,皆所以 不肖之所望於諸君也。 童 由 皆 恭,孟子則曰「君子 後 爲 告 亦 可。 焉 子, 羞稱 神農之言者,其 精思之,力行之,古之好學者皆然, 而 行 所 足 己。 是 以 以 爲 伯夷、柳下惠皆聖人也,至于隘 觀 亦 所聞,未 行 知 爲不可及。 君子之言行無所 管、晏。 其 朋 言 道 言, 友之義 也。 也 仲子之廉,孟 知中否。 則聖人之庭户 明道也; 徒自以爲 今其 世之學者因言 人有毁 不 若孟 也。 曲」。 然聖言淵懿,非淺 書 子者 仲 具 諸君其擇之,反 不在 一發諸 聖 仲尼之門,三 尼 又曰 存 子則 道 贵 者,其門 口 而 身措 要 1:「昔 肆 以 孟子 漸 皆 喜 日 攻 求 而 諸 言 諸 而 一蚂 弟 與 腦 其 用 人 人 識 亦 進 筆 行

惡、辭 性,收 哉? 其流 也。 心之非,正 曰 不敢别白是 其徒者,又畏天下指爲黨人,遂皆膠 者,則曰吾不敢攻人之惡,姑自守 其害有過於楊、墨者。 況今去孟子千有餘 孟 蓋 氣 「《孟子》一部書,只是要正人心,教人存心養 生於其 子 不 相 Ě 孟 直 風 攻 讓 其放心。 如 前 道 不 餘 子 耶 此,恐非聖賢之用 、是非之心爲之端, 能 心、害於其 韻 ? 時去孔子未遠,其徒相與 君 默 猶 非 不見,我且直之,孟 不 而國定。 而 有存者。 至論仁義禮智,則 -然,何 則世之人 拒之,至不知 歲, 政; 為其 幸而 千變萬 聖學失傳,異端 當是 論 亦 心 亦 事 論 時 何 有得聖人之道 也 紛 化 者以 君 楊、 邪 賴 子 紛 只說 說 以 乎 而 所 則 譊 之害 傳守,故 爲 墨 惻隱、羞 口閉 知 欲 己。 又 不 譊 競 好 肆 從心 道者 格 E 得 也 「, 則 爲 起 君 已

所先。 誠意 業,只是人欲之私,與聖賢作處,天地懸隔。」 遇人便道性善。 循天理是也。 可添一物,堯、舜所以爲萬世法,亦只是 性分之内,全無見處,更說不行。人性 之修身、齊家、治國、平天下,其本只是 而已。 永叔論列是非利害文字儘去得,但於 人能 心得其正,然後知性之善。 Œ 立,則 外邊用 永叔却言聖人之教人,性非 是無足爲者矣。《大學》 計用數,假饒立 得功 孟 率性 上不 正 子 心

以道

此 之書,世儒 學者,仁之體亦不曾體究得。」 「一以貫之,仁足以盡之否?」曰:「孟 仁?」曰:「須是 曰"『一者何也? 所 又曰:「孟子對人君論 謂 王 道 :未嘗深考之,故尊之者或過其實 也。」曰: 仁也。」仁之用大矣。今之 知一以 「安得 事,句句未嘗離 貫之之理。」曰: 又曰:「孟子 句 句不 離 子固 乎

> 子之非,恐必有所授,難據以口舌争也。」謂晁 過 私 疑之者或損其真,非灼 意 也 論 ,而遂疑之,亦過矣。近見一書,力詆 也。 世之尊孟 子者多失其 知聖賢之心,未 傳 非 易以 孟 子

伊川云:『由《孟子》可以觀《易》。』」《詩》《書》,非也。趙岐未爲知孟子者。與,非苟知之,亦允蹈之』,此最善論孟子者。道於《易》一遍,然後看《孟子》,便見孟子精孟於《易》一遍,然後看《孟子》,便見孟子精武於《易》一遍,然後看《孟子》,便見孟子精理於《易》一遍,然後看《孟子》,便見孟子精理於《易》。』

孟子精義綱領

 \overline{h}

29

國朝諸老先生孟子精義卷第一

梁惠王章句上

「孟子見梁惠王」章

者也。」 爲用 《易》曰:『立人之道曰仁與義。』而孟子言仁 語,謂某處取某處遠近。」 者多外之,不然則混 必以義 (而不外焉,可與語道矣。 明道曰:「仲尼言仁、未嘗兼義、獨 配。蓋仁者體也,義者用也,知義之 又曰:「「萬取 而無别,非 千焉,千取百焉」,齊 世之所論 知仁義之說 於義 于

交征利而國危,便是有害。未有仁而遺其一必曰利者,蓋只以利爲心,則有害在,如上下伊川曰:「君子未嘗不欲利。 孟子言何

所共惡,于是莫有益之,而或攻擊之矣。故 擊之,立心勿恒,凶。」蓋利者衆人之所同欲 利。」 親 速改也。」 聖人戒之曰:立心勿恒,乃凶之道也。 不可專利。 忘義理,求之極,則侵奪而致怨仇。 也,專欲益己,其害大矣。欲之甚,則昏蔽 曰"「放於利而行,多怨。」孟子謂「先利」則 「不奪不餍」,誠哉是言也。 未 有 又曰:「《益》之上九曰:「莫益之,或 義 而 上九以剛而求益之極,●衆人之 後 其 君 便 是 利 大凡人之存心, 義 未 夫子 謂 嘗 而 不

國强 焉?」横渠先生曰:「堯夫抑上富强之說,正 諭 人 主? 兵後 伊川先生論范堯夫對上之詞,言陛 待做甚? 如《周 禮 》豈不 以爲: 非 是富 是。 「此言安足 國之術 下富

^{● 「}上」,原無此字,據四庫本補。

王問何以利國,則說利,不可言之理,極言可入? 聖賢之曉人,不如此之拙。 如梁惠猶爲漢武帝言神仙之學,長年不足惜,言豈

之,以至不奪不餍。」

曰:「亦有仁義而已,何必曰利。」」使民不後其君親,則國治矣,利孰大焉? 故楊曰:「君子以義爲利,不以利爲利。

博矣。 之心也。 既乎?」 以仁義者,苟以利爲事,則不奪不餍矣。 而不遺其親,知義 尹曰:「梁惠王以利國爲言,而孟子對 孟 子所以拔本塞源而救其弊,此聖賢 彼以 利 而 而不後其君,則爲利 不 知 仁義,其害豈 有 知 也

「孟子見梁惠王王立於沼上」章

横渠曰:「不賢者民將去之,故不保其

樂也。」

杨曰:「人君當樂民之樂。臺池鳥獸,

知。 豈足樂哉! 之間,剖析利害之所在,使人君化焉而 皆非能引君以當道。惟孟子之言,常于毫髮 語王以自樂而廣其侈心,是縱其欲也。 沼苑囿之觀,是拂其 君子,其賢者乎,則必語王以憂民而勿爲臺 文王、夏桀之所以異,則獨樂不可 問孟子,孟子因以爲賢者而後樂此。 而其言易行也。」 夫如是,其在朝廷則可以格君心之非, 又曰:「梁王顧鴻雁、麋鹿以 欲也,其佞者乎,則必 也。 至 世之 不自 其 者

有此不樂也」,告君之道當然,其意深切矣。」樂也可知矣。曰『賢者而後樂此,不賢者雖尹曰:「麋鹿魚鼈皆遂其性,則與民偕

「梁惠王日寨人之於國也」章

之家可以無飢,今以古之二百五十畝猶不四十一畝也。古以今之四十一畝之田,八口四十一畝之田,八口

說將 足以爲政,徒法不能以自行,便先從養生上 可足。」 者,又有補助之政,又有鄉黨賙救之義,故亦 通 足 已别受田,其餘皆老少 畝,今四十一畝。 足,農之勤惰 不可,故教之也。」 天下計之,則亦少有一家九人者,只十六 以供九人之食。」曰 去。 又曰:「孟子論王道便實。徒善不 既庶既富,然後以飽食煖衣而無教 相 懸 若以 乃如 : 百百 地土計之,所收似不 此。 也。故可供有不足 畝 九 問:「古者百 人固 不足,

下,至「黎民不飢不寒」,此制民之産,先王之 及爲政也,故爲王道之始。 不與也。 不行先王之道,而徒以是爲 不行先王之道。故曰自『不違農時』而下,至 使民 楊曰:「移民移粟、荒政之所不 養生 夫有仁心仁聞,而民不被其澤者, 一喪死 無憾」者,仁心仁聞 自「五畝之宅」而 盡 心,宜 ៣ 孟 已,未 廢 子之 也

政,不能平治天下。」此之謂也。」

本之有也。」夫有仁心仁聞而不行先王之政,是謂徒善,徒善不足以爲政,行先王之道而是謂徒善,徒善不足以爲政,行先王之道而是謂徒善,徒善不足以爲政,行先王之道而。

濶而不見用,哀哉!! 工不知出於王道,而欲民之多於鄰國,又歸王不知出於王道,而欲民之多於鄰國,又歸尹曰: 「孟子所言,王道之始也。梁惠

「梁惠王曰寡人願安承教」章

•曰:「豈不以其徒敬之,故亦當敬耶?」伊 象人而用之者也。 蓋象人而用之,其流必至 曰:孔子云:『始作俑者,其 曰:「但具人 舍,坐處背塑像,先生 楊曰:「翟 形貌,便 霖送 伊 不 一令轉 川先生西 當當 無後乎?』 慢 椅 勿背。 [遷,道 因 賞 爲其 此 宿僧 霖 ĴΠ 間

心,其流必至于輕忽人。」 忽,則于人可知矣。 于用人。君子無所不用其敬。見似人者不 若于似人者而生慢易之

王道故也,惡在其爲民父母?」 尹曰:「爲政之不善一至于此,不能 遵

「梁惠王曰晉國天下莫强焉」章

哉 ? 仁政 Ŧ 而 今惠王據有大國,而 尹曰:「古之聖人,地方百里,而 惑而不爲焉耳。」 遵王道故 也。 仁者 反敗 無敵, 豈力不 辱 清,不 能 可 足 施 以

「孟子見梁襄王」章

亂 乎? 一者也,殺人而已矣。欲天下之定于一, 尹曰:「 戰國之際,干戈相勝,非救民於

齊宣王問日 齊桓晉文之事」章 口口

舜之道也 明道曰:「得天理之正,極人倫之至者 用 其 私 心,依仁義之偏者,霸

> 若履大路 心而王則王矣,假之而 于曲逕之中,而卒不可 者之事也。王道如砥,本乎人情,出乎禮義 周所封建也。 仲者,義所不由也,況下于霸者哉?」 故仲尼之徒無道桓、文之事,而曾西 霸者之心而求王道之成,是衒石以爲 異端不能感,故力進于道而莫之禦也。 者,必先立其志。 繆以千里」者,其 不同,在審其初而 伊川 E 而 行,①無 「孔子之時,諸侯甚强大,然皆 周之典禮雖甚廢壞,然未 初不可不審也。 正志先立,則邪說不能移, 己。 復 《易》所謂『差若毫釐 回 霸則霸矣。 與人堯舜之道。 <u>щ</u> 霸者 二者其道 故治天下 崎 恥 嶇 玉也。 苟以 故誠 比 泯 反 側 絶

立。 也。 至孟子時則異矣。 故齊、晉之霸,非挾尊王之義,則不能自 天下之大國七, 非 周

0 若」, 原 無此字,據四 庫本補。

又曰: 之救世 時能 王 主 周 梁以 不以 雄,而天下不知 秋》之法, 大惡見絕于天下,然獨 下之義 所 云 也,故孟子所以 室 命 爾,聖人 行王道 雖微,天下 爲 者 王者,與孔子之所以告諸侯不同。 「古人善推 一,時 主 四 王 ,先王之政絶 以尊 則 也 行 一,則可 (則不 而 民 獨 周 已矣。」 以爲 有 諸 夫 其 待 勸 以 爲 周 侯尚知尊周 而 所爲 王矣。 推 齊之可 然而 本。 己 王,則謂之天王天子,民 而澤竭 夫 矣。 而 至孟 又曰:「孔子之時 也。 生民塗炭 已 以王者此 蓋王者天下之義 二周之君 矣。 矣。 子時,七國 故 爲美。 孟子 此 夫王 諸諸 特 也 故《春 勉 雖 君子 告齊 侯是 者 争 無 天

桓 亦 一、文事不足爲也已。 有 此 楊 非 日 樂 無傳也。 平 ?! 而 齊宣見孟子於雪宫, 孟 孟子務引其君於當道 子對以 大匠不爲拙工改廢其 晏子之言 日 「賢 則 ,則 者 霸

牛,而 也。」 焉! 周之先王之事。 之百姓同樂; 善心而 民 行先王之道故 也。 範 仲 繩 録 之功,詭遇 獲十。」管仲之功,曾西未 桓、文者。 爲 也。 不 我 爲 思 天下 、馳驅,終日不獲一 曾西羞 飢 一, 故 政于齊, 曰 【是心 然雖有仁心仁聞,而 格其非,不止 然學當爲 又曰: 不 舉 日 寒, 也,詭遇而 嬖奚與王良乘,王 : 斯 比 足以合諸 論王之好貨、好勇、好色,而 也。 管仲 無 心 足以王」, 圃 「孟子與 加 已 若使爲人臣者,論事 後 王者 故又 諸 就 曰 : 則 Œ 得 彼 事,故 事 王 ,爲之詭遇,一 類 侯 人君言,皆所以 以制民之産告之,使 禽獸,雖若丘 而 乎。」 論事。 論 必能 是 而 民不被其澤者,不 不 已,其 王 與 正天下, 仲 王 良 之 爲 尼之 曰:「吾 者,未 如 好 之,然 E 又 齊王 樂, 曰 其 也 徒 又 陵 之 一之愛 孰 每 擴 而 日 弗 管 朝 爲 無 功 有 如 使 禦 仲 爲 m 道 足

尹曰:「仲尼之徒無道桓、文之事者,以

此,而其君肯聽,豈不能堯、舜其君?」

朝諸老先生孟子精義卷第一

終

乃是參彼己爲言。 發明忠恕之理,正孟子所謂善推其所爲者 少者懷之。」則無待乎推矣。」又曰:「《中庸》 及人之幼。孔子曰:「老者安之,朋友信之, 推其所爲者,老吾老以及人之老,幼吾幼以 此一章,可見古人事君之心。」 又曰:「善 知王政之可爲,是謂將順。」 未見羊,而欲以羊易牛,乃所以爲仁,引之使 王」。若曰以小易大,則非其情。以爲見牛 道。」曰:「然。此正如孟子所謂「是心足以 其美,後世之說或成阿諛,恐是引其 仁之方,不謂之仁,則知此意。」 可。學者須是就心上做工夫。」 問:「 王矣」,此言極好。心術明且正,何所施而 曰:「孟子之道,其要在心術。如『是心 若知孔子以能近取臂爲 又曰:「詳味 君 將順 足以 以 當 不 已矣。」 國 朝

國朝諸老先生孟子精義卷第二

梁惠王章句下

「莊暴見孟子」章

于治也。故孟子告之以此,姑正其本而已。」 舉疾首蹙額,雖奏以《咸音》《韶濩》,●無補 則天地之和應之矣。使人聞鐘鼓管絃之音, 地之和也,而樂以和爲主,人和則氣和,氣和 地之和也,而樂以和爲主,人和則氣和,氣和 類之音,則不知倦。」則今樂與

齊宣王問日文王之囿」章

不與民共之,則是害民而已矣。」 尹曰:「文王之囿,與齊宣王之囿一也。

「齊宣王問曰交隣國有道乎」章

樂天者天人已合,天道在己。」 吕曰:「畏天者以人畏天,天人未合,

知者之心,于此殊矣。能法文、武之用心,則以小事大,則狹隘而私于一國。仁者之心,用謀也。以大事小,則樂天而無不覆載,尹曰:「仁者之心,至公也;智者之心,

❶ 「咸音」、《周禮·春官·大司樂》作「咸池」。

己之心以及民,與民同樂,則王天下也孰

尹曰:「王者之所以王者,得民心而已。

天命之改與未改

爾。

民惟恐君之不好勇也。若夫按劍疾視,則其

小勇陋矣。」

「齊宣王見孟子於雪官」章

君臣相說之樂,曰《徵招》、《角招》也。」 文樂,民亦樂其樂。出乎爾者反乎爾,理之之樂,民亦樂其樂。出乎爾者反乎爾,理之之樂,民亦樂其樂。出乎爾者反乎爾,理之

知,其言可謂深切矣。齊宣不能推而用之,未始有異也。孟子所以力陳其說,使曉然易尹曰:「君之與民,貴賤雖不同,而心則

「齊宣王問曰人皆謂我毁明堂」章

理,則栽培之,不然,須別種。 聖賢何心,視何也?」伊川曰:「譬如一樹,有可栽培之或謂:「孔子尊周,孟子欲齊王行王政,

理。 也。 巷。』亦斯 我敬王者以此。《易》之《睽》曰:『遇 閉其邪心,引之于當道也。其自謂齊人莫如 于决溢;因其勢而 可者,蓋譬之水逆行中流而遏之,其患必至 人君之邪心,不可爲也。然而孟子不以爲不 安天下無足爲者矣。 若夫好貨好色,則生于 疾,故孟子告以文、武之事,使廓而大之,則 也,則人君固不可無勇矣。而齊王以是爲 知之,仁守之,勇行之,三者闕一焉,非 自好,但今用之非是。 『繼述』兩字牢更不可易。予謂『繼述』兩字 楊曰 且好貨好色,孟子猶不鄙其說 故以公劉、太王之事告之,陳古之善而 「智、仁、勇,天下之達德 之謂 也。 利導之,則庶乎其通 謂以上合下便,● 當時自合說與真箇 而 也 推 執得 主 諸 達 于 有 智 道 明 海

❶ 「謂以」,二字原缺,據四庫本補。

迹,不 乎? 考而 之政 下,百有餘年,海内安樂,其法度豈不皆善, 百姓則其 苦,制爲法度,蓋欲以 天下安利而已。 若果是,雖紂之政有所不 政安在? 舊,逮周公七年制禮作樂,昔者武王所 征,周公則征之, 九一,周公則更而爲徹,文王關 武 弊,不足怪矣。 人乘間謬爲邪說以進,則其末流激成今日之 王、周公,今且舉周公事明之。 況 已。 有所不因。 今繼述足以救時弊、便百姓也,是亦 然則爲不孝,此何理 Ŀ |有繼述之意,豈容無所開 (志,救 釋此不務,乃欲 聖人作處,惟求一 時弊則 夫繼述之說,始於《記》 且如神考十九年間,艱難 聖人何所容心,因 武王克商,乃反 救時弊、便百姓 其 事。 革 一二以循 也 ? 箇是底道 此獨 果非,雖 且如祖 商 道 市機 文王 不當繼 熙 [時乘 前 政 也 文、武 政 宗天 豐之 由之 而 耕 所 使 理 理, 神 述 勤 便 者 由 不 稱 小

> 子 去就 輩 不孝可 辯,則勝他識道理人 但自不敢以正論陳之于上,恐有妨嫌。 何害于繼述,而 無弊 耳。若謂時使之然,則神考之法,豈 人做得? 祖 神 ,便無開 考 一 在 、太宗順人心定天下,傳數 之義 朝廷,須是 ,補偏救弊,是乃神考所以望 乎? 起 焉。 口 而 然而 處 更之,神考亦 自唐宋至 議 如此說始得,其聽 顧以爲不孝乎? 法度不 論 不 不過,如戰國說士,遇 知道 免有弊者,時 五代,禍 知要是 理 世 所 而 亂 在,徒 不聽 今之所患, 乎後世也, 而 無變,豈 極矣。 容 使之然 則 若 謂之 有 獨 孟 有 吾 太 П

行 好 色,皆指 王政也。 尹 日 事而 「孟子之不欲 文王之政,公劉之好貨,太王之 言,可謂 善引其君 毁 明堂、欲 齊 王 之

孟子謂齊宣王曰王之臣」章

尹曰:「友之失友道,士師失其職,齊宣

自責,此齊宣所以終不足與有爲也。」王既明知其罪矣。至於四境之不治,則恥于

「孟子見齊宣王曰所謂故國者」章

反屈于疏賤矣。」已而進之,則貪妄者日益進于上,廉恥之人已而進之,則貪妄者日益進于上,廉恥之人權,不得

吕曰:「世臣,如畢公弼亮四世之類。」

好生爲德,有司以執法爲公,則刑不濫矣。」之者天子之德,而刑之者有司之公。天子以獄之成告于王,王三宥之,然後致刑。夫宥之者非一人之私意,不得已也。古者司寇以一人。」「國人皆曰可殺,然後殺之,則殺

孟子之論用人去人殺人,雖不聽左右諸大夫後用之」,則人君之權,豈可爲人所分? 然稱湯曰『用人惟己』,而孟子亦曰『見賢焉然曰:「不爲臣下奪其威柄,此固是也。《書》曰:「或謂人主之權當自主持,是否?」

在我。若初無所見,姑信己意爲之,亦必終吾從而察之,必有見焉而後行,如此則權常之毀譽,亦不聽國人之言,因國人之公是非,

爲人所惑,不能固執矣。」

用此道 君之務,孰大於是?」 進退群臣,必察于國人之論而不自恃 公,爲害甚大,尚何世臣之有哉? 道 加 尹 可則者也。 一,則賢 、曰:「世臣則累世修德,必能 否判然,人不可得 取 人荷不詳審 「, 則 而 欺 是以 好 認 也。 輔 或 必 君 荷 .君 以

「齊宣王問日湯放桀」章

不足以知聖人,而妄論之耳。」等,則鳴條、牧野之事,當書曰篡弑。蓋其智之有? 世儒有謂湯、武非聖人也,有南史之去,則天下不以爲君矣,是誅一夫也,何弑君去,則天下不以爲君矣,是誅一夫也,何弑君

尹曰:「孟子爲當時而言,以警戒時

五三三

君也。」

「孟子謂齊宣王曰爲巨室」章

學,成而不能行其學,則烏足貴哉?」 也,既成矣,將以 伊 ĴΙ 曰:「夫 人 行之也。 幼 圃 學之,將欲 學而 不 能 成 成 之 其

所受教,故其言如此。」 楊曰:「此皆好臣其所教,而不好臣其

是也。」
尹曰:「孟子之卒不得有爲於國,蓋類

「齊人伐燕勝之」章

天下有其二以服事殷,所謂不累于高名者, 弟,是水益深、火益熱矣,民將復避之也。 壺漿以迎王師。齊王又殺其父兄,係累 曰:『亦運而已。』運者,反覆運轉之謂 又曰:「或謂:『文、武所謂 .名厚利故也。所謂不累于厚利者,三分 楊曰:「民之去燕,猶避水火 至德,以 八也,故 不累 其 也。」 簞 故 子 食

猶以爲君,則文王安得而不事之? 至于武

得矣。 『時日曷喪,予及汝皆亡!』故攸徂之民室家 悅之言,憚勞而已。 清者也。」此 心於其間也。夫是之謂至德。 謂至德者,三分天下有其二矣,其取天下,何 相慶,簞食壺漿以 文王三分天下有其二,以服事紂,是聖人之 而割正夏,而湯告以必往,是聖人之任者也 之伐桀也,衆以爲我后不恤我衆,舍我穡 難之有? 有行之者,文王是也。」此論盡矣。 王是也。 之而燕民悅,則取之。 下,以爲累于利而 有 其二而 文王之時,紂猶有天下三分之一,民 取之而燕民不悅,則勿取。古之人 弗辭。」果如此言,則 而文王勿取者,視天而已,初無 亦非也。 可乎 迎 若夏之人則不然,曰: 王 湯之伐桀,雖其衆 ? 古之人有行之者,武 師。 孟子之言曰:『取 湯雖 或又曰:『湯 武王之取天 不往,不可 蓋文王所 有不 事 用

則或爲囚奴,或去之他國。紂之在 古之人有行之者,武王是也。」由此觀之,湯非 行之者,文王是也。『取之而燕民悅,則取之, 王,而受罔有悛心,●賢人君子,不爲所殺, 云: 『取之而燕民不悅,則勿取。 古之人有 一夫矣。故武王誅之,亦不得已也。 孟子不 天下,爲

也。齊人之伐燕,則異是矣。如水益深,如 火益熱,亦運而已矣。孟子所以深告之,而 尹曰:「文王、武王之用心,凡以爲民 樂爲任,而文王非樂爲清也,會逢其適而已。」

「齊人伐燕取之」章

宣王未之思也。」

以千里畏人者,由取之不以其道故也。」 尹曰:「湯以七十里爲政于天下,而齊

郷與魯関」章

之、出乎爾者、反乎爾者也。」可謂知所本矣。 尹曰:「孟子引曾子之言曰:『戒之戒

民心其可强之乎?」

「滕文公問日滕小國 也」章

正也。」 之用心哉? 尹曰:「事無理之國以求苟安,豈人君 横渠曰:「使民效死,則政教 與民守之,效死勿去,孟子言其 可爲。」

「滕文公問日齊人將築薛」章

許一時、君子不爲、人無取法也。」 横渠曰:「所爲善,故可繼續 而行。

也。 以太王居邠告焉,繼之以强爲善,可謂能自盡 文公恐懼,而不知自强,異乎太王矣。」 尹曰:「齊人將築薛,而滕文公恐。孟子

「滕文公問日滕小國也」章

上,則看他如何,不可以禮法拘也。 伊川曰:「衆人必當就禮法。自大賢以 且守社

罔」,原作「國」,據明抄本、四庫本改。

五二五

五二六

人之道,大抵使人循禮法而已。」三聖賢則無害,他人便不可。然聖人所以教廟者,天子之職也,堯、舜則以天下與人。如稷者,國君之職也,太王則委而去之,守宗

故又請擇於斯二者。」 被又請擇於斯二者。」 被又請擇於斯二者。」 故又請擇於斯二者。」 故又請擇於斯二者。」 故又請擇於斯二者。」 故又請擇於斯二者。」 故又請擇於斯二者。」 故又請擇於斯二者。」 被又請擇於斯二者。」

者害人」,●而繼之以「效死勿去」之策。自問安之之道,而對以太王居邠,「不以其所養恐,問救之之術,而對以「君如彼何哉? 彊恐,問救之之術,而對以「君如彼何哉? 彊盃子直是知命。滕文公以齊人築薛爲

正者,非聖賢之道也。天理即所謂命。」可,功求成,取必于智謀之末,而不循天理之如此說,舍此則必爲儀、秦之爲矣。凡事求世俗觀之,可謂無謀矣。然以理言之,只得

知强弱之相陵,故孟子必以人心向背言之。」孰肯從之哉? 當是時,不知民心之向背,徒尹曰:「無太王之德,則民不應之矣,尚

「魯平公將出」章

嬖人妒賢而間毁之,孟子歸之天,可謂知尹曰:「聖賢之進退出處,有禮義存焉。天實爲之,非人之所能也,夫何怨尤之有?」楊曰:「孟子之遇不遇,治亂興衰之所繫,

命矣。」

[朝諸老先生孟子精義卷第二終

國

「所養者」、《孟子・梁惠王下》作「所以養人者」。

孟子精義卷第三 公孫丑章句上

國朝諸老先生孟子精義卷第三

公孫丑章句上

「公孫丑問曰夫子當路於齊」章

伊川曰::「地不改闢,民不改聚,只修治

爲, 諸 何?」曰:「管仲之功,子路未必能之。然子 賦也。」使其見于施爲,如是而已。 曰:「孔子曰:『由 便是了。」 \Box 譬之御 侯、一正天下,固有所不逮也。」「然則 慕子路之所未就,此說 『吾先子之所畏。』或 或問:「 者, 曾 則範我 西 不 也,千乘之國,可 馳驅者也。 爲管仲, 日羞管仲 是否?」楊 而 若管仲,蓋 于 其 子 之 于 使 路 所 如之 九合 治 其 氏 E 則

事 之亂 亂 保》以上治内,以《采薇》以下治外,雖有 大。 滅 事 中國安得而不微? 狄,安得遽至中 小。」曰:「孔、孟 爲見管仲有此功,故莫敢輕議。不知孔、孟 仲,故顛沛如此。 國微,桓公獨能 詭 有爲,規模自别,見得孔、 及也。」曰: 吾其被髮左衽矣。」爲 所以自治者俱亡,四 遇 雖使中國之人不至被髮左衽 一或問 自王道觀之,則不足以爲大也。今人只 耳。 ,胡羯猖獗于中原,當是時,只爲 桓公攘戎狄 曾西,仲尼之徒也,蓋 曰:「衛 「若以 -原乎? 如 如何?」曰:「必也 後 然則管仲之功,後世 於 而封之。當時 此,故孔子曰:『微管 世論之,其功不 Ŧ 方是時,縱能 其功 室爲近 夷安得 如《小雅 孟作 如 此 懿 處 而 夷狄横 不 一盏 也 蓋 ,則管仲 公爲 道 救之于已 不交侵? 一廢,則 **通猶賢** 미 管仲之 無 觀 以 謂 誠 狄 而 仲 管 天 室 政 所 夷 難 中

之 封 楚事 問 施 爲 誠 則 他 綱 用 子 有 則 輕 而 周 貧 也 之事 不尊 聖人 鄙之 楚 意 得 自 法度不出自 之否?」曰:「管仲高 毫 FL 衰 度僧,置安樂院 不 責之以 末 之 ,觀管仲亦有 爲 君 子 如 者 蓋言其 仲 周 勤 廢之,不問其才。」因言: 或或 之善、必録之,而況於仲乎 何 列 管仲之才,使孔子得 如 管 「, 蓋 \pm 爲深取之?」 國 管 豈 不 然後 包茅 耳 宜 仲, 一仲亦莫之詰也。 肯 以 他, 不 , 爲 非 何 退 不 加 以 則仲之事蓋 之? 是處, 足 儘 王 兵,但 聽 貢 誠 ,給病者醫藥,人賴 道 有 道 時 ,其名則 爲 曰 哉 用 不 故孟 之也。 一才,自一 但其意 欲楚尊齊耳。 如 行 - 1 處。」曰 何?」 日 志 聖人之于人 故也。」曰:「 子 是 如 若實尊周,專 不 行 不 日 今蘇 一,若其 别耳 孟 應廢, ? : :「若不 乎 暇 E 子 五五 天 若使 道 爲 州 所 下 意 矣。」 尊 以活 朱 如 本 如 但 霸 以 贵 冲 假 齊 伐 於 使 還 孔 然 此 紀 雖 敢

又曰 者,純 也。 者,如 衆人 能 氏 仲今人未 獸雖 之。 何 又言 況于餘人? 後,人不敢 不比數之,其意亦猶此也。」又言:「自 在 甚 所 駢 衆。 口 于 爲,可 "「自古狙詐之徒,皆知義足 若管仲 邑三百、飯 若丘陵 仲尼之門,無道桓、文之事,而 規 所 輕 用公道 ,荆公,雖知卑管仲,其實 利 取 議 其 管仲只爲行詐 可 置 而 ? 二 曰 謂 小管仲,只 而 只不 輕之。 輕 弗爲之意,則管仲 物 人若知王良羞與嬖奚比 高 而已。」或日 竊 議 業 矣。 譽 疏食,没齒 之。 如 : 則厚 于人,故人終 此皆是好 孔 如仲者,但不如孔子耳 此 如《 子 爲 其直 故 未 見 :「吕吉甫云:「管 論 曾 見 與 無怨言。 他 及 語 西 管 事,只 王者 不 自 亦識 何 仲 其收 破。 不 然 以 以 小 管 别 、爲其 以 不 孟 勝 不 他 息 器 仲 足 則 而得 近 子 好 利 爲? 未 一之實 孟 若 其 奪 道 世 直 人 意 則 杰 伯 所 王 禽 子 截 許 IF. 視

得定。」 相 爲 不 爲天下國家,●不以利言者,唯孟子一人守 多假 爲 高,故常溺于利而不知反。 利 疚 加 而 行。 遷者 自王者之迹熄,天下以詐力 幾 希 如 管 仲 由孔子而後 亦 知 義 故 所

「公孫丑問日夫子加齊之卿相」章●

孟 得 動 孫 心。 丑 子曰:「否。 行道焉 明道 問 孟 日 子加齊 如 此 公公 我 則 四十不動心。二又曰:「公 孫 之卿相,恐 能 \pm 無 謂 畏 懼 夫子加 而 有 動 心乎? 齊之卿 所 不 勝 相, 而 故

之,從容自中,非 所當捨,此以 孫 丑 此義也,此不義也,義吾所當取,不 有造道 不 伊川曰:「自信 知 孟 而 子, 義制 不 有 動者, 故 1 所 問。」 則無所疑而不動心。 者也。 制 有以 也 又曰:「不 一,此不動之異。」又 義 義 在 制 一我, 心 動 丽 由 義 心 不 而 公 有 吾 動 行

> 動 曰 焉 ,則所以 勇 者所 以 敵物者,不賴 敵 彼者 也。 勇而 苟爲造 裕 如矣。 道 而 心不

反是。」
小了知測。此孟子所以四十不動心,小人明道曰:「君子道宏,故可大受,而不可

宫黝 是明理。」 行,孟施舍無懼,子夏之勇本 有所主,便心不動。」又曰:「北宫黝之勇 而 伊川曰:「不動心有道, 可見。 子夏是篤信聖人而 木可 如數子者, 知,却 力行,曾子 皆中 因 北 必

子 施 推之以不懼,北 各有所 舍之守 明道曰:「北宫黝要之以必爲,孟 似。」 約 也。 宫黝或未 又曰:「北宫黝之勇在于必 子夏信道,曾子 能 無 懼 放故 明理 黝 一、故二 施 不 如 舍

- 「下」,原無此字,據明抄本補。
-) 「章」,原無此字,據四庫本補

五二九

-:

 \mathcal{H}

也。 勇 子之所謂勇乃 子也。」 若曾子之守禮 也,無懼則能守約也。子夏之學雖博,然不 宫黝之養勇也,必爲 黝 縮 也 爲 同。」),曾子 似子 如何?」曰:「縮只是直。」又問曰:「北 孟 孟施舍之勇,知守氣而不知守約 施 夏,孟 明 舍之 又曰:「北 理守約 勇 施 守約,守約乃義 爲 能 舍 約,故 者 于 似 宫黝之勇,氣亦不知守 ൬ 也。 無 曾子,如何?」曰 以 已,未若舍之能 懼 黝 子 似子夏、舍似 或問:「自 夏 也,與孟 篤 志 也 力 . 子之 無懼 反 行 北 曾 曾 宫 者 而

氣。 者 可 可。」此觀人之法。 「,有 便 調 伊 勇于義 ĴΙΙ 不 又曰:「『不得于言,勿求於心, 知,此告子淺近 日 :「勇一也,而用不同,有勇于氣 者。 心之精微,言有不得者不 君 子勇 處。」 于義,小人 勇 不 于

明 道 日 「「不得于言,勿求於 心,不

> 妨。」 可 義之氣睟然達於外,故不得於心,勿求於氣 可 也。 <u>°</u> 養 又 氣 曰:「人必 以 心 爲主 一,若言 有仁義之心,然後 失 中 心 不 動 亦 與

志 ? 其氣,内外交相養也。」 氣次焉,自有先後。」 曰:「志,氣之帥。若論浩然之氣,則何者爲 伊川曰:「志,氣之帥,不可小 志爲之主,乃能 生浩然之氣。 又 曰:「持其 觀。」 志至焉, 志 無 又

則慣 以直 義 氣者 驗。 理 亂矣。 内。 明道 勝 在志,養氣者在直內,切要之道 要之,聖賢必 氣 曰:「持其志,使 者鮮 今之人以恐懼 又曰:「志可不克,●一 也。」 不害 又曰:「人患乎懾 心 疾。」 氣 而 勝 不 能 氣 亂,此 者多矣, 又 無 無無 日 「志」字。 大 如 怯 可

志可不克」,明抄本作「志可克氣」。

日 者,蓋氣不充,不素養故也。」 定,則氣不能動志。」又曰:「志動氣者十九, 莫不知和柔寬緩,然臨事則反至於暴厲。」先 先生曰:「誠然矣。志一則動氣,然亦不可 者,能定其志,則氣 生曰:「只是志不勝氣,氣反動心也。」 志, 先生曰:「只這 心,蓋不知義在内也。 地不得。」 也。 ·思氣 暴 動 動志者十一。」 動 氣 「壹與一 所 《亂其 志, 勝,習所奪,只可責志。」 然志動氣者多,氣動志者少。 一則動志。 爲 然亦在持其 氣 養氣者言也。 字同 又曰:「告子不得於言 兩 事 也 非獨 持國 爲吾使,志一則動 箇 志 動 志帥 也 志 日 趨蹶,藥也,酒也,亦 氣則 而已。」因 若成德者,志已堅 專 是私,然學 氣也,持定其志 「凡人志 動 則 又曰:「學者 志 動 或問:「人 氣 論 勿 雖 者 氣矣。」 能 一動 求 持 使氣 氣 氣專 不 志 又 於 恁 其 亦 也。 子 故 僻 雖 猶 權 Ė 使

能

是

不

爲

則

氣

堂下人曲直,若自下去堂下,則却辨不得。」 又曰:「孟子知言,便是知道。」 又曰:「孟 當以道爲本,心不通於道 道,則是非了然,不待精思而後見也。學者 豈 蹶者趨者反動其心。 不持 衡以 則動志, 又曰:「孟子知言,正如人在堂上,方能 孟 伊川 : 時中,亦古人所謂億 又曰:「知言之善惡是 不 子所謂 『我知言。』孟子不欲自言我知道 權 較輕重,孟子所謂 動 衡 曰:「心通乎道,故能 然志 氣 加 ? 知言是也。 較輕重,竭其目力,勞其心智 動 氣 氣 專 爲 在喜 志者,心之所之也 多。 ,而較古人之是 知言是也。 則屢中,君子不貴 必 一怒, 豈 且 有諸己然後 非, 辨是 若 志 不 乃可 非 揆之以 動 專 如持 耳。 志 在 以 辨 知 ? 淫 知

其志」、二字原 無,據明抄本

言, 一一件格 知言 然 後 能 格 物 而 窮 理。」 伊 川 一本作 知 言

方可。 之問 怎生 此。 子曰 是; 此言 立 浩然之 子 知言 無 卓 方可。」明道曰:「忠信所以 養氣 問 以 養? 由由 爾, . 不欲言 知 如 又 又曰: 氣, 道 日 勿忘勿助長,只是養氣之法,如不識 句已盡,横渠之言不 一言,諸君宜 何?」曰 我 横渠言「由 誠 孟子言躍 -也 知 須 以 有物始言養,無物 知言然後 見 言,我善養 至 「學者須要知言。」 我 此是答公孫丑『夫子鳥 明一, 是 二曲 知道,故以知 明 如 潛 也。 箇 則不 以 可以 物, 心玩索, 至 明 吾浩然之氣。」只 然, 卓 誠,由 以 如 養 如 至誠」,此 又養 顔 誠 能 言養氣答之。」 氣,蓋 進德,終 躍 子 須 即 誠以 無失,類 如 是實 又曰:「孟 言 箇 明 分分 如 甚 不 也 至明」, 乎長 日 明 一麽? 識 句 知言 有 乾 見 所 得 若 我 孟 却

> 若他 器 道 乾, 曼 其 言也」。只這裏便見得孟子實有浩然之氣 交花。」此 如 在 浩然之氣,可謂 之道,修道則 用 無 曰:「孟子答公孫 卿 氣 此夫」。徹上徹下,不 其左右」,大小大事 聲 ,形而下爲器,須著. 則謂之神,其 但 君子當終 詩云:「樂意 浩然,養之至則爲大人。」 人 無臭,其 得 便亂 道 語 在,不繫今與後,己與 形容得浩然之氣。」 說 謂 體 日 道 盡矣。 則謂 之教,孟子去其 命 對 是 丑問 相 于 越 如 嗣 之易,其 人則 在 何。 一, 如此說。器亦道,道 故說神『如在其上 何謂浩然之氣, 禽對 天 過如 只 謂 也。 語, 日 之性 理 又 此。 誠 日 蓋 中,又發揮 則 生香不 又 謂之道 上天之載, 人。」 之不 形 率 内内 日 而 性 ·斷樹 直 E 可 則 一,其 亦 石 則 難 爲 揜 又 如 出 謂

人之所以不知善者,氣昏而塞之爾。孟子所伊川曰:「氣有善不善,性則無不善也。

E 也。」 以 去 曰:「養心則勿害 矣。」「或 養氣者,養之至,則清明純 志順 又曰:「志順者氣 加 氣 日 正,浩然之氣 養 心, 耐 己, 或 養 不逆,氣順 日 也。 氣 養 全,而昏塞之患 氣 則 然則 志 何 有 志 養 也? 所 將 浩 自 帥 伙

無不利。」

也,乃在于持其志,無暴其氣耳。

言敬 處。 浩然之氣,乃吾 非 至於聖人,亦止如是,無别途。 求,近取諸身,只明人理,敬而 養浩然之氣者也。」 之氣。」又問曰: 地,一爲私心所蔽 思無邪」,「無不 道 以以直 理。 乾卦言聖人之學,坤 李朴字先之。 故有道 内,義以方外,敬義 氣 請教。先生曰:「當養浩然 敬一 「觀張子厚所 有理,天人一 則 也,養 欲然 只 又曰:「學者不必 此 而 · 桂言賢 而 不 句 餒, 也,更不分别。 害,則 立 作《西 穿鑿係累,自 已矣,但是 知其 而德不 人之學,雖 循 而 塞 銘 八小也。 行 乎 孤 天 約 遠 能

> 安得有差? 有差皆由 不敬 不 Ē 也。」

浩然之氣。 伊 川 E 浩然須要實識 主 無 適。 得他剛 敬 以 直 大直,不 内 便 有

則充塞于天地之間 則 告子外之者,蓋不知義也 而 生,事事有理 無所不 無 明道 不在道,一 在 日 剛 :「浩然之氣, 而 則 在 置 義 無 私 ,配義與道,氣皆主于 所 也 意 屈、以 非 則 自外襲 天 餒 直道 地 矣。 之 順 而取之也 是集義 E 理 氣。 ൬ 所

問: 日: 言剛 直,此三者不可 解 如《坤》卦所謂「直方大」是也。 至 「見李籲録 剛 楊 坤 言 遵道 處 至 剛 云剛 柔 則 録 害坤 而 闕 伊 則不 明 動 川 闕 道 體 也 語 屈」,則是于 語 剛。 曰 : 中, 然孔子 便不是浩然之氣 至 却 方 與 即 大、 于《文言》 但坤卦不 至剛 先生 剛 至 也。」 已帶却 說 剛、以 别 因 又 可

得 學者不要如 直 尚 不 看只有李 其 字 敢 意 有 (意,不 連 此 改 「先兄 語 動 又 下 籲一 日 句 無 或 拘言語,皆往往 此編録,纔 只剛則不屈 在 此 以 脫 本無錯編者 學 言, 忘 直 者 便 道 著 兩 不 順 聽 字, I 亦未穩當 講 理 得 夫 他 論 録 便 而 轉 處 得 到 大 動 人 養之。」 說 八多只 都 此 别 便 却。 是。 别 依 李 舊 則 嘗 先 籲 說 不 舊 是 曾 生 知 却 時 **\$** 以

至 剛 剛且直 伊 以直,養而 ĴΠ 日 也,能養之則無害矣。」 : 孟 無害。』此蓋言浩然之氣 子 日 」 其 爲 氣也, 至大 至

直 厲 體 此 一,以 是文勢,如治世之音安以樂,怨以怒,粗 噍 此。」又問 明 此 以 道 三者養 殺, 日 皆 「至大、至剛、 此 氣 養 類。」 否? 氣 日日 以 問 以直,不言至直 否?」曰:「 不 至大、 然。 至 是 剛、 然。」 氣 之 以 以

「塞乎天地之間

,莫是用于天

八地間

無

也, 又早 氣之體。」 窒 如化育則只是化育, 而 有 規 礙 示 配義與道 却 之 模 否 ? 底 别 近 是 耳。 體 曰 面 又 。」道有冲漠之氣 件 日 氣 將 此 事 則 這 「凡言充 語 也 更說 只 氣 固 是 充 好。 塞之。 甚 氣 寒 費? 又 更 然 象。 日 云 說甚 然此 孟 . 者 費與 「其 子 充 却 却 只 、充塞 爲 是 似 是 氣 簡 說

生者 也。 與 體 是道 箇道 是義,及其養成浩然之氣,氣與義合矣。 不可言合,爲未養時言也。 氣,合義與道。 道 也 即即 都了。 ,却言配義,如以金爲器,既成 義用也, ,須是以 伊 氣 川日 儘 是 是 體 有 若以 : 人行 就事 用 形 配 方其 體 人而 義 道始 上 道 ,故言合。 未養。 與 一便言 是 言 道 得。 體 則 義。」 , 義 則 謂 言 人 如言道, 氣 以 氣者是 是 又曰 自 義 自 義理 用 是 又言道, 是 人,道 氣 養 配 則目 則是 積 義 配 者 成 義 自 所 道 本 自 此

7

他

然之氣

處。

誠者,物之終始,不

誠

說

氣

與

義

明

道

生

便

合得

襲

而

取

之也。

集

義

是

積

義

所

若累土爲山

須

是

積

土

乃

成

Щ

形

乃名爲義

作

山

浩然之

而

後

至。行不慊

于心,止

是

防

患

義

乃

能

生。」

又

日

是

義

之有甚迹,然亦 氣自是氣,體所充自是一件事,敬自是敬,怎 二分,只將敬 之氣,既言氣,則已是大段 配道言其 如何,養得 ,積集既久,方能生浩然氣象。 者,既 也。一 不是義。 是 時 曰:「只著一個 地否?」 他體 生 道 金器。」問: 自别,怎生便能使氣 得 如曰 ,0安 ,配義言其用。」 本 又曰:「 分便有一分,養得 此 儘 臂之以 有 「其爲 氣,語其體則與道合,語其 能便到充塞天 也。 日 形象。 配義與道,浩氣已成 義, 「人敬 氣 氣須 金爲器,及其器成, 私意,便是餒,便缺 有形體之物,如言 也,配義 用 浩然之氣是 也 是 以 又曰 養, 與義合? 直 地 人但 二分便 與道」,若 内,氣 處? 集 又曰: 浩然 看 義 集 義 Ħ. 有 所 所 便 之 物。 養所 便是 塞 不 莫 此 氣又不 非 如 所生,非 天地,必 日 圃 - 爲堯存 : 非 乎 術 便是明 生浩然之氣,非義 是 集大成。 須 生, 義 集 山 浩然之氣,所養各有 待 也。」 已 積 是 義 成 集

又曰:「集義

所

生

者,集衆

外襲

我

而

取之也

漸

,所以

至

于

充

方命

得

此

用

則

莫

養

生

能

充

寒

天

所生

合道

與

可

這裏缺了他,則 天地之間 義疑,有私 非義 (善。」 ,不爲桀亡,只是人不 外至,是 襲而取之也。 有少私 意便是餒。」 又曰:「氣直養 集 便這 義 所 意,只 生者,這 裹没這物。 須集義,這 是 到他 又曰 氣 面 虧。 無 箇 : 這 浩然之 是 害, 裹 道 上 不 知 集 便 頭

0 四 庫 本作「得

ħ. 五五

又

害。 然有 學者之事, Ŧi. 復 坤 不 且 氣 言,故必主于敬。 有深淺 事,坤六二是學者之事。 是二,又是六,故 言是剛也,直只 有事也。 利。」方便是 直 桂 看 便不同。 不習無不利。 云『至柔 難 之三 大只是對 不 取 此 識 言剛 氣 大小。」 地 須 道。 象 德,方始 而 要認得, 然亦有聖人之道。乾九二是聖人之 欲得學,且只看取 助長,乃正也。」 而 動 然亦 小 《坤》六二:『直方大,不習 言方者,剛 一剛,大便是大,直便是直。 是對 也剛」,以其先柔而後云 坤之六二只爲已是地道,又 而言是大也,剛只是對 又曰:「必有事 爲 勿正,勿作 見浩然之氣。 當行 (未盡,須是見至大、至 聖賢之道其發無 地道之精純 曲 而言是直 無不慊于心之時 則 害于 爲也。 地道。 又曰:「必有 者主 者。 若要見時 也, 地道 心勿忘, 二,但 養氣 至如 坤 如 一,故 雖 此 剛 柔 剛 而 至 是 六 自 于 無 下 自 無 而

之事。 不會得時只是弄精神。」 也。 物。」 輕。 焉, 正心之意 忘勿助長,必有事 得,便合有得。」 此 事 長。』未嘗致纖毫之力。 重 有 曰:「高飛 勿忘勿助 事 加 焉 又曰: 「必有事焉 ,須默識 謂 此一 有 也 日 勿忘是敬也,正之之甚,遂至於助 必 勿助長,養氣之道當如此。」 又曰:「必有事焉 善然後爲之,是正 有 事 段子 同。 勿 於此 長之間,正當處 取主 所 戾 助 事 思喫緊 天, 活 長, 作 潑 是敬也。 之意。」 又曰:「正是著意,忘 魚躍 則 潑 焉,只中道 敬」。 爲 是 地 而勿正,心勿忘, 此其存之之道,若 人 于 勿 而 會得 也。 也。 處,必有 淵。」言其 也。 正 勿正,事者,事 勿正,正之爲 又曰:「必 也 時活潑潑地, 勿 勿 上行。」 志 正 又曰: 後 事 言 L 又曰 則 下 則 長。 之 是 勿 有 若 而 勿 勿 又 事 無 助 漸 必 思

帛

威

儀

而

後

發

見

于

外

然

須

1

有

此

恭

者,得也,須是

得

于己

一然後

謂

之

德

也

見。

若

心

無

恭

敬

何

以

能

爾

所

未

將之時

。 已

有

恭

敬

非

大

幣

帛

而

後

有

否?」

曰

中

理

在

事

義

在

4

内

荷

義

然之氣

從

何

而

生?

理

只

是

發

而

者。

且

如

恭敬

,幣之未將也

恭

敬

雖

義,

却

是

都

無

事

也

_

又問:「

義

莫

是

事

有

事

焉

,須當

集義。

只

知

用

敬,不

焉

而

勿

正

心

勿

忘

勿

助

長

也

必

有

事

是

心

勿忘,

勿

īĒ.

便

是

勿

助

長

也

ا ا

或

必

有

事

焉

當

用

敬

否

?

日

敬

只

是

涵

纔

說

著

静

字,便

是

忘

也。

孟

子

日

必

便

入

于釋氏

之說

也。

不

用

7

又

間

敬

莫是静

否?

日

纔

安

得

不

用

意

?

若

能

不

用

意

却

是

都

或

問

伊

ĴΠ

敬

還

用

意

否

?

曰

静字,只用敬字 敬 說 中 無 其 不 問 有 恭 幣 謂 見 知 焉 因 養 主 理 集 始 敬 之 德 然 幣 于 便 事 事 安樂者 當 之道 便是 事 也。 也。 者 易,又省 事 自 義 是 也 雖 之久必别。」 自 只 則 然 也 Ŀ 知 焉,須把敬來做 如 若只守 問: 是 無 如 必 心 何 所 且 義 如 德 有 操之則 非 以 礙 何?」曰:「内外 三 然後 便 何也? 此 又曰: 爲 欲 事 僻之心, 孤 敬、義 夫。 知 左 孝之道 焉 爲孝,不 右 能 有 箇 而 存 又 盡孝 此 逢 德 是 ,捨之則 何 日 敬 正之也。 敬 件 其 語 如 不 有 别 . 則 以 事著,此 所 是 成 道 不 孤 雖 原 「今志 非 ? 直 正 必必 則 近 只 以 知 也 也 一理,豈特事上 内, 亡 是 安 侍 守 日 集 似 順 亦 有 剩 于 常 有 奉 著 得 又問 理 義 道 須 然 隣 義 當 主 最 不 且 人 而 又 M 敬 却 箇 箇 理 如 所 是 虚 于 行 持 恁 只 到 是 孝 助 之太 簡 内 何 去 論 義 是 德 而 都 是 字, 一志 之 最 則 温 盛 必 求 只 持 然 無 爲 如 虚 此 不 有 合 在 事 己 須 後

五三七

煞好。 得。 然冰釋, 飫之,使自趣之。 長 可 于 不 文義 杜 篤 預 怡然 亦 云: 上也且 不 미 「優 理 助 有益 順,然後爲得也。」此數 若江海之浸,膏澤之潤,涣 而柔之,使自求之, 長。 ,若于道 志不 能 理 篤 上助長 則 忘 廢 厭 反 旬 而 不 助

則不無,擬心則差。」某當時言下有省。」助長」爲一句,亦得。因舉禪語爲況云:『事出哥以『必有事焉而勿正』爲一句,『心勿忘勿生與某講《孟子》,至『勿正心勿忘勿助長』,云侯世與云:「某年十五六歲時,明道先

此 遁 辭 淫、邪、遁,是觀人之言而知之,亦可以考其 四 辭 偏 ,然本意 、蔽、淫 者、楊、墨兼有。」又曰:「自曾子守義、 生于不 明 道 日 辭 唯 正,窮著便遁 陷 爲 孟 溺深,邪辭 觀 子知 人之言 言 ,如墨者夷之之辭。 也。 即即 信其 知道 說 至 又曰 于耽 也。 一:「詖 惑 詖

> 君子或 皆說 不 蓋 辭 蔽 蓋自謂不能辭 也。」問: 能」者,不尚言也。 能者 陷 「有德者必有言」也。 冉牛、閔子、顔淵善言德行,孔 遁 篤 ,使學者務本而 不然。」曰:「 實自内 窮, 『我於辭 皆 離 命, Œ 本 本之學, 則 命則不 也 《易》 然。 以 己。 善言德行自居矣, 而 宰我、 孔子兼之,而 能 所 則 E 1. 恐 觀 「我於辭 謂 一尚 子貢 可以 非 子 口 孟 善爲 兼 命則不 乃 知言。 子 自謂 之。 窮 語。 說 恐

以爲武侯戰伐所喪亦多,非殺一不辜而 辜 則 誠 行 無所逃于天地之間。安得天分,不有私 有所不爲。 本無「天分」、「不」、「則」字。 也。」 先 不義,雖得天下不爲,與孔子 伊川曰:「夷、惠有異于聖人大成處,然 生在 經 又曰:「父子君臣,天下之定理, 筵日,有二同 有分毫私,便不 行一不義 矿 論 是 武 王 同者,以 侯 者事。」 殺一不 事 其

不辜 不 以 下 天 木 子之 而 爲之事。 有若等自能知夫子之道,假使汙下,必 好而言, 得天下不爲,謂 命 討 先 謂 天 生謂: 其 下之賊, 論 殺不 可信 「二公語 辜以 則 也 何 私己。 過 害? 武侯 殺 又

811

好 綸 知 **夫子者乎?** 也 天壤,固 聖 明 八汗曲 道 日 賢 : 于堯、舜。 亦 然 不 宰我、子貢、有若,其 圃 至阿所好。 未爲 盡論,但不至阿 而觀 生民以來,有 以孔子之道 智 其 足 所 如 彌 以

憑

子賢於堯、舜,語 伊 JII 日 -: 語 聖 事 則 功 不 也 異, 事 ,功則 有 異。

以 但言『仰之彌高,鑽之彌堅』而已。 堯、舜 謂 仲 或問 非 贵 尼 善善 垂 可 稱 「夫 法 賢 聖人者。 萬 也? 八子賢 世,故云爾。 於堯、舜,信諸?」曰: 但 門人推尊夫子之道 如顔 子便 然三子之論聖 不如 後來 此道 惟 曾

> 子 門人推尊,不 「夫子賢於堯、舜 猛 子善形容聖人氣象,曰: 治天下,孔子又推 容注措甚好,使學者宛 據處?」 ,恭而安。」又《鄉黨》一 ,其道: 能 傳 後世 得 不 ?」曰:「此是說 否?」曰:「 然。 堯、舜之道 又問: 如 子温 一篇,形 見 聖 無 加 而 人。 容 堯、 厲,威 垂教 孔 功。 得 子,有 舜 聖人 堯、舜 萬 非 問 而 世。 孔 動 其 不

守,近 言。 言。」 齊 苟難,近於並 曰:「詖、淫、邪、 爲聖人之道 子謂 『我於辭 物; 《易》謂不言 横渠曰: 於揣 邪 又曰 辭 摩 離 非 耕爲我;淫 說 命則不能」,又曰 Ē, 知 四 難 遁之辭,古 知 而 德 辭 近 德 信,存乎德行,又以 之難言, 以 於 四 者 溢 者 隘 達 、侈、 辭 미 與 乎是哉?」 放 語 以 不 知 侈,近 偏、 孰 浩 盡 之 恭 近? 然 天 至 妄四字 之氣 下 遁 於 也。 之 兼 尚 辭 詖 辭 愛 難 孟 推 狂 無 辭 又

之。 冉、 孟 顔 善知 子言我 又曰 聖 : 於 人 宰我、 德 辭 行 命,爲能有 而言之。 子 貢 善善 所尊也 推 仲尼 尊 聖人 有 德 說 且 辭 有

兩,用 見 權 則 心 蔽 守 邪 井觀天,井蛙 至 生 曾子守 蔽 刑 守固 陷 於 手 以養諸 ,其所以充 者 則 約 名 于大,故言放于 小 脺 吕 權 必先 見 失 ,故言 而道 約 日 面 便 守 小 必 義 盎 内,行無不慊以 調 而 先 博學,窮大必先 而 「北宫黝守外形,孟施舍守我氣 離,故言附 背,其充塞之驗 不 可 不 道 反 塞 人 可 以 見 於詖 窮 經。 天 又曰 以 治 大,故其辭詖 ,故言流 地 語 國 學不 淫。 _: _ 固 此 于邪。 東海之樂。 中 非 浩然之氣是集 防諸外,積之有漸 博 兩 未 執 目不見 于 一日之力。 未合 執 而 與 中 遁。」 經未 ? ·, 致 而 求守約,則 大道 而 欲 如 陷者 Œ 一必 求 申 窮 又曰 又 而 如如 致 大 務 韓 日 欲 先合 義 思 多 坐 只 用 則 識 無 所

而

不作,故樂正、《雅》、《頌》各得

其所。

如

不

制

故

或行夏,或善殷

,或從周

于樂

正

又

日

仲

尼

有

其

德

而

無

其

位

于

禮

嘗

言

mi

辭遁。 見左而 誠, 者誠 著。 思 以 能 開 駁 惠 如 不 而 體 逃 ,不知 反身之誠充其知,則 人陷 務約, 和 知未 故 得。 如如 難 于此者 故 ,皆只是一 其 以其言 如莊周 不見右 不 入大水,杳無 子 必 故 辭 統 故曰: 得 貢 盡 邪。 要, 其 其 惟 也,智者 (是也。 如 如 辭 、浮屠、務欲 所 欲 蓋 己 偏,不能 如楊子爲我 窮者 淫 仲 逃 陷 益 :弓是 避 且 在 惟 以 知 津 如 明 所 智,夫子 衆 所避 將 以 窮矣。」 涯 司 也。 于 惡, 兼 多之中, 致 至 此者 脫 馬遷之類 濟。 罔 ,墨子兼愛, 于 知 致知 而 而 去 知 既 不 之 形 不 不 也 蓋將 所 勉 明 聖 迹 知歸 不能 ൬ 知 又 濟。 矣。こ 誠 **一,**殊 而 明 所 反 日 道 汎 中、 其 未 向 自 身 故 無 分 夷 離 濫 意 不 必 而 其 歸 離 者 如 雜

之樂, 之後觀 子貢所 乎? 用 加 損 者 (者,文也; 故 則 之,以 以 集 议 其 知聖人之深,謂「生民 禮 其 古今之正 貫 所 比 不 言 先 百 미 制 世 後 聲,其 加 之王 爲 聖之精 之禮 損者,道也。自 ,皆莫之能 德有不至乎? 義 以 ,其 其 以 政 所 來未 違。 有 正 百 不 作 之 此 世 可 盡 爲

有」也。 去。 先 何謂 氣 此 則 日 爾 持 事。」 許 生 寒 須于心得其 其 大事。 云 乎天地之間,配義與道」者,將道義 浩然之氣? 謝 调 或問 當 雖難言,却 : [只他道 日 爲 : 否? 氣 若是不理會得底,便撐 知 也,至大至剛,以 「必有 言 日 īF. 須教他識 是 箇 孟子 時 事焉,是持 智, 難 識 近之。」 言 日 取。 養氣 也 箇 難言 是仁。 便 體段 直 ,敬否? 又 又曰 知 養 日 他 也 始 拄 而 肚 浩 得 胡 無 說 裹 明 敢 然 横 明 正 害 道 渠 是 出 故 將 問 之 有

> 嘗言 道 所謂 涉 藥 夫必 忘,安如勿助長,正當勿忘勿助長之間,須 天。 勿助 孟 可 細 恭敬必勉强不安,安肆必放縱不恭 生 五 乎 日 子 無 以養生者,以不留 曰:「施之養生則 體 刑 : 天命 所 有 認 長 去念,助則近于留情,故聖人之心如鑑 事 Ŧi. 天 可知 取。 者, Ē 以 用 者 事 吾 ",渾不 有德, 馬 異于釋氏 + 理 Œ 當 而 是 五 恁 心 而 又曰: 勿 學 年學箇恭 是杜 己。 以待之,則先事 地 便 IE. 不 時,自家 五 此 成 何 情也。 撰做作來。 可,于道則 服 只 也。」 「吾嘗習忘 調 0 如 Ŧi. 平 有 而 視聽 章 ; ? 學道 看 安不 多少 又曰 取 天 動 且 而迎。 有 病 成 學者直須識 討 作, 以 天 出 則 :「勿忘又 害。』習忘 在 異 養 有 地 人 明 恭 見矣。 于是。 罪 起 生 切是 忘則 大 如 道 ",便 凡 先 明 勿

● 「不成」,二字原無,據明抄本補

也。 淵。」 做大。 子百家 所 作人似之。子思之意,言上下察也。猶孟 意。」 爲言 道體 勿忘 天 飛戾天,魚躍于淵。』無些私意,上下 二字,却 天之所爲 識 得 謂 得 理 語小,天下莫能破。」」 一猶 必有 勿助 其 故 無所不在,非指鳶魚而言也。若指 天 爲 則 結 所 韓 明道 理 又曰:「《詩》云:『鳶飛戾天,魚躍 便人人自生出 是,自 上面 是自家 放政 事 也。 長 ,然後能爲天之所 愈 上文云 焉 謂 嘗曰:『吾學雖有 則 更有 然 而 詩人之意,言如此 魚 知 以 體 底 勿 川 此, 关 天自 道 貼 泳 「君子 正,察見天理 在,下 出 理 知 而 一般見解, 處,佛氏 來。」 此 移易不得。 鳥雲飛,上下自 則 語 面 爲。 知 大,天 更有 所受,「天理」 夫子與點 却不 聖門學 又曰:「高 不不 氣象,周王 欺 地 察,以 誑 不然 下 用 敢 在。 衆 莫 私 鳶 恁 者 生。 能 意 子 于 之 魚 明 地 爲 諸 知

配 也 直 故 體 帥 勿忘也。 是 口 心不可。 王 以 羊,非愛其 曰:"「志至焉,氣次焉。」氣之從志,則持其 之,所 之充 也。」 養 至大; 氣 誠 ,則氣從之矣,故不得於心勿求 自 又曰:「通天下一氣耳,天地其 又曰:「志,氣之帥,則氣從 氣 而 也 爲 楊 解,所謂 也。 無 無 愛其財 日 以著明之也。」 而 集 害 勿正,勿助長也。 形 夫志者,心之所之也,而志爲氣之 : 又曰:「無暴 財 反 義所生,故 ,則塞乎天地之間,蓋氣之本 聲之可 人受天地之中以 動 齊 而易之也,而 不得於言也。 而易之矣,故不得於言勿求 以其心。 王 不 名,故難 忍 氣壹則能 至剛。 其氣者,蓋 牛 又曰: 之 百姓 助 言 不求 觳 生,均一氣 長,老子所謂 也, 氣之剛大, 領 志 隸 「必有事焉 動志 於 Ŧ 而 體 蹶 而 而 於 心 爲愛,無 以 故 者 己。 易 也,氣 氣 道 之以 也。 趨 可。 則 耳, 以 者 志 故 於 齊

草

他

議

論

方是議

論

又曰

:「伊川

則

미

心

說

勿

正則

不可。

伊

ĴΙ

讀

書直是

焉

而

勿

E

爲

句,如

何

?

日

事

說

大

至

以

直

一爲

句

養

而

無

害」爲

與夫

助之長者又何

.辨?

此

近

似之際,

者尤當慎擇也。」問:「伊

其

說

是

也。

然將不

舍

而

耘之,則

宜奈

耘

,則有莨莠之傷;

又曰:「養氣之道,如治苗然。

善養

也

用意以養之,皆揠

苗者也,曲孰甚焉

見其

至大,不知集義

所

生,故不見其

至

流

通

寧非

剛大乎?

人惟自牿于形

體

焉

則

無

二者之害矣。」

又曰:「

通

氣

也。

其

爲

害

順

同

循

其

固

然

而

順

養

之,

無

益

生

也

益

生不

祥。

忘與助

長

所趨

雖

異

(氣者,無加損焉,勿暴之而已,乃所謂 人受天地之中以生,其盈虚常與天 助之長,則揠之而槁矣, 川先生以『必有 舍之而 一句。」 天下 以『至 故 體 勿 何 不 加 ? 剛。 9 之 ? 地 草 事 不 直 不 正 損 而 何 志,鄙 同。 問: 直 究 莫 伊 或 誠服之矣,使得 莫不興起,則 之得邦家,綏之斯來,動之斯 業,則夷、惠之能 下?」曰:「只看顏子在陋巷便做得禹、 何著力?」曰:「孟子固曰:"至大至剛, 勿忘,勿助長。』既不可忘,又不可 而 不 ĬΠ ? 養 ,方見好 無 日 「伯夷、柳下惠,如 妨。」 堅 . 而 害較渾全。 如夷、惠之風,能使頑夫 夫寬 「明道曾言至大至剛之氣, 云 無害。」則雖 又 先兄 曰 處。」 ,薄夫敦,奮 日 其 「嫌于將 無此說 未有 百里之地 論 朝諸 他說 問: 伯夷之清,則 未 爲 一段有天 若 何見得能 嘗忘,亦 話,須是與他 「 必 之時,人固 乎百 物 而 日 養 有 君之,其效 世之上 以 和,自是力 下 廉 事 直 不 可 朝 物,不 ·須以· 助 養 而 懦 助 己 諸 知 長,當 勿 而 思量 夫 侯 長 心 而 直 Œ 無 之清 宜 悅 有 量 稷 有 如 聞 聖 害 體 養 如 者 立 事 天 如 心 而 不

曰:「賢人而已。」」曰:「皆古聖人也,未至於大成。」故孔子也,柳下惠之和,則聖人之和也。故孟子

爲矣。 至于聖人則不敢居焉。 難 動其心,則發于政而害于事矣。 不 者知道故也,養氣者合理也。 言、養氣之說詳焉。 子、子夏之徒養勇以不動其心,及夫告子之 孟 而 勇耳,未知道也,孟子則知言而 不動心是非優劣,以告公孫丑,而又言己知 言 判,詖淫邪遁之害無不 子因言北宫黝之必爲,孟施舍之不懼,曾 無 孔子而已矣。 也 所動心,故公孫丑以爲過于孟、賁之勇。 尹曰:「孟子當一國之任,行至聖之道, 苟或不能知言而養氣,則必動其心, 故孟 子推 臣聞之師程頤曰:「孟子 尊孔 雖然,北宫黝之徒能 歷論 子,而 知, 古聖人,無以 齊國 知道 自 養 雖然,至德 以 之任 則是 氣。 爲不 不足 非 知言 能 加 無 養

> 子配孔子,卑孔子者也,如何?」曰: 義。 相傳至孔子、孟子。」● 如此較優劣。 言:「以孔子賢於堯、舜,私 與道,施之則充塞乎天地之間,斂之則 也,不可忘也,不可助 者在直内,養之如 爲私心所蔽而 于密,真學者之要務也。」 或問:「晁以 而已,存而 至大至剛以直,其體則名曰道,其用 者,天地之正理,吾之所固有 養氣之說,學者所宜潛心也。」所謂浩然之氣 學者能識之,然後可以養之。 勿失而已。 惟韓退之說得最好,自堯、舜 一一一般矣。 何? 夫帥氣者在養志,養 長也,主一而已,直 如是則集義 必 孔子者也, 有事焉,不可 也。 其爲氣也 而 不養,則 能 則名 不不 以 退 配 道 藏 義 内 īĒ. 志

▶ 「自堯舜相傳至孔子孟子」下,明抄本有「孟軻死不得

孟子 日以力假仁者霸」章●

莫能爲,此天下之所以不定于一也。」 尹曰: 「王霸之優劣如 此,而當時之君

「孟子日仁則榮」章

而

言矣。」 求之者。 不修政刑,雖小國必侮之矣。 刑,雖大國必畏之矣。國家閒暇,般樂怠傲 尹曰:「賢者 孟子引《詩》云『自求多福』,可謂知 在位、能者 禍福無不自己 在 職,明其 政

「孟子曰尊賢使能」章

更也。」 稅,更不征其物。 無 廛故而厚其稅。 此二布。」 伊川曰:「廛 又曰:「順天爲政者,天 廛無夫里之布,廛自有稅, 法而不廛,稅有常法,不以 而不征,市宅之地已有 廛

惟 天所命,不敢不從,故湯、武得天吏之稱。」 吕曰:「奉行天命之謂天吏。 廢興存亡,

子精義卷第三

公孫丑章句上

皆願爲之氓,如是則鄰 無敵於天下,又何 市,旅皆願出於其路,農皆願耕於其 尹 曰:「士皆願 立於其朝,商 疑焉? 國之民仰之如父母, 然則安可使之 皆 願 (野、民 藏 於

其

不願哉 「孟子曰人皆有不忍人之心」章

隱,如 井,其顙有泚,推之可見。」 物,俄而至於忍,安之以至於殺,充之以至於 好殺,豈人理也哉!」 又曰:「惻,惻然。 無是以生,但戕賊之以滅天耳。 以生。惻隱之心,人之生道也,雖桀、跖 顯道記聞甚博,謂之曰:「賢却記得許多,可 伊川曰:「心生道也,有是心斯具是形 物之隱 應也。此仁之端緒。 明道先生見謝 始則不 赤子人 不 知 愛 能

原無此字, 據四庫本補

五四四

問仁。 然便以博愛爲仁則不可。」 退之言『博愛之謂仁』,非也。 之端也」。 心,仁也。後人遂以愛爲仁。 仁處,類聚觀之,體認出 孟子言惻隱爲仁,蓋爲前已言『惻隱之心,仁 也,愛自是情,仁自是性,豈可專以愛爲仁 謂 玩 物 只此便是惻 曰:「此在諸公自思之,將聖賢 喪 既曰「仁之端」,則不可便謂之仁。 志 顯 道 隱之心。」惻然有隱于心 不 覺 來。 身汗 孟子 面 仁者固博愛, 惻 赤 隱 日 0 固 惻 是 所 隱 先 ? 言 愛 之 生

言此 更 其有仁。 人仁之門,而恕非仁也。 因其惻隱之心,知 義之端。」 無 五事,須要分别出。 明道曰:「羞惡則有所不爲,知所止,乃 作 惻 「更有」。● 隱 惟 又曰:「仁義禮智信,于性上要 四者 則屬愛,乃情也,非性也。 有端 信。 ,而信無端,只有不信, 如 東西南 仁 一則固 北,已有定 一,一所以 恕 者

> 體 是有不信。 ,更不可 言信。 如東 即 若以 東,西 東 即 爲 西 西 則 南 無 爲 一有「不 北 則

字。

信。」

《易》 說時,只說一箇義字亦得。」 信乎? 只爲有不信,故有信字。」又問:「 有信字。 不言信者,既 在四端之間?」● 曰:「性中只有四端, 或問 孟子 則 又曰:「四端不言信,信本無 是至理,在《孟子》則 且如今東者自東,西者自西, 論 伊 ĴΠ 四 有 端 : 誠 處 心爲 四 曰:「不如此說。 却無信。 則 端 欲擴 四端, 不及 而充之; 爲有 是氣。」 又曰:「四端 信, 則 信 何 示 若如 在。 在 信,故 也? 說約 其 何用 又 中 此 莫 在

[「]汗」,原作「汙」,據明抄本、四庫本改。

^{● 「}一作更有」,明抄本作「一作便字」。

語》四改。

之,不足以 孟 體 道 處 也。」 子曰:「苟能充之,足以保四海, 而用之。不能體而用之者,皆自棄也。 ,則博學詳說 又曰: 事父母。」夫充與不 而反說約,此 「人皆有是道 内外交相養 惟 充,皆 君 苟不 子 在 爲 充 我 故 之 能

而

達 固 非 怛 天下皆吾體,生物之心皆吾心,彼傷則我傷 于外爾。」 謀 極 m 深 慮 吕曰:「人皆有不忍人之心,忍之則 不安,蓋實傷吾心 **添所及** 與與 物物 →非勉强所能。 隔 絶,故其心靈梏于 ,非譬之也。 彼忍人者,蔽 一身而 然 後 不 知 憯

著循字不得。」

所 井 乍 謂 時,是真 又 見孺 天理 日 謝 日 格格 : 「人須是識其真心。見孺子將 子將 者,自然底道理,無毫髮杜撰。 心也,非思 物 人 窮 于 理,須是 井,皆有 而 得也,非 識 怵 得 惕惻隱之心。 勉 天 而 理 中 始 也。」 人

> 然,即 欲,即滅却一分天理, 存一分天理 鄉 方乍見時,其心怵惕,所謂 『去智與故,●循天之理。』若在聖人分上,即 意,杜撰做 一分人欲。 黨朋 人欲耳。 友,内交於 事,所謂 人欲纔肆,天理滅矣。 天 理 孺 人欲肆 與 子 父 人欲相對 母 也。 天理 兄弟,惡 故莊 也。 ず,有一 ,即 任 子 其 要譽於 分人 私 勝 日 聲 用 得

乎? 而 不忍見其死,見其全不忍見其傷,而況於民 此,仁之體顯矣。 痛于中也。 民次之。 游曰:「惻者心之感于物 況於親戚乎? 孟 物之體傷于彼,而吾之心 子曰: 故君子之於禽獸,見 故惻 「君子親親 隱之 也,隱 心莫隆于親 而仁民,仁 感應 者 其 心 生 之 于

[「]非」,原無此字,據明抄本補。

^{● 「}與」,原作「輿」,據明抄本改。

失其本 我 至 外至也 在 民 之間 |于充其心體之本然,則 彼 而 而 愛 也 心 物 我 因心則然,此 ,故天下歸仁 傷之,痛 也已。」 此 自然之序也 在 又曰:「 彼 惻隱 馬 而 我 萬物一 所以 痛之。 惻隱 彼 爲仁之端 愛 體 痛 無 傷 矣,無物 傷 差等者 痛 也 非 引,傷 也 自

耶? 起聖 已 豈 道 自 茶者何謂?」薛曰:「前後例如此,近 自 惻隱之心 惻隱之心爲仁之端,平居但以此 耳 出 不 然 見。 遠 人之僞」,真 于人心,如此 如 或 日 矣。」 老子 此 問 且 若 儒 出于自 「何以 疾 日一禮 薛宗博 子將 體 痛 究 簡是。」 非 人 1然,不 知仁?」楊氏 事本 此理,知 者忠信 在 于 請 井, 諸 己 非意之所欲 因 可已也。 職 也 之薄」,荀子曰 加 其 問之日 事 而 人 所從 會茶, 爲之疾 見 日 之者,必 體 1: 「孟]:
「所 來 曰:安 门但 則 E 究,久之 日以 痛, 不 仁 子 以 禮 得 得 有 以 事 禮 之 召 何

益也。 者 之禮 此可 心有 豈 夫 如 也。」 忠信之薄,是特見後世爲禮者之弊耳。 失 言『失道而後德,失德 過,豈自外 之。」曰:「只爲 多 之不成人,闕一不可,亦無先後之次。 有 果能 義 有 ,其意欲民還淳反樸,以救 何, 四 與 謂 此 ,本諸人心,所以節文仁義 體 而 所不安,故當辭 又曰:「孟子曰:「人之有四端,猶 豈 此 故禮 使民 理 不 後 也。」夫 有 等 ? 知道 禮 來? 先後? 稍 行而君臣父子之道得,使一日去 還淳反樸,不 夫禮文其質 疎 德仁義禮者之言也。 禮者, 四體 前 如 濶 後例 云辭 雖 與 逐。 心 忠信之薄 而 生 然,老子之 合如此,心 中 遜之心 後仁,失仁而後義 俱生,一 只此 而 亦 打 已,非 善 一時之弊而已。 不 乎? 是禮,非 是也,顧 禮之端,亦 而 過 體 薄 亂之首」。 中 能 不 然 而 自 有 謂 須 備 先 所 天 末 打 禮 僞 所 調調 增 下 之 用 其 只 請

道也 禮 ,則天下亂矣。 可 可 也 乎? 惟不可去,此 若去禮,是去君臣父子之 四端所以猶人

之有四

體

矣。 苟能推不忍人之心以及民,則民歸之如父母 母,況其他乎? 苟不能推此心以及民,則不足以事父 尹曰:「人之有是四端,得于天者然也。 非失其本心而何?」

明道曰:「子路人告之以有過則喜, [孟子曰子路人告之以有過]章 尹曰:「人之擇術不可不慎也如此。」 「孟子曰矢人豈不仁於函人哉」章 亦

謂

必

訟

百

世之師也。」

賢也。 也。 有 又曰:「舍己從人、最爲 以 伊川 痛舍之,猶懼其守己者固 後之學者有一善而自足,哀哉!! 能 問 曰:「聞 不 能,以 善言則拜,禹所以爲聖 多問 難 事,顔 事。 子所 己者我之所 而 從 以 者 爲 人 鄿 大

> 善。 也。 與人爲善,乃公也。」 又曰:「樂取 于人爲善,便是與人爲

而已。共改之者,過雖在人,如在己,不忘則 物我之私,循理者共悅之,不循理者共改之 以 達善達不善。」 焉,共悅之者,善雖在己,蓋取諸 與 横渠 人焉。 日 :「君子爲天下,達善達不善,無 善以天下,不善以天下,是之 人而爲,

舉 不 做便 揚。 謝曰:「子路百世之師,揀 不做。 故孟 子將來 與 舜、 難 割捨 禹 作 底, 處 要

大也。」 而 不吝,●舍己 尹曰:「有過 圃 而不能改,吝也。喜者改 從 人, 此 其 所 以 爲

- 吝」上,原有「能」字, 據明抄本删。
- 原無此字,據四

五四

孟 子 日 伯 夷 作其 君不事」章

日

源 言之也。 則 滋深,故其論伯夷也以學。 夷 之時,道雖不明,而異端之害未甚,故其論伯 其道隘與不恭,乃心何罪?」 疵 源 推 也 0 不能也。」 夷 以德。 而 、惠之語,其弊至此。」 伊 川日 行之,必有害矣,故孟 又曰 夫闢邪說以明先王之道,非拔本塞 : 孟子之時,道益 隘 思 與 與 不 鄉 恭,君子不由,非是 人處,此孟子拔 。道未 不明,異端之害 子推 又曰:「夷、 又曰:「孔子 盡乎聖人, 其學術 本 而 惠 塞 瑕

也。」 其 惠之 不 興 恭,則君子不由也。」 起 則 風 ,故可爲百世 楊曰: 一,足以 必至于隘 問 ':「伯夷聖人,猶有隘,何 「伯夷、柳下 廉貪 與不恭,此 (敦薄 師。 故可 至其 惠之風 又曰:「伯夷、柳 流風之弊,隘 君 爲 ,聞之者莫不 子 百 ,所以 世 師 也? 不 下 由 論 與

> 聞 其 量 ? 風 此 者, 自 氣禀 頑夫廉,懦夫有立志,此是甚 不 ·同耳。 若觀 其 百 世之下,

力

其 夷、 至于隘 夷、惠之清和、聖人清和也。 之和,而又曰隘與不恭者,何也? 源。」 惠爲 尹曰:「孟子謂伯夷聖之清, 與 聖 不恭。故孟 人 人也,得 聖人之極 子立教,拔 加 清 其 極 以其本 流之弊,必 柳 孟子非謂 和 下 者 而 惠 耳 寒 聖

朝 諸 老先生孟子精義卷第三終

或

孟子精義卷第四 公孫丑章句下

國朝諸老先生孟子精義卷第四

公孫丑章句下

「孟子曰天時不如地利」章

尹曰:「得天下者,凡以得民心而已。」

「孟子將朝王」章

旨,況餘人乎? 此景丑氏所以問也。夫天 其臣也。 之時,天下定于一,尺地莫非其有,一民莫非 歌之意,欲其知之也。雖公孫丑猶不 也,無所逃于天地之間,是之謂大戒。先王 下有大戒二:臣之事君,義也,無 也,爲其召之,故不往。 楊曰:「夫孟子將朝王,則見王固所欲 則士于其時,無適非君也,無 明日出弔,蓋 適 而 取 ·諭其 所逃 非 瑟 君 而

義之誠心,不足與有爲,則雖欲亟見之且不士於斯時有不爲臣之義。時君苟無尊德樂之楚之魏無不可者,非一國所能專制也。故也。周衰,諸侯各擅其土地,士不遇於齊,則於天地之間,則『君命召,不俟駕行矣』,禮

尹曰:「孟子之行止進退,衆人固不可得,況得而召之乎?」

識

也,類皆如此。」

尹曰:「君子之辭受,惟當於理而已。」「陳臻問日前日於齊」章

尹曰:「王於距「孟子之平陸」章

尹曰:「王於距心皆知其罪,而莫能

改也。」

尹曰:「進退久速,皆當於理而」

「孟子爲卿於齊」章

尹曰:「智者不失人,亦不失言。」

五五

孟子自齊葬於魯」章

尹曰:「生事之以禮,死葬之以禮,盡夫

沈同以其私問」章

宜乎?!

孝心而已矣。」

與也。」
 尹曰:「惟義可以伐不義,不然,君子不

「燕人畔」章

周公之於管叔,其用心一也。夫管叔未嘗有喜亦喜,蓋天理人情於是爲至。舜之於象,如此,然有差等矣。」 又曰:「象憂亦憂,象類,觀其用心爲如何哉? 推此心以待人,亦理,觀其用心爲如何哉? 推此心以待人,亦

所不免矣。故孟子曰:「周公之過,不亦其管叔之畔,非周公所能知也,則其過有惡也,使周公逆知其將畔,果何心哉? 惟

之使象。」

"明親親之恩過厚爾。若求無過,則宜如舜公之過也。周公之心,以弟待兄,度其必不公之過也。周公之心,以弟待兄,度其必不

「孟子致爲臣而歸」章

拒而不受。」
曰:「王之意非尊孟子,乃欲賂之耳,故孟子每,而使國人有所矜式,孟子何爲拒之?」
伊川曰:「齊王謂時子,欲養弟子以萬

「孟子去齊宿於畫」章

也。孟子之進退,則子思之徒也。而客之言留也。泄柳、申詳之事繆公,惟恐公之見棄尹曰:「繆公之待子思,惟恐子思之不

不出於子思、繆公之事,故孟子不應也。」

「孟子去齊尹士語人曰」章

告君,又陳其此誠之不詐也。」 齊,是甚君臣? 然其去未嘗不遲遲 此 誓不復告君,不復見君,又自誓不 不怨,故直于寤寐弗忘,永陳其不得見君與 不忘君,怨慕之深者也。君臣猶父子,安得 知此詩解者之誤。 今此君才不用,便躁忿如此,是不可磯也,乃 也。 伊川曰:「《考槃》之詩,解者謂賢人永 據此,安得有賢者氣象? 此詩是賢者退 而 : 孟 窮處,心 子之於 而 顧戀。 實 如

之視臣如犬馬,則臣視君如寇譬」,以爲君言寇讐者。」此尤害理。何則? 孟子所謂『君亦曰永言其不得過耳。昔者有以是問常夷亦曰永言其不得過耳。昔者有以是問常夷。」非也。矢,陳也。以得曰:「《考槃》之詩曰:「永矢弗過。」

謬爲大言以欺人,是人終不可與人堯舜之道 隱于孟子,其樸實可知。 夢人問"「王由足用爲善,何以見?」語之 必復立其 夫苟一日有 之詩,雖其時君使賢者退而 改之,予日望之。]君子之心蓋如此。 子之自處,豈處其 之也。爲君言,則施報之道此固有之,若君 好色好勇,與夫好世俗之樂,皆以直告,而 曰:「齊王只是樸實,故足以爲善。 朝,何終不過之有?」 悔 過遷善之心,復 薄乎? 若乃其心不然,而 孟 子曰 窮處 以 三王 爲 用我,我 《考槃》 如好 又嘗夜 可罪, 庶幾 不

理矣,尹士何足以知之?」推如,正吉,●罔孚,裕無咎。』孟子可謂盡此尹曰:「《易》卦《晉》之初六曰:「晉如

矣,何善之能爲?」

「正」、《周易·晉》作「貞」,當係避宋仁宗趙禎諱。

0

五五三

「孟子去齊充虞路問曰」章

促他。」
是可催促他?」又云:「大數則是,然不消催
考之則可矣。他默識得此體用大約是如此,
百年必有王者興,其間必有名世者」,以其時
日年必有王者興,其間必有名世者」,以其時

地 將喪斯文」下,便言『後死者不得與於斯文』, 則是文之興喪在孔子,與天爲一矣。蓋聖人 聖賢之言氣象自别。」又云:「孔子於「天之 其如予何?」喪乃我喪,未喪我自做著天裏, 者不得與於斯文也,天之未喪斯文也,匡人 受命之語,若孔子謂「天之將喪斯文也,後死 平治天下,當今之世,舍我而 盛 ,如欲平治天下,當今之世,舍我其誰?」 位未能到此,故曰: 「夫天未欲平治天下 ,與天爲 明道曰:「「夫天未欲平治天下也,如欲 一,出此等語,自不覺耳。 誰?』此是有所 孟子

聽天所命,未能合一。」

自任之重如此,何不豫之有?」

尹曰:「道之行與不行,亦時而已

」,聖賢

「孟子去齊居休」章

仕者未嘗遽受其禄,以觀可否,在上者亦不 做渠曰:「古之人亦有仕而不受禄者,

欲便臣使之。」

朝諸老先生孟子精義卷第四終尹曰:「進退辭受,不可以無義。」

國

威 朝諸老先生孟子精義卷第五

滕文公章句上

「滕文公爲世子」章

虚

大勇者矣。」

乎 者則 者爲 也。 與下愚不 才禀于氣,氣有清濁,禀其清者爲賢,禀其濁 者,以能明性也。 也、雖荀、楊亦不知性。 先生曰:「此須索 ?! 日:「固 性即 **、愚。」「可變否?」曰:「可。** 不移也。」曰:「下愚所以自暴棄者,才 或問:「人性本明,因 移、然亦有可移之理、惟自暴自 是理,理則自堯、舜至塗人,一也。 是也,然 理會也。 性無不善,而有不善者才 却道 孟子所以 何得有蔽?」伊 孟子言人性 他 不 孔子謂上智 可移 獨 出 不得。 1善是 一諸 ĬΠ 儒

> 者亦若是。」孰勇於顔子? 觀其言曰:『舜何人也? 性只一般,豈不可移,却被他自暴自棄不肯 去學,故移不得,使肯學時,亦有可移之理。」 ,犯而不校之類,抑可謂 問:「顔子勇乎?」曰: 予何人也? 「孰 如有若無 勇于顔 子? 有 爲

可謂諭之以 不信者也。 尹曰:「人之性無不善,蓋無有聞 道。」 苟能自信,何患不至乎? 孟 子 而

滕定公薨」章

所宜 故 親,至此猶未忘,故必至再變,再變猶未忘 周則天道一變,人心亦隨以變。 也。」問"「喪止於三年,何也?」曰"「歲 又繼之以一時。」 即 伊川曰:「禮者,因人情者也。 義 也。 三年之服,禮之至、義 惟人子孝于 八情之 之盡

尹 曰:「聖賢之道,繫于行與不行。

Ŧī. 五五五

悲夫! 效若 之聞 道 此 在 而 于 孟 信 子 與 不信。 轍 環 天 滕文公信孟 下, 卒 無 子,其 所 遇,

滕文公問爲國」章

建 也。 生 \Box 譬諸草木,山 或 田 制 而今不 如有弟,是餘夫也,俟其成家,别受田 母下妻子, 曰:「卿以下必有圭田 問: 而 . 物 也 》所記不 使之,而民不 善治者做井田 常 伊 必 ĬЦ 미 井 相 井 E 行者? 又曰 田 稱 田 同 以 今可 上著得許多,便生許多。 「孟子 Ŧi. 必 豈 :「餘夫二十五畝。 恐漢 口至八口爲 封 有 行否?」曰:「豈有 或謂 勞; 建,必 而 人多 儒所記未 論三代之學,其 行之,而民 ,祭祀之田也,禄外之 倣肉 今人多 地 肉 少 刑 刑 率,受田百 必是也。」 之理?」 而 ,非聖人 地 不 用之,而民 一夫上父 少,不然。 病; 名 古可 也。 與 八之道 倣 天地 畝 封 又 行 Ŧ 又

> 段 也。 不 或疑非先生語 怨。 迹 也 故 者 善 聖 學者得聖人之意 人 因一時之利 而 而 制之也 不 取 其]。」此 迹

行者。 成一 或三 使地 其 側 饒與 謂: 以畫 先生論井法。二程謂:「地形不 或 有坳垤處不管,只觀四標竿,中間地雖不 不井授,故使十而自賦其 田 峻 中什 四,或 「必先經界,經界不正,則法終不定。 夫處,亦可計百畝之數而授之,無 形有 民 則 處 方,只要用算 横 就 如此則經界隨山隨河,皆不害于畫之 田 無 渠日 寬狹 亦不 使自 害。 得 一夫,其實 -: 井 ·甚美。 處 就一夫之間,所争亦不 賦 尖斜,經界則 野 爲井,不能 ,郊門之内 九 法 折 又經界必須正南北,假 田 而 計 數 一也。」先生與 助, 地 則 就 通 不避 畝 在 成 調 郊 必 授民。」先 處 之國 之 Щ 又 謂 或 外 河之曲 或就不 多。 寬 中 五七, 助 不 平 平, 也 又 程 地 牛 \mathbf{H} 口

言

議

豈

敢

某

止

欲

成

書,庶

有取之者。」

法既大備

,却在所以行之之道。」先

使

上

下

都

無

此

怨

怒,

方

可

行。

伊

Ш

H

使

貧

富

均,

則

願

者衆,不願者寡。」伊

ĬII

亦

未

可

言民

情怨怒,止

論

可

不

可

爾。

爲氓,亦幸也。」明道言:

或曰:「若有人聞其說,取之以爲己功 畝數衮分之。以衮分之數,取十一之數 十一也?」先生言:「百畝 川云:「至如魯,二吾猶不足,如 徹之徹。 一家得惰者。 使暴君汙吏,亦 介有議 輕示人,恐致 非 透徹 專 論,則 而 在 及已收獲, 秦 而 徹,言徹取 耕, 時 方 ; 其 笑 有 則 數 及 百 益 功 來 占田 伊川 言 生日 地多、概與之、則無以别有田者 他如何?」「今之公卿,舊 極多 須是有行之之道。又雖有仁心仁聞,而 方員平直,須是要規 行者,不由先王之道也,須是法先王。」伊川 「孟子於此善爲言,只 .過制者如何?」先生云:「如又曾有田 :「徒善不足以爲政 言:「不行于當時,行于後世一 ,只消與五十畝 采 矩。」二程又問:「官户 地 ,徒法 有田多者,與之采 儘 竭 多。」又問 目 不 力焉 能

能

?

爲急。講求法制, 奪富人之田爲辭。 治,皆苟而已。 必自經界始。 今,如有用我者,舉而 治,望道而欲見,論治人先務,未始 先生《行狀》云:「先生慨然有意 貧富 世之病難行者,未始不以 粲然備具,要之可以 不均 然兹法之行,悦之者衆, 措之爾 ,教養無法,雖 嘗日 不 以 三代之 呕 政 于

五五七

二、「其

也。」

有

論。」先生謂:「有笑

則

如如

何?」先生云:

如如

有能

者,則己願受一

「井田、今取民

則計

亦可

。」或謂:「井議

不可

力均

且

相驅率無

則

無義,是透

亦遠

矣。」伊

也

苟

如

此

畫定,雖便

不

得

經界之壞,亦

以

自行

也。」先

何得

五五八

吾所 苟 廣 之賦役,退以 之法,共買 有 末,足以推先王之遺法,明當今之可行,此皆 能行之天下,猶可驗之一鄉。」方與學者 儲 處 志未就。」 蓄, 病 之 者,特上之未行 有 興 術 學 田 其 方。 校、成禮俗、救災恤患、敦本抑 期 私正經界,分宅里,立斂法 以 數 畫爲數井,上不失公家 年,不 耳。 乃言曰:「縱 刑一人 加 可 議 復 古 不

畝,是爲徹。」

不爲公田,俟歲之成,通以什一之法取于百家,八家皆私百畝,同治公田百畝,是爲助。較數歲之中以爲常,是爲貢。一井之地八較數歲之中以爲常,是爲貢、助、徹三法而已。

使自賦。 助 而 通 周 用 楊曰:「夏后氏 人百 也。 方里 畝 故孟子請野 而 mj 徹 井,井九百畝,八家皆私 徹者 五十而貢,殷人七十 九 徹 而 也。 助 蓋 ,國中什 兼 貢 (、助 百 而

> 于此歟 鄭 畝 使自 氏 其 謂 中爲公田,所 賦 周 制 則 畿 貢 内 法矣,此 用貢 謂 法,邦國 九 周 ௱ 人所 助 用 也 以 助 法,有 爲 剪 徹也。 中什 得

無助,類皆如此,可爲興歎也。」使孟子之言得行,豈特善于一國而已。行而世,匪說攸聞。』聖賢之用于世,其心一揆。尹曰:「傅說有言:「事不師古,以克永

「有爲神農之言者許行」章の

不 只 必 醫方稱黄帝之說是也。」 稱述當時 曾實有之。」 爲于己道無所 多 人 伊川 異 (教,其 羲農之事失其義理者,猶之陰陽 曰:「許行 志 得,故不能安,雖 又曰:「氣有 非 所爲神農之言,乃後世 願 也 丁,其 又曰:「儒者其卒 勢 盛 則 自 日 然 必有衰, 聞 如 道 此。

^{● 「}章」,原無此字,據四庫本補。

息矣。 而已。 久者示人。」 于民, 医直輔翼, 聖賢于此間見些功用, 舉此數端, 可以常 淵泉,豈能時出之? 大抵氣化在人一般,聖 是先有溥博淵泉也,方始能時出,自無溥 聖人都做得了,然必須數世然後成,亦因 得堯、舜然後垂衣裳。 治則須治之。 衰則終必張盛。若冬不春、夜不晝,則氣化 匡之直之,輔之翼之。」正須如此。」一云:「堯之 (于其中只有功用。 所謂「溥博淵泉、而時出之」也、● 聖人主化,如禹之治水,順則當順之, 古之伏羲,豈不能垂衣裳,必 放勳 據如 曰:『勞之來之, 此 ,事只是一箇 博 須 時

以

從夫子如此之久,方數不可得 子貢蓋于是始有所得而 而 矣。 聞 也, 夫子之言性與天道,不可得而聞。」 明道曰:「子貢曰: 『夫子之文章,可得 然觀其于孔子没,築室于場,三年然 一數之。 以子貢之才, 而聞,亦可謂

> 年中待作多少事,豈肯如此。」 後歸,則其志亦可見。他人如子貢之才,六

以所事孔子事有若,獨曾子便不可。自子貞 離散,只有曾子便别。 上,必皆不肯。」 伊川曰:「孔子門人,自孔子没後,各自 子夏、子張、子游,欲

於人者食人,治人者食於人」,則勞佚平矣。 未見其象。『勞心者治人,勞力者治於人,治 國,以井田均萬民,則又太平之著見者也。」 不齊,要其實則其道如砥。 輕,役重則賦 則貧富均矣。至于禄厚者責重,禄薄者責 富有天下,不爲有餘,貧食百畝,不爲不足, 吕曰:「言治者必曰太平,習聞其名,而 楊曰:「舜之臣二十有二人,而孔子曰 輕,役輕則賦 重,視其迹若參差 若夫以封建均邦

0 而 時」, 通行本《中庸》作「時而」。

泉陶。 既平,則命益若鳥獸草木,乃在臯陶之後。 所 詳。 者,命益 偪 古者兵刑之官合爲一,觀舜之命皋陶,蠻夷 也。 在廷臣多矣,至傳禹以天下,而禹 此也。不同,亦時焉而已矣。」問:「舜之時, 蓋 皋陶,不仁者遠矣。1蓋有見乎此。」 憂。』而子夏亦言: 不 猾夏,是其責也,則皋陶之職所施 何也?」曰:「舜徒得此兩人而天下已治故 舜 治 人, 稱者是也。 與 有 為。 人與若 故皋陶 禹摠百揆,而皋陶施刑,内外之治舉矣。 則禹 臣五人而 是以當舜之欲傳位,禹 使烈山 孟 雖欲施功未可也。 雖不可以無禹,而禹亦不可 鳥獸草木,其先後之常敘,宜如 子 夫洪水横流, 天下治」。 澤 而焚之,在禹之先,天下 ●『舜有天下,選於衆,舉 「舜以不 所謂五 得禹、泉 草木暢茂, 故孟 獨 推之,餘 臣者,孟子 獨 於外 子論 推泉陶 陶 者爲 五人 禽獸 爲 以 己 無 人

> 者,則、 說者, 以益難明也,亦時之不幸也夫!」 有學孔孟之道而志於異端邪說者,此道之所 道, 尹 豈有 亦自處於異端而已。 叮 日 謂 : 既哉 盡 「異端邪說,眩惑時君,各欲售其 善 盡 美矣。 孟子力闢許行之言,歸 雖然,古之爲 至於後世,則 異端 又

IE

「墨者夷之」章

墨子書中未嘗有此等言。 伊川曰:「墨子愛其兄之子猶隣之子, 但孟子拔本 塞源

知其流必至於此,故直之也。」

彼有取爾也。 横渠曰 謂赤子匍匐將入井非赤子之 「夷子謂愛無差等,則二本也,

尹曰 :「老吾老以 及人老,一本 也。 愛

罪

也,所取者在

此

0 「子夏」,原作「子 貢」, 據四庫本改。 今 本《論 顔

淵》作「子夏」。

572

國朝諸老先生孟子精義卷第五終

「正」,原作「子」,據明抄本改。

五六一

五六二

國朝諸老先生孟子精義卷第六

滕文公章句下

陳代日不見諸侯」章

伊川曰:「較事大小,其弊爲枉尺直尋

之病。」

可枉己以求難必之功乎?」或近,或去或不去。歸潔其身而已可也,豈繼也,若夫成功則天也。」人臣之事君,或遠繼曰:「孟子曰:「君子創業垂統,爲可

古之人寧道之不行,而不輕其去就。如孔、曰:「何其不自重也。枉己者其能直人乎?一中節,欲其皆中節,則道不得行矣。」一中節,欲其皆中節,則道不得行矣。」或曰:「居今之世,其去就之際,不必一或曰:「居今之世,其去就之際,不必一

孟雖在春秋、戰國之時,其進必以正,終於不得行而死是矣。顧今之世,獨不如戰國之時之矣。孔、孟豈不欲道之行哉?」●或曰:「以術行道而心正,如何?」曰:「謂之君子,以術行道而心正,如何?」曰:「謂之君子,以術行道,未免枉己,與其自枉,不若不得行之愈也。」

人而正國家哉?」於枉尋而直尺矣。趨利而不憚於枉,安能直於枉尋而直尺矣。趨利而不憚於枉,安能直尹曰:「有枉尺而直尋之心,則亦必至

「景春日公孫衍張儀」章●

伊川曰:「廣居,正位,大道,一也。 所

●「孔孟豈不欲道之行哉」。

「章」,原無此字,據四庫本補。

之所。」 居者廣,所位者正,所行者大,天下至中至大 又曰:「廣居,正位,大道,一也。

不處小節,即

是廣居。」

望哉?」 道,不以 道,爲其不以義 尹曰:「公孫衍、張儀,孟子以爲妾婦之 利 害 動 而事君也。 其 心者, 豈儀、衍 夫居正位而行大 之敢

周爾問」章

故君 欸? 子難之。不以其道而仕,直鑽穴之 尹曰:「進不以義,未有能行其道者也,

彭更問」章

徒

以受; 聖賢之奉,士之所無媿也。 害貴賤之心度之,何足以知聖賢也哉 尹曰:「志聖賢之志,行聖賢之道,而享 如其道,則何足爲 泰。 非其道,則 而世之人以 何 利 口

章問日宋小 國 也」章

國之足畏哉 下皆將歸往之,恨其征 尹曰:「爲國者能自治而得民心, 苟不自治,而以强弱之勢言 伐之不早也,尚 則 何 强 天

「孟子謂戴不勝

之,是可畏而已矣。」

顔、盗 疑矣,可不慎歟!! 賢,必察之審而 也,而欲有益於其君,難矣哉! 尹曰:「君子寡而小人衆,未有能 跖 相 閧 於前、孔、顔之不勝盗跖 用之衆。不然,則是使孔、 是以人君用 立 無可

「公孫丑問日不見諸侯何義」章

貨先,不得不見,然陽貨瞷孔子之亡而 楊子謂詘身以伸道,非也。」 豚,孔子亦瞷其 而不内,皆已甚也。孔子不爲已甚者,故陽 楊曰:「段干木 亡而往拜之,夫是之謂稱 踰垣 而辟之,泄 柳 閉 門

尹 曰:「君子之所養以義,苟非其義,則

五六三

利 心 也,不可以不察。」

戴

盈之日什一」章

肯捨去,是不勇也,與月攘 日:一 明知此義理 有 一雞 不可,尚吝惜 何

以異?

天

不

下之達道三,仁、知、勇而已。」

如此。 止,願示還期。」若事非是,即從而 之道甚善,然又曰:『鑾輿之出有日,不 路,終是不如魏徵之正。 堯、舜望其君乎?」 楊曰:「馬周言事,每事須開 此正孟子所謂月攘一雞 如諫太宗避暑 者, 豈是 止之,何用 人主 可 事 以 澽 親 線

也 尹 曰:「去害 改過,如救 焚溺,猶恐其

遲

之害甚於楊、墨。 愛疑於義,申、韓則淺陋易見。故孟子只闢 明 公都子曰外人皆稱夫子好辨」章 道 日 「楊、墨之害甚於申、韓,佛、老 楊氏 爲我疑於仁,墨氏 兼

> 害,亦經孟子闢之,所以 又非楊、墨之比,此所以害尤甚。 楊、墨,爲其惑世之甚也。 「此篇意亦甚好,但言不謹嚴 且孟子言墨子愛其兄之子猶隣之子,墨 或問伊川曰:「退之《讀墨》篇如何?」 | 廓如 佛、 也。 老其 ,便有不是 楊、墨之 言近理,

「大抵儒者潛心正道,不容有差,其始甚微 後 心 處。 後之學者又不及楊、墨,楊、墨本學仁義,後 若言孔子尚同 釐 曰: 人乃不學仁義。 孟子欲正其本,故推至此。退之樂取人善之 仁,但所學者稍偏,故其流遂至於無父無君。 知其流必至於此。 子書中何嘗有如此等言,但孟子拔本塞 人無 ,繆以千里。 可謂忠恕,然持教不知謹嚴,故失之。至 人指出,故不見其過也。」 兼愛與墨子同,則甚不可也。 楊子本是學義,墨子本是學 但 楊、墨之過被孟 大凡儒者學道,差之毫 子指出 又曰:

辨也。

場、墨亦未至於無父無君,孟子惟之便至於其過不及同出於儒者,其末遂至楊、墨。如然而厚則漸至於兼愛,不及則便至於爲我,聖人中道,師只是過於厚些,商只是不及些,其終則不可救。如『師也過,商也不及』,於其終則不可救。如『師也過,商也不及』,於

此。蓋其差必至於是也。」又曰:「楊子似出楊、墨亦未至於無父無君,孟子推之便至於

於子張,墨子似出於子夏。其中更有過不此。蓋其差必至於是也。」又曰:「楊子似出

爲我,不能復禮,則爲墨氏兼愛。故曰:子似子夏。」 又曰:「不能克己,則爲楊氏「楊、墨皆學仁義而流者也。墨子似子張,楊及,豈是師、商不學於聖人之門。」 又曰:

「親親而仁民,仁民而愛物。」此之謂也。」

然亦惡亂人之心。」 又曰"「仲尼聖人,其又曰:「邪說則終不能勝正道。 人有秉彝,●

各以其所學行、異端遂起。至孟子時、不得道大。當定、哀之時、人莫不尊之。後弟子然亦惡亂人之心。 又曰 一仲尼聖人 其

方且以好辨目之,不亦異哉! 是以常人之是之嚴,而自以爲承三聖之功也。當是時,害流於生民,禍及於後世。故孟子辨邪說如事曰:「學者於是非之原,毫釐有差,則

「匡章日陳仲子」章

心

度聖賢之心也。」

義也哉!」理義者,心之正也。充仲子之操,豈所謂理理義者,心之正也。充仲子之操,豈所謂理尹曰:「君子之爲君子者,曰理曰義。

國朝諸老先生孟子精義卷第六終

● 「乗」,原作「乘」,據四庫本改。

國朝諸老先生孟子精義卷第七

離婁章句上

「孟子日離婁之明」章

者也 之罪人也。」 治道 IE 先王,何異捨規矩而欲成方員,捨六律 君不能謂之賊。」後世人臣 五音也哉 者,妄也。 『責難於君謂之恭,陳善閉 尹 曰: 雖聰 治 巧有過人之知,不以仁政,不 是以 國 謂吾君不能者多矣,皆孟 而 孟 無法度,未 子反 不知出此 覆 開 邪謂之敬,吾 小有能 陳,而 義,而言 成 繼之 而 善 子 欲 法 治

「孟子曰規矩方員之至也」章

伊川曰:「爲君盡君道,爲臣盡臣道,過

桀、 桀、紂。」 不 身危國削,名之曰『幽厲』,雖孝子慈孫,百世 行 是 此 此 能改 則 則損一人,一 則 又 又曰:「暴其 紂 有 道無 日 無 是 也。 非,無一 理 謚 「道二,仁與 無對,有陰則有陽,有善則有惡,有 漢之君都爲美謚。」何 否? 又曰 民 人行則得其友。」只是二也。」 亦無 甚 曰:「不是。 ,則身弑國亡,不甚, = 「仁則一,不 不 仁而 故《易》曰:『三人 已,自 天下 似休 仁則二。」 然 謂 因 理 之 如 則

至也。 焉。舜盡事親之道,而瞽瞍底豫,天下之爲父 不能也。學者之於人倫,亦期於盡而 子者定,其理正如此 盡之云者,愛欽之道於是至矣,不可以有 楊曰: 游曰 人倫至於聖人而後爲至者,蓋 一愛敬盡於事親 「顏子所學,學舜 也。 孟子言聖人 ,則孝之性 而 己。 已矣。」 蓋舜於 非 人倫之 盡 盡 性 加

天下,可傳於後世者也。孟子所憂,亦憂不道,以爲兄,盡兄道。此孟子所謂舜爲法於道,以爲君臣,盡君臣之道,以爲夫,盡夫人倫無所不盡也。以爲父子,盡父子之

言其危亡名謚,所以深戒後世之君臣也。」 尹曰:「孟子每言治民事君之法,又力

如舜耳。人能以舜爲心,其學不患不進。」

「孟子曰三代之得天下也」章

已。而後世曾莫省夫仁而爲之也。」 尹曰:「孔子有言,道二,仁與不仁而

「孟子曰愛人不親反其仁」章

尹曰:「有是實則有是應,無非自己

「孟子日人有恒言」章

者也。」

不合,則所守與所行自判而爲二矣。孔子平天下只一理。此《中庸》所謂合内外之道,楊曰:「《大學》自正心誠意至治國齊家

子篤恭而天下平。」孟子曰:「其身正而天下日:「子帥以正,孰敢不正?」子思曰:「君

歸之。」皆明此也。」

之道,必以修身正心爲本。不有其本,未有之道,必以修身正心爲本。不有其本,未有尹曰:「舉斯心加諸彼而已。是故大學

能成功者也。」

「孟子曰爲政不難」章

則於治國治天下也何有?」
之所以正也。大家難齊也,不得罪於大家,一國之事具矣。嚴而不厲,寬而有閑,此家而有妻子,有兄有弟,有臣有妾,尊卑親戚,而有妻子,何兄有弟,有臣有妾,尊卑親戚,

爲急務,不知要道故也。」
尹曰:「此理至要而易行,而人未始以

「孟子曰天下有道」章

其時則可矣。然學者當思其所作爲,如何乃伊川曰:「凡言五年七年之類,聖人度

五六七

五六八

有益。」

益也。」

小,又不能師文王而無敵於天下,徒恥之無以强弱而亂其序矣。爲小國者既不能安其以强弱而亂其序矣。爲小國者既不能安其,可,其不安其分也。至於後世,戰争尚力,

「孟子曰不仁者可與言哉」章

君,常以危亡災害爲深念焉。」而利其災,樂其所以亡故也。是以古之明而利其災,樂其所以亡故也。是以古之明尹曰:「自古亡國敗家者,皆由安其危

「孟子曰桀紂之失天下也」章

之,所惡勿施而已矣。不能爲此,至於困憂尹曰:「得民心者無它道,所欲與之聚

辱陷死亡而不悟,悲夫!!

「孟子曰自暴者不可與有言也」章

又曰:「行之失莫甚於惡,則亦改之而已伊川曰:「懈意一生,便是自暴自棄。」

進也。 誠 聖人以其 也,往往强戾而才力有過人者,商辛是也 矣; 謂下愚也。 治,則無不可移者,雖昏愚之至,皆可 日 非自暴自棄者,孰 不爲,雖聖人與居,不能 下愚有二:自暴也, "《語》曰"「唯上知與下愚不移。」所謂 愚也。」 事之失莫甚 唯自暴者拒之以不信,自棄者絶之以 (自絶於善,謂之下愚,然考其歸,則 然天下自暴自棄者,非必皆愚民 於 亂 不可 自 則 棄 化而入也,仲尼之所 與 亦 也。 爲 治之 君子?」 人苟 而 已矣。 以 漸 善 磨 自 又 苟 而

是足哀矣。」 自 自 棄故 暴故 尹曰: 也。 也。 「人孰不 人孰 人皆有 不 可 可 可 得之資,而 以 以 爲 聞善? 善 自暴棄之, 難 難與言者, 與 、爲者,

尹曰:「治有本。」

「孟子曰居下位而不獲於上」章

誠處。」 以 乎善,不誠其身。』《易》曰 「不能動人,只是誠不至。 人 又曰:「明善在明,守善在誠。」 德,未見 川日 :「學者必知所以 其能 進也。 於事厭倦,皆是無 故孟子曰:『不 『知至至之。』 人德。 又曰: 不 知 明 所

諸約 明 後已。 在 情 知 凡 善善 吾身誠 狀 ,乃吾性之所固 者,致知之所及 蓋 ,不至於明善,則 在 愐 吕 君子之於天下,志在及民 我者 知 日 明善則誠 明善者能明其善而已。 所 :「自治民 有是善,所 從來,則在我者非徒悅之而 ,以何爲仁,以何爲義。能明其 談 有,非 則有物,不誠 而 也。 以 雖 造約,必至於明 能 有 及乎知至 思 誠 民, 勉 其 之所能及也 如明仁義,則 不 身也。」 而 則無物矣。 可 已。反求 得 則 所謂 善然 而 已, 治 又

得; 内誠 期 之所信於朋友者,豈可以聲音笑貌 之事親,好色富貴不足以解憂,惟順父母 非 獲乎上,民不 疑,身且不保,尚何民之可治哉? 非善也。 有 矣、則患行之不著、人之不知、未之有也。 朋友矣。』上之所求乎下者,不察乎鄉則 不可以爲人"不順 以 善 反 曰:『不信乎朋友,不獲乎上矣。」獲乎上 性,則 求身而 信 解 善而見信,有功 而 察乎鄉者,不見乎家則不得。苟誠 盡 憂,則其 不知 而信之矣。故曰:「不順乎親 乎父母,内行孚於家人,則 所以事乎親 不獲乎上者,德進而見忌 有 萬物皆備 諸 誠 可 三,則 乎身者 得 而見知,吾所加 乎親,不可以 而 ,則斯善也, 者,或幾乎僞矣。 雖 治矣。」 可 父子之恩 知 矣。 知 爲子。),猶疑 不得 又曰: 於民者,莫 有諸己矣。 功高 故曰:「不 朋 不 友 爲 乎親, 則人 信 其 哉? 而見 者 如 出 不 平 可 身 於 故 不

五六九

善不 也; 至 容乎思勉而後中也。 反之者,求復乎性而 所 性 即 理 下,遠而 理 同 不 也 欲 (之道,反之者也。 天道 本 而 丽 然者,有 理 賢者之於天道,反之者也。性之者,成 由 足以 與天 可 雖 已。 如 之 不 也,天道自然,何勉何思,莫非性命之 是,非 仁義 誠 萬 宵 無間 故誠者天之道,性之者也, 至乎誠矣。」 思 而 古,求之人情,參之物理,理之所 然 而擇,德不 無二。 猶 致 行也,出於自然,從容不 人私 也,天 雜之僞,雖行而未能無息 ___ 智所能爲,此之謂 而 即聖人,聖人即天,從心 聖人之於天道,性之者 雖前聖後聖,若合符節 不 可不勉而 미 易者 執,不 也 誠之者 誠。 大 迫,不 如是, 丽 則 未 誠 天

乎 其 善 極哉? 游 不 誠 乎身矣。 欲 以 内則 誠 其 意,先 順乎親,以外則信乎友, 學至於誠身,安 致 其 知 往 故 而 不 不 明

雖異 者。 乎 於擇善 從 允 以 中 容 寒 1 禀,其爲誠 道 乎 不 所 則 是賢 中 勉 可 以 則有 道 以 而 Ŧi. 得 中 ,是聖人之事也,故爲天道。 典 人之事 思矣,固執之,則有爲矣,拳拳 (克從 君 身一也。」 無 以 爲 也。 也。 也, 下 則 不 然 故爲人之道,聖 可 思 有 以 闸 誠 得 得,無 者,有誠之 民 此 思 舜之 也 至

也。 乎誠 足 於朋 上 於妻子,況能 不 未 夫責善,朋友之道也,不信乎朋 一,則 稱 必 誠乎身,則身不行道矣。 身。 也 友 當於道 楊曰:「不明乎善,雖欲擇善而 身不能 已,而 又曰:「今之君子,欲行道以 少乎? 不順 也。 欲獲乎上,不 順其親乎? 故欲信 保, 況欲 乎親 故欲 ,則於其 乎 誠 治其 朋 乎身,必 亦 故欲順 友 身不 民 所 難 乎? 必 厚 平 友 先 行道。 者 其親 先 則 順 薄 於 固 成 不 不 其 ",必先 以執之, 也,況 不不 乎 明 天 善不 可 得 行

不下矣。」 蓋忘機則非其類可親,機心 疑,至於無往而不爲人所疑,道何可行哉? 動者也。」夫以事上則上疑,以交朋友則朋 中之人盡爲敵國乎? 之務,反不知誠其身,豈知一有不誠,他日舟 是驗處也。 便是驗處。 若獲於上,悅於親,信於朋友,皆 又曰:「『不誠,未有能動者。」動 故曰:『不誠,未 一萌,鷗 鳥 舞 有 而 友

尹曰:「苟能知此,則道無餘藴矣。」

尹曰:「養老尊賢,國之急務也。」「孟子日伯夷辟紂」章

[孟子曰求也爲季氏宰]章

求富之,爲之强戰,是何異於助桀而富桀也。」塗炭也。戰國之戰,以亂益亂,殘人民耳。而尹曰:「湯、武之征,以正伐不正,救民於

「孟子日存乎人者」章

伊川曰:「心有所存,眸子先發見。」

尹曰:「存乎中必形於外,不可匿也。」

「孟子曰恭者不侮人」章

「淳于髠日男女授受不親」章尹曰:「聲音笑貌,無其實也。」

于髡欲以嫂溺爲喻,而說之以枉道,故再發尹曰:「孟子之救時,無非正道也。淳

問而辭再屈。」

「公孫丑曰君子之不教子」章

之,其勢必至於責善,故孔子所以遠其子也。」 子曰『易子而教』,蓋考之孔子爲然也。 不告,及其不學,亦無如之何。」 又曰:「孟 至,則非孔子所以待其子。 非强教之也。 曰:「使之學《詩》學禮,非教乎?」曰:「此亦 也。雖不責善, 豈不欲其爲善? 教子,不亦過乎?」楊氏曰:「不教,不親教 或問:「父子之間不責善,固是,至於不 如學《詩》學禮,必欲其學有 故告之學則不 然必 親 可 所 教

五七一

五七二

其子也」?」 之矣,又奚問焉? 陳亢又奚稱曰『君子之遠子自教其子,則鯉之所未學者,其必有以知

尹曰:「父子主恩故也。」

孟子日事孰爲大」章

敢爲,又有多少畏恐。然二者皆不知命也。」曰:「不說命者,又不敢有爲。」曰:「非特不命。孟子曰:『知命者不立巖牆之下。』」或說命者多不守身,何也?」曰:「便是不知說命者。」曰:「守身,何也?」曰:「何是不知

慎。」 本。」 服勞更淺。 正 而 惟 事 養疾亦是守身之一。 親 明 又曰 道曰:「守身,守之本也。不 ,乃誠 又曰:「守身爲大,其事固有大者, 若謂諭父母於道,能養志使父母 一色難 孝也。 形下面 故曰: 『孝悌爲仁之 齊戰疾 有 事服勞,而言 ,聖人之所 - 失其 身

《記》曰:「魯郊非禮 曾子、 嘗譏之矣。說者乃云「周公有人臣不能爲之 哉? 尼論 能。 之法度者是賜也。 周公以天子之禮樂,當否?」曰:「始亂周 之弊,遂使季氏僭八佾,三家僭《雍》徹,故仲 所當爲也,安得獨用天子之禮乎? 其爲有餘也。 事父,臣之事君,聞有自知其不足者矣,未 子,可也。」吾以爲事君若周公可也。 所能爲者,皆所當爲也。 子、孟子之心,皆可見矣。」 曾子未盡善也。 說 却 而 成王之賜,伯禽之受,皆 大舜 與此 非之,以爲 又 日 辭不相合。 可 : 周公之功固大矣,然臣子之分 「事 也。 人子事親,豈 親若曾子 周 人臣安得用天子之禮樂 曾 也,周公其 公其衰矣。」 元 然推其極 是曾子之子,尚 故曰: 而 又曰:「子之身 日 有大過。 衰矣。」聖人 不 「事親若曾 可者 時 能 *, 問 其 蓋 無 子之 因 非 志 過 公 賜 襲 聞 謂 不 曾 如

也。

衰,是成王之失也。 子曰: 『周公其衰矣。』 孔子以此 之身做出來, 豈是分外 於周公,亦是人臣所當爲爾,人臣 功而懷怏怏之心者,必此言矣。」 子之事父,其孝雖過於曾子,畢竟是以 爲之功,故得 來,而謂 功業大於周公,亦是以君之人民、勢位 功業者,以君之人民也,以君之勢位也。 爲之? 豈不見孟 豈有不能爲之功業哉? 臣子身上没 天子禮樂,使周公在,必不肯受。 曾子之孝亦大矣,孟子纔言可也,蓋 爾。 賜 以 臣之於君,猶子之於父也。 人臣所不能爲可乎? 人 臣 用 分 所不得用之禮樂』則妄也 人臣 外 介甫謂『周公有人臣 调 事? 子言『事 所 當 不 底 若曾子者,僅 得 事。 借使功業有大 用 親若曾子可 而不當爲, 之禮 爲周 又曰:「魯 凡言舜言 使人臣恃 臣之 公之 故 父母 不 孔 口 日 哉 之,孟子曰: 之事也。 有過分之事? 樂』,此乃大段 事 下之治亂,繫乎人 可從 1 尹曰:「事親守身,惟曾子爲能盡之。」 M 理 也

能立

以免責

做出

假

如

得

崩

子只言『事親若曾子可也』,不言其有餘也。」 臣子身上皆無過分事,惟是孟子知之。 其事親之際,想亦洋洋自得以 所不能爲之功,故得用人臣所不得 曾子爲孝,不可謂曾子、舜 「介甫說魯用天子禮樂,云『周 介甫平居事親最孝,觀其言 凡有所爲,皆是臣 不知事君。 大凡 過 于 爲孝有 人 孝 職 臣 公 也 用 所 身 有 如 餘 說曾 之禮 當爲 上 也。 此 臣 岢 又

也」。

其誰

功業

为

臣

「孟子曰人不足與適也」章

則生於其心,必害於其 伊川曰:「君仁莫不仁,君義莫不義,天 昔者孟子三見齊王而不言事,門人疑 我攻其邪 夫政事之失,用人之非, 君 仁不 心,心正,然後天下之 公政 仁耳。 ,豈待乎作之於外 離 是 而 知

之失 者能 其 非 更之, 救救 心,使無不正,非大人其孰能之!」 而正之,後之失者,將不勝救矣。 直者: 能 諫 之,然非心 存焉 則 事 格

之德。 以 得 日 謂 以 間 正 事 俱 二、「大人正 īĒ 如 權智之人亦可以救時,據時所見,正 正 君 不 可循序整頓。 也 君,下 《此人在人君左右,壞人君心術。』 下可 足道 己爲先,縱得好時節,終是做 楊 大人過人處只是正己,正己則上可 惟大人爲能格君心之非」。 曰:「孟子言『人不足與 ,則須使人君心術開悟,然後 可 以正 以 己 Œ 而 人。今之賢者多尚權智, 然格君心之非,須要有大人 物 人矣。」 正者也。 己正,則 適 也,政不足 不徹。 蓋 人 上 不 與 天下 可 又 欲 或 以 不 政

亂,繫乎人君之仁與不仁耳。 心之非即害於尹曰:「臣聞之師程頤曰:天下之治

先。 者,非有大人之實,則亦莫之能 乎格君非心,然後無所 用其人,不勝其去矣。是以 復有其事,不勝其更矣,人人而去之,後復 正 ,不待乎發之於外 夫政事之失,用人之非,事事而更之,後 也 不正。 一、故以 輔相之職,必 格 而 也。」 君 所 謂 心 之非 格 在 爲

「孟子日有不虞之譽」章

之毁。 近義 過者 以 孟子以不義排之, 匡章遭毁, 孟子以近仁取 處母兄於不義,其爲不義均矣,而時人反 失仁,此不可不察也。 不虞之譽。 爲 而 一, 而 廉。 吕曰:「行不足以致譽,而妄得譽,是謂 不虞之譽得于非義,而求全之毁猶 時人反毀以不孝。 匡章責父以善而 毁 求免於毁,而反致 一譽以 亂 陳仲子欲潔 其 真。 不相遇,是愛親之 夫二人之行皆不 故仲子得譽, 毁,是謂 一身 而 求 顯 不

未娶,亦莫未遲。

且

以常人言之,三十未娶

之。夫君子之取人,如不得已,取其心可矣,

毀譽豈可盡信哉!」

尹曰:「君子正己,毀譽非所恤也。」

「孟子日人之易其言也」章

尹曰:「言不可不慎。」

「孟子日人之患」章

尹曰:「尊己自大,人之常情。」

「樂正子從於子敖之齊」章

尹曰:「孟子責其誠不至也。」

「孟子謂樂正子」章

尹曰"「從而無所諫正、與不見聽而從

之,是皆可罪也。」

「孟子日不孝有三無」章

曰:「此須仔細理會。舜三十方徵庸,此時或問伊川:「舜不告而娶,何也?」先生

大,因以舜之事明之。」 大,因以舜之事明之。」 大,因以舜之事明之。」 去可也。若不如此理會,但言舜不告,豈不告可也。若不如此理會,但言舜不告,豈不以此理會,但言舜不告,豈不以因爲無後也。』 大,因以舜之事明之。」

「孟子日仁之實事親是也」章

尹曰:「仁義之實,事親從兄是也。不

● 下「娶」字,原作「要」,據明抄本、四庫本改。

五七五

五七六

知仁義之實,則禮樂爲虚矣。蓋有諸中,然

後有以形諸外也。」

「孟子曰天下大悅而將歸已」章

爲父子者定。」 昌曰:「養志云者,養善志也;順親云 八書爲養志。瞽日爲不善,而舜日以進善, 不害爲養志。瞽日爲不善,而舜不順乎不 明父子之經不正,故瞽瞍底豫,然後天下之 則父子之經不正,故瞽瞍底豫,然後天下之 明父子者定。」

尹曰:「舜進此道,所以爲大。」

國朝諸老先生孟子精義卷第七終

國朝諸老先生孟子精義卷第八

離婁章句下

「孟子曰舜生於諸馮」章

揆一也,易地則皆然,故曰『若合符節』。」楊曰:「舜之事瞽瞍,與文王之事紂,其

尹曰:「道一而已。」

「子産聽鄭國之政」章

尹曰:「孟子可謂知爲政矣。」

「孟子告齊宣王」章

宣王言之,使知爲君而遇其臣,不可不以其平是也。世之爲臣蓋有如此者。孟子爲齊狂狡之童是也,視君如寇讐,若子胥之於楚

孟子精義卷第八

離婁章句下

理也。」

尹曰:「君子見幾而作。」

「孟子日君仁莫不仁」章

曰: 「以身教者從,以言教者訟。」」 尹曰: 「致治之源,必本於人君,故

「孟子曰非禮之禮」章

或問伊川曰:「非禮之禮,非義之義,何

■ 「誅」,明抄本作「逐」。

尹曰:「君臣以義合者也。報施之道,道也。若夫君子於君臣之際,則無是理也。」

必至于此。孟子以深曉時君也。」

此,是孟子教人臣與人君爲怨敵,無此謂待之之禮,當如寇讐可誅可殺也。●若如曰:「此三句說君臣相待厚薄感應之理,非或曰:「人臣之禮,豈可視君如寇讐?」必至于此。孟子以沒畴思君也」

五七七

五七八

之禮 謂 過予,是 也。」曰:「此事何止大人不爲。」曰:「過 也 也 細人之事,猶言婦人之仁也。 先 以 生 物予人爲義,過予,是非 日 . 恭 本 爲 禮 過 恭 義之 是 只 非 恭 爲 義 禮

它小了,大人豈肯如此。」

是真 不知 也。 未爲失,但大人見之,則爲非禮非義,不 通制之者。 時 須 子喪出 也。 禮之禮、非義之義。又不可一概如 非 中者矣。 精 時 義 如 義 又 時 中 横渠先生曰:「非禮之禮,非義之義, 理 何,以 中非 母 如 者皆是 也。 神,始得觀其會通,行 制禮者小功不稅,使曾子制 ,子思不喪出母, 然言不足以 今學者須是執禮 義得, 此不可易言。 時中之義甚大, 行其典禮而不達會通 也。 謂非 大率 時 盡天下之事,守禮 時措之宜 中 不可 ,蓋禮亦是 而行,禮義 其典 以子思爲 此 者,即 禮 則 此 禮 如孔 爲 時 自 有 又 中 亦 方 非 非 非 中 但

> 得 看 也 時 得 中。」 前言 君 子 往 要多識 行 熟 前言往 ,則自能 行以 比 物醜 畜其 類,亦 德 者 能見 其

(也。大人隨事而順理,因時而處宜。」 尹曰:「非禮之禮,非義之義,所失者小

故

「孟子曰中也養不中」章

、以教育也。」 尹曰:「養之者,不使漸乎不善,孟子勉

「孟子曰人有不爲也」章

人

若 爲。」先生日 可爲不可爲也,纔有 無所] 或問 不爲,豈能 伊 :「此只是有所擇之。 ĴП 曰:「人有不爲,然 有 爲 所不爲,便可以有爲也。 耶 後 能 可 擇其 以 有

爲 不爲不仁,則 義。」 横渠 日 可 有 以 所 爲仁,不爲 不 爲,而 後 不義 可 則 以 有 可以 爲。

楊曰:「舜在側微,堯舉而試之,卒以天

廬 爲焉。非有爲之難,其不爲尤難矣。只如 名之心乎? 以此見人必能不爲,然後能 使它人有才氣者,雖 當堯未之知,方且飯糗茹草,若將終身。若 大矣,宜非深山之中所能久 下授之而 不知消息盈 也。然則居畎畝之中而天下爲己憂可也,或 尹耕於莘,非湯三聘則必不起,諸葛亮臥 ,非先主三顧亦必不起。 不疑,觀其所施設,其才其德,可 虚之運,犯分妄作,豈正理哉!」 不 得 時,其能自 非要之也,義當然 處。 加 爲舜者, 已其 草 伊 有 功 謂

有 所不爲,是以可以有爲。 所 爲耶!」 尹曰:「有不爲者,知所擇也。 無所不爲者,安能 唯 能 有

「孟子日言人之不善」章

尹曰:「言不可不慎。」

·孟子曰仲尼不爲已甚者」章

日:「 聖 人 作 處,本分之外,不 加毫

> 末。 故以 孔子之聖,孟子止言其不

而已。

尹曰:「已甚則失中。」

孟子曰大人者言不必信」章

謂也。 禍。『言不必信,行不必果,惟義所 伊川曰:「孔子與惡人言,故以遜 然而孔子未嘗不欲仕,但仕於陽虎之 在。」此之 辭 免

時則不可。 『吾將仕矣』,未爲非信也。」

楊曰:「孔子曰:『言必信,行必果,硜

不必果,惟義所在」,以發明孔子之意。」 **硜然小人哉!』故孟子言『大人言不必信,行**

於信果,未必義。」 尹曰:「主於義,則信果在其中矣。

主

伊川曰:「保民如赤子,此所以爲大人。 「孟子曰大人者不失其赤子之心者也」章

不失嬰兒之心,不若保民如赤子爲大。」 吕曰:「喜怒哀樂之未發,則赤子之心

謂

五七九

當 問 以 未 曰:「喜怒哀樂未發之謂 人之心,如明鏡,如止水。」 赤子之心若何?」曰:「取其純 達 此 其 「赤子之心與聖人之心若何?」曰:「 「已發而去道未遠也。」曰:「大人不失 「《雜說》中以赤子之心爲已發,是否?」 乎中,●若便謂之中, 心應萬物之變,無所往 未 發 此 心 至 虚 無 所. 中,赤子之心發 是不識 偏 而 倚 非 中矣。」先生 一近道 故 大本 謂之中。 也。 也 聖 而

故言大人以此而已,語化之則未也。 楊 曰:「赤子之心,發而 未 離 大本 也。

「孟子曰養生者不足以當大事」章 尹曰:「赤子之心,純一無僞。」

生 竭 至如此,又安得不能當大事?」 力盡 ,人之常,此 伊川曰:「送死,天下之至重,人心苟能 此一事,則可以當天下之大事。 相對 而言,若舜、曾子養生篤 養

> 至於送死,則其誠可知。」 致者也,必也,親喪乎?」養生則人能勉 尹 曰 「曾子日 : 『吾聞諸夫子,人未有

自

「孟子日君子深造之以道」章●

淺近事,莫非義理。」

伊川

日

造道深後,雖

聞

常人語言至

言 理涵 是篤 敬守此心,不可急迫,當栽培深厚,涵 爲得,得者須默識心通。 非自得也。」又曰: 慮,優游涵養,使之自得。」 m 誠燭 自 養 明道曰:「學要自得 而 得者,乃自得也。 得之。」 理。 上知 「學問,聞之知之者,皆不 則穎 又曰:「學者須是潛 悟自别,其次須 而已矣。 學者欲有 有 安排 又曰:「學者須 布 大抵學 所得,須 置 者,皆 泳其 心 以 不 積

達」,原作「遠」,據四庫本改。

章」,原無此字, 四庫本補。

開 間 得非外也,故 然後 向靠 ,不然却只守。」明道 不足以 書册,何 可 達 以 道。」 自得 E 自得。」 由 0 得 若急迫求之,只是私己, ? 又 日 日 居之安,資之深,不 : 又曰:「解義理,若 : 「學莫貴於自得, 既 得後 便 須 放

則豈 不 可矣。 能 尹曰:「深造然後可以自得,道非自得, 左 右逢原? 左右逢原, 則 無 所 施 而

央也。」

惟

:自失,兼亦悮人。」

「孟子日 博學而詳說之」章

處。 詳 我 内外交相養之道也。」 又曰:「顔淵曰:"博 之;說約 教 說 以 文,約我以禮。」此 之,將以反說約 人, 只此 既博之以文,又約之以禮,所謂『博學 伊川曰:「孟 處,則欲博學詳說以反之於約 兩 字。 子 也。 言四端 博 是顔淵稱聖人最 是 博與約正相對, 博學,多識多見 處,則 欲 擴 的 m 多 聖 此 而 當 充

> 聞 .之謂,約只是使之知要也

見,徒足以 造約爲 博學而詳說之,將 吕 謝曰:「由 曰 : 功,約即 飾 學 П 博 耳 以 誠 以知 而 以 聚 也。不能至是,則多聞多 已,語 反說 之,不博 約,猶 約 誠 也。 則 知 則 未 四 爲學之道 約 也 方而 不 可 識 得。 中

約 謂之守以約卓,于多聞多見之中 實、未嘗畜德 以 博學詳說 之以卓。』其言終有病,與孟子之言異矣。 誇多鬬 反說約也。」世之學者,欲以彫 卓而守之乎? 畜其德。』孟子曰:『 又云:「楊雄云: 『多聞守之以約,多見守 楊曰 靡,以資見聞 :「《易》曰:『君子 所 以 而 趨約,至於約,則其道得 反約也,彼亦烏用學爲哉! 見得此理分明 而 己,故 博學而詳說之,將 多識 が摭其 繪組織爲工, ·, 將 前 然後 華不茹 言 何以 往 知 爲 其 行

掌爲不妄。」 子之後其道不傳,知孟子所謂天下可運之於

以 禮」同意。」 尹曰:「與顔子稱孔子「博我以文,約 我

「孟子曰以善服人者」章

也。 以善養人者,凡教之養之者養人 横渠曰:「以 善服人者,要得以 善勝 也。」 人

不以善養人,而責人也深,故愈深而 于人,故人得罪于君子,心服焉。 吕曰:「古之君子養人以善,而不厚望 今之君 人莫 子

養人者也,此王霸之所以異。」 尹曰:「以王霸言之、霸者服人者也、王 之服。」

「孟子曰言無實不祥」章

伊川曰:「不祥,凶也。 君子好成物,故

吉。 小人好敗物,故凶。」

尹曰:「言之不祥,莫大于蔽賢。」

明道先生曰:「介父只是說道,云我知

「徐子曰仲尼亟稱於水」章

尹曰:「是以學者必自本而往。」

「孟子曰人之所以異於禽獸 者」章

文,然人只要存 謂之人也?」此意如何?」曰:「某不盡記 形、鳥喙而心不同焉,可謂之非人乎? 云: 『人亦天地一物爾,飢食渴飲無休時。 於庶物,察於人倫,然後由仁 人與萬物皆生于天地意,下面二句如此。」或 若非道義充其腹,何異鳥獸安鬚眉。」上面說 能存得,更做甚人也? 顔如渥丹者,其貌則人,其心則禽獸,又惡 曰:「退之《雜說》有云:「人有貌如牛首、蛇 否?」先生曰:「固是。人只有箇天理,却 子言此者,莫是只在去之存之上有不同處 或問伊川曰:「人與禽獸甚懸絶矣,孟 一箇天 理。 泰 Ш 義行。」 又曰 孫 明復 即 舜 有詩 其 明 口 有

它不 有箇 《易》只道箇『立人之道曰仁與義』,則和性字 性之,舜由仁義行,豈不是尋常說話。 由字也不須道,自已分明。 自分明,只作尋常本分事 知 道 道 如 只 此 說 如此。只它說道時,已與道離 道 時 便不 是道 說 了。 陰陽、剛柔、仁 也。 孟子言堯舜 有道 至于 者 亦

義,只是此一箇道理。」

用。 名,亦人名之爾。」 名,但人名其行耳,如天春夏秋冬,何嘗有此 順 明庶物,察人倫,皆窮理也。 物 所謂明庶物,察人倫者與?」 致用,性其仁而行。]又曰:「别生分類,孟 理而 ?,察人倫。 人倫,道之大原也。 横渠日 行,而 :「明庶物,察人倫,然後能 庶物,庶事也。 未 嘗 有 意 以 明察之言不甚異。 爲仁義。 既知明理,但 明庶物須要旁 又曰:「明庶 仁義之 精 知 子 義

尹曰:「存之者君子也,存者聖人也。

君子所存,存天理也。由仁義行,存私

之。

「孟子日禹惡旨酒」章

能

若曰 若有不合者,周公之心必 『武王不泄邇,不忘遠』者,謂 之見」,謂望天下有治道太平 也,聖人亦無不盛。」 蓋各因一件事言之。 『武王不泄邇』,非謂武王不執中,湯却泄 紂在上,望天下有道而未之見。 『湯執中』, 之治?❶ 其有不合,周公之心固無此。 二《南》以天子在上,諸侯善化及民,安得未 曰:「「望道而未之見」,言文王視民如傷,以 民雖使至治,止由之而已,安知聖人? 伊川曰:「文王望至治之道而未之見, 。人謂各舉其最盛者 又曰:「文王『望道未 如是勤 加 未得見也。 遠邇之人 勞。 非 邇 設 又

● 「未之治」,原作「謂之至」,據四庫本改

之事。」

在人,不見其間也,立賢無方也如是。」 敢赦,執中之難如是。天下有道而已,在己 必吾見也。」 又曰:「湯放桀,有慚 日 而 不 「望道而未之見,望太平也。」 疑。 横渠曰:「立賢 思兼三王,周公所以于其 無方,此湯所以公天下 (身望) 德而 道 又 不 而

者豈可以不思? 思無邪而已,曰不思者其輔成王以措諸事業,其勤若此,然則爲學尹曰:「周公大聖人也,宜若無思。觀

伊川曰:「王者之《詩》亡,《雅》亡,政教「孟子曰王者之迹熄而詩亡」章

横渠曰:「其義則竊取以明褒貶。」

號令不及于天下。」

然後《春秋》作。春秋之時,《詩》非盡亡也,楊曰:「王者之迹熄而《詩》亡,《詩》亡

《雅》亡則無政、《春秋》所爲作也。然孔子 平王之時。 曰 : 則王者之《詩》亡矣,此《春秋》所以 平王之崩在隱公之三年也,則隱公即位實在 之迹熄而《詩》亡、《詩》亡然後《春秋》作。』據 隱公,其說紛紛無定論。 然其事則齊桓、晉文,其文則史,其義則竊取 子以一字爲褒貶,以代刑賞,前此未 亡,所存者位號而已,慶賞刑威不行焉。孔 于是東遷。當是時,《黍離》降而爲《國風》, 之,是亦述之而已。」 又曰:「《春秋》始于 故曰:"《春秋》,天子之事也。」故謂之作。 『孔子作《春秋》。』何也? 蓋當是時,周雖未 黍 「述而 離 降 .而爲《 不作,竊 自幽王爲犬戎所滅,而 國 比於老彭。」而 風》,則《雅》之詩亡矣。 孟子有言:『王者 孟 作 平王立, 也 子曰 有也

當時之事也。而其義則定天下之邪正,爲百尹曰:「孔子作《春秋》,亦以史之文載

「孟子日君子之澤」章

當時門人只知闢楊、墨爲孟子之功,故孟 皆及後世也。」 子徒也,孔子流 發此一說,以推尊孔子之道。 言予未得爲孔 在上爲政,其 ,予則私善於人而已。」 伊川曰:「君子小人澤及五世者,善惡 流澤三四世不已,五世 澤至此未五世,其澤尚 又曰:「五世依約君子小人 而 後斬 在 Ŧ 子

理 則遺澤寖微矣,故五世而 于親,四世 也。」 楊曰:「君子之澤,五世而斬。 而 緦 服 窮,六世 斬。 而 親 此古今之常 屬 竭。 蓋人之 服 窮

推尊孔 子 至孟 徒 也 子 尹 一,但 曰:「臣聞 子,而不敢比其澤,故曰『予未得爲孔 時未及五世,其澤猶在夫人也。 能 私 善乎人」而已。」 之師 程 回日: 孔 子 ,流澤, 孟子

孟子曰可以取」章

有

可哉? 之曰:「不然,義無對。」 之饋,是可取也,然己自可足,是不可取也, 所在,則義所以對死者也。」 死,死傷勇。」夫人之于死也,何以知其 以傷惠。」 如使四十者衣帛,五十者食肉,豈不更好,然 所欲,然却五十者方衣帛,七十者方食肉。 於合當與者無可與之。 與,然却可以無與。若與之時,財或不贍,却 與傷惠何害?」曰:「是有害于惠也。 纔取之,便傷廉矣。」曰:「取傷廉固不 力不可以給,合當衣帛食肉者,便不足也,所 兩 可之事乎?」先生曰: 或問 蓋視義 伊 Ш 王彦輔曰:「『可以死,可 曰:「可以取,可 爲 去就 。 且博施濟衆,固聖人 耳。 明道先生聞 死 「有之。 生之際,惟 以 無 取,天 如 -可,然 以 朋友 可 미 而 以 不 無

楊曰:「若使死可以 救世 則 雖 不足

五八五

生,是 怪,然 治? 死 無 恤 生。」 死,死傷勇。」如 然豈 亦須 以 乃 死 以 有 死 救 殺 死 得是。 天 生爲 賢人君子之人君 下, 必 孟 乃君子分上常事 大事 一要以 子曰:「可以 者 死 也, 任 事 而 未 - 爲能 能 必能 死, 使天 外 可 不 足 外 死 以 下

「孟子日逢蒙學射於羿」章

舜完廪 就上 子 此 井 遠 子爲將之事 之學 ,濯孺 去, 如 何 面 伊川曰: 一,徒費 理會文義者,又滯泥不通。 後井 理 子,虚發四矢,甚無謂也。 出 會 得 事,只答它大意,人須要理 事君之道如何也。 , 孟子只取 來? 「心力。」 「學者不泥文義者, 完廪又怎生下得來? 其 又曰: 不背師 「庾公之斯 又如萬 之意, 國之安危 如子 又全背 會 章 濯 須 遇 若 浚 問 孺 却

學,莫若擴然而大公,物來而

順

應。

聖人之常,以其情順

萬

事

而

無

情。

故

君子之

權 在 輕 此 一舉, 重 可 也 則 何 殺之可 用 虚 發 也, 四矢乎?」 舍之 丽 無 害 于

尹曰:「爲取友而言。」

尹曰:「戒人之喪善,「孟子曰西子蒙不潔」章

而

勉

之

以

自

新也。」

「孟子曰天下之言性也」章

哉? 外 爲 在 且 動 能 也。 内? 以性爲隨物于外,則當 ,外,牽己而從之,是以己性爲 亦定,静亦定,無將迎,無内外。 不動,猶累於外物。 明道答横渠書曰:「承教,喻 夫天 既以内外爲二本,則又 是有意于絶外誘,而 地之常,以其 顥 心普 其 竊 在 以 萬 不 外時,何者 爲 鳥 物 知性之無 有 所 荷以 可 以 m 内外 謂定 遽語定 定性未 無 外物 心; 也。 者 内 爲

之正

爲

何

如

哉

夫人之情

易

發

而

難

是也

今以自

私

用智之喜怒,而

視

聖人

喜

哉?

烏得

以

從外者

爲非,而

更

求

在

内

者

繫于心而繫于物也。

聖人之怒,以物之當怒。

智則 自 惟 規 日 E 而 日之 私 求 之情各 于外誘之除,將見滅 艮 「貞吉悔亡,憧 而 不 照 能 用 不足,顧 無 其 智。 有所 以 物之地 背, 明 覺 自私則不能以 敝 不獲其 其 爲 故 一是反鑑 端 憧 自然。 不能 往 無 身。 于東 來,朋從爾思。」苟 窮 適道,大率患在 今以 而 行其 不 而 有 索照 口 生 惡外物之心, 爲爲應迹,用 (庭,不見其 得 于 也。 西 而 除 也 《易》 非 也 于 規

明

裁之。」

亦

思

過半

理之是非

亦

可見

外

誘之不

足

惡

圃

于

道

者

,惟怒爲甚,第能

于怒時遽

忘

其

怒,

而

觀

是則聖人豈不應于物 是聖人之喜怒,不 也。 怒 爲 制 何 忘 則,語 利 道 故 性。 以利 坐 爲 也。 萬 者,却道 周 不 孟 而 智 物之性,必求其故者,只是 易》所言 利 爲 得 子拔本 故曰『以利爲本』,本欲利之也。 致,亦只是不 而 伊川日 且 助 發, 近 只 本。」故是本如此 譬 也。 不合非 是 利, 如 行 塞 順 其 故者,本如 人無 般,只是後 ,天下只 源,不肯言利。 利 所 李 鑿 無 利 事 也。 覯 直 ,是不鑿 有 是 是 是 也。 人趨 者 生 也 又曰: 箇 欲 也。 不 纔不 著利 其不 利。 其 順 得 也 信 今言 而 , 利,便 了故者, 便有弊。 安 信 孟 者 日 此章 不 害之 得 孟 子 至 天下 又 直 與 害 皆 無 子 可 如

矣。 . 椅子,人坐此便安,是利也 「天下之言性,則故 道 近 求遠,古 人 所 而 非 已矣。」 惟 聰

與其

非

外

而是内,不若内外之兩忘

也。

兩

人。」孟

氏

亦

曰:『所

悪

於智者,爲

其鑿

則

澄

然

無

事

矣,無

事則定,定則明,明則

尚

應物之

爲

累

哉?

聖

人之喜,以

物之當

喜

五八八十

則故 爲主。 無傷其性也。」 義、皆欲順利之而已。」 下之言性也,則故而已矣。『故者,以 利只是一箇利,只爲人用得别。」 然後奪之于君,奪之于父,此是趨 求安不 本。」故者舊也,言凡性之初,未嘗不 而已者,言性當推其元本。 謂之利者,唯不害之謂也。 已,又要褥子,以求温暖, 又曰:「天下言性 推其元本, 無所不爲 利之弊 又曰:「天 以 章之 利 順 也。 爲 利

斯可矣。」 横渠曰:「天下何思何慮,行其所無事,

事是也。不知行其所無事,而用私智之鑿,告子曰『生之謂性』,是也。列子曰『生於陵告子曰『生之謂性』,是也。列子曰『生於陵告子曰『生之謂性』,是也。列子曰『生於陵告子曰『生之謂性』,是也。列子曰『生於陵世也。

致也。」 所以 天之高, 是以故滅命也。 然而 星 然」,是也。 辰 之遠,千載之日 所謂命 苟求其以利 者,列子謂「不 至,可 爲 本,則 坐 知 吾 而 雖

而致,不鑿而已。」智者則鑿矣,行其所無事,則不鑿也。可坐智者則鑿矣,行其所無事,則不鑿也。可坐尹曰:「故者,素也,利則順而不害也。

尹曰"「忠恕而已矣。」此一事已處了。若聖人哀矜,又别一事。」而忠,而横逆者猶若是,君子曰『又何難焉』,人如天地涵容,但哀矜而已。」伊川曰:「自反人如天地涵容,但哀矜而已。」伊川曰:「自反「孟子曰君子所以異於人者」章

「禹稷當平世」章

爲簡,古

6今所

巷,則 過其門而不入,則非 過 其 伊 不中矣。 JII Mi 日 不入,在 居陋巷,在顔子之時爲中,三 禹、稷之世 日 中 :「君子而 矣。 故曰:「禹、稷、 一爲中 時 - , 若在 中。」如 陃

子易

地

則皆然。」

異耳 此則 顔子 則人 有 當禹、稷之世,禹、稷當顔子之世,處與不 施 勞,是禹 亦尚 ,天下已信之矣。」 而 同 更觀人臨時志何如 固可以 横 渠 孔、顔出 不 未 ·用? 然當 曰:「禹、稷、顔 、稷之事 信,苟 爲禹、稷之事。 平世,賢者自 處自異。 同 室 出 也, 顔子勿用者也。 鄉 則 妄動 鄰之别,有責 也。 當亂世, 同道,易地皆然。 顔子不伐善,不 也。 雖同其人,出 顯,天子豈 孔子,其時 德性未成 無 顔子 責 有 處 之 棄 處

其論 墨子苟 楊氏答陳瑩中書 利天 下 雖 摩 E 頂 : 放 「毎 踵爲之,未嘗 一讀《孟 子》,觀 示

下有任 憫 户 樣 纓冠而往救之者也,顏淵閉户者也。故孟 門不入,弗子其子,至胼胝手足而 之溺猶己溺之,稷思天下之飢猶己 禽獸,孟子豈責人已甚 者,固不可 身憂,非忘天下也,循古樣轍 曰:『易地 如愚人,然君子不謂之不及。 子不謂之過。顏淵在 諸身措之天下,各欲當其 不 可,則是楊、墨而已,君子不與 其 職章章明矣。今公卿大夫比肩在上,則天 欲狹 미 一身之有過,願成來者之無 爲 也,故不敢 人也 其責者,自惟愚鄙,無 濟 不 則皆然。」若顔淵 同 欲 日議 寡 原其心,豈有它哉? 出位冒天下之責而任之以 而 也。 릲 陋巷,飯 平 而 此 可 ? 孟子力攻之,至 與世之横 而 蓋君子所 所 而 也。 E 禹、 過 蓋 疏 用 已。若謂 禹 飲 不 稷 于世,雖 禹思 縮 意賢 此古人之 水,終 爲 飢之,過 稷被 不 目 蓋 病 當 以 亦 天 自 其 施 下 施 比 智 不 胎 閉 子 髮 H 君 誉

外之道 蓋自 巍如 若 子在 否? 得。 下由是 何 致 謂 髮 IE 可 過,或恐未能 者 知合内外之道,則顏子、禹、稷之所同可見。 有。 得 中 過 Ē 中,于喜怒哀樂已發之後、能得所謂 有差,便是不正。 以平天下?」曰: 之, 誠 陋 心 和 且如 此 心 此須是于喜怒哀樂未發之際,能 而 所 意 誠 巷 · 其效自然如此。 因 ,則天地可位 則 如 平; 吾輩 Œ 以合也。 意 時 論孟子直以禹、稷比 道 顔子者,如 如 如 心推之,至于可以平天 不 也。 終不 觀其天下平,則知非意誠 足以 還 禹、稷事業便可爲之無 明不行矣,而 敢 故觀 平天下,則 問:「正 ,萬物可 要得常正,除非聖人始 後 便 何做 世自是 其誠 道 此心一念之間,毫 得 得? 心誠意,如 意正 育,其于平天下 自 禹 方顔子,只顔 無 己 欲來者之無 一心,則 人 心 稷功業巍 下, 正 得 又 心 日 其 何 心 體 此 知 難 和 天 内 若 所 正 便

> 不能 也,兹乃禹、稷、顔回之所以 同 也。」

無伐善 勞。 如此說,只 稷、顔淵同 施勞同; 也 口 以故其 [同道。 觀禹 尹曰:「當其可之謂時,前聖後聖,其心 同 禹 焦 道 是 如 所遇皆盡 不 竊意顏子言志,願 勞于外,稷躬耕稼,●與顔 事 ,謂窮達雖異,其道則同 何?」曰:「不 矜不伐,稷自未 也,非道 善焉。」 也 須 無伐善, 便人,與 如 問: 此 「禹、稷 說 也。 顔 淵 無 禹 無 施

顔

公都子日匡章」章

足,如此,則于人有益,而 于舜,使其行合于舜,則是聖人之徒也,孟子 哀其志而 楊曰:「章子之不孝,孟子非 伊川曰:「責善之道,要使誠有餘而言不 不與之絶耳。 而 在我者無自辱矣。」 或者乃獨 取之也,特 責其反

⁰ 「耕」,原無此字,據明抄本補。

原壤登木而歌,亦可謂不孝矣,孔子猶不棄固當進而友之,豈獨禮貌之而不絶與? 夫

之,若章子者,不亦可也?」

于人之幸不幸之際,未嘗不深歎而屢嗟焉。」自辨哉? 天下以私論人者,悉皆然也。故臣尹曰:「苟無孟子,則章子之不幸,何以

「曾子居武城」章

其是而已,故易地則皆能爲之。」 所處之地不同也。君子之心不係于利害,惟 尹曰:「或遠害,或死難,其事不同者,

「儲子日王使人瞯夫子」章

裘,渴飲而飢食,日出 已,皆人所日用,而昧者不知也。 乎哉? 求之,則堯、舜與 譬之莫不飲食,而 楊曰:「聖人,人倫之至也,豈有異于人 堯、舜之道曰孝弟,不過行止 人同,其可 而作,晦 知味 知 者鮮矣。 也已。 而息,無 夏葛 然而 推 疾 非 徐 是 而 道 久 爲 而 而

「齊人有一妻一妾而處室者」章

以驕妻妾之心而驕他人,其無恥則一揆。」尹曰:「妻妾猶不能欺,而況他人乎?

國朝諸老先生孟子精義卷第八終

五九二

國朝諸老先生孟子精義卷第九

萬章章句上

「萬章問日舜往於田」章

艾,有妻子 也。 至孝矣! 若乃自以 其 無令人。」孝子之事親 心,不能 庸 能 盡 孝也。 終身慕 ,至五十 孔子曰: 『君子之道 及 爲能 Ŧī. 則 此。 孟 因 \sim ,則是數者具有之矣,而 + 慕妻子, 仕則 凱風》之詩曰:「母 ,則失之矣。」 子言舜之怨慕,非 物有遷 而 據 慕。 舜 惟 如此,此孔子所以 也。 蓋人少則 患 四、丘未能 不 慕 故 順 君。 知好 又曰: 于 慕父 、氏聖 父母 深知舜 舜 色 不足以 生)則慕 一焉。」 「舜其 母, 善善 不 取 + 小 而 之 謂 之 我

> 矣。 解 憂, 尹 而言五十而慕者,以此 惟 日:二 順 父 舜之號 母 爲 足 泣 以 解 無 憂, 以 也 解 則 憂 終 故 身 慕 也 可 人 知

「萬章問日詩云娶妻如之何」章

能

也。

悅

之,好色,富貴,不足

以

解憂,非

盡

性

則

不

棲 于 事,論其理而已矣。 若使舜便不告而娶,固 曰:「孟子言舜完廪浚井之說,恐 見之迹,發人隱 殺舜爲事,堯奚爲不治? 已,今之官府治人之私者亦多。 告,堯固告之矣。 不爲娶,堯去治之。 乎? 畎 畝 伊川 之中,豈容象得以殺兄 學孟 曰:「舜 子者以意逆志可 匿 不 堯之告之也,以君治 而治之,非 告而娶,須 堯在 堯命瞽 不可。 上,而 蓋象 使舜娶,舜 而 其父頑,過 是 堯 也。 使百 之殺 然 使 識 也。 未 而 得 官 必 舜 嫂 象 舜 問 治其 事 有 欲 之 無 雖 意 此 以 m 時 又 可 不

告而

娶,義之小者也,廢人之大

也。 聞。 使治朕棲」,堯爲天子,安有是事?」 而 曰:「昔瞽瞍使舜完廪浚井,舜知其欲 只如今有智慮人,已害他不得,況于聖人?」 殺否?」曰:「聖人智足以周身,安可殺 是爲至。 曰:「象憂亦憂,象喜亦喜,蓋人情天理,于 聖人與天 也。 一逃之乎?」曰:「本無此事,此是萬 如下文言『琴、朕』,『干戈、朕』,『二嫂、 孟子更不能理會這下事,且只說 舜之于象,周公之于管叔 道 何異?」曰: 無 異。」「聖人可 等 其用 章 舜心 殺己 -所傳 也? 又 心

其不告,君子以爲猶告。」
其不告,君子以爲猶告。」
知之宜審矣,故受不告之名,而不忍陷父于知之宜審矣,故受不告之名,而不忍陷父于

之。 弟如此,豈有不知,知則治之矣。」 有之,不知則已。 豈可信? 上理會,只如象欲『使二嫂治朕棲』之語, 說聖人誠信無僞,此尤不可不知。 若從枝葉 殺舜爲事」,孟子答舜所以處之之道,其意 事,不可只于言上理會。 「孟子稱舜象憂亦憂,象喜亦喜,此 夫舜之意,惟恐不獲于象也,則 楊曰:「讀書須看古人立意所發明者何 堯在上,不容有 然堯於舜既以女妻之,其 如萬章問『象 如 此等人。若或 又曰 語 最 象喜舜 宜 日 在 以 味 此

❶ 「覺」,明抄本作「務」。

五九三

亦不暇辨。」 敢。但萬章所問其大意不在此 使其子九男百官皆事舜于畎畝之中,象必不 以盡之。其言殺舜之時,堯已妻之二女,又 所載,但云象傲 兄者乎? 所殺,何也?」曰:「堯在上,天下豈容有 自 夫豈 問:「象日以 · 此語 有 僞 自是萬 乎 而 ? 己。 殺舜爲事,而 是以 觀 章所傳之謬,據《書》 萬章之言,傲何足 謂 之不 ,故孟子當時 藏 舜終不爲 怒,不 殺 宿

尹曰:「臣觀此一章,人情天理于是

「萬章問日象日以殺舜爲事」章

知也。」
矣。常人作爲以求之,則有差焉,不可不矣。常人作爲以求之,則有差焉,不可不

伊川曰:「「不以文害辭」,文,文字之「咸丘蒙問曰語云盛德之士」章

作文當如此。」一字不行,却遷就他說。如有周不顯,自是文,舉一字是文,成句是辭。《詩》不可爲解文,舉一字是文,成句是辭。《詩》不可爲解

哉 折 尹曰:「萬物紛 諸聖,微 孟 子, 處 孰 則 能 見諸 考 其 天,衆言 實 而 知 殽 其 亂

「萬章曰堯以天下與舜」章

IE

則

聽」,誠哉是言也。後世以天人爲二道者,豈不足以識之。「天視自我民視,天聽自我民,尹曰:「堯不能以天下私與舜,非孟子

「萬章問日人有言至於禹而德衰」章

窮理者哉!!

意窺測? 如曰「顏何爲而夭,跖何爲而壽」,善人非耶?」天道甚大,安可以一人之故妄曰:「天道無親,常與善人,若伯夷者,可謂是天理。司馬遷以私意妄窺天道,而論伯夷是天理。司馬遷以私意妄窺天道,而論伯夷

字。 皆指 尹亦 未 能 此又與伊尹立太甲不同也。伊尹 之,只被見是武帝孫,擔當不過,須立之也。 庸 太 理 亦 太甲也。 後,不必引 又看《禮》,見王巡狩問 遂言湯崩六年之後太甲方立,不知年只是歲 霍光 甲元 思庸 稱 立 亦必然。 而 歲爲年。 不 頃吕望之曾問及此,亦曾說與 一人計 尹 廢 立 一死,外丙方二歲,仲壬方四歲 年,又看 ,故放之桐三年。 以 昌 也。 太甲又有思庸之資,若無是質,伊 邑,其 證 冕 且看《尚書》,分明說成 較 《史記》以孟子二年四年之言, 服 二年四年之說,縱别 天 E 奉 (理,非 始 徂 嗣 乃光之罪,當時不 桐宫 王。 。 百年者,益 知 當時湯 居憂三年,終能 可 天 知 也。 凡文字理是 既 知太甲必 知《 他 が、故 崩,太 湯 無 又 (書))傳 既 可 · 合 立 後來 須 日 没 證 思 立 T

楊曰:「孟子曰:『天與賢則與賢,天與

也 子 其所欲哉,不得已焉耳。 王之號,亦因 曰: 『舜之孝,武王之武,皆不幸也。』 征伐 則與子。』『唐、虞禪,夏后、商、 ,聖人何容心哉,奉天 時時 而已,皆非有 故曰 而 己。 心迹之異也。」 未盡善也。 周繼二, 横 渠 先 皆 豊 帝 生 天

聖之心者無如孔子,繼孔子者孟子而已。」遠,其子之賢不肖,非人之所能爲也。知前賢則與賢,天與子則與子。』舜、禹、益相去久周繼,其義一也。』唯孟子識之,故曰:『天與

尹曰:「孔子曰:『唐、虞禪,夏后、商、

之民,豈 生此 皆 能覺之而已。」 分我之所有以予之,皆彼自有此 睡 ,他人未覺來,以我先覺,故摇擺其未覺 民中盡得 明道 「萬章問日人有言伊尹以割烹要湯」章 可 曰:「我天民之先覺者,謂我 不覺其未覺者。 民道而先覺者也。 又曰:「天民之先覺,譬之 及彼 之覺, 義理,我 既爲 乃天 先 亦 譽 旧 非

術 此 以 嘗 可 全 行 盡 亦 民 斯 有 亦 于天 則 道 得 足以治天下國家故也。」 所 使之覺。 覺斯民 天 增 元無少欠,亦無增加 下者,謂 生斯 加 也 民 及其覺也,元無少欠,蓋 適 蓋言天生此民,將以此道 底 其 事 般 全盡 業。 爾。 天之生民之理,其 天之生斯民 天民云者,蓋 ,未嘗不足。 也 亦 將 達 覺 是 未

覺 矣。 民 讀 說 知是知此 ,將以 後知,先覺覺後覺。 十年 夜話 如 曰:『以 或 何 問問 勝讀 愚之」,其亦自 ? 事,覺是 伊 川:「釋氏有一宿覺、言下覺之 先知 曰: 十年書。』若 又曰: 何 覺 覺 後知, 必 于理。 「君子之學,則 ?浮圖, 賊 而 其 老子以爲『非 于言下 以先覺覺 性 古人云:『共君 孟 與 子 即 嘗 悟 言 使 後 (),何 覺。 覺字 以 先 明 知 啻

先 知覺後知,使先覺覺後覺。 明 道 曰:「伊尹曰 :「天之生斯民 予天民之先覺 也 一,使

> 甚 者 也,予 底 是覺斯道? 將 以 斯 道覺 甚底是覺斯民? 斯 民 也。」釋 氏之云

湯、桀, 愈 若 不 湯、桀,孔子之所以不爲。今學者任道之心 不 然 己推 言伊尹『聖之任』,匹 有 被 ·如是 間。 不得 有 可 猶 其 則有 疾 不 未 而 澤,不知 吕 痛 志,則亦 如 乎? 及聖人之大成者 納諸溝中,其自任以天下之重如 其 曰 所謂先覺者,覺其在 命 : 伊 在 無 存 身,未 尹 傷于 伊 馬 時之不 蓋亦有命,無必 ,視 尹 有 先覺乎?」 知 有不求 命。 天下 夫匹 道 可 之在 如 不 以 豊非 疾 其 得 婦 有爲,不 1我,當 不 所 其 有 我 愐 聖人之憂天 미 以 不 所 者 又 己。 不治,愈不 被其 治 與 曰 見治 爾 使 者 失 : 如 天 其性 其 孟 五 五 亂 下 此。 得 就 下 就 均

而 可 離 楊 曰 則 道 「夫盈 有 在矣。 天地 之間,孰 譬之四方,有定位 非 道 乎 道

志

多寡

,若論

義

其

理

也。

伊

尹惟

能

一介知

所

取

與

故能

禄之以

天下

弗

顧

繋馬

千

駟

弗視

也。」

又

日

:

介之與

(萬鍾

若

百姓

日

用

而

不

知

耳,

知之,

則

無

民

天

而

聖

作,晦

而息,無非

道也。

孔子之相

于有莘之野,是以

寒而

衣, 飢

圃

之間

,人病不

求耳。

伊

哉 ?

孝弟而已矣。

用

者

加

伊尹之樂有在

乎是。

謂

知

之者也。」

道。

夫堯舜之道, 豈有物可

玩

而

而

不

知

也。

伊

尹

耕

于莘之野,以

即

耕于有莘之野是已。

此農

夫

田

若

夫

無

適

而

非

道

一,則

鳥

得

而

離

耶

衣

飢

而

食,日

出

而

作

晦

而

息,耳

聽,手足之所舉

履

無非道

滴

東

則

離

乎

西,

滴

南

則離乎北

斯

識 也 0 尹 旦 宜 一乎君 子 之所 爲, 衆

五九七

風

可

赤

荷

五九八

萬章問日或謂孔子」章

得不盡 急。 若 不相悖處可也。」今且說聖人非不知命,然于人事 非 亦 却 何用汲汲求治。禹、稷救飢溺者,過門不入, 不 遇一事, 箇 不 憂、象喜亦喜。 微 會處 服過 知飢 處 數者之事 伊 ,此說未是。 ĴΠ 置、盡人謀之後、却須泰然處之。 宋。 置了放下,便是無義無 溺 日 則心心念念不肯捨,畢竟何益? 而 「孔子既 舜 何故如此,須思量 死 既 者自有命,又却 國祚長短,自有命數,人君 又曰: 見象之將殺己,而又象憂 知桓魋不能害己,又 「人之于患難,只 到道並 救之如 命 也。 此其 行 有 有 而 木

受之 舜 所 命有自合之理,無從而 必 可 然。 理,故孔子不主彌子以受衛卿。 以受堯之天下。 吕曰 有命有義,是有可得可受之理,故 辭受有義,得不得有命,皆理之 無 間焉。 命無 義 有義 ,是無可 無命, 二者義 得 雖 可

> 受之義,亦安得而受之? 受之? 是謂義合于命,故益 一者義 中國授室,養弟子以萬鍾,爲孟子之所 之天下。 有可受之義, 命有正合之理,時 有 命無義,雖 而 無 可得之命,究 有可 中而 是謂 得之命,而 避啟 已焉。」 命合于義,故 其 而 理 不 安 受禹 得 而 可

哉 ? 炙孟 所爲 一子,猶 主,此不易之論 楊 尹曰:「觀近臣以 去聖愈遠,邪說異論,蓋不 日 于 「義命常相隨,無 或 說 有 ,萬世之法 疑 其所 焉,烏 主,觀遠 義 則 在 也 止 無 其 於此 命 知 萬 臣 也。 義 章 以 命 其

「萬章問日或日百里奚」章

此,蓋以其不正之心度聖賢故也。」 尹曰:「當是時也,好事者之論大率類

國朝諸老先生孟子精義卷第九終

國朝諸老先生孟子精義卷第十

萬章章句下

「孟子曰伯夷目不視悪色」章

行未 既 乎 以 有 子所言,只是推而言之,未必至如 用希」,則伯夷之度量可知。若使伯夷之清 論 流 (于道防其始,不得不如是之嚴,如此 如 ·中,故曰『君子而時中』。」又曰:「夷、惠之 久則久,可以速則速,此皆時也,未嘗不 者。 此,又使念舊惡,則 必如此。 伊川日 夷是聖人 夷、惠之行不已,其流必至于孟 一可以 且如孔子言『不念舊惡,怨是 極 清處,惠是聖人極 仕則仕,可以 除是抱石 止 此。 沉 前 止 河。 和處 然聖 而 孟 合 子 猶 可

> 湯 流 聖人則兼之而 見。其以天下自任,故以爲聖人之任 則 五就桀,三聘幡然而從,豈不是時然後 有 害。 至 時出之。 于言伊尹 清、和 始 在 何止 畎 畝 于偏,其 五五 來 就

明道曰:「終是任的意思在。」仕,可以止則止」,而不得爲聖之時,何也?」問:「伊尹出處,合于孔子「可以仕則

也。一 淺。 終之,須以知爲 之事也。 始如致知,智之事也,行所知而 而以玉聲終之。《詩》曰『依我磬聲』是也。 爲學者言終始之義也。 有知之而 爲 飢而 不義,只爲不知。 伊川又曰:「「金聲 又曰:「知至則當至之,知終則當遂 《易》曰「知至至之,知終終之」是 不食烏喙, 不能行。 本。 知而 知之深則行之必至,無 人不蹈水火,只是知。 知至而至之,知幾之 樂之作,始以金奏, 而玉 不能行,只是知得 振之」,此孟子 至其 、極,聖

五九九

條 事 知 知 終之。」 理 至 至是致知 一之事 可 因 與 其 幾 博 始 篤 條 行 學、明辨、審問、慎思 知 理,故 便 終 行,是終之,如 而 能 終之, 終條 故 小理,猶 可 始 與 ,皆致知 知 條 存 至 理 紁 則

貞 又 此 當其可之謂 非 勉 者 一之,則不流。」 日 出 蓋 聖人之和 ,和之極。 爲 處 未 横渠 異物, 之時 能 知 日 安 金 也。 時, 0 . 和 也 和 勉 所謂 爲 取時 而 無 而 思 至于語言動 狥 清 所 玉 蓋 中也。 物。」 聖者,不勉不思焉者也 非 節 雜 未 之, 者, 能 聖人之清; 有也。」 則不 又曰: 清之極 可以行 作、皆 . 過 ; 有 3 ,可以止, 聖之時, 勉 知 又曰: 無 時 而 運 也。 所 和 而 異

何 母 楊 遲遲之有? 日 國之道 孔 也。 子之去 曰: 然 燔 魯 孔子之欲去魯 肉 日 不 『遲 至, 遲 不 吾 稅 行 也 冕 也 久 而

中,則其智容有所不 柳 其 則 也未 伊 澤世 也。 矣, 矩,智何 智矣。但此 之事,或不足于智, 辭 者、聖之事。」夫仁且智,斯之謂 道也。」 問:「「始條理者,智之事; 未之有矣,門人謂賢於堯、舜,則 伯 、智矣。 智 尹 以 下 夷、 欲以 惠,只 但可 燔 必皆 德 垂 去,故不 肉 被 後 柳下惠 足以 微 如所謂 語賢者。 生民 不至 中。」曰: 而已,故 于 罪 發明中處乃智之事,聖則 清 名之耶?」曰 稅 行 7,功施 道 一,則 、任、 冕 從容中道,從 不 百 不 得 若大而 前 孟 欲 何也?」曰:「聖 後 和 世 行 周矣。」曰:「智 以 行 世。 爲 子曰「智之於 微罪 處 而 于天下, 苟 中 下有聞 : 化之,則 速 夫子 -, 其 去, 如如 行矣,過 也。 心 聖。 故 他 伊 愐 其 自 風 所 雖 則 # 流 遲 流 生 ൬ 便是用 欲 賢 終條 未 智 其 則 今 此 遲 風 風 民 又 伯 起者。 不 者 以 足以 必 所 具 而 復 其 不 以 日 踰 忘 足 理 無 來 行

耳。 若隘 妙 無 此 伊 故 柳 退 害 言聖人所以 同,而其中 已 ? 却 所 義 全 三人者 尹之任 孔子出 下惠之和,其弊多汙而寡潔,惡異 而 至聖人,但其他 否?」日 一牛,萬 寡 一,故伯 昔伊 是 無 與不恭 若伯 進,過 以 事 , 則 智爲 因 柳 尹之任 而救之。 理 「用智非 與 夷、伊尹、柳下 夷 大過人者,蓋能以身救天下之弊 ,其所偏也與 八孔子 由 廉 洞開,即便是從容處,豈不謂 榯 下 出 妙矣。」曰 智行 之 惠 而 而 片,其 處 復 救之。 偏 不 ,異,只 是故伯夷不清不足以 未 刻,故柳下 、弊多 和 而 非 所 必 救 不 以 行 : 爲不 能 足以 伯 惠、於清、任、和 之,非天下之中道 進 智者 「聖人之于智,見 言聖人。 中。 夷 而 之清 能 救伯夷之清 ·惠出 寡 又曰: 也。」日 其至與 無 退,苟得 偏 其 而 而 若曰 「王氏 救之。 尚同 故 . (孔子 、弊多 也 救 處 而 行 之 如 耶 ? 當時 德以 使伯 又五 蕡 丽 極

此

其

處

然後聖人之道無弊。 伯夷之清,使天下從之,其弊不應繼 才之衆,至其衰世猶 百有餘歲,其間 者,何不思之甚 者當孔子之時,皆足以爲孔子矣。 也,故久必弊。 一人之力哉,四 孔子救之,又 于天下,故 荷藤 同俗者,殆 百 獨 夷之弊至是猶 況孔子去柳 有餘歲,文、武、周公之化,不爲 無 、接輿、沮 以革之乎? 孔 聖賢 何 耶 人者相爲終始也。 無 子 至孔 其 不惠 1 溺之流,必 集 補 在 遽 有 其 于 之君六七作,其 子之時,三聖人之弊各 其 ,則周之聖人所 由 耶? ,世,而 存 未遠,若 由 湯 行 所 者。 周 而 以 至于文王之時,五 至于戰 大 退 無 且 獨 成 使 弊者 者尚多也 孔子之時 柳 俟 伊 萬 使三 下 國之 尹 爲 世之法, · 豈孔子 踵 成就 惠 柳 謂 有弊, 不 而 一聖人 此 能 F 荷 道 說 惠 人 則 矯

之時, 之,而其所謂同者,不過得百里之地而君之, 來,未有盛於孔子。」而伯夷、伊 曰:「伯夷、伊 無弊者,四人者相爲終始,使三聖人當孔子 其弊果何自而得之耶? 若曰孔子之道所以 易其介」,夫亦豈以同 以 則伯夷之不必退亦可見。 濱,以待天下之清,聞西伯善養老者則歸之, 然以爲必于退則不可也。方其 則伊尹之不必 之,然後幡 弊之說者,是亦不思而 柳 任者,然以爲必于進則不可也。 謂 下 「直道 惠之所爲,是 亦皆 而事人」,孟子 然 足 而 尹 以 進 就 不 可見。 爲 果何益乎? 湯,不然,將不從其 同道。」又曰: 孔 爲和乎? 子, 已矣。伊尹固聖人之 伯夷固 此 亦稱其一不以三公 若柳下 尤 避紂,居于海 聖人之清者。 尹不 不 故爲聖人救 一自 湯三使往聘 由是觀之, 惠,孔子蓋 可。 足以 生 聘 民 孟 矣, 以 子

聘。 事? 湯 桀,則就之乎?」曰:「否。」「何以知其然?」 乎?」曰:「安得 乎? 爲和 則皆 也,使之事 曰:「伯夷聞文王作興則歸之,宜其就 人,又當自有所見,縱得孟子之旨,安與 爲之說乎? 雖然,此孟子之言也,學者于聖 孟子之言,其辨如彼,今釋孟子之言,安得 不辜,而得天下,皆不爲而已。 也 獨夫,伯夷伐之,亦何恤哉?」 能以 然而横政之所出,横民之所止,不 ,一節之至于聖人者也,其 夫以三子爲聖人者,孟子發之也 肯伐桀乎?」曰:「 問: 朝諸侯,一天下, · 桀,蓋 「使伯 有 而 所不 不就?」「然則 夷居湯之世,就 屑矣。」「然則其 至天下共叛之, 行 一 不 可 彼爲任 以爲 湯 義,殺 使 湯 湯之 之就 孔子 忍 之 果 爲清 桀 相 居 聘 吾 强 圃

尹曰:「孔子集大成,或清或任或和也。

爲

夫射遠焉,至者可以謂之力,中者非力也。猶可以用智,終條理則智不容于其間矣。譬金聲則有隆殺,玉振則始終如一。始條理者

「北官錡問日周室班爵禄也」章

中者未必能遠、遠者力也。」

欲 煨燼之餘,而多出于漢儒一時之傅會,奈何 爵 學比後世爲尤詳,又載籍未經秦火,然而 追復矣。」 盡 禄之制 信 明道曰:「孟子之時去先王爲未遠,其 而曲爲之辭乎? 已不聞 以其詳。 今之禮書皆掇 然則其事固不可 拾 于 班

見其籍矣,而況繼之以秦火之後哉!」尹曰:「當孟子之時,周室之制固已不

「萬章問日敢問友」章

另。不資其勢而利其有,然後能忘人之勢。 横渠曰:「獻子忘其勢,五人者忘人之

若五人者,有獻子之家,則反爲獻子之所

賤矣。」

「親」,疑當作「賢」。 尹曰:「堯之尊親,真所謂尊親也。」

「萬章問曰敢問交際何心也」章

陵仲子而已。聖賢辭受進退,惟義所在。」 尹曰:「不聞孟子之義,則自好者爲於

「孟子日仕非爲貧也」章

問: 云: 是爲兆。」先生因言近煞有人以此相勉,某答 生曰:「乘田委吏却不是爲兆,爲魯司 否?」先生曰:「孔子爲乘田委吏是也。」又 「待飢餓不能出門户時,當別 「或云乘田 或問伊川曰:"「聖人有爲貧而仕 委吏非 爲貧、爲之兆 相 度。」 也。」 寇 者 先 便

失義,雖賈儈可爲也。然君子亦任其力之所已乎? 膠鬲起于魚鹽,百里奚起于市,苟不

也 仕,有時而爲貧。古人有之、《簡兮》之詩是 若以義受禄于吾君之爲安乎? 于人,如墦間之爲 能 坐待爲溝中瘠耳 末,能之乎? 不能也。 稼,能之乎? 堪 不强 孟子豈虚語哉!」 使與 其 不能也。 不能 力之所不能 市人 前 也。 可 也。 交易,逐什 也,不然,則未免有 與其 舍是數者不能,則 使之陶 任。 屈 己以求 漁,能之乎 今使吾 故君子之 于錐 人,孰 刀 徒 求 將 之 ? 耕

「萬章日士之不託諸侯」章

于君 m 說 使之有升降拜揖之勞,是以犬馬畜之矣, 者 前 此 曰:『君臣 楊 曰:「周 則 孟 降 子 而 所 再拜。 謂 一之義 禮 養 王 君子 不 燕所以待群 可 燕 之道 以 則 燕 以 也。 膳 廢。一曰: 臣 夫爲獻主。 禮: 嘉賓也, 是不 受爵

《養君子之道,而廪人繼粟、庖人繼肉之以膳夫爲獻主而王不自獻酬焉,是乃所以

義

也。

爲

故

,萬章日敢問不見諸侯」章

世人不恥也。」
也一人知我,則不肖當事賢,君子恥見之,而我知,則賤當役貴,君子不恥役,而世人恥我知,則賤當役貴,君子不恥役,而世人恥

聖賢之所守蓋如此。」此條當係尹氏,或屬上文。「君子進退去就之義,孟子論之曲盡矣,

「孟子謂萬章日一鄉之善士」章

上 曰:「誦其詩,讀其書,而不論其世,則 其所遇之時 也。 尹曰:「是尚 是以 論 如 其 何,不可一 世也,言上有古 友 也,言所友每 概 而 論 人,須 也。 愈 進 知之 當 而 論 愈

有不能盡。」

「齊宣王問卿」章

爲? 如此。」 問:「易位與去,以恩義言之否?」曰:「貴 乎?」楊曰:「但言其有此理也,豈 戚之卿無可去之理。」 又曰:「宣王問卿, 孟子則當以正對,●蓋不直則道不見故也。」 尹 嘗以 或問:「易位之事,三仁于紂盍不行之 曰:「事君有犯無 伊尹之事觀之,信有之矣。」又 隱,孟子之言 可以常

聽諫,欲其必聽,故其言深切。」 立之事乎?」曰:「孟 問:「孟子此言,豈 子 此 不 起 語 後 所 以 世 警 强 戒 臣 齊 擅 王 廢

國 朝 諸老先生孟 子精義卷第十終

0

卿孟子」,原作「孟子卿」,據四庫本改。

六〇五

國朝諸老先生孟子精義卷第十一

告子章句上

「告子日性猶杞柳也」章

故孟子嘗言告子未嘗知義,以其外之也。」尹曰:「人性之無不善,告子所不知也,

告子日性猶湍水也」章

那得仁,然仁亦自在。」●善,然善者依舊在。『觀過斯知仁』,既是過,之非不可上,但非水之性。性雖可以爲不不可爲不善,但非性之至,如水之就下,搏擊不可爲不善,但非性之至,如水之就下,搏擊,論曰:「孟子論性善,論之至也。性非

出荀、楊之上者,知性故也。」
尹曰:「孟子傳聖人之道而得其真,高

告子曰生之謂性」章

不可。 幾時分別出是人是物。修道之謂教,此則 于學。若元不失,則何修之有? 在 謂率性也。 物而言。 行也,則是性已失,故修之。 成性存存,道義 底性, 牛則爲牛之性, 又不爲馬 也,循其性而不失,是所謂道也。 是于下,萬物流形,各正性命者,是所 于中却須分別牛之性、馬之性。是他便只道 地所生之物,須是謂之性。 人 般,如釋氏說蠢動含靈皆有佛性,如 事。 明道曰:「告子云生之謂性則可,凡天 「天命之謂性,率性之謂道」者,天降 循性者,馬則爲馬之性,又不做牛 以失其本性,故修 人在天地之間,與 皆謂之性則可, 而求復之,則入 (萬物) 底性,此 是由仁 此亦 同流,天 謂 此 通 車 所 性 則

●「自」,原無此字,據明抄本補。

力

緩

怠

則

遲

清

1,及其

清

也

則

却

只是元

初

水

口

以

不

加

澄

治之功,故

用

力

敏

勇則

疾

清

用

之門,亦 禀有然也。 克岐克嶷; 禀,理有善惡,然不 謂 已之意,天只 而 生也。 性,性 子越椒始生,人知其必滅若敖氏之類。 是 即 有自幼而善,有自幼 萬 氣,氣 善固性 物各 是以 即 有 生 ·是性· 也,然惡亦不可不謂之性 性,生之謂也。 成 爲道。」 性。 中元有 存存亦 加 又曰:「生之 此 惡,后稷之幼 兩 是 人 物 生 是 生 生 相 氣 對 氣 不

說 也。 『繼之者善也』者,猶水 繼之者善也」,孟子言人性善是也。 性 時,便已不是性也。凡人說性,只是 蓋 生之謂 性 ,人生而 流 静以 而 就 上不容說,才 下 也。 夫所 皆水 謂 說

也; 也,有流 然 濁, 有 有 不可 流 濁 而 而 之多 以濁者不爲水也。 至海終無所污,此 未遠 者,有濁之少 固 已 漸 [濁,有 何煩 出 者 如此,則 而 清 人 甚 力之 濁 遠 人 雖 方 一爲 不 不 有

所

同

也,亦 之,各得其分,則教也。 置 無 理,天命也; 是善與惡在性中爲兩物,相對 在 加 損焉,此舜有天下而不與焉者也。」 不是將 隅也。 順 清 水之清 圃 來 换 循之,則 却 則 濁 自天命以 性 , 道 善之謂 亦 各自 不 也 是 3 至于教,我 循 出 取 也 此 來。 出 而 故 濁 此 修 來

性 性 話,中人以下不可與之說 只是大綱說,言中人以 分處。]又問:「中人以上可以 性否?」曰"「此是才,須理會得性與才所以 者,生之謂性也。」又問:「上智下愚不移,是 如 也,何以言相近? 下不可以語 一、凡言性處 俗言性急性緩之類。 ,性之本 伊 川 曰:「性相 上,是才否?」曰 也。 須 看他 生之謂 曰 : 文. 近,習 此只是言氣質之性 上可 性安有緩急,此言性 意 近上話也。 性 如 -以 相遠 何。 論 語上,中人 與之說 固是。 其 也。」性一 且 所禀 如言人 生之謂 近 也 以 F 此

問: 此 言天性柔緩,天性剛急,俗言天成,皆生來 禀受也,天命之謂性,此言性之理也。 今人 若乃孟子之言善者,乃極本 之性,牛之性猶人之性與? 之後謂之性爾,故不同。 也。」 異 隙中日光,方圓不移,其光一也。 就 他 論 孔 E 子生之謂性爲不然者,此亦性也。被命受生 天者,自然之理也。」 ,此訓 其 其 ,故生之謂 說 子 「生之謂性 「性字不 所 日 便 性本同,但限以形 又曰 禀也。 不 性 所禀受也。 是 相 ···「孟子言性,當隨文看,不以 也。」 可一概 近, 性,告子以爲 告子所云固是,爲孟 若論 與天命之謂 若性之理也,則無不善。 又曰:「犬牛人 論。 其 故 繼之以犬之性猶 本, 豈可 生之謂 又曰:「論性 一,孟 不可使相 窮源之性。」 然不害爲 性,同乎?」 性,止訓所 言 子 惟所禀 子問 相 以 知 更。 近 爲 不論 所 他 如 告 非 各 如 去 只 4

> 盡性 然天地之性人爲貴,可 「人之剛柔緩急,有才有不才,氣之偏也。 惟大人爲能盡其道,是故立必俱立, 本參和不偏,養其氣而反其本,使之不偏,則 故氣質之性,君子有弗性者 而後有氣質之性,善反之,則天地之性存焉 順吾理者,則亦末如之何矣。」 知,愛必兼愛,成 且人與物等,故告子之妄不可不 氣 曰:「性者萬物之一源,非有我之得私 不 而 備 横渠曰: 論 天矣。」 氣 不 「以生爲性,既 論 不獨 又曰:「告子言生之謂 性 不 成。 明 一概論之乎?」 ,二之則 彼自蔽 不通晝夜之道, 焉 又曰 不 抵。」 塞 是。」 又曰 而 知必 不 形 也 天 周 知 又

本,則 不 也,亦有 善 楊曰:「人所資禀固 無 ጢ 時 人則受之以 不 善。 而惡矣。 蓋 生故 猶人之生也 陰 也。 有 陽之謂 不同者,若論 然 ,氣得其和 而善者其常 道 除陰 陽 其

常然也,至于汨 其常者性也,此孟子所以言性善也。 氣 則 而 氣 有以變之,其澄濁而 去,其清者自若 已,非 不 質之性,亦云人之性有剛柔緩急强 爲 安樂 和 非 謂 人,及其 其 天地之性然也。 (常,治之而使其 也。 濁 有疾 ,則沙泥 是故 求清之義與?」 也 一,以 君子于氣質之性 混之矣,沙泥 今夫水,清者 氣不 和 則 和 反 而 横渠說 弱 常常 然 昏 矣。 也 必 既 其 明

之,則其言非矣。」也,告子謂生之謂性則是也。及乎孟子復問也,告子謂生之謂性則是也。及乎孟子復問尹曰:「生之謂性者,自其所禀而言之

「告子日食色性也」章

哉! 孟子,後世何所承乎?」 尹曰:「 學者 不 告子 知 大 本 以 爲 圃 妄 論,若此 内 義 外, 者多矣。 不 亦 異

「孟季子問公都子」章

伊川曰:「敬立而内直、義形而外方。

義形于外,非在外也。

方矣。 公都子曰: 此出焉,故有内外之辨,其實義亦敬 施之于事,則厚 方外。」夫盡其誠心而無僞焉 楊曰 敬與義本無二,所主者敬 「《易》曰 「行吾敬而已。」」 薄隆 一: 「君子敬以直内,義以 殺 一定而不可 ,所謂直也。若 而 "易,爲 也。 義 則 自 故 有

「公都子曰告子曰」章

理,則 豈人之情也哉!!至于不能順 以善者,于四端之情可見。 相 以爲善矣。」若,順 曰:「孟子言性之善,是性之本。 近,謂其禀受處 問:「孔、孟言性不同, 流而至于惡,故曰:「乃 不相遠也。 也。」 又問: 故 如 若其 其情 孟 人性皆善,所 「才出 何? 子曰:「是 孔子言性 情, 而 悖天 伊 于 則][[氣 可

0

性也, 言善惡,皆先善而後惡,言吉凶 否?! 發,何嘗 下之理,原 善。」又問:「性如何?」曰:「性即 者,才也。今人說有才,乃是言才之美者也。 是才?」曰:「如 不移,只有二,自暴自棄是也。」又問:「如 子所言上智下愚不 之,是生知也; 濁 愚人,如韓愈所言,公都子所問之人是也。 才乃人之資質,循性修之,雖至惡可勝 然此論生知之聖人,若夫學 至清之氣生者爲聖人,禀得至濁之氣生者爲 皆可至于善而復性之本。 可以爲輪轅,可 不 -善,發 其 氣 所自,未有 清 湯、武反之,是學而知也 而 材 則 中 植 移,亦無不移之理,所 才 節 以 是 善 也。 爲 不善。 則 氣 梁棟,可以 無 而 譬如木,曲 濁 往 所謂 知之,氣無 則 喜 而 ,皆先吉 才 怒 理 不 堯、舜 悪 哀樂 也。天 善。 爲 榱桷 而 直 禀 凡 未 而 爲 者 何 以 孔 清 性 得

情 害之耳。又云:『人見其禽獸也,以 觀 說 善,非才之罪也。」則是以情觀之,而才未嘗 爲旦晝之所爲有牿亡之耳。 有才焉,是豈人之情也哉?」所以無才者,只 山之性,是山之性未嘗無 木,人見其濯濯 不在才,但以遇凶歲陷溺之耳。 不善之才。 善處,只是云『舍則失之』,不肯言所禀 善,才有善不善。」楊 才做緣習。」● 後 性如 則 孟子意,却似才亦無有不善,及言所以 M 可 言 何?」曰:「佛亦 以爲善矣,乃所爲善也。 是 如云『非天之降才爾殊』,是不 非 皆 也,以爲未嘗有才焉。此 又問:「伊川云:「性無 先 雄 是 韓 是說. 而 才,只爲斧斤牛 後 愈皆說 又云: 『乃若其 本善,只不合將 非 又觀牛山之 又 若夫 着 爲未嘗 爲 時 不 羊 贵 有 不 不 然 佛

0 緣」,原缺,據明抄本補 井之事

象

欲

使二

一嫂

治

一,象還

自

度

得

道

殺

却

舜

迭爲

賓主,當是

時

意。

子且答他正

意,不暇

子只云非

而

有

象,以瞽瞍爲父而

有

何?」伊川云:「上智下愚便是才,以堯爲 便是性,欲爲善便是情,能爲善便是才,如 四端者便是爲善之才,所以不善者,以不 才三者皆無不善,亦不肯于所禀處說 如萬章問象殺舜事,夫堯已妻之二女, 相倍蓰而無算者,不能盡其才也」, 才之罪者,蓋公都子正問 是有器械 已自近君,豈復有完廪浚 一一辨之,又恐失其 觀孟子之意,似言性、 才是一 取其二女,堯 舜,亦是才。 也? 棲 才料 當當 箇 或云 是時, ,方可爲也。 爲善之資, 性 善、孟 善之 然 便 堯 本 孟 1 君 在 不 其氣 清則 惟 不 則 性也,可以爲梁棟 這 得 可 其才也。然而才之不善,亦可以變之,在 夫木之曲直,其性也,或以爲 由 于天之謂性,禀于氣之謂 又曰:「性無不善,其所以不善者才也。 使其肯學,不自暴自棄,安有不可移哉?」 不移者,只 下意。」 否? 自 以 氣之有 移,非謂 有善有不善,性則無不 暴 爲 以 才清,氣濁 善。 自 復其善 必 偏 棄, 無 有 不 又曰: 故 正也,乃若其 可 此 兩 則 孟 爾。 事。 般 不 移 則 子 「性出 也 미 爲 才濁。 日 可以 故能持其志,養其氣,亦 然孟 與 , 而 自暴自棄不肯學 爲 「人皆 (性則 有不 爲榱桷者才也。 · 善。 于天,才出 譬猶 子未 才。 善。」 惟上智與下 移之理。 미 無 車,或以爲輪 才之善不 木 暇 不善矣。 以爲堯舜。」 焉,曲直 與 又曰: 辨 于氣,氣 所 且答 「若 也 今 養 受 以 愚 オ 者

善。

今謂才有善不善,何

地

情、

能

盡

此

四端之才也。

則

如

云「或

譬如

作

器

械

() 須

不

善。

觀

此

數

處,

切

疑

信 情,凡此數者,皆一也。聖人因事以制名,故 性善。 之道 料,曲 不同若此。 若說一人之才,如因富歲而賴,因 其 圃 自性之有形者謂之心,自性之有動者謂之 豈才質之本然耶?'」 罪?」曰:「才有 心 了 此言人 行 贵 以名之,以其施之之不同也,故爲 情 皆善也 · 而 道與性 則 或 嗣 可 性之本謂之命,性之自然者謂之天, 陷 可 オ 去聖人之意遠矣。」 日 以爲輪,直可以爲梁棟,若是 溺 以 二、「人 事? 聖 而後之學者,隨文析義,求奇異 其 爲 也。 善 心者,非 人因 美惡者,是舉天下之言也。 材 下 若 有美 面 工其善 以 又曰:「稱性之善謂 夫 不是說人皆有四者之 性之善如此,故謂之 關 爲 (惡, 豈 也,則爲 才事。 不 善 又曰 可言非 非 X 才猶言 才之 歲而暴, 五者以 段鑿 義 「自 禮 才之 罪 智 性 壞 才

> 異,其亦弗學歟? 其亦未體其性 别之。 亦不知道之所存歟?」 舍此而行,是悖其性也,是悖其道 合而 言之皆道 别 而 言之 也 亦 也,與五者 皆道 也。 其

易 民之秉彝,好是懿德。」故有物必 「禀於天者爲性,感爲情動 因 動 此五常,性也。 知者,知也。 者、宜也、權量輕重之極。 彝 不信然後 者之謂情,性者自然完具。 又曰:「《詩》曰:『天生蒸民,有物 逆之則難,各循其理 也,故 明道 曰:「仁者,公也, 好 見, 信者,有此 是懿德。 若夫惻隱之類,皆情也。凡 故 四 端 萬物 ,何勞於己力哉 不 者也,萬物皆有信。 爲 禮者 言信。」 皆 心,質幹是才。」 人 有 信只是有此 此 有則, 别 理 者 也。 順 又 也。 有 民之 之 E 定分。 則。 則 義

秉

伊川曰:

「杞柳,荀子之說也。

湍水,楊

其惡 子之說也。」 宗之理,所以聞其聲而知之也。 聖人何能 子於十二子,而謂人之性惡。 勝其氣,復其性 其言蔓衍 滅宗,此無 韓 退之說 「人之性也善惡 則爲惡人。」荀子,悖聖人者也,故 反 而 叔 足怪 不 其 向之 又曰 性以 斷 一可以 母 其始便禀得惡氣 優 : 混 至於斯 聞 柔 「楊子,無自 無此 修 楊 而 食我 其 不 患。」 耶 决。 善則爲 ? 之生, 性果 使其 其 得 善人 者 論 惡 能 便 知 又 性 也 學 有 其 E 耶 列 一, 故 以 修 必 ? 孟 則 滅

而皆中節謂之和,不中節則謂惡。」亦觀其文勢如何。情未必爲惡,哀樂喜怒發亦觀其文勢如何。情未必爲惡,哀樂喜怒發

善 而 混 己。 爲 楊 湍 曰:「《孟子》七篇之書,其要道 說 水之說,孟子 明 矣。 而 論 固 者 嘗辨之,不 欲 之,皆未究其 可 性 與 善 性

必以 反身 止而 於氣 當深考也。」 善,然後爲得。 爲三品則失之矣。 此 也 故以習而 『惟上智與下愚不移。』言相 所以也。 『天生蒸民,有物有則。』凡形色之具于吾身, 君子有弗性者焉。」又曰: 性,善反之,則天地之性存焉。 孟子論白羽之白與白雪之白是也 母 類,是生而 止 賄 而 不憂,既生也傅不勤 德勝: 焉。 誠,則舉天下之物在我矣。 死,若此類,是生而惡也。 相遠。 孔子曰:『性相 其 致知在格物,物 善 氣 又曰:「學 横渠曰:『形 也。 若叔魚之生,其母 ,性命于德。」斯 是數說,要之皆 韓子 ,既學也 始 不 近也,習相 近, 於致 德 固 究其 而 不 不 故氣質之性 則 後 勝 師不 所 可 知,終于知 言 不 文王在 有 \sim 視之知 以, 盡 氣 惟 詩》云: 勝 可 原 氣質之 遠 煩,若 窮也 之, 性 性 謂 相 於 也。」 遂 近 更 性 日 其 列

失其 麗 惡, 矣。 有 木 此 性 必有 荀子之所謂 善,得火之能熟 吾之知思 無 志,類萬物之情,贊天地之化,其則不遠矣。」 哉 木 物之所同 與 者也。」夫天地之間,有夫 非 又曰:「蘇子曰:「性之有習,習之有 譬如火之能 口鼻之於臭味,接乎外 (性,其 火 天下 以 而 物 也。 未 有 也, 而 焉 ·之理 而 嘗 謂 察物也,蓋亦不審矣。 而 非 然也。 知其 惡,得火之能焚者 意 相 媳 各 其 得 離,蓋母子之道 者 焚之,則火之用 熟與其能 有 者也,是火之 有 ,則物與吾一 體物而 火之得其性,焚之者 則 夫木以 不 焉。 誠 乎? 不遺 焚也。孟子之所謂 金尅之而 目之於色,耳之於 而 婦 不得遁焉者,其 ,則天下之理得 也。 由 得 也。 也,火之失其 丽 息矣,何 是 其性者也。 後有父子, 夫子思之 其 通 火 火生焉 天 有 無 火之 熟之 下之 能 形, 善 亂

說也。學者更深考之,則孟子、蘇氏之學,是 道者果 之可 說既 也。 和。 學,惟 善之論 輕 以 可名言者耳,中亦 始枝矣。」信斯言也,則 推之以爲性善之論,性善之論 「喜怒哀樂之未發謂之中,發 子 日 曰:「道有 爲之議,其亦不思之過與!.」 爲孟子道性善,得子思之說 , 以 中者天下之大本也,和者 出 致中和,天地位 寄之日 孟子之傳得 出,而 名 何 <u>m</u> 言者也,所 物 天下始知 也 不可 中。 ? 與 非道也,道之寄而 中 子 以 其 子 思之言中 名言者,古之聖 宗。 謂 焉,萬物 何 思 與 自 一也者,特道之有 因 中 者 異 而 其 在 枝 安 哉 育 語 是矣。 而 出,而 耶 在 和 世 ൬ 天下 焉。」 皆 而 ? 哉 而 漸失之,而 儒 又曰:「蘇 中 廣 已, 已, ? 之論 之達 是 子思之 人 節 之 孟 命之 必 與 且 所 亦 子 謂 日 也 有 性 道 謂 不 中 又 道 之

是懿德。」其釋《詩》也,于其本文加三四字而德」,曰:「故有物必有則,民之秉彝也,故好引「天生蒸民,有物有則。 民之秉彝,好是懿非得失,必有不可誣者矣。」 又曰:「孟子

是情,主宰便是心。」●也。曲者中規,直者中繩,才也。性之動便使曰:「人性之善,如木上達,木之性

已,而詩語自分明,今之說詩者殊不知此。」

本然哉? 此諸子之惑也。」謂之性也。至于善惡異趨,賢愚異習,豈其謂之性也。至于善惡異趨,賢愚異習,豈其

「孟子日富歲子弟多賴」章母

謂之水,至於流而爲派,或行於東,或行於夷。在義爲理,在人爲性,主于身爲心,其爲命,在義爲理,在人爲性,主于身爲心,其或問:「心有善惡否?」伊川曰:「在天或問:「心有善惡否?」伊川曰:「在天

西,却謂之流也。」

也,義也。何謂理,何謂義,學者當深思。」明道曰:「人心之所同者,何也? 謂理

又曰:「理、義,體、用也。」

豈能 猶喜悅淪肌 窮理亦當知用 曰 口」,玩理以養心如此。 :「須知 養心?」 伊川曰:「在物爲理,處物爲義。」 理 浹骨,有春和意,何況義理。 義之悅我 心緩急,但勞苦而不知悅 蓋人有小稱意之事, 心,猶 芻豢之悅 處 我 又

善; 其真。或以善惡不出於性,則曰性無善 以習成爲 或以 吕曰:「世之言性,以似是之惑 氣 性,則 禀 厚 薄 日 爲 性 性 可 以 則 爲 日 善, 有 性善,有性 可 以 而反 爲 口,或 亂 不

- 「宰」下,明抄本有「處」字。
- 「章」,原無此字,據四庫本補。

也。」 故 善 時 事 易 肥 可 善 未 誠 性 子言同然者,恐人有私意蔽之,苟無私意 加 不 由 誠 ,猶習 之不 故故 文 則 有 以 磽 以 出 可 也 善 而 而 武 成善 象,瞽父而 進, 猶 爲美實, 以善惡名,猶 不 此孟 不 謂 天之道 又 齊,猶習 虚 興 非 禀 之性 善者也 可以爲 1,習悪 日 一,則多 者 厚 ൬ 人 子 皆 十己 者惡 好 是不可言無善無 所 虚 自 我 則 有舜, 善 • 之變化。 不善,是 虚 以言性善 其 耐 不滋 心 成惡,性本 百百 有 循 而 誠 流 幽 所 物 其 ,未足以若人。 不 不 非 而 所 然, 不 面 能 本 厲 誠 性 則 觀之,蓋 以 流于惡。 時,猶習惡 興 移,禀薄者 以求之,皆 則 也。 雨 也。 虚 即 命于人 露 而 相 而 天 荒 不善 好 之滋,播 今夫舞 近 雨露之養, 誠者,善 理 唐 ₹暴,亦 世 而習相 天 也 者 性 人 而 德。 者。 故 善 口 者 無 亦 未 麥,皆 非 之 堯 種 亦 地 以 雖 徵 虚 嘗 我 遠 性 習 孟 有 以 人 君 不 所 爲 若 而 知

> 心 即 天 心

近,不 心 最 寡 親 真 欲 切 箇 謝 如 此 猶 有 日 芻豢始 滋 理義之悅我心,猶 : 句 味。 嘗 如 問 得 何 然須是 伊 ? JII 先 先 體察得理 生 生 芻 日 豢 「養 : 之悅 此 心 義之悅 莫 我 句 善 口 我 淺 於

又 亦 日 無 如 . 尹 大仁 孟子。 日 亦在 知大本者無 故曰:『非天之降才爾 熟之而 己。」 如 孟 子 善 殊 論 也。 學

者

孟子日牛 山之木嘗美矣」章

清。 休 可 而 曰:「夜氣之所存者,良 以 充之, 化旦晝 息 只 問:「夜氣 至於聖人。」 時 如 氣 小 清 兒讀 耳。 之所 如 書, 至 何?」伊川曰"「 平旦之氣,未 害 早 ,爲夜氣之所存 知 晨 也 便 ,良能 記 得 與 也。 此 也 事接,亦 只 是 荷 擴 又

或問 明道 曰 : 每常遇事,即能知操存

矣。 鄙詐之心生矣,貌不莊不敬,則怠慢之心 杖,有銘有戒,動息皆有所養。今皆廢此,獨 之意,無 有義理之養心耳。 人,耳之于樂,目之于禮 敬以直内,是涵養意。 時 如如 何 但存此涵養意久 存 養得熟?」曰:「古之 一、左右 言不莊不敬,則 起居,盤盂 ,則自熟 几

問 無出 問:「人有逐物,是心逐之否?」曰:「心 心 會。 出 時,先生以目事地。 川曰:「否,此只是說心無形體 如『出入無時,莫知其鄉』。 一人無 本無出 「孟子言心『出 心豈有出入? 亦以操舍而言也。」 人矣,逐 或問:「「舍則亡」,心有亡,何也?」伊 時,人 人,孟子只是據操舍言之。」又 物是 亦 便在這裏,纔過了,便不見。 不 公欲。」 ·覺。 」 入無 時」,如何?」日 問: 又曰:「人心緣 此句亦須要人理 有言 ,纔主著事 未 則 境 時

> 知如 無 操之而已。操之之道,敬以直内也。」 時,莫知其鄉。]更怎生尋所寓? 何所寓?」曰:「『操則 存, 舍則亡,出 只是· 有

鄉。 心豈有出入?」伊川聞之曰:「此女雖不識 子,却能識心。」 惟心之謂與」,語人曰:「孟子不識 范淳夫之女讀孟子「出人無時,莫知其

孟

乎,爲之猶賢乎已。」夫博奕非君子所爲,而 慢邪僻之氣得而人焉。 玉,登車則聞和鸞,蓋皆欲收其放心,不 以操心也。至于無故不徹琴瑟,行則 云爾者,以是可 楊曰:「古之學者,視聽言動無非禮,所 以收其放 故曰:『不有博奕 心爾 使 聞 珮

與不養而已。」 尹曰:「人之失其 良心者類 如 此,在

「孟子曰無或乎王之不智也」章

伊川 博奕小數,不專心致志,猶不

猶 學也。」又曰:「朝聞道,夕死可矣。」不 是生知,猶如此說 『吾嘗終日不食,終夜不 可 人有甚事來,迫切了抵死 得 恐失之,纔說姑 ,須是求其 況 學 道 所以 而 悠 待來日,便不可 ,所以教人也。 如此,何故始得。 悠 可 寝以 得 地 乎 如 ? 思,無益,不 此 0 也。」 學如不及, 文意 仲 聖人固 尼 知 不 言 難 聖 如

弈之小數,不專心則不得,而況于爲善乎?」尹曰:「君子孤立而不專,難乎爲功也。

「孟子日魚我所欲也」章

者爾。 往 已,無是衆物之紛紛 者,君子莫適就 義 而不爲義。 也 吕曰:「死 ,何生死之擇哉 義在生則生,義在死則死,我之所知 孟子謂舍生取 生貴賤,貧富榮辱,此 也。 也。 君子心存目見,惟 故 所守至約,無 義者,乃喻 衆 未 知 所 物 而

、曰:「一爲外物所遷,則失其本心。|

尹

所貴夫學者,常不失其本心而已。」

「孟子曰仁人心也」章

皆由 樂其 弗思 待陽 也。 心放則不知求,豈愛其至輕而忘其至重哉? 曰 : 便謂之心之用。」或曰:「譬如 心譬如身,四端如四支,四支固是心所用,只 否?」曰:「固是。 生,仁是就 可謂身之四支,如 心 不 所當樂,慕其所不當慕,不慕其所當慕 而 氣而生。」曰:「非是。陽氣發處却是情 問:「仁與心何異?」伊川曰:「心是所 心譬如 思輕重之分也。」 已矣。今世之人,樂其所不當樂,不 至重,雞犬至輕,雞犬放則知求之, 事言。」曰:「若是則仁是心之用 穀 種 ,生之性 四端 若說仁者心之用則不可 固具於心,然亦 便 又曰:「放 是仁也。」 五穀之種 心, 未 必 又 口

^{●「}乎」,原作「也」,據四庫本改。

心本善而流于不善,是放也。」

去,下學而上達也。」已放之心,約之使反復人身來,自能尋向上已放之心,約之使反復人身來,自能尋向上明道曰:「聖賢千言萬語,只是欲人將

之賜後學多矣。」
尹曰:「識心性之真,而知學之要,孟子

「孟子日今有無名之指」章

尹曰:「學者何所事乎? 心而已。」

「孟子曰拱把之桐梓」章

尹曰:「所以養者,後學猶不知也。非

爲不知,知之亦莫能養也。」

尹曰:「趙岐謂大者心志是也。」「孟子曰人之於身也」章

公都子問日釣是人也」章

明道曰:「知性善,以忠信爲本,此先立

乎其大者。」

世。 之,立乎其大者也。大者不立,其爲小人也之,立乎其大者也。大者不立,其爲小人也尹曰:「其外不爲物所引,内則思而得

無疑矣。」

后是完并全见。 而後得者,故曰人。顛倒錯謬,失其本心者, 尹曰:「莫之貴而貴者,故曰天。待人

皆喪天爵者也。」

尹川曰:「人人与皇「孟子曰欲貴者」章

伊川曰:「人人有貴於己者,此其所以

人皆可以爲堯舜。」

尹曰:「是亦天爵之義,在我者重,則外

物輕。」

「孟子曰仁之勝不仁也」章

尹曰:「一日暴之,十日寒之」,亦猶

六一九

是也。」

「孟子日五穀者」章

尹曰:「日新而不已則熟。」

「孟子曰羿之教人射」章

教者不能與人中巧,在夫學者勉與不勉耳。」法式,然後可以至乎成,其中其巧,則成矣。尹曰:「不以法式,則不可以語學,盡

國朝諸老先生孟子精義卷第十一終

國朝諸老先生孟子精義卷第十二

告子章句下

「任人有問屋廬子」章

之所言者、禮義也。苟以利害言、則何止乎尹曰:「任人之所言者、利害也。孟子

重而已。」

「曹交問日人皆可以爲堯舜」章

未嘗知道固在我而不在人也,故使歸而求其所虧者成之而已。孟子之不受曹交,以交又曰:「君子之教人,或引之,或拒之,各因其不爲堯、舜,是所可賤也,故以爲僕隸。」其可曰:「人皆可以爲堯、舜,聖人所願也。或曰:「人皆可以爲堯、舜,則無僕隸。」

但曰:『未之思也,夫何遠之有?』此言極 以驕人之志,亦未嘗言難以阻人之進。 有異處,亦須自識得。」 求之,有餘師」這數句,却說得好。孔、孟言 之言不如此,如下面說「人病不求耳,子歸 知哉?』只下這一箇豈字,便露 涵蓄意思。孟子言:『夫道若大路然,豈 聖人之道,安可以難易言? 聖人未嘗 或曰:「聖人之道,知之甚難。」曰 筋骨。 仲尼 言易 聖 m 人 有

楊曰:「夫道若大路,行之則至,故孟子时:「堯、舜之道,孝弟而已矣。」其爲孝弟,乃在行止疾徐之間,非有甚高難行之事,皆夫婦之愚所與知者,雖舜、顏不能離此而爲聖賢也,百姓特日用而不知耳。」 又曰:「孟聖賢也,百姓特日用而不知耳。」 又曰:「孟型新之高,精粗兼備,其言甚近,而妙義在焉。如許大堯、舜之道,孝弟而已矣。」其爲孝弟,始孟子故言,精知,

尹 日 道若大路,人皆由之, 在爲 與不

日

當

以

害

誘

說

爲

能

者多

而

爲而 已。

「公孫丑問日高子曰」童

怨,《小弁》直怨「我罪伊何」。」 伊川 曰:「《小弁》之怨與舜 别, 舜 是自

用 其 情,烏在其孝也?」 尹曰:「疏之戚之,至情也。 於親 而不

宋極將之楚」章

分,其義 若與之談道 所謂道理之談,孟子之仁義是也。 謀者,其說又利 惟利之從,則人君所見者利 之,蓋君子之事君,其說不可 息兩 國之争,其 楊曰:「宋牼以利說秦、楚使之罷兵,以 利之間乎? 理,道 於我,吾說必見屈 心未爲過 理 既明,人自不能 一毫爲利,則不足爲 也。 而 己。 惟利之從。 然 被有軋 孟子力 矣。 王 勝 霸之 故 也。 不 吾 荷 抵

王矣。」

救之,其與人言也,一 矣,天下知 尹 利 圃 是 不 時, 知 義、故 斷之以正而已。」 利 孟 子 拔 本塞 源

「孟子居鄉」章

「淳于髠日先名實者」章 尹曰:「禮者,宜而已。」

事。 就桀,不得不如此。」 蓋已出了, 伊川 曰:「五就湯,五就桀,此 則當以湯之心爲心,所以五 伊 尹 後來

也; 桀,何也?」曰:「其就 桀?」曰: 於仁而已,與商之三仁或去或不去同 仁,其揆一 以易地,故曰 則皆然,故曰 其 楊曰:「禹、稷、 就 桀 「既就湯,則當以湯之心爲心。 也。」 也, 同 不同道。雖不同,其趨 道。 湯 進 問: 顔回、曾子、子思,易 三聖人其行不 之也。」「然 「伊 湯也,以 尹五就 則 三聘之 湯, 同 何 則 不 爲 五 謂 同 勤 湯 事 就 歸 可 地

者,宜乎其言若是。」
尹曰:「淳于髠未嘗知仁,而未嘗識賢

「孟子曰五霸者」章

非孟子其誰制之?」逢君之惡者,當時莫知其罪也。世衰道微,尹曰:「孟子力陳五霸諸侯之罪,與夫

「魯欲使慎子爲將軍」章

政之可爲也。又如論王之好樂,使之與百姓見羊,而以羊易之,乃所以爲仁,引之使知王矣」,若曰以小易大,則非其情。以謂見牛未矣」,若曰以小易大,則非其情。以謂見牛未

巨义事题,皆比真见。同樂,論王之好勇、好貨、好色,而陳同之先

尹曰:「當時之君臣莫或知,此天下所王之事疑,皆此類也。」

「孟子曰今之事君者」章

以紛紛而戰争之不息也。」

倫亂,若君聽於臣,父聽於子,動則弒君弒伸川曰:「不可一朝居者,孟子之時,大

尹曰:「不改其道而變其俗,則終不父,須著變,是不可一朝居也。」

可治。」

「白圭日吾欲二十而取一」章

尹曰:「事不師古,何以永世。以治水

「白圭日丹之治水也」章

治稅之言觀之,白圭可謂妄人矣。」

通用。孟子曰:「君子不亮,惡乎執?」」伊川曰:「諒,固執也,與「亮」同,古字「孟子曰君子不亮」章

六二三

「魯欲使樂正子爲政」章

尹曰:「『好善優於天下」,真知言哉!」

尹曰:「士之仕也,必歸於正道,聽言爲「陳子曰古之君子何如則仕」章

上,禮貌次之,至於免死則下矣。」

「孟子日舜發於畎畝之中」章

版築之間,膠鬲舉於魚鹽之中,管夷吾舉於明道曰:「『舜發於畎畝之中,傅說舉於

士,孫叔敖舉於海,百里奚舉於市。」若要熟

之仁。以安樂而失之者多矣。」 尹曰:「困窮拂鬱,能堅人之志而熟人

也,須從這裏過。」

[孟子曰教亦多術矣]章

不屑之教誨也者,是亦教誨之而已矣。」孔子明道曰:「孟子曰:「教人亦多術矣,予

因其才而篤之故也。」 尹曰:「教者或抑或揚,或與或不與,各不見孺悲,所以深教誨之也。」

朝諸老先生孟子精義卷第十二終

國

孟子精義卷第十三 盡心章句上

國朝諸老先生孟子精義卷第十三

盡心章句上

「孟子日盡其心者」章

無 量 盡 天 孟 則直養之而已。」 爲命,在人爲性,論其 氣,苟不 限 德 子曰: 「自是人有限 人 盡 處 伊 量? 有限 物 未 川 通 一盡 ,與天地參,贊化育,贊一本無「費」字。 能 曰:「心具天德,心有不 又問: 量否?」曰:「論心之形,則 盡 其心,知其性。」心即性也,在 作「用」。 何緣知性 量,以有限之形,有限之 「心之妙用 之以 或問:「人之形體 所主爲心 道 知天,盡己心 安得 有 ,其實只是 限 ·盡處 無 量否?」 限 有 安 則 便 量 是 天 得 限 能 ?

曰: 便盡 矣。」 於 如 此之心,能 始 更無性 箇 後有意。」 心。」又問:「凡 天只是一理否?」曰:「然。 心,則自然知性知天 所主在心,纔盡 也。」問:「意是 天,自禀受言之謂之性,自存諸 百 此數,只是盡心 道 得 命,以序言之,不得不然,其實只能 少却 奉 性至 苟能 外 又曰:「盡其心者,我自盡其心,能 順之而 一,便 又問: 之物,若云有限量 命也。」 盡 通之於道,又豈 又曰:「心也,性也,天也,非 爲不盡 得,便能 心 運 心即 已。」又問: 虚 便了 之所發否?」曰: 用 也。 心莫是我 處 矣。 是知 或問:「事天 知性否?」 是 大 ,纔數著便不盡。 、抵禀 心 性,知 如言窮理盡 孟 否 一,除是性 有限量? 自理言之謂之 有 ?」曰:「是 於天 性即 子言心、性、 惻隱 人言之謂之 日:二 如 日 「有 外 是知 性 羞 何? 性 窮 何 天下 惡 有 以 如 理, 必 有 mi 意 至 盡 天 如 物 而 數

六二五

知性, 安,更不可别求長安。 京師 異 是言作兩處,若要誠 也 往 知 長安,但 性 又曰 便 知 知 天,當 出 横 西 渠嘗 實,只在京師便是 只心便是天,盡之便 門便可 處 喻以 便認 到 心 取, 長 知 安。 天 更不 到 此 猶 可 長 猶 居

外

不至 是也? 唯 日 見性是也,若存心養性 子曰:「盡其 道 盡 聖 出 ,惟務上 心知性 此。」明道 家獨善,便於道體自不足。」質夫曰 明道 乎! 元 日 不 達 ,佛亦有至此者。 心者, 相 加 日 釋氏 連 無 :「盡心知性,不假存養,其 屬, 下學,然則 知其 本 但 怖死生爲 性 有 段 間 也。」彼 事 存心養性 其上達處 斷 則 非道 無 利,豈 所謂 矣。 也 一,佛本 贵 是公 識 彼固 孟 有 心

未 有 體 横渠 , 曰:「大 則 心 爲 有外。 其 (心則 世 能 人之心,止於聞 體 天下之物, 物

> 人道則 心。 也。 心。 此。 見之 之分内耳。」 不禦莫大乎太虚,故心知廓之而 霆,故有耳屬焉不知其幾萬里之遠 之不知其幾 天下 又曰:「知性知天 人病 無一 狹。 故能盡其心者,必知心所從來 天大無 又曰:「天之明莫大於日,故有 可以 聖人 以 物非我,孟子謂 事天。」 耳 萬里之高也。 外,故有外之心,不足以 盡 又曰:「存心養性以事天,盡 目 性,不 聞 ,則陰陽鬼神之變,皆吾 見累其 以 盡 聞 天之聲莫大 心,而 心則知性 見梏其心, 莫究 不 也。 而 務 後 知 乎 其 天之 目 合天 能。 盡 天 其 其 接 極 視

其心也。大其心與天地合,則可知思之所及思足以盡天地萬物之理,然而不及者,不大呂曰:「盡其心者,大其心也。心之知

^{● 「}未有」,原作「有未」,據四庫本改。

於性

;

位

禄

名壽

,皆吾性

之所

能

致。

天

命

之

謂

性

則

性

於

命。

我受於天,亦

天所

命

性

命

也

0

物

同

其

達

乃

與

天

大德必受命

則

命

合

出

吾

體

屈

伸聚散,莫非吾用,性命之禀

雖

血

,猶吾以令使之而已,死 自物觀者,犬異於牛,牛異 觀者,上達至於不可名,下達 於仁義禮智,與桎 授之而已,或偏 乾道變化,各正 君,性,天 物得 故故 之則 知性 之偏,故 自 則 職 梏 生 性 或 不得 知 也 1命,彼 壽 而 於人,皆謂 IE 物 天 達。 夭 死, 一,惟 不 觀 惟 皆 敢 至 彼 其 所 之 謂 謂 於 則 **\$** 所 所 又 不 此,可 少。 别?」曰:「心是發用處,性是自然,事 擴 問明道先生:『何 聖人之於天道,有 何别?」曰:「今人莫不知有君 去底氣象?』曰: 曰:「充擴 不去時如何?」曰: 『天地閉,賢人隱。』察 問 存 以見盡 如如 心 養性 得 何 是 去 不盡矣。」 盡 則 便是 其心 如 『天地變化,草木蕃。』『充 爲 性 恕 斯 焉 事 ? 可 心 天。」曰:「 則 訓謝 問:「知天、 。』如何是充 謂之恕心?」先 性 氏 於 能 曰:「昔 天

乃吾性

也。

性

即

夫

道

道

也。」

有

天

道

性

命,自道

觀

異。

道

本體見· 邪 人僞 以 泯 游曰: 存 矣。 矣。 其 誠 夫是之謂 知其 盡 也 其 性 養其 心 則 則 極 性 廣 心 高 者,守 大悉 地 明 無 備 餘 存其心 静 天 藴 以 復其 理 而 者 全 性 開 之 本 而

敢一字原均作 「散」,據明抄 本、四 庫 一本改。

心

性

何

則

只

事

其

君

者

事

天

如

擴

得

牛

之性

不得

之命

事

天

者

如

事

0

盡

命,天命

也,不敢不順。

盡

性

順

命

爲

幾

是不

違。

,

矣,而

猶

未

與天

0

達天德者,物我

幽

明

不不

是從。

受。

人得之正,故可達天。

性者,猶吾以

職

物、皆天道也。

謂

命

者

所能 在哉? 是之謂 命 知父母之爲我 事,是爲知君上之爲我尊,而未嘗致 也 道 此 至 也 極 之至智之盡 大至 而 中 ,則與天 則 感其心哉? 己。 事 庸 欲 存其 天者,履其事也。 剛 道。 者,德全於事 不 知天,智之 外 以直,則養其性之道 地 心之道 中 馳 相 ,親,而· 也 庸 似 忿 極 也。 則 亦 而 不 盡 高 不違矣,故足以 日 死 未 天 内 也; 明 修 其 生 嘗 也。 作 7者,理 徒造其 、志致 身以 爲 致養也,其忠孝 事天, 反 晝夜 知天者 聽 俟之,自作 極 也。 , 其 理 内 矣,豈 仁之至 於 視 而 造 知 事天,夫 氣致 存養 恭 不 以 天 殀 其 也 履 歸 也。 專 也 元 壽 安 其 理 至 有

儒 後 能 謂 養 楊 知 日 性 我 知知 則 敵 盡 天 其 然 事 心 後 我則 然 能 後 事 卑, 能 天 存 失 此 八其旨 心 其 知 序 矣。」 其 也 性 世 然

> 性 正心 之爲道 修 之; 無異 白通 然後可修, 日 性不假修,故《易》止 可 會 問 而已。」 心,自然知 ,故《中 以言盡 心 : 孔 楊 亦不言修性 也 達,廣大静一,若體會得了然分明,然 是何物 子但 尊 何 知知 雄 謂 德性」, 庸 横渠作《西 又曰:「六經不言無 未 言盡 云:『學所 仁則 盡 性 性 。」「請問之。」曰: 但 心 不 無 理會得心,盡箇 性 知心 言 ? 變 孟 广,惟 · 用 問 _ 率 壞 子言『存 日 」, 知 銘 言「洗心盡 性 楊 以修 人。 : 》,亦 豈 尊德性、孟 雄言之。 心 假 性 未 則 大抵須 只是要學者 修 心 言 。」夫物 知性 「心之爲 甚 乎? 養性』。」 心,惟佛氏 盡 性」、《記 心 ? 一是三 心 子 先 不可 唯 能 有變壞 ,但言 理 須 物, 不 盡 求 者 會 先 無 假 又 初 其 後 明 理

尹曰:「或曰心,或曰性,或曰天,一理

心,所以立命。」矣。存之養之,所以得天理也。殀壽不貳其自存諸人而言謂之心。盡其心則知性知天也。自理而言謂之天,自禀受而言謂之性,

「孟子日莫非命也」章

了,「莫非命也」,然聖人却不說是命。」或曰:「桎梏死者非命乎?」曰:「孟子自說否?」曰:「聖人只教人順受其正,不說命。」問:「桎梏而死者,非正命也,然亦是命問。」 極梏而死者,非正命也,然亦是命正命也。 桎梏而死者,君子不謂之命。」 或

其正。 善反 欲 幸,不順命者也。」 又曰:「莫非命也,順受 於人無不正,係其順與不順而已。 ,人爲之招也。」又曰:「順性命之理,則吉 而已。 横渠曰:「性于人無不善,係其善反不 順性命之理,則得性命之正。 過天地之化者,不善反者也。 行險以 滅 理 徼 命 窮

凶莫非正也。逆理則凶爲自取,吉其

倖也。」

曰命。」
君子所言者,正命也。又其上,則義而已,不君子所言者,正命也。又其上,則義而已,不

「孟子曰求則得之」章

義也。求之有道,得之有命,是求無益於得 得不濟事。 「求之有道,得之有命,是求無益於得,言求 下,不爲也,此言義而 則失之,是求有益於得也,求在我者也,此言 以上而言,却只道求之有道,非道則不求,更 也,求在外者也,此言命也。 命在其中。 不消言命 有義而無命。行一不義,殺 伊川曰:「君子有義有命,求則得之,舍 也。」 此言猶只爲中人言之,若爲中人 中人以下乃以命處義。 又曰:「賢者 不言命也。」 又曰 。至於聖人,則惟 一不辜,而 惟 知 義 如言求 而已, 得天

君子? 者,又其每下者也。 不惑 患難 之有 義,中人以 則不求,此樂天者之事也。上智之人安於 親 更不言命,惟安於義,借使求則得之,然非義 上知者言也。 日 日 家貧親老,須用禄仕,然得之不得爲有命。」 得之以義,不必言命。」 問:「家貧親老,應 可求 舉求仕,不免有得失之累,何修可以 一「在己固 : 『不知命,無以爲君子。」人苟不知命, 也,只是一事。 :「此只是志不勝氣,若志勝, ,故有命之說,然後能安。 必避,遇得喪必動,見利 ,故自處以 然聖人言命,蓋爲中人以上設,非 得 之有 上安於命,乃若聞 可,爲親奈何?」曰:「爲己爲 中人以上,於得喪之際,不能 不求。 命 若不得,其如命何? 是 孟子曰: 求 若賢者則求之以道 無 益 必趨,其何以 於 命 若上智之人, 得 「求之有道, 而 自無此 ,知命之不 不能安之 免此?」 孔子 累。 爲 見 爲

> 無益於得也,求在外者也。」故君子以義安 之命,然富貴貧 命,小人以命安義。」 也,求在 曰:「求則得之,舍則失之,是 壽,是爲僥倖,不可謂之命。」曰:「雖不 我者未盡,則 其在我者,則富貴貧賤壽夭可以命言。若 得之有 問:「富貴貧賤壽夭,固有定分,君子先 命。」求之雖 我者也。 貧 賤 (賤壽夭,是 求之有道,得之有命,是求 而 有道 夭,理所當然,富 一,奈何 亦 得之須 前 求 有 定。 益 有 孟 於 可 貴 命 得 子 謂 而

是求在我者也。」得,則是求無益於得也。道義則不可言命,爲勤苦,有富貴者,只是幸會也。求而有不爲勤苦,有富貴者,只是幸會也。今有人均

矣。今告之曰:「水火不可蹈。」人必信之,之未篤。某竊謂其知之未至也,知之斯信之楊曰:「世之學者,皆言窮達有命,特信

求 以 知之不若蹈水火之著明也 其 亦 知 必曰「然」,而未有信而 之也。 告 人 曰 「富 貴 不 在 求者,以 天, 不 其 可

下,亦不爲也。」以之爲外,所以行一不義,殺一不辜,雖得天者,則有不得之理,是以君子猶以命爲外也。尹曰:「求在我者,則必得之,求在外

「孟子曰萬物皆備於我矣」章

時 能 物 於我」,此通 些子道多,元來只依舊。 之,幾時 推之。 道 皆然,都自這裏出 却是 堯盡 能 明道曰: 推 减得一分。百理具在,平鋪放著, 雖能推之,幾時添得一分,不能 君道添得些君 著人上說。」 人物而言。 然 「萬物皆備於我」,不 禽 潤 之性却自然,不待學,不 去,只是物 禽鷽 道多,舜盡子道 「反身而誠,樂莫大 又曰:「萬物皆 與 不能 人 絶相 推 獨 似 人 添 爾 只 則 備 得 幾 推

我矣。 懈, 中。 自小 誠 備 學也,其 椓 待教,如營巢養子之類 明之,天地之用,皆我之用。 自 須防檢,不須窮索。 信皆仁也。 而 得些本性須 又安得樂? 「學者須先識仁,仁者渾然與 於我, 喪處 明,安待窮索? 不 則猶 何防之有? 順 不 不改其樂,須知所樂者何事。」 也。 反身而 極 要引他、留他真性、待他自然、亦須 是 須 他皆誘之也 多,只 反 識得此理,以誠 别 訂 物 身 誠,樂莫大焉。] 不誠 也。 又曰:「樂莫大焉,樂 有 頑 有 加 理 意 對 誠,乃爲 此道 有未得, 若心懈 箇 以以 思乃備言此 又曰: 欲 嬰兒 是 與物無對 己合彼,終未有之, 也。 得 大樂。 飲乳是自 物物 則 敬 故 人家嬰兒善, 「萬物皆備 孟子言萬 須 有 存 人 同 體 大大不 窮索,存 雖 防,心苟不 之而已,不 體 若反 則 以以 義 是 又 亦 逆於 靈, 此 身未 物皆 足 禮 日 在 完 且 久 其 物 却 意 以 智 於

舊習。 樂,亦不患不能守也。」 以昔日習心未除,却 道,若存得便合有得,蓋良知良能元不喪失。 忘,勿助 此 更 長」,未嘗 有 理 何 至 事 一約,惟 ? 致 一必 患不 纖 須存習此 毫之力,此 有 能守,既能體之而 事 焉 心久,則可 而 勿 其存之之 Œ 一心勿 奪

强恕 達人」,所以爲仁之方也。」 至於無我 行之以恕,則 要自家各自 近處,其理蓋不出乎公平,固在用意淺深,只 强 恕求仁莫近,言得不濟事,亦須是實見得 而行者,知以己之所好惡處 伊川曰:「恕者,人仁之門。」 也。 體 以 故 『己欲立而立人,己欲達 認 無 得。」 我爲 又曰:「有忠矣,而 體,以恕爲用。 人而已,未 又曰 所 而 謂

素有 心 則樂莫大焉。」 於 横渠 曰: 我 也。 「萬物皆備於我」,言萬 「反身 圃 誠」,謂行 無不 慊 物 於 皆

> 難知 身而 之道存焉。世之人不知自己求之,道之所以 **豈難知難行哉**? 盡物之性。」以己於人物,性無二故 「盡己之性,則能 之數雖多,反而求之於吾身可 難 誠,樂莫大焉。』知 楊 行也。」 日 孟 子 盡 雖行止疾徐之間,有堯舜 日 人之性。 : 萬物皆備於我, 萬 物 盡人之性,則能 皆 也。故 備 也。 於 我 夫道 日 則 物 反

謂行無不慊於心也。强恕而行,誠之者也。」尹曰:「萬物皆備天理也。反身而誠,

[孟子日行之而不著焉]章

也。 察」。 論。 則不 矣而不察,謂人習之而不省察也。」曰:「先 行之而不著,謂人行之而不明 能由。」 雖孔門中 伊川曰:「行之不著,如此人多,若 曰:「此 亦有由 言大道 間 一行 之 而不知者,又更有 如 而 此 而 不著,習 人由之不 曉 矣 也 而 不 知 不 知 至

聖人之化,人於善而不自知也。衆者,言衆類,由之而不自知也。如孔門弟子,却是聞曰:「在衆人習而不察者,只是飢食渴飲之生有言:雖孔門弟子亦有此病。何也?」

不知者衆也。」然而行之而不明曉,習矣而不省察,由道而然而行之而不明曉,習矣而不省察,由道而尹曰:「誰能出不由户,何莫由斯道也。

多也。」

「孟子曰人不可以無恥」章

伊川曰:「無恥之恥,注是。」

尹曰:「人知其所恥,然後能改過

遷善。」

「孟子曰恥之於人大矣」章

尹曰:「爲機變之巧以自欺者,何若人

之有?

「孟子曰古之賢王」章

尹曰:「人君能下賢而好善,賢者不慕

孟子精義卷第十三

盡心章句上

勢而好利,以如是而相遇,然後可以有

爲

於時。」

「孟子謂宋句踐」章

則修身見於世,此其所以囂囂也。如此,則尹曰:「古之人得志澤加於民,不得志

無怨尤,不改樂。」

「孟子日待文王而後興者」章

尹曰:「言君子之特立也。」

「孟子日附之以韓魏之家」章

「孟子曰以佚道使民」章

有焚溺而死者,却雖死不怨。」生之也。且如救水火,是求所以生之也,或也,故雖勞而不怨。『以生道殺民』,謂本欲也,故雖勞而不怨。『以生道殺民』,謂本欲失之

尹曰:「『以佚道勞民』,乘屋播穀之類

六三三

六三四

此其所以不怨。」是也。「以生道殺民」,除害去惡之類是也。

「孟子日霸者之民」章

物。 「立之斯立、道之斯行、綏之斯 所經歷處。 則 下自然來比,來者撫之,固不煦煦以求比 和 知爲之者也。」 王 用 取之也。 。」固非 若田之三驅,禽之去也,從而不追,來者 \equiv 伊川曰:「《易・比》之九五曰:「 驅 小補。 ,失前禽。]言王者顯明 『所存者神』,存主 此王道之大,所以其民皥皥 伯者是小補而已。」 又曰:「「所過者化」,身之 來, 處 其 便 比 動 如神。 道 顯 之 而 天 比, 於 斯 不

雖善言美行,無非所過之化也。」者化」,及物也。」 又曰:「德至於無我者,明道曰:「「所存者神」,在己也。「所過

化。 横渠曰 又曰: 「徇 「性性爲 物 喪 心, 能 存 人化物 神, 物 物 而 滅天 爲 能 理 過

> 者 淡 不 開 男兒到此是豪雄。」」或問:「周恭 皆自得, 來 予 能 開 不 外,思人風雲 好,與曾點底 心樂, 乎 ,●爲 如如 無事不從容,睡覺東窗日已紅。 風 見明道先生在 住 所過者化?」曰:「吕晉伯 、輕近午天,傍花隨柳過 ? 謝 便 何?」謝 日 他 放 存 將謂 四 所 神 却, 時 「學者須是 過 過 事 偷閑 變 佳 者化。」問: 沈 曰:「他不擺 化 態 興 鄠縣作簿時,有 早 中。 般。先生又有 學 忘 與 在 物 人同。 少年。」 胸 裹。 累 富貴不 懷 而 前 擺 見箇 脫 明 看 下得 順 道 JII. 脫 得 道 性 他 通 開,只 淫 詩云: 得 詩云: 命 甚 _ 却 萬物 胸 叔 天 旁人 開 貧 者 轉 道 懷 擺 恁地 地 始 平 賤 語 理, 直 脫 爲 有 不 静 閑 是 便 得 立 放 形 觀

^{● 「}却」。原作「門」,據四庫本改。
● 「態」,原作「熊」,據《河南程氏文集》卷三《秋日偶成》改、

也。

此尤見仁德之昭

著也。」

道 所存者神。 所 存者神,便能 横渠云: 『性性爲能存神,物物 所過者化,所 過者化 便能

爲能過化。」亦甚親切。」

喜 有 便與伯者之世不同。蓋彼所以致 驩樂,有甚不得? 違道干譽之事。 ,亦不教人怒。」 楊曰:「霸者之民驩虞 但所謂皞 至王者則如天,亦不教人 如 皡 也,治民使之 如 人驩虞,必 也,則氣象

皥爾。 經也。 之斯行,綏之斯來,動之斯和。」是以其民皥 尹曰:「臣聞之師曰: 所過者化,身所 所存者神,心所主也。『立之斯立,道

聲,民所稱道。」 又曰:「仁言謂以仁厚之 言加於民。 伊川曰:「仁言,爲政者道其所爲。 「孟子曰仁言不如仁聲之入人深也」章 仁聲如仁聞,謂風聲足以感 動

> 於下之聲也。善政制民,善教化民也。」 尹曰:「仁言,出於上之言也。 仁聲,得

「孟子曰人之所不學而能者」章

伊川曰:「良知良能,皆無所由,乃出於

故孟子教人、雖貨色之欲、親長之私、達諸天 天,不係於人。」 横渠曰:「大人所存,蓋必以天下爲度。

下而后已。」 或問:「孟子言『惻隱之心,仁之端也』,

惻隱,何也?」楊氏曰:「孟子但言發處,乃 又曰『孩提之童,無不知愛其親」。 只說愛與

若未發之前便只是中。」 義出於人心之所同然,君子能不失是而達之 尹曰:「良能良知,與生俱

生者

也。

「孟子日舜之居深山 之中」章 天下耳。」

學者當知聖人,知聖人然后 知

故曰:「莫我知也夫,知我者其天乎!」」德日躋,必有人所不及知,而天獨知之者矣。

尹曰:「達謂達盡事理。」

「孟子日有事君人者」章

也。 生斯 大人者又在二者之上,充實 斯民底事業,達可行於天下者。 □其全盡天 天吏,如文王、伊尹是也。」 曰:「順天行道者天民,順天爲政者天吏也 問:「天民、天吏、大人何 大而化之之謂聖,然聖人豈不爲天民 民之理,●其術亦足以治天下國 伊川 曰:「天民云者,蓋是全盡得天生 而 以别?」先生 有 光輝之謂 家 也。」

似不得位者,必達可行於天下而后行之者踐形者是也,如伊尹可當之矣。民之名,則明道曰:「天民者,能盡天民之道者也,

異於深 所學。 故 下。 禹、稷,其必有在矣,學者不可不知也。 禹 可掩者。 、稷同 則可以學矣。」 顔 淵 Ш 舜 道。 夫舜之可以託天下, 顔淵之可以 在 在 之 陋 野 深 豈苟言哉? Ш 巷,終日如 人也, 與 木 加 石居 四岳 愚,而 其 川與 知 必 鹿 其 有 孟 豕 誠 子 可 遊 然 稱 以 知其 其 託 而 無 爲 不 與 天 以

尹曰:「羞惡是非之心,人皆有之,不失河,非無我何以臻此?」尹曰:「聞一善言,見一善行,而若决江

「孟子日人之有德慧術知者」章

其

心

而已。

此。 速。 以孔子之聖,而下學於困,則其蒙難正志,聖 自 孟子謂 横渠曰:「困之進人也,爲德辨,爲 古困 於内 人有德慧術知者常存乎疢 無 如 舜,困 於外 無 如 孔 疾 子。 以 感

知此。」 又曰:「正己而物正,大人之事,學須天下文明者也。天民、大人亦係乎時與不時也。大人者,則如《乾》之九二「利見大人」,

善耶? 也。 必 由之也。 爲善,利之也,假之也。 有心爲之,雖善皆意 功 「不得已當爲 正己而正物,猶未免有意之累也。 覆 横渠曰:「達可行於天下,然后行之,言 生民 有意在善,且爲未盡,況有意於未 然后 加 出 爲之,雖殺人皆義也 也。正己而物正,大人 如伊、吕之徒。」 無意爲善,性之也, 有意 又

覺 謂 爲政以德,自治之道備 天民之窮而無告,伊尹 ,止謂天生之民,與此 故大人之政,正己而 吕曰:「如 伊尹乃得天民之稱。 ,則不求於民 己。 義皆異。」 所謂予天民之先 孟子所 又曰 而 民 歸

> 却 何 物自正也。 正己以正物,不當言正己而物正矣。 必期於正物則無命。」若如所論, 圃 天下平之意。 可 云:『正己而 必乎? 楊曰:「孟子言大人正己而物正。 大人只知正己而已,若物之正 惟能正己,物自然正,此乃篤恭 不期於正物則 荆公之學,本不知此。」 無義,正 孟子自當言 物正, 己 荆公 mi

能之矣。」
說之未遇也。所過者化,所存者神,大人其安社稷爲悅者,忠臣也。天民則若伊尹、傅安社稷爲悅者,忠臣也。天民則若伊尹、傅

「孟子日君子有三樂」章

英才而教育之,樂施諸人也。」也。仰不愧,俯不怍,樂得於己也。得天下也。仰不愧,俯不怍,樂得於己也。得天下愧,俯不怍,其樂可知,有息則餒矣。」 明道曰:「人能克己,則心廣體胖,仰不明道曰:「人能克己,則心廣體胖,仰不

六三七

「孟子日廣土衆民」章

百理具備。」故大行不加焉,窮居不損焉,是他元無少欠,甚窮已。不爲堯存,不爲桀亡,人人得之者。明道曰:「天理云者,這一箇道理更有

背」, 者能之。」 焉 言 而 然眸然見於面,盎於背,施於四 施 [四者 喻 能 於 皆積 四 ,豈待勉强 道 伊 本於心而生色也。 得 體 川曰:「「仁義禮智根於心,其生色」, 盛 四四 到 致然。 此?」 又曰:「得之於心,謂之有德 體 也。」 不言而喻。」孟子非 四體不言而喻」,惟 又曰: 『醉於面,盎 「「醉於面,盎於 體,四體不言 自及此 並於背 有 自 德

便 此 日 見 便醉面 得 又曰:「「居處恭,執 學者須學文,知道者進德 盎背。 又 曰:「盎於背, 有諸· 中必形於外, 事 ,敬,與 而 厚 已,有德則 也 觀 人忠」,充 其 氣象 又

> 積學。」 體 道矣。 道者言,不可爲學者言。 學,不是德,有德者不如 不 心手相應 二事,觸類至于千百,至 習 ,四體不言而喻。 無 學文之功,學得 不 一而學; 利 未 有 苟得矣,下筆便能書,不必 學 譬如 養 子 是。 于無 學書,若未得者,須 如 事 加 心得之則 是 後 故 窮 嫁 此言 盡 事,一 者 亦亦 也 施 可 爲 只 事 於 得 是 是 四 知 是

盘背,則充養之功存焉。」 之功。」楊氏曰::「只是說本來如此,若睟面或問::「根於心,說本來如此,爲復充養

子 加 損 深造之,不能爲 哉 尹曰 ? 「君子之學性 四 體 不言 是 言 而 也。 喻 而已,豈 可 僞 爲哉 以 窮 達 而

[孟子曰伯夷辟紂]章

本不治,未有能成善政者也。孟子見之明,尹曰:「王政之始,必本於民無凍餒,其

民無常産則無常心,勢使之然也。故知禮義 尹曰:「富歲子弟多賴,凶歲子弟多暴, 食之以時用之以禮財不可勝用也」章 孟子曰易其田疇薄其稅賦民可使富也

「孟子曰孔子登東山而小魯」章

生於富足。」

篤實 之動 小光輝 之明 嶽 篤 大。 月之明無窮,則無以容光必照。 故無不及也。」 亦亦 實 觀瀾 有 m 而 處 伊川曰:「登 無由 本,故 大大 ,苟非源之無 有 有 光輝 必照,因 光 積 有光輝。若使積 輝 凡 則 也。 也。 有 容光必 又曰 Ш 又言 大 今以 難爲言 作 光 窮 一一觀 「篤實而不窮 照。 列則 其道之無 輝。」 瓦 無以爲瀾。 礫積之,雖如 ,以言聖人之道 珠玉,小積則 君子之道有本, 水有術 又曰 其下又言其 窮。 、必觀 成章者, 日日 瀾,水 非 其 月 有 H Ш

> 也。」 以言 波對 支。」成章之謂也。」 瀾。』瀾湍急處,於此便見源之無窮。 其但容光者無不照,故知日月之明 ·瀾,非也。下文『日月有明,容光必照』, 又曰:「《易》曰:『美在其中,暢於 今人以 無 四 窮

曾言,而孟子言之,此是心解也。」 成章不達,及所性四體不言而喻,此非孔子 以明性,不可以遺言附會解之。 天下』者,德愈高者事愈周易也。」 難爲言,言無以加也。」 又曰:「當自立說 横渠曰:「『登東 Ш 而 小 魯,登太 若孟 子言不 又曰 Ш 而 小

海 高 Ш 子學聖人之道,亦如此矣。 天下之水莫大於 山之比,故孔子登太 下觀魯國,乃知其 ,觀於海則百川皆爲 ',則所取者遠,所覽 吕侍講 曰:「東山在魯之東,孔 小。 者大 Ш 細 而 流, 太山之高,又非 ,則所志者 小天下。所見者 故難爲水。 子 廣。 登 東 游 東

孟子精義卷第十三 盡心章句

義

乎其 聖。 滿坎 光。 若有 明莫 則能 玉 然成章。」君子學問 高 百家 曰:『其容不改,出言有章。』孔子 于天。」又曰:『追琢其章,金玉其相。』●又 非孟子之意也。 也,精學問,明道德,成章而后達,達則通 其源,則不見其 於聖人之門, 之追琢,謂之成章,然後可達於聖道。 [極遠,如水之瀾; 注 所 有文章。」又曰:「吾黨之小子狂 而 流水之爲物,不舍晝夜,盈科者滿坎也, 如 成瀾,故必 皆不足學,故 日月, .謂君子學必成章乃仕進,其 後行,行則人於海。 不及,則 聞 容光 觀 堯、舜、周、孔之道 不 大,瀾者水中大波 《詩》曰: 以其瀾 小隙 足 難 .既成,如雲漢之在天,美 無所不照,如日月之有 以 爲 言。 爲 無 ,然後知水之大。至 明。 有 「倬彼雲漢、爲章 不 觀 君子之志於道 聖人之道,窮 照,日月之照 水 Ĕ. 有 ,則知諸 也,水大 術 「堯焕 簡 若 斐 末, 於 此 子

> 小 章聖人之道大,學者當志其大, 也。 不當 志 其

六四

0

下也。」 物爲 Щ 物之心,身之所 而小天下,此言勝物而 心,是將自小 楊 曰:「或謂孔子登東山 處 ,安能 ~者高, 小物? 小之。 則 物 丽 使聖人 聖人本 小魯, 自 不 得 無 以 登 太 不 勝 勝

爲然。」 於 必照 之源無窮,是以有瀾。 照,言道之無窮也。 四 支, 尹曰:「臣 盈科而行,成章 篤 實 而 聞 之師 輝 瀾 光 之謂 而達,美在其 ,水之湍急之所也,水 日 日月之明無窮,是 水之瀾,日 也, 惟 八中,而 無 窮 月之 者 暢 以

「孟子日 雞 鳴 而 起」章

明道曰:「孟子辨舜、跖之分,只在 利

⁰ 玉」,原無此字,據明抄本、四庫本補

之間。 也。 利 聖人則更不論利害,惟看義當爲與不當爲, 害者,天下之常情也,人皆知趨 之道,不是但 只是主於敬,便是爲 又曰:「舜孳孳爲善,若未接物,如何爲善? 便是命在其中也。」 義與利, 出 只那計較便是爲有利 利則人義,天下之事,惟義利而 言間者,謂相去不甚遠,所争毫末耳。 只是公與私 「嘿然無言。」一作「爲」。 善也。 也。 又曰:「大凡出義則入 纔出 害,何用計 以此觀之,聖人 義,便以 利 而 已。 較。 避害。 利言 利

之盗 善之至 之徒 也。 雞 者善之至也。 鳴 黨也 跖 雞 而 吕侍講曰:「天下之言善者必稱舜,舜 也。 鳴 起, 跖所以爲盗 而 孳孳爲善 起,孳孳爲利,亦惟日不足者,跖 與舜爲徒則入於舜,與跖爲徒則 聚黨數千,横行天下,以不義謂 天下之言利者必 1,惟日 者何也? 貪利而已。 不足,舜之徒黨 稱 跖 , 跖者 不

他 利,好善則終於爲舜,好利則終於爲跖。君 利與善而 是而不爲跖之徒也幾希。」 之間,相去甚微,學者不可不知。」 子小人,各趨一塗,是故君子憂其不如舜。」 不仁而已矣。」天下之道,唯善與惡,唯義 人於跖。 取榮利,則父不以詔其子,而士不以學也,如 舜、跖之分,在善利而已。 ,利與善之間也。」孟子曰 楊曰:「舜、跖之分,利與善之間。 己。 人皆可 故曰:「欲知舜與跖 以爲舜,亦 使世無科舉可 可 :「道二:仁 以 爲 又曰: 之分,無 跖 唯 利善 與 與 以 在

心一萌,則去善遠矣。」
尹曰:「善之與利,毫釐之間耳。苟利

「孟子曰楊子取爲我」章

中 頂 ,欲執此二者之中,不知怎麽執得? 放踵爲之,此皆是不得中。 伊 ĬΙΙ 曰:「楊子拔 一毛不 爲, 至 如 墨 子 子 莫執 又摩 識 得

六四

閉 庸 也 受之類皆然。」曰 哂 中 中 非 如 心 拔 莫 则 執之,却不知有當摩 户不 一,在 過其 無 巷 見 中而 通。 安排 事 無異。」 一毛利天下不 如 推 如 則 過 楊 事 喪 在 此 出二者之間 門 不 其 權 堂 且試言 、墨過、不及,遂於過、不及二者之間 也 物 《祭則 盛 類 中矣。 門 爲 物 不人則非 須 安排 寒 미 中 愐 Ŀ 又曰 是 不 而 見 言 不 時 如 皆 著 矣。 用 廳則中央爲 一中 - 爲 居 人 而 此 則 天然有 初 取 中 陋 ,在禹、稷之世 時, 國則堂非 是 矣。 爲 寒之衣, 頂 也。 巷在 中,便不是中。 且 不 字最 也 中。 執 放 中 如 中 踵 箇 矣。」 顔子之時爲中 初 或曰:「男女不授 難 男女不授受,中 若以手 利 中 又 而 中,一家則 寒 則 中 日 識 天下時, 在 不 非 時 m 通 爲 又 則 須 中 那 國 公欲 足胼 中,若 變, 日 若當手 薄 之中 是 也 上 知 裘 不 廳 默 與 有 -,若 胝 居 當 中 子 更 爲 爲 中 識 執 待

> 道 義 其 爲 也,此孔子之道也。 而 人自看 足 也。」 所當爲者,如 身爲 也。 中。 胼 胝 如 輕,亦不 然 權之爲言 則 何。 也 于 只 此 是說 可 以 爲 又曰:「君子不以天下 秤 身爲 以 中 得義,義 蔽焉而有執者,楊、墨之 仕 錘 • 當閉 則 之 重 仕 義 m 以 户 天 也 人則孝之類 下爲 不 E 更 出 何 輕, 難 物 則 說 爲 凡 于 爲 權 是 盡 此 在

子之爲 不爲 愛而 異端 執 孟子所以惡執 下而爲之。 身,雖拔 中 墨 適 已,兼愛所以爲仁,至于摩頂 吕侍講曰:「二子之學,見善不明,流 我, 權 子之兼愛,是能 楊子所取者爲我而已,爲 ,則至於道矣。 毛利天下不爲也。 無 子莫,魯人也,不爲楊子之爲 異 (墨子 端之見者,謂之賊 ,之兼 執 執 愛, 中 中 也 墨氏 是 無 我 猶 爲 權 放 道 所 所以 執 無 近 也。 踵 取 於道 異楊 愛其 利 者 也。 我 如 兼 天

忍害

物

惟

體

舜

之用

中、法

湯

之敷

政

則

庶

夫

用

過

乎

柔

小則優

游

不

斷

用

過

乎

剛

則

碰

則 極 是以舉 愛之見,是賊其義者也 純 地 子 而 以 執 一而 爲我之見 不雜,其用則施之無方。 爲深,人之所性之中固 廢百也。 是 賊 夫道非窮天以 其 仁 執 .者 也 則 有之矣,其 所以道有 3 不 墨子 爲高 該 不 執 徧 正 體 非 兼

之達道也。 大 之,蕩蕩乎民 天下之達道。 正 有 一,則失己。 哉 權 正 ,體道之常謂之正,盡物之性謂之權 乎,天下之大本也。 知正 無能名焉。」此 唯聖人爲能立天下之大本, 孔子曰: 不知權 『唯天 リ則 違物; 堯之道,非 大哉權 爲 大,唯 知權 乎 大, 在 堯 不 下 彼 則 行 知

也。 敷 也,不可以彼名之, 政 非 優 舜 在 執其 優 中也,不 此 兩端,用 舜、湯體道之中以致用也。 可 其中 非在 以 中 於民,湯不剛不柔, 此 名之,此 也,不可 堯之天 以 此 消 名

> 明矣。」 翟 利 幾乎 堯之 雖 兼 知 ,此,孟 愛, 天 道 而 也 子 立 所 愛 雖 自 以 爲 闢之,然後聖人之道 親 我, 始。 而 惜 與 夫楊朱、 天 下 同 墨 其

忌憚,則不若無權之爲愈也。」
吕曰:「執中無權,雖君子之所惡,苟無

也。 無定 體 今人以變詐爲權,便不壞 謝 ,須是權 曰:「君 子 以 而 取 中。 時 中, 執 無 中 了權字?」 往 無 而 權 不 猶 中 執 也

異 也,苟不當其 陋巷,人不堪其 當其可,與墨子摩頂 天下之飢猶己飢之,至 也。 楊曰:「禹思天下之溺 子莫執 可, 中 憂, 則 執 與 放踵 口 爲 楊 也不 于 我、 氏 無 股 兼 之爲我, 改其 以 猶 無 愛之中 異 己 胧 也 樂、未嘗 溺之,稷 脛 無毛,不 也 亦 顔子 無 思 仕 在 以

● 「與」,原作「於」,據明抄本改。

六四二

智爲 物 所 所 \Box 而 也 權 取 不 有 子 今夫物 曰 中 以立常 惡 已 其 則 中 能 以 權 而 知 也 鑿 知 爲 蓋 也 易 也 無 聖人 知 中 權 物失其平 可 若 禹 權 有 也。」如智者若禹之行水,則 賊 地 權 中 則 之行 用 ,則誤矣。 首 用 則皆 權 道 /所謂 權 以 即 猶 中 智以 之 猶 重 所 不 而 知 執 有 水,循 禹、稷、顔 無 權 然,是亦楊 mi 權 不 以 慎 權 時 爲 非 銖 衡之權 末 者 盡 知 歟? 不不 也 乎 權 所以 兩之差 猶 八救,是 輕 孟 變,不 固 ,則皆智之鑿,孟 不 者,執其 子 知 然之理,行其 權衡之權,量輕 口 鄉 用 必 權 日 墨 量 易 亦 知權 鄰 中 問: 用 是 則物 輕 地 猶 有 『所 也 而 矣。」是 不 重 則 執 則 中 鬭 已矣。」 得其 惡於 或 皆 而 知 而 不 世人以 m 無惡於智 日 取 耳 然 中 足 所 不 不 智者 否? (平矣。 故 中 也 以 知 無 子 知 也 應 中 之 事 用 其 又 其 而 閉 孟

> 之,中 約, 之中 焉。 中 蓋 者 而 不 古 移 與 \Box 輕 因 知 權 時 五寸之執,長短多寡之中, 自 而 唯 中 權 也。 中乎? 若居今之所,守向之中,是不知權,豈 重不等矣,猶執 有 坐于堂, 固 既 輕 也。 二, 即 小 中,合堂室 異 謂 重之知 矣。」曰 欲 之 《中庸》之書不言權, 所 求 尺 又 則向 中 謂 厚薄 如 而 而 權 : 斯 之所謂中者今不中矣。 厚 以 圃 其中得 也。 有 猶 小大之中, 五寸 薄 一尺之物,約 觀之,蓋 定 坐 小 所 于 以爲中,是無權 矣。 大之體 此 必 又有 丽 室,室自 故 有 則 非 其 殊 權 權 釋 厚 五 堂 (日7君) 則 以 焉 室之 五 薄 寸 中行 有 寸 小 所 而 是 也 之 大 中 執 執 非 中

道。 也, 中者,時 白 故孔子曰: 「天下 尹 刃 E 中 미 蹈 也。 也,中庸 執 子莫之執中,其殆執 中之難 不可能 國家 也,苟 可均 也。」孔 執 也 爵 子之所 乎? 則 禄 爲 口 謂 賊

孟子日飢 者甘食」章

以 有 由 則 無 外者不及人,不爲憂矣。此孔子所以 口 害。 簞食,一 飢 腹之不足,遂變其初心,嗜于外物,人能 是 神安而氣寧,失其正 心 害,則 渴之害爲心害,則神安而 觀之,豈獨 吕侍講曰:「人身以飲食養之,得其正, 利欲者,心之害也。 瓢飲,在陋巷而不改其樂也 飽乎仁義之道,復何憂乎?」 口 腹 爲 ,則賊其神而害其氣 飢 渴之害,人心亦皆 人心之害,生於 氣定,則 稱 雖 顔 蓋 回 在 無

師

也。

於心有好樂,則爲害也大矣。 謂 君子矣。」 尹 日:二 飢渴之害,有欲存焉故也。 無心害者,其 況

孟子曰柳下惠」章

口

横渠曰:「介,操守也。」

孟子嘗 吕 稱 侍 柳下惠聖人之和 講 曰:「介者,殊俗 ,聖人之和異乎衆 特 立之行也。

孟子精義卷第十三

盡心章句上

《論語》載其爲士師,三黜,人曰:『子未可以 枉道 則柳下惠不以三公易其介矣,此所以爲百世 去乎?』曰:『直道而事人,焉往而不三黜 人之和,此所以爲介,此孔子所謂 而 事人,何必去父母之邦。」由是考之, 和 而 不流。

矣。 之。」曰:「何以知其介?」曰:「只不卑小官 易其介,此與聖人之和互相發耶? 所以爲柳下惠也。」 問:「柳下惠不以三 何所不可? 之意,便自可 和耶?」曰:「若觀其和,疑若不介,故此 和而不以三公易其介,則雖和而 楊曰:「不惡汙君,不辭 見。 而樂于小官 如 柳 下惠之才,以爲大官, ,則其剛介可知矣。」 小 官, 乃所 不流,此 미 謂 、特言 以 公 和 爲

尹曰:「介,大也。」

「孟子日有爲者」章

吕侍講曰:「人之性無思也,無爲也,寂

六四 五.

而已。 以 之歸,是猶鑿井而不及泉,未免於廢井也。」 域,終未至於天道,未免半塗而廢,未免小人 堯,孝不如舜,學不如孔子,終未入於聖人之 始有卒。天之誠行健而已,人之誠自强不息 失性而喪道矣。是故人之致誠于有爲,則有 物,猶棄井也。 八尺曰仞,及泉則可利物,不及泉則利不及 爲舜; 有爲者辟若掘井,掘井九仞 自强于仁,可以爲堯,自强于孝,可 循 自强于學,可以爲孔子。 所 往 人遵道而行,半塗而 而 行之謂 之道。 而不及泉, 行 ||廢,則 仁不如 則 有 亦 爲

穀不熟,不如荑稗,亦猶是也。」 尹曰:「君子之所爲,貴乎有成也。 五

身之,學而知之也。」 問:「堯、舜、湯、武事伊川曰:「堯、舜性之,生知也。 湯、武之也久假而不歸悪知其非有也」章(孟子曰堯舜性之也湯武身之也五霸假

日: 迹雖 豈不性之耶?」曰:「堯、舜生知,湯、武學而 之者,身不行而假借之也。」 之,言歸于正也。」 知之,及其成功一也。身之,言履之也。 「孟子言堯、舜性之,湯、武身之,湯、武 不 同, 其 心 德 有 又曰:「身,踐履也。 間 否?」曰: 無間。」 反

之,蓋其功可録也。」 也。 兵,但欲楚尊齊,假此爲說耳。故孟 而不 湯、武身之,體之者也。五霸假之而已,非己 頁,其名則是,若其意豈爲楚不勤王然 是處,但其意别耳。 有之。」 又曰:「王道本于誠意,管仲亦有 曰:「管仲伐楚,以包茅不入爲辭,所謂假之 「五霸假之也。」蓋言其不以誠爲之也。」 歸者也,烏知其非有? 初非有勤王之誠心,卒能一正天下,假 楊曰:「堯、舜性之,由之而 如伐楚責之以 故孔子以仁與 行 包茅不 子 日 後 也。 Dut

是以功烈如彼其卑也。」之也。及其成功則一也。五霸則假之而已,尹曰:「性之者,與道一也,身之者,履

「公孫丑曰伊尹曰」章

若尹與光,是太甲、昌邑所用之臣,不受先王 害昭然也。 明以嗣子,不可使自爲之,非權數之言,其利 下之賢者而與之,伊尹不自爲也。 質,初不立也。 歲,仲壬四歲,惟太甲長耳,使太甲有下愚之 戚之卿與此同。 治而已,太甲如終不惠,可廢也。 之委寄,而 知其下愚不移也,始之不擇,則光之罪大矣。 無人,必擇於湯之近戚,近戚無人,必擇於 ,寧使孔明爲之也。霍光廢昌邑不待放, 伊川曰:「伊尹受湯委寄,必 諫 立者非其人,則劉氏必爲曹氏屠 不用,則去之可 苟無三人,必擇於宗室,宗室 然則始何不擇賢,蓋 也,放廢之事 期天下安 孟子言 劉備 外 託 丙 孔 天 貴

不可爲也,義理自昭然。」

若如司 也。 不可? 否? 不幸 下不 忠而 之。』備死,孔明操 觀之以 人材進退,惟孔明是聽,而蜀之人亦莫之疑 明,曰:『嗣子 也。」曰:「若有伊尹之志,其素行足信, 云:「有伊尹之志,則可。」后世之爲人臣者, 蓋孔 已,所 而適遇此 疑者,誠 楊 若行不得,是伊 爲 馬 日 但觀蜀先主當時以 異 懿 明自非篡弒之人,其素行足信也 以能 其 ,其誰信之? 伊 可 事,而 意素著故也。」 因問:「孟 尹 實 爲放太甲之事。 輔 所 亦所 一國之權,當時 輔之,如 以事 有伊尹之志,不 謂 尹 君,更 中道。」 之 伊尹之事,自後世 不可 其子 事 不 無 然如 輔,君 軍 回 屬諸 可 耳, 國大務 法 知 此 自 葛 何 于 行 唯 而 7 取 孔 爲 後 得 天 知

尹曰:「聖人之志,豈易量哉?」

六四七

六四八

則安富尊榮其子弟從之則孝悌忠信不 素餐兮孰大於是」 食何也孟子曰君子居是國也其君用 公孫丑 日 詩 日不 素餐兮君子之不 耕 之 而

詩 也。其君安富尊榮,子弟孝悌忠信,則有 尹 曰:「『不素餐兮』,刺無功而受禄之

尚志曰仁義而已矣」章 「王子墊問日士何事孟子曰尚志曰何謂 功

也孰若?」

尹 曰:「士不能居仁由義,則不足名之

爲士。」

信之是含筆食豆羹之義也」章 「孟子曰仲子不義與之齊國而弗受人皆

尹曰:「孟子可謂善觀人矣。」

則如之 「桃應問日舜爲天子皐陶爲士瞽瞍殺人 何孟子日執之而已矣」章

楊

E

「予讀《周世宗家人傳》,至守禮 也。方守禮殺人,有司不能執之,而徒以聞 何? 釋,則雖欲不問,得乎哉? 然世宗取天下 故世宗得 其父則傷恩,其意若曰:天下不可一日而 義,二者相爲輕重,不可偏舉也。 百戰之餘,未易以舜之事望之也。然則宜 負而逃,以伸己之私恩。 無君也,故寧與其執之,以正天下之公義,竊 法,人子亦不可一日而忘其父,民則不患乎 天子,瞽瞍殺人,皋陶執之而不釋,爲舜者豈 義輕重不足以相勝,則 以謂父子者,一人之私恩,法者,天下之公 殺 不能赦其父哉? 則詘法以伸恩;義勝恩 焉。爲天子父,可謂貴矣,此禮律之通義 人,世宗不問 亦置諸 m 不問 法 而 ,史氏以 也。 蓋 已矣。 殺 有 兩盡其道而已。舜爲 人而釋之則廢法,誅 ,則掩恩以從法,恩 爲 如皋陶者執之而 此舜所以兩全其適 法有八 知 權 議 故恩勝義 予竊思之, 而 貴 於 不 居 奈 無

或問:「使舜不去位,皋陶遂行法否?」也,一置諸法而兩不傷焉,何爲不可哉?」

《周官》八議,豈是周公撰出,亦須有箇來處。貴之辟,豈有天子父殺人便置之死。且如曰:「此亦須自有法。周禮人臣猶有議親議

尹曰:「聖人之心至公至當而已。」

然孟子所說,只是論舜心耳。」

孟子自范之齊」章

之學,故孟子每言夫居焉。」廣居者也。學者所以變氣質,不居者不可謂實日,所以學氣質,不居者不可謂

畜之也恭敬者幣之未將者也恭敬而無「孟子曰食而弗愛豕交之也愛而不敬獸

實君子不可虚拘」

也。 幣之未將時已有恭敬,非因幣帛而 伊 川曰: 又 日 「恭敬者,幣之未將者也」,言 恭 敬 雖 因 幣帛 威 儀 後有 而 后 恭敬 發

見,然須心有此恭敬而后發見。」

以留君子。」尹曰:「苟無其實,是僞恭敬而己,

何足

「孟子曰形色天性也」章

知 不同,既爲人,須盡得人理。 盡 至,故可以踐 也。」 又曰:「形色性所有也。聖人人倫之 人道者,君臣、父子、兄弟、夫婦之類皆是 性也,惟聖人爲能盡 禀五行秀氣,頭圓足方以肖天地,則形色天 ,賢人踐之而未盡,能踐形者,惟聖人也。」 得人道也。人得天地之正氣而生,與萬 明道曰:「「惟聖人可以踐形」者,人生 伊川曰:「「惟聖人然後踐形」,言聖人 形。 人之道,故 衆人有之而 可以 踐形。 物

隨之遷於外。」 横渠曰:「言不能全性於内,則有形色

游曰:「性者,性之質也。能盡其性,則

六四九

非 未 無 踐 曰:「聖人 形,苟視聽不 目之本然也。」能盡 故曰:「惟聖人然後可以踐形。」 箕子曰: 有 盡 有 「視日 足 禮 視 所 何 其 性 以言 勿視,非禮 聽 不 物 形 丽 明 盡 之實 踐 不 而 聽 踐 無愧 形 備。 耳 未 形 日 也 不 德 足於聰明,則是有耳 聰 能 矣。 反身而 勿言,則於口耳猶有所擇,是 順 也 ,視謂之明,聽謂之聰,皆耳 盡 若反身未至于誠 乎 視聽之性 蓋 豈 性,則於質有所不充矣。 非 萬 誠 不 物皆備 口 ,樂莫大焉, 慊 不隸 於 ,則能盡耳目之 形 於 乎不善。」若 哉? 目之形,而 則 我 是 爲 則 楊 於 其 其 子 性 能 所

形。 爲 非 即 形也,自聖人言之,目之所視,耳之所聽, ,形色者,是聖人之所履 是形色,則即 踐,履 楊 日 也,體 「形色天 是天性 性 故 性,有 也。 惟 也。 物 聖 蓋 必 形 人 色 然 有 又曰 必 後 則 有 可 也 以 所 莫 以 踐 物

> 是也。 則 以 盡 又曰:「有物必有則,耳 未免有克焉,若孔子 が,所 其 至口 則 謂 之所言,身之所 便是踐。」 故曰:「惟聖人 動容周 旋 中禮 告顔 動 然後 者 目 淵「非 也。 不 鼻等便是形,各 可 ·待著 以 未 禮 踐 至 勿 意 形。」 于聖,則 ,莫不合 視」等語

而 者,人而已,盡人理然後 而 己。 不知。 尹 日 賢 人知之而 「臣聞之師 不 E 盡 稱 能 盡得天 其 名。 踐 形 衆 地之正 者 人 聖 有 之 氣

「齊宣王欲短喪」章

制禮,其可改乎?」

尹

日

「三年之喪,天下之通

「孟子曰君子之所以教者五」

化。 酒 簋 貳用缶,納約 伊 又曰: ĴΠ 日 「待物生,以時 「在《易 自牖。」納約謂進結於君之 坎》之六 雨 潤之,使之自 四 樽

心之明也,從其心之所明而入,然後推及其也。教人亦然。夫教必就人之所長,所長者結於君心,必自其所明處而告之,取信則易道,自牖言自通明之處也。人臣以忠信善道

餘,孟子所謂成德、達財是也。」

子語宋牼之言是也,本有是善意,因而成之。 之,如好貨好勇,因其爲說以教之。私淑艾, 其間而施之,不待彼有求有爲然後教之也。 淑 者,不待問 答問者,必問 大人正己而 淑艾者,自修使 天之雨,豈待 「當其可之謂時 艾 又曰:「時 也。 横渠曰:「有如時 以 而 物 能 FI 望 告之,當其可告而告之也。 而後答也。」 又曰:「時雨化 正。 問 化之, `,成德因其人之有是心當成 人觀己以 而後雨,但時 於 不能,以 又曰:「成德者,如孟 春誦 雨化之者,當其可乘 化,如顔子大率 夏弦。」 多問於寡,有 可 雨 而 又曰: 雨 若 私 如 私

> 宋 作于此,化于彼,如祭祀之類。」 聖人神道設教,正己而物 成 無,實若虚 輕罷齊、楚之兵,因而 而 不用,隱而未見,行而 ,但修此 以教· 成之,若好色好貨, 人, 顔子常以己 Ī 未 ,皆是私淑艾。 成 故也。 又曰:「若 徳未 至于

亦不倦之意。」

尹曰:「君子之教,各因其材而誨之,是

因

m

達之。」

不可及也何不使彼爲可幾及而日孳孳「公孫丑曰道則高矣美矣宜若登天然似

也」章

無道,身隨道屈。」 其人也。孔子稱顏淵曰:「亦足以發。」」 其人也。孔子稱顏淵曰:「亦足以發。」」 其內也。孔子稱顏淵曰:「亦足以發。」」 其內也。孔子稱顏淵曰:「亦足以發。」」

六五

六 Ŧi.

殉 道 ,獨善其身也。 尹 日 以 道 殉 殉乎人,則何有于己,烏 身,施之天下 也。 以 身

在 其爲道?'」

答何也孟子曰挾貴而問]章 公都子曰滕更之在門也若在所禮 而不

不答也。」 尹 曰:「有所挾,則受道之心不專,所以

尹曰:「觀人必自其本。」 厚者薄無所不薄也其進銳者其退速」 「孟子曰於不可已而已者無所不已於所

伊川曰:「民須仁之,物則愛之。 仁推己 也仁之而弗親親親而仁民仁民而愛物」 「孟子曰君子之於物也愛之而弗仁於民

不可。 及人,若老吾老以及人老,於民則可,於物則 統而言之則皆仁,分而言之則有序。

務

也。」

而 分殊。知其理一,所以爲仁, 楊氏論《西銘》,言河南先生曰:「理一 知其分殊,

> 在 加 百骸皆具,所謂 民,仁民而愛物」,其分不同,故所 所 曰:「用未嘗離體也。 差等。」或曰:「如是則 其中矣。」 之于首,冠不可納之于足,則 以爲義。 所謂分殊,猶 體也。 體用果離 且以一身觀之, 至其用 孟子言『 、即體 處,則屨不 而 施 親 爲 而言,分 二矣。」 不 親 四 能 而 體 口 無

本故也,無僞 則親之,此之謂 尹曰:「於物則愛之,於民則仁之,於親 也。」 差等。 何以有是差等?

湯之有天下,選於衆,以舉臯陶、伊 楊曰:「當務之爲急,莫如 「孟子日知者無不 知也」章

親

賢。

故舜、

尹爲先

尹 日 「知務者,知輕重大小之義也。」

或 朝諸老先生孟子精義卷第十三終

國朝諸老先生孟子精義卷第十四

盡心章句下

及其所不愛不仁者以其所不愛及其所「孟子曰不仁哉粱惠王也仁者以其所愛

愛」章

可見。」
伐,以不義而并吞耳。仁不仁之效於斯以爲不仁,爲其所得爲故也。戰國之戰以爲不仁,爲其所得爲故也。戰國之戰

征者上伐下也敵國不相征也」「孟子曰春秋無義戰彼善於此則有之矣

討,故雖湯、武之舉,不謂之討而謂之伐。 陳横渠曰:「天子討而不伐,諸侯伐而不

孟子精義卷第十四

盡

心章句

逆 恒 征伐之名至周始定耳。」 下,敵國不相征。然湯十一征,非賜鈇鉞,則 一弑君, 侯 當 孔子請討之,此必 不 請 而 討。 孟 子又謂 周制, 征 鄰 者 國 有 L 伐 弒

秋之際,敵國相殘耳,皆王者之罪人也。」 尹曰:「征也者,王者之正天下也。

春

「孟子曰盡信書」章

愈也。 荷執信於辭,則時 其實者,當識其義而已,固不可執而盡信也。 施於書也。」 至如是之甚也。亦以規學者執辭忘義,不 聖人之征尚多殺如此,雖曰其徒之相攻,不 之設是言也,懼後世之惑,且長不仁之心,謂 中所取者,如二三策之所載奉天伐暴之意 反政施仁之法而已,非謂盡信其辭也。 孟子 伊川曰:「夫載事之辭,容有 因舉《周書·武成》而言,吾於是篇之 又曰:「聖人取書,其辭或有 '或害於義,不如無書之爲 重 稱 丽 渦

六五三

似可 其政其 害義 改 者 八事耳。 然 固有所芟除更易也。 而 若《武成》書「血流漂杵」之辭 不易者,則以其 其不可易者 非 害義之辭

故也。」

杵之說。 則是有不取也。 横渠曰:「《武成》取二三策。言有取, 知德斯知言,故言使不動。」 孟子只是知武王,故不信漂

何獨《武成》哉?」 尹曰:「讀書者不考其理而惑其文,則

「孟子曰有人曰我善爲陳」章

人,人皆稽首歸之,各欲正己也,焉用戰爲? 尹曰"「武王之伐商也,順乎天而應乎

爲人君者,當法武王而已。」

「孟子日梓匠輪輿」章

川曰:「只是論得規矩準 繩,巧則

尹曰:「規矩法度,可以告者也,巧則在

在

其人,雖大匠亦末如之何也已。

「孟子曰舜之飯糗茹草也若將終身焉及其

屬天子也被袗衣鼓琴二女果若固有之」

尹曰:「非聖人至命,則不能臻此。」

之父人亦殺其父殺人之兄人亦殺其兄 「孟子曰吾今而後知殺人親之重也殺人

然則非自殺之也一間耳」

尹曰:「出乎爾者,反乎爾者也,故曰一

間。 觀其存心則然。」

「孟子曰古之爲闌也」章

尹曰:「古今之爲關,亦猶王者之征伐

與當時之征伐也。」 「孟子日身不行道不行於妻子使人不以

道不能行於妻子」

伊川曰:「《易・家人》上九之《象》曰

身爲本也。爻辭謂治家當有威嚴,而夫子又 「威如之吉,反身之謂也。」言治家之道,以正

身也。孟子所謂身不行道,不行於妻子也。」則人怨而不服,故云威如而吉者,能自反於其復戒云:當先嚴其身也。威嚴不先行於己,

行於它人乎? 故曰:"其身不正,雖令尹曰"「妻子至親且近,而不能行,況可

不從。」

「孟子日周於利者」章

尹曰:「《中庸》言凡事豫則立,此之

謂

也。

人簞食豆羹見於色」

「孟子曰好名之人能讓千乘之國苟非其

尹曰:「好名之人,非有德者也。」

「孟子曰不信仁賢則國空虛無禮義則上

下亂無政事則財用不足」

尹曰:「三者以仁賢爲本,無仁賢則禮

義、政事,處之皆不以道。」

「孟子日不仁而得國者」章

CLAIN SOFT MAN SIZE STOP I THE MEZ NO LINE TO IN

知天下之不可以力取也。」●

尹曰:「當時之君見不仁而得國者,不

「孟子曰民爲貴」章

之,今以其水旱,故易之。」

君、社稷,或有時變置也。」

尹曰:「君以民爲本。當時諸侯不知國

「孟子日聖人百世之師也」章

因循前人之語,非自見。假如人言孔子爲聖伊川曰:「人皆稱柳下惠爲聖人,只是

■「力」,原作「示」,據四庫本改。

六五六

「夷、惠聖人,傳者之誤。」 人也,須直待己實見聖處方可信。」 又曰:

聖人之功大矣。」
尹曰:「百世之下,聞其風者莫不興起,

「孟子日仁也者人也」章

而 準,放之西海而準,放之南海而準,放之北 義立而 敬以直内,義以方外,則與物同矣。故曰 有直乎? 必有事焉而勿正,則直也。夫能 仁也。若以敬直内,則便不直矣。行仁義豈 也。仁者,人此者也。敬以直内,義以方外, 而言之,道也。』《中庸》所謂率性之謂道是 準。醫家言四體不仁,最能體仁之名也。」 伊 明道曰:「孟子曰:「仁也者,人也。 川曰:「仁,理也。 德不孤。 是以仁者無對,放之東 人,物也。 以仁合 海 海 而 敬

仁與人泯矣,此其所以爲道也。」立人之道,則仁之名所以立。合而言之,則立人之道,則仁之名所以立。合而言之,則以曰:「仁者,以道之在人者名之也。

是道。道立則仁與人之名亡矣。」謝曰:「這箇人與這箇仁相合爲一,便

合也。」 楊曰:「由仁義行,非行仁義,所謂

在

人身言之,乃是人之道也。」

又曰:「合

言之,道也。仁固是道,道却是總名。」

尹曰:「聖人去父母之邦,與它國如此,

則於禮義輕重可知。」

「孟子曰君子之戹於陳蔡之間」章

尹曰:「君子無上下之交,則國與時可

知矣。」

「貉稽曰稽大不理於口」章●

群小之愠,而况其下者乎? 顧自處者如何,尹曰:「文王、孔子,大聖人也,不能免

盡其在我者而已。」

「孟子曰賢者以其昭昭」章

天下國家,其有不順者寡矣。欲以昏昏而使尹曰:「大學之道,在自昭明德,而施於

成路爲間不用則茅塞之矣今茅塞子之「孟子謂高子曰山徑之蹊間介然用之而

昭昭,未之有也。」

心矣」

尹曰:「仁義,人心之所固有,安可舍其

孟子精義卷第十四

盡心章句下

類也。」良心哉? 或作或輟,而欲成德,是茅塞之

言之日以追蠡日是異足哉城門之軌兩「高子日禹之聲尚文王之聲孟子日何以

馬之力與」

久而用多也。高子以追蠡言之,失之矣。」尹曰:「城門之軌,豈兩馬之力哉? 歲

「齊饑陳臻日」章

不知聖賢之事,在爲所當爲而已矣。」貧窮。其後齊饑,陳臻謂孟子將復爲之也。尹曰:「孟子嘗勸齊王發棠邑之倉以賑

聲也鼻之於奧也四肢之於安佚也」章「孟子曰口之於味也目之於色也耳之於

有分焉,不可謂我須要得,是有命也。仁義伊川曰:「口目耳鼻四肢之欲,性也,然

●「章」,原無此字,據四庫本補。

六五七

禮智 受有厚薄清濁故也。 謂之性焉。禀氣有清濁,故其材質 有性焉,可以學,故君子不謂 「仁之於父子,智之於賢者,謂之命者,以其 天道 在 人 賦 於 然其性善可學 命 有 厚 薄, 命。」 是 有厚薄。」 命 而盡,故 又曰 也 (禀 然

楊曰:「口

之於味等,性中本

來有這

箇

於己。」 患焉。」 者也。 知人。 舜、禹受命受禄,苟不受命受禄,舜、禹 是我所患,彼不知我,是命 毛,直欲陷害孔子,如 又曰:「智之於賢者,知人之謂智,賢者當能 晏嬰智矣,而獨 「智之於賢者,彼此 渠曰: 晏嬰之賢,亦不知仲尼,於仲尼猶 有於此而不受知於賢者,智不 又曰:「養則付命於天,道 「孟子以智之於賢者 不知於仲尼,非天命耶?」 歸 均 賢 女樂之事。」 也。 也。 鈞聖 我不知 爲)則責 施 人 命 亦 於 也, 如如 彼 . 又 成 吹 賢 無

吕曰:「雖命不易,惟至誠不息亦足以

移 命 也。 之, 此 大 德 所 以 必 受命, 君 子 所 以 不 謂

若不是性中有,怎生發得出來?」若不是性中有,怎生發得出來?」若不是性中有,怎生發得出來?」若不是性中有,怎生發得出來?」

「浩生不害問日」章

致矣。 欲之爲善,亦須實有諸己,便可言誠,誠便合 能 有諸己,則居之安資之深,而美且大可 長」同理。」 不受變於俗者鮮矣。」 又曰:「士之所 伊川 徒知可欲之善,而若存若亡而已, 曰:「可欲之謂善,便與「元者善之 又曰: 難 「善 者,在 便 又曰:「今雖 有 有 諸 無 箇 己 底 面 已。 意 以 知 思。」 則 馴 能 可

竿

弄

瓶

以

至斲

輪

誠

至

則

不

可

得

而

知。

致曲」以至『著則明』, 可欲之善屬焉。 也。 與 又曰:「充實而有光輝, 熟。 又曰 又曰:「《中庸》言『其 : 坤,學者之分也,有諸 謂之光輝之時也。」 又曰 覺悟 : 便是 「乾,聖人 性。」 其未 之分 所 化 次 謂 又 問: 大則 高。 竿弄瓶: 如?」曰:「若以大而 不驕 矧聖· 始於習數尺, 人誠 此 句 至之事 而 却 物 有 而 意 ·, 豈 後 思

修身見於世

之信屬焉。」

也

内

外之道。」

者,如 子正在 之謂 人所 至 後是 至於化 又曰:「大而化之,只是理與己一。 爾。 可 不 與。 知。」 過 神 不 人操 之。 非 能測。」 此,若化則是仲尼。 者,則己 又曰:「聖人不可知,謂 卓爾是聖人立處,顏子見之,但未 是聖上别 尺度量物,用之尚不 此 又曰 過 一便是尺度,尺度便是己。 又曰: 一神者妙 不 及甚微 有 「孟子言聖 等神 ,惟顔 萬 在前是不及,在 物 人,神即聖 免有差。 而 聖人至妙 子自知 圃 爲言 不可 知 若 而 顔

更無差等也。」

也。 化則不吝,化煞高,不吝未足以言之。 處,便是 非是聖上別有一等神人,但聖人有不 曰:「大人正己 吝兩字正相對,驕是氣盈,吝是氣歉。」 「横渠言大則不驕,化 大而化之之謂聖,聖而不可知之謂 神 也。 化與變化之化同。 正,充實 化之,解此則未是。 至 可 只只 則 得 於百尺, mj 爲 不吝,此語 圃 有 小 知 光輝 便 習化 若 驕 之謂 到 可 驕與 也 然 知 又 何 或 其

顔淵 善必 仁與知 人信 知欲仁矣。 明於未 人,志仁無惡 横渠曰:「求仁 ,具體聖人,獨未至於聖人之止耳。」 可 欲 樂正子不致其學,所以爲善 之際。 而已。 一必求 於未 顔子好善不倦,合 又 E 惻隱之前,明 樂 IE 子、

之事 慢。」 皆到 地之間 室, 天 則 陰 誠 何 不 而 篤 善於 施 時 義 不 陽 物 己。 踐 又 信 由 不 不 備 測 미 圃 成法,亦不陷於惡。 善人 日 好 不學故 之謂 己。 足 矣。 非 爲 又 欲 測 心之謂信,充内形外之謂美,塞 學。 中 之 云。 神。 日 氣 又曰: (欲仁) 之地,但一人向學緊,一人向 善人云者,志於仁 -庸》曰 德盛 非 謂 大 君子名之,必可言也 篤 無自入聖人之室也。」 「氣有 天之化 大大 時 神。」 其 而未致於學者也 信 可 在 一者,窮神則智不足道,知 「至誠爲能化」,孟子曰「大 能 不 則化之名 人 陰 欲之謂善,志仁無惡也 好 成 也運 也, 陽 又 性 學,不越爲善 日:二 之謂 知 推 有諸己也 諸 義 何有? 行 而 氣 聖,天 顔子、樂 利 有 未 ,人之化 如是。」 用 漸 致其學 欲仁 不不 則 爲 化 地 人信 又曰 化,合 之實 手天 神 彻 正 同 人 故 學, 化 於 順 化 子 流 人 雖 又 能

聖,聖位天德不可致思謂 能不 也,在 哉 累者 勉 未 面 大 時若非象,指何爲 不 又曰:「大亦聖之任,雖非 之致,非智力能 空,學者捨惡 可 目 愐 名之 幾 焉。」 未 忘 !」 又曰:「大可爲也,大而 通 愐 化之」, 化,未 於 聖矣,化則 勉而大也。不已而天,則 也。 薄 後 熟 勉 象 知 乎 而 所謂 皆以 又曰 ൬ 荷 耳。 己。 云 能 大耳。 耳, 趨 健 有其大,化 氣 其 然 强也。」 《易》謂 善以 位 順 也 **豈**天 德合陰陽, 則 無 時? 動 若聖人 乎天德 者 象 我 爲化 止 ,非待其 若非 窮神 地 圃 浩 世人取 而 又 後 神 神。 矣。」 然 則 清 后 此直 知化 曰:「大 氣,指 與 大, 化 湛 性 和 能 蒸鬱凝聚接 天 不 故神也者, 之天道 然之得 所 一體之偏, 釋 大 可 有其大。 乃 地 測 又 化 成 可 何 德 爲 氏 同 而 加 日 性 不 同 盛 爲 始 銷 流 神矣。 化 可 加 無 語 學 礙 象 而 一大 聖 後 由 熟 爲 ? 遺 人 於 所 也 無

又曰:「聖不可知謂神。莊生謬妄,又謂「心存無盡性之理,故聖而不可知謂之神。」能。立心求之,則不可得而知之。」 又曰:不可知。」 又曰:「聖不可知者,乃天德良

而名矣。莊子又謂有神人焉,非也。」之神,上下一理。擴充之至於神,則不可得尹曰:「自可欲之善,至於聖而不可知

有神人焉。」

「孟子曰逃墨必歸於楊」章

尹曰:「聖賢不爲已甚者。」

「孟子日有布縷之征」章

尹曰:「民爲邦本,取之無度則危矣。」

「孟子日諸侯之寶三」章

尹曰:「實得其實者安,實失其實

者危。」

尹曰:「小有才智而昧於義理,鮮能免「盆成括仕於齊孟子曰死矣盆成括」

於殺身之害。」

「孟子之滕」章

人,故人多疑其間容有爲攘竊之事者。或人 國,就客館於上宫。有人織屨以爲業,置之 無類,故從我而來者,不拒逆之使去。但能 科立教以待學者,蓋亦有道。 其不爲如此,故云「殆非也」。孟子說之。設 學者之事,曰:「子以是衆從者之來學於我 德,故發此問。孟子因爲言聖賢之門所以待 道之心,不容爲盗,若或有之,將有累孟子之 之意以爲孟子大賢,從之游者皆必有慕善向 孟子之從者所匿也。 牖上而失之。其主館之人求而不得,疑其爲 以此求道之心而至,則受而教之,不保其爲 人師,故舍我而去者,不追呼之使來。有 有爲因利乘間爲盜竊之事而來與?』或人悟 吕侍講曰:「孟子日歷諸侯,至滕侯之 是時孟子從者常數 人之患在好爲 教

爲異日之不保而廢其今日與人爲善之意。」人,苟有向善之心皆取之。亦以進人爲善,不潔也,不保其往也。」」故聖賢在下,其所以用稱『互鄉難與言。童子見,門人惑。孔子曰:稱『互鄉難與言。童子見,門人惑。孔子曰:不義。設爲不義,亦非孟子之累也。《論語》

不倦也。又見孟子答小人而有理。」
尹曰:「苟以是心至,皆在所教者,誨人

也。故擴而充之,不可勝用。」
取之曰盗,亦義也。惻隱,仁也。如天亦仁敢之曰盗,亦義也。惻隱,仁也。如天亦仁故。曰盗,亦義也。謂非其有而也人皆有所不爲達之於其所爲義也」章

心達之於它人,推愛人之心達之於禽獸,則其所忍,所忍者,謂他人也。推己愛親戚之戚,皆有不忍害之之心。但能達此心施之於戚,皆有滿曰:「凡人之心,於所愛子弟親

故也,如蔡澤未見應侯,先宣言而激怒也。 不爲義 汝。 物。 與人恭而有禮,四海之内皆兄弟,無所往 是以言銛取 爾汝矣。欽人者人嘗欽之,故不受人所 相呼以爾汝,自士以上,知相欽 踰之心,則義不可勝用,言義有餘 不辨禮義而受。 也,不能充之,雖不爲穿踰小盗,萬鍾之禄則 之心,仁之端也,不能充之,則不能仁民 爲,而不合於義者皆不爲 爲盗、皆知其不爲。但能達 不可勝用,言仁有餘也。羞惡之心,義之端 舉此心加諸彼。充者,充己性之所有。 是仁也。凡人之心,自非元惡大憝, 故擴而充之此惻隱無欲害人之心,則仁 能擴 也。 而充此自欽欽人之心,欽 舒, 取 人之心也,知其所以言語動 故擴 物 也。 而充之此羞惡不 未可 ,則是義也。 此 以言 心其它所欲 而 不可 也。 而言, 而 如穿踰 達者, 無失, 其心 呼以 爲 惻隱 賤者 則 而 穿 愛

者,欲人辨小人鄙夫見利忘義委曲從人者, 也。 意在强 知 可 此 意,抵 撒伺隙, 以取財 人之牆 無以異於穿踰之盜也。 色,窺測人之向背,或 其 '以言 人所取。」 可 此章之初兼論 國 以 踰 而 不言動其心故也,如商鞅知秦孝公 不言 而不言强國也。● 人之屋以 ,則反以不言銛取 仁 竊 一義,其 其貨 順人之旨,或激 苟能辨之,則不爲如 利,皆是穿踰之類 (財,但 穿踰者,不必穿 后 於義說 人之心也, 觀 人 、之容 之詳 人之

則

餂之; 心實然也 尹 可以言而不言,是以不言銛之。 曰:「孟子謂未可以言而言,是以言 ,推廣其仁義之心良心者,則皆誠 論其

責

而

如

「孟子曰言近而指遠者」章

之謂

也。

蓋 指 其近 伊川曰:「不下帶,言近也。」 處。 下,猶舍也,離也。 又曰:「帶, 古人於一

> 帶 有 至理存焉。」 必皆有意義。 不下帶 而 道 存 猶 云只 此便

遠也。 苗可長。 子之言,近在目前,而道德存焉,此言近 遠,則可謂善言也。 之患在於不治己 夫治田。 天下平,此守約而施 農夫舍己之田 可謂善道也。 指遠,臣 人深也; 吕侍講曰:「君子之言至近,而指意深 修之一身,可謂約矣。 君子治身,必去其惡則德可進。 除草曰芸。 請以 所以自任者輕,責己薄也。 不下帶者,近在目前 孔子之言明之。定公問: 治人之田。 圃 治人,不責己而 所守至約,而 博也。 農夫治田,必除其草 君子治身, 所求于人者重 身正則物 德 責人,辟 施 也。 廣 言近 如 而 E 博 則 農 君 m

- 「鞅」,原作「映」,據四庫本改。
- 撒」,疑爲「嫐」字 四 庫本作「間」。

守約 也。 然而舜 知,力行近乎仁,知恥 「慎厥 下服 之帝王無 使臣 使臣 正 而 盡 人,此其指遠 人。」問 君 心修身者,守約 后齊家,齊家而后治國,治國 此 使 也 不偏愛人,急親 堯、舜 堯、舜之知 以 以 身,修思 臣 其指 舉鬼 知 禮 禮 知 不修 則 臣 臣 陶 周 子 遠 修 事 也 君 事君以忠。」其言可謂 湯舉 身以 萬 Ė 己 君 永。』《 也。 加 道 物,道 以 不 先王 如 也,治國治天下者,施博 盡,臣 樊 「知人。」其言 安百 治天下。 賢 之何 徧物,急先務也,堯、舜 伊尹,是亦愛人 近 中 遲問 也。 正 乎勇。 濟天下,施 庸 姓 事 ?」孔子 心而 V 急先務,急親 仁。 君以 曰 帝嚳修 泉 而 后修身,修身 知此三者,則 子 陶 忠,則 可謂近矣。 后治天下。 對 博 好 戒 近 是是 曰:「愛 日 身而 學 也。 禹 近 亦 臣 曰 賢, 古 平 天 知 道 君 君

之制 篤恭 望人,故人樂爲善。 以堯、舜之道勉己,故日進於德, 也。『檢身若不及』,此責於己者厚 於人、《書》曰『與人不求備』,此責於人者 以 子曰:"「舜人也,我亦人也。」楊雄 人。」顏子曰:「舜何人也? 予何人也?」孟 責 自 天下 行其言。』此求於人者輕也。 故君子之所守,修其身而天下平。 知 知 仲尼。」此自任者重 人 任 所 所 者必以薄。 行也,不制以己,使人有所勸 而 國 者必重,求於人者必輕,責己者必以 以 以 家 修 天下平。」修身者,治天下之大本也。 治 有 身; 人, 九 則 知 經,一 知所 孔子曰:『躬自厚 所 以 若不治己而治人,若不責 曰修身。」又曰: 「君子 以治天下國 修 也。《表記》曰:「聖人 身 成湯急於己 則 知 家矣。 以 所 勉 曰:「治己 君子所以 也。 中 而薄責於 以 愧 人 治 恥,以 八之道 凡爲 而 人, 厚, 演 緩

己而責人,猶農夫舍己之田而治人之田也。」

近,非聖賢不能也。」分明,不驚怛人不能得,然後知孟子所謂言分明,不驚怛人不能得,然後知孟子所謂言楊曰:「作文字要只說目前話,令自然

芸人之田者,不求諸己者也。」而已。君子得其本,故曰不下帶而道存焉。尹曰:「正心誠意以至於平天下,理一

「孟子日堯舜性者也」章

者也。」 過。」 也。 之理耳。 地。」又曰:「聖人無過。湯、武反之也。其 福之說,使中人以下知 始未必無過,所謂 身,踐履也。 明 又曰: 《道曰:「湯、武,反之、身之者,學 若釋氏怖 又曰:「湯、武反之也,湯、武 「經德 反,復也。 如 死 不 日月之食,乃君子之 以 所畏 口, 學道,則立 乃教上等人。 懼修省,亦自 復則至聖人之 心不 身之 而 禍 Ē 然 復

> 與別別 東京 東京 大三性之、反之,自古無人如此說,只是孟子 子三性之、反之,自古無人如此說,只是孟子 分別出來,便知得堯、舜是生而知之,湯、武 分別出來,便知得堯、舜是生而知之,湯、武 是學而能之。文王之德則似堯、舜,禹之德 是學而能之。文王之德則似堯、舜,禹之德 是學而能之。文王之德則似堯、舜,禹之德 是學而能之。文王之德則似堯、舜,禹之德 是學而能之。文王之德則似堯、舜,禹之德 是學而能之。文王之德則似堯、舜,禹之德 是學而能之。文王之德則似堯、舜,禹之德

容中道,聖人也,堯、舜是也。 者人之道也。」誠者,不勉而中,不思 反身而誠也。《中庸》曰:『誠者天之道,誠之 知之,安而 而 而 固執之者也,湯、武是也。《中庸》曰:『或 知之,或學而知之,及其知之,一也。 行之,或利而行之,及其成功,一 吕侍講曰:「性者,由仁義行也。 行之,堯、舜也。 學 誠之者,擇善而 而 知之, 到 也。」生而 ITI 反者, 得,從 或安 生

■ 「知」,原作「行」,據明抄本改。

也。 先言 俟 修 所 以 也。 也。 義 欺鬼神,不愧屋漏,所以誠意正心,非求福 之容止,皆盛 禮者,盛德之至也。 『子慟矣。』曰:『有慟乎?」哀發乎誠心,是 生者,爲禮也。 而 于外,則可以爲湯、武,可以爲堯、舜也。」 命 其 禮 以 行之, 動 ,禮樂交錯於中,發形於外,故動 堯、舜、湯、武,性之者上也,反之者次 而 在 智,君子之法也。 哭死者或以德,或以親,哭之以哀,非 干,求也。 君子正心修身,本于至誠 存 而 已矣。」君子之道必法堯、舜,故 己者,聽其 誠 不自知,此 湯、 ,不欲欺 武 德之至也 也 顔淵死,子哭之慟,從者曰 君子常一其德,不爲回 在 人,非以 非爲生者也 君子 《論語 天者。 法在 内 經,常 有 鄉黨》篇記孔子 正行爲名也。 己,命在天,君子 故曰:「行 其 爲 德 言語 也。 善 容 則 而 周 外 己, 必 口 邪 此 法 旋 有 信, 不 無 章 以 爲 禄 邪 中 其

> 也。 己。」 信, 是,則天命之至,我何 禄 成 也。 所以復其性 者安,法行于己者安,則得乎天 仁 行 行 義,德 圃 性 而 則 非 堯、舜不失其性,湯、武善反其性,及其 行法以俟命,君子也。 周 則 不回,非 吕 性也。 德出于性矣,德出于性,則 也。 旋 又曰:「法由 日 也。 中禮 : 禮,德之法也。 真德也。 有 無 故四聖人者皆爲 也。 意 意 利 而 爲生而哀 行,蘄 安 此 正行而 與哉? 行 <u>寸</u> 至于 性 命 聖人性之,君子 非 真 也 信,非真信也。 由 盛 無 亦 哀、真 真哀也。 此 者 德,由仁 意 順 法 有 出 一,復 受之 盡。 行于己 意 德 聖人 性 而 Ŧ m 直 者 如 利

而 語 死 爲之,是爲天之所爲 必 而 信 哀 謝 ,非爲生也,經德不 曰:「仁者天之理,非 非 ΙĖ 行 也,天理當 也。 一回,非 然 聖門學者 杜 而 已矣。 撰 干禄 也。 也, 當 故 然 哭

以克己爲本。克己復禮,無私心焉,則

法? 只此便是行法。 臭,如好好色,出於誠心之自然,非人爲也。 而 已,任它生死 楊曰 哭死 : 而哀,至非以正行者,言如惡惡 「到盛德田地,便只是行法俟 미 也。 若未到其 地,安能 行 命

音為然。 己,命則聽之而已,不以繫乎已也,惟能反之而至於動容周旋中禮,則至矣。 行法者在而至於動容周旋中禮,則至矣。 行法者在一尹曰:「反之者,修爲而復性也。 反之

「孟子曰說大人則藐之」章

敬,如有心去藐它人,便不是也。」一兩字,如『說大人則藐之』。 夫君子毋不一兩字,如『說大人則藐之』。 夫君子毋子毋曰:「《孟子》書中門人記録,時錯

爲多非先王之制,以道觀之,不足畏也。故呂侍講曰:「大人,謂當時之尊貴也,所

也? 孔子之所畏也。若夫無道 此食色過數,非先王之制,我得志弗爲也。 制,我得志弗爲也。 《爾雅》云:『桷謂之榱。』題,頭也。大人堂 驕,大其聲色,拒人於千里之外,晏然自以爲 之所以伸道。 在我者道耳,在彼者勢矣。 也,我心何爲畏彼人乎哉? 孟子之意,所言 義,節之以禮,和之以樂,皆古聖人所制之法 所不爲也。 在彼者居處過制,奉養非度,動静失禮,皆我 音,外作禽荒,非先王之制,我得志弗爲也。 般樂飲酒,驅 高數仞,榱題數尺,此宫室過侈,非先王之 之勢,則氣 曰:「說大人則藐之,勿視其巍 大人有道,則不嚴而尊,不動而 舒意 在我所行者,居之以仁,由之以 騁田 然則孔子曰『畏大人』,何謂 展,言語 獵,後車 食前方丈,侍妾數百人, 得 千乘,此酣 盡。 在上,以富 道與勢孰重,貌 巍然。」富貴 八尺曰仞。 威,此 貴 酒 嗜 自

感 于 所以欽之也。故曰:「我非堯舜之道不敢陳 成 乃定心定氣,條陳性命之理,道德之要,古今 將 如 主前 去矣。 悟 敗之機,國家安危之策,以 日 格 之在 其 ,故齊人莫如我敬王也。」」 天,殊 非 君子有憂世之心,欲援天下之溺 心,此孟子所謂藐之也。 不 念人心 將 離 說其大人,庶幾 而 富貴 藐之, 之勢

孟 德全盛,自然到此,不是勉强做出 也, 冕者、瞽者, 見之便作, 過之便趨。 蓋其 夫言,便誾誾 是它只管行禮,又不與你計較長短 也。」時諸國君相怎生當得它聖人恁地禮數。 《然』,猶自參較彼我,未有合一底氣象。」 子渾别。 謝 曰:「孔子曰:「事君盡禮,人以爲諂 孟子『說大人則藐之,勿視其 如 也,與下大夫言,便侃 來氣 與上大 象, 侃 如 巍 與

己之長方人之短,猶有此等氣象。若在孔楊曰:「孟子言說大人則藐之,至于以

誾 子 子方其陳說君前,不直則道不見,故藐之。 大人,孟子說大人則 近於兄也。」故孔子謂君子畏大人。」 冕者與瞽者,雖褻必以貌,如 《禮》曰: 誾 則 尹曰:「内重則外輕。」 問:「孔子畏 如也,與下大夫言, 無 此 『貴貴,爲其 也 觀《 鄉 藐之,如 黨》 近 於 侃 君 侃 篇 也 此何暇藐人? 如 何?」曰: ,與上大夫言, 3 也,以至見 敬 長, 謂 孟 其

「孟子曰養心莫善於寡欲」章

若其平居,則其胸中亦未嘗不畏且敬也。」

誠,既誠矣,又何養? 公,欲亦寡矣。」與又曰:「孟子言養心莫善於 寡欲,欲 則不惑,所欲不 差有功。」 又曰:「養心莫善於寡欲,不欲 又曰:「養心莫善於寡欲,欲皆自 伊川曰:「養心者且須是教它 寡 則 心 必 自誠。 沉 溺,只有 此已不識誠,又不 荀子言養心 所 向 便是欲。」 寡 莫善 外 欲,又

養其四體。今之人都無此,只有箇義理以養耳,采色以養其目,舞蹈以養其血脉,威儀以大於義理。 古人所養處多,若聲音以養其所以養。」 又曰:「學莫大於致知,養心莫

心,又不知求。」

性。 長,所以 焉,故雖有存焉寡矣。 欲之人,操其心而存之,無有梏亡之患,故 德之所自成也。不存焉者, 梏亡之謂也。 常寧,則定而不亂,明而不暗,道之所自生, 少欲則耳目之官不蔽於物,而心常寧矣。 欲者,感物而動也。治心之道莫善於少欲, 可以成性,可以 無節,妄作而失常,善端所由喪,而天理 有不存焉者寡矣。其爲人也多欲,則妄動 善養心者 吕侍講曰:「養者,治也。寡者,少也。 成性,失其養 ,正其思 、失性。 是故心者,性之用 而 則反道敗德,所 得其養則道進 已矣。 目欲紛麗之 以 ൬ 也, 寡 心 失 雖 虧 德 m

> 臣 繡,思文王之卑服,則身欲寡矣。寡欲如此, 色,視思明,則色欲寡矣, 明,可以通性命之理,可以達道德之奧,治天 玩物喪志。」舜與武王猶且戒之以廣聖德 逸, 罔淫於樂。」召公戒武王曰:「玩人喪德 之易染者莫如欲。 之謂與?」甚哉天下之難持者莫如心,天下 『操則存,舍則亡,出人無時,莫知其鄉,惟心 禹之菲飲食,則口欲寡矣,身欲天下之文 思聰,則聲欲寡矣,口欲天下之美味, 而心不治者,未之有也。臣 願陛下留神孟 子 伯益 寡欲之法言,則聖 戒 耳欲鄭衛之聲,聽 舜 竊聞 日:「罔 孔 子曰 一心清 游於 思夏

所欲不待沉溺也,有所向者即謂之欲。」尹曰:「臣聞之師曰:「不欲則不惑。」

下之操術,未有不由此也。」

「曾晳嗜羊棗」章

吕侍講曰:「孝子之於親,生則致其養,

者也。 孜膾 不 同 子忍食之乎? 終 而 意,思其所樂,思其所 則 諱其所同也。 不食羊 嗜也。 · 致其 炙哉? 以曾子之孝,豈不能忘口腹之欲 羊棗非天下之所共美也,曾皙 棗 哀, 也。 思其 思其平生所獨嗜者,故 夫膾炙非不美也,天下之所 猶諱名不諱姓,諱其 居 嗜。 處 曾皙嗜羊棗,而 思其笑 八語,思 所 食 其 獨 膾 而 獨 孜 曾 而 炙 嗜 志

矣。」 尹 日 : 誠孝之至 然 也。 公孫 丑之言

日

萬 章問 日孔子在陳」章

陋

堯、 狂 又曰:「孔子與點,蓋 也。」 ,皆過也 道曰: 然 特 過 而 行 猶 行 有 不 不 與聖人之志同,便見 及。 不 掩焉,是無實 掩 如 焉 琴 耳,此 一張、曾 也。」 所 皙 謂 之

伊 ,川曰:「中者只是不偏,偏則不是中。

荷

也。 庸 子只言反經,中在 只是常。 定理者,天下不易之理也,是 猶言中者是大中 其間。」 也 庸 經也。 者是定理 孟

也? 於爲 知聖人,故謂之狷也。 不 以子張所爲過中道,故亦謂之狂也。 師 辭 事雖不可見,其行與二子同 大,其言高,不合於中道,故謂之狂。子貢問 之心也。 爲,而 : 費、荷 乃 與 「踽踽,猶區 商也孰賢,子曰:「師 己者也。 吕侍講曰:「夫曾皙志不欲仕,可謂 横渠曰:「鄉 鄉 曰: 狂者,非猖 孫之徒,能不仕於亂世,而 知 原之辭 苟狥欲 不足以知聖人,故次 仲尼與之,而 區也。 也,無 原狗 而不畏人,乃 非若憤世嫉邪者,或 狂妄行之謂 執 欲 凉凉 守, 而 也過 也。 畏人,其 孟 猶 故 一,商 子以 狷者雖有 明 其 於 棲 也 棲 辭 盗 知不足以 狂 也,其 爲 不及。」 心穿 也。 也 牧皮之 耳。 妄。」又 一,何 若 所 志 遁 踰 切

道

以

辨,而 非。」似 哉? 及狂 羞。』●考其言之次第而 乎。1又曰:「南人有言曰:「人而無常,不 者、狷者,又非有常之所能及,安得不 有常者斯可矣。」有常者聖人尚欲見之,況 君子者斯 也。 邪 作 往 不欲 之道 狷也必矣。蓋二者於道,各有 說 孟子之書,至此將終,痛先王之道不行, 於 巫醫。」善夫! 子曰:『不得中 聖人之所深惡,故尤取於狂狷 來爲 子曰: 『聖人吾不得而見之矣,得見 是 河 異 中也,仁有所不盡,而 可 而 ,猶日之中,不及則未,過 行害正,故下文云:『惡似是 或 禮 非者,鄉原是也。 抱 則 善人吾不得 木 過 而 我 死,故聖 行而 不常 門 推 而 其意,則 與之,必也 不 其 而 人 入我室, 見之矣,得 德, 衆人之 知有所不 取之也。 有常之不 則 或承之 所 也。 昃。 立故 狂 取之 所 雖 而 狷 及 賢 難 可 狂 見 夫 聖 乃以 亦宜 假 空自 故以 進 原

以

故

非

自

沉

也。

面

者之語· 賢不能 之人,行何爲踽踽 言行不相顧,前所謂行不掩其言也。蓋狂 能辨也,惟孔、孟爲能辨之。 凉、《左傳》註 人之語也。 取 飾 善也 狂者爲 然。 爲德中之賊 以聖人之道,而 而 也。 志 無 故不以 在 恨 能 踽踽,說《詩》者以爲無所親 彼狂者何 非 於 凉 也。 云薄 使 是而 善, 然無所 也。 人道望之,以其不 不 也。 鄉 凉凉,此鄉原之人非斥古 斥之也。 鄉 内潛 以 皆 爲 日 原 以 爲 日 何以 如是嘐嘐然志大,其 惟 厚,蓋古人義之與 彼 希 爲 恨 欲 古人之制行, 其不人我室,蓋 世之志,衆人不 善 者, 是嘐嘐,非斥狂 則日古之人古 人 人 惟 謂 者 鄉 足責也, 己爲善, 以 原 其 爾 凉 者 外 何

踽

踽

凉

親

二「常」字,通行本《論語·子路》均

進 取進」 據四

俱下 於流 流 是爲 惟 發 善 察者 可 稱 惟 此 不 此 而 比 舉 孟 潛 以 取 者 俗 也 孟 鄉 斥 而 - , 若獨 之也。 俗,而 者 之非 之極 萌 也。 爲 古 鄉 子之藴。 原 子 而 鄉 王 道 善 人 自 也,如是 姦心以求媚於世者,則能於世皆以 孟子之弟子,惟公孫丑 獨 原 夫直 論 則可矣,閹 獨 道 鄉 道 以 孔 鄉 惟 欲求其 生斯 鄉 也。 原 行 爲不 不行 子以 原乃 欲 故問 於其 原 道 之 而之於天下,無所往 自 既 世也 之行,欲求其 情 而 然,獨以 爲德之賊,何也 與之同。 媚於世,故 風 悪 世,意以爲 不 行,豈 狀 一鄉之人皆稱以 然媚於世者,是鄉原也 俗 取 ,爲斯世 而刺之,無 也。 頹 狂者言行 能使 爲不 靡 閹者居 汙世者,王 如如 以 、萬章善問 但能使 也,善斯可 善 非 人皆以 古 水之順 可 リリリ 而 不相 继 人 刺之惡。 舉之, 爲善,不 必 爲 孟 而 暗 爲善, 顧 世之 道不 見非 不見 流 子 非 而 能 又 於 而 無 爲 是 伺

行潦 也。 明, 鄉 天 滔天,如驩兜、共工者,將即 所惡 辨也,故 心 之人,求自媚於世而得其 悅之 廉 則 同流俗合汙世而已,故汙世 而 下 原 非 潔 似 必得罪於汙世,而 而 也。 不 咸 使孔子、孟子得 也。 ,非難辨也。 堯、舜之道,仁義而已矣。 出 ,故刺之無 忠信,故非之無 能 服 於仁義也。 所見者汙 曰德之賊也。 亂 自以 孔子、孟 況乎 也。 爲 口 教化已明 是者 子道 下,若衆人皆濁 惟似是 刺之惡。 太山 志中國,静 鄉原乃 미 ·, 既 鄉 舉之 不 己於丘 行 所欲 原 而 不 習俗 非, 與之合。 四 之亂 流 於 非 取 但 罪之罰 世 故 俗之 浮 言 者,人之 狂 垤 而 非 已成 一,故 德,聖人之 一,河 者 沉 庸 而 鄉 自 廉 一衆,人 違 俯 己 非 原 辭 海 以 又 潔 n,然後 仰 獨 所 則 象 之 者 非 忠 爲 而 m 恭 闢 雖 於 是 古 似 日

吕曰:「君子反經而已矣,經正則庶民

之經正 Œ, 如舜 親 興。 兄弟之服,然后貴貴之經正,必如堯 爲賓主,湯於伊 長之經正; 親、長長、 必如王者父事三老,兄事五更,然 盡 所謂經者,百世不易之常道。 也。」 事親之道而瞽 必如國 貴貴、尊賢 尹學焉而后臣之,然后 君臣諸父兄弟,大夫 瞍 而已。 底豫,然后親親之經 正經之道,必 大經者, 饗 尊 舜 降 后 賢 迭 其 長

也。 志大 非 滋矣,故曰德之賊焉。君子則必反經 而 非 所惡 章反復辨問 ,所以非之無舉,刺之無 而可與進道,狷者有所不爲 尹 日 於鄉原者,爲其似是 「君子之取於狂 后 世 何以 明之。」 狷 刺 而 者,蓋 則其 非 而 也。 口 忽 以 與 而 似是 狂 人也 有 者 爲

孟子曰由堯舜至於湯」章

而 知之,聞 尹曰:「 而 見而 知 此 知之, 道 也。 見而知此 孟子自 謂 道 聞 孔子之 也 聞

> 者與?」 道, 而 有乎爾。 而卒不得行焉。 己。 以 雖 是 嘆 終 而 篇 不 故曰:「無 怨,豈 門 人 能 蓋 有 已 亦 巾 乎 有 哉 爾 識 則 之 傷 亦

時

無

朝 諸 老 先 生 孟 子精 義卷第 四 终

國

